



7L  
2451  
H3  
V.63  
風俗通義序

昔仲尼沒而微言闕七十子喪而大  
義乖重遭戰國約從連橫好惡殊心  
真僞紛爭故春秋分爲五詩分爲四  
易有數家之傳竝以諸子百家之言  
紛然散亂莫知所從漢興儒者競復





比誼會意爲之章句家有五六皆析  
文便辭彌以馳遠綴文之士雜襲龍  
鱗訓註說難轉相陵高積如正山可  
謂繁富者矣而至於俗間行語衆所  
共傳積非習貫莫能原察今王室大  
壞九州幅裂亂靡有定生民無幾私



懼後進益以迷昧聊以不才舉爾所知方以類聚凡一十卷謂之風俗通義言通於流俗之過謬而事該之於義理也風者天氣有寒煖地形有險易水泉有美惡草木有剛柔也俗者含血之類像之而生故言語歌謳異



聲鼓舞動作殊形或直或邪或善或  
淫也聖人作而均齊之咸歸於正聖  
人廢則還其本俗尚書天子巡狩至  
于岱宗覲諸侯見百年命大師陳詩  
以觀民風俗孝經曰移風易俗莫善  
於樂傳曰百里不同風千里不同俗



戶異政人殊服由此言之爲政之要  
辯風正俗最其上也周秦常以歲八  
月遣輜軒之使求異代方言還奏籍  
之藏於祕室及嬴氏之亡遺脫漏棄  
無見之者蜀人嚴君平有千餘言林  
閭翁孺才有梗概之法揚雄好之天



下孝廉衛卒交會周章質問以次注  
續二十七年爾乃治正凡九千字其  
所發明猶未若爾雅之閎麗也張竦  
以爲縣諸日月不刊之書予實頑闇  
無能述演豈敢比隆於斯人哉顧惟  
述作之功故聊光啓之耳昔爲齊王



畫者王問畫孰最難最易曰犬馬最難鬼魅最易犬馬旦暮在人之前不類不可類之故難鬼魅無形無形者不見故易今俗語雖云浮淺然賢愚所共咨論有似犬馬其爲難矣并綜事宜於今者孔子稱幸苟有過人必



知之俾諸明哲幸詳覽焉漢泰山太守南頓應劭撰



風俗通義目錄

皇霸卷一

三皇

五帝

三王

五伯

六國

正失卷二

樂正后



丁氏家穿井得一

封泰山禪梁父

葉令祠

燕太子

孝文帝

東方朔

淮南王安神似

王陽能鑄黃金

宋均令虎渡江



彭城相袁元服

愆禮卷三

九江太守武陵威

大將軍掾燉煌宣度

山陽太守汝南薛恭祖

宏農太守河內吳匡

河南尹太守羊翮祖

太原郝子廉

南陽張伯大



公車徵士汝南夏甫

公車徵士豫章徐孺子

過譽卷四

長沙太守汝南郅惲

司馬潁川韓稜

太原周黨

汝南陳茂

度遼將軍皇甫規

南陽五世公



江夏太守府志卷之五

十反卷五

太守國子監

陽翟令

汝南府志

東郡太守府志

安平相汝南府志

巴郡太守太山但望伯



高唐令樂安周祉

豫章太守汝南封衡

河內太守府  
周景

河內太守司  
韓演

安定太守  
南朝

宗

宗

宗

宗



蜀郡太守潁川劉勝

聲音卷六

商

角

宮

徵

羽

損

笙



鼓

管

瑟

磬

鐘

祝

琴

空侯

箏



筑

缶

笛

批把

竿

簣

簫

篪

簫



籟

菰

荻

窮通卷七

孔子

孟軻

虞卿

孟嘗君

韓信



韓安國

李廣

太尉沛國劉矩

司徒中山祝恬

司徒潁川韓演

太傅汝南陳蕃

祀典卷八

先農

社神



稷神

靈星

竈神

風伯

雨師

桃梗

葦茭

畫虎

雄雞



殺狗磔邑四門

臙

臘

祖

禩

司命

怪神卷九

世間多有見怪驚怖以自傷者

世間多有惡夢變難必效

城陽景王祠

九江逡道有唐居山名

會稽俗多淫祀

鮑君神

李君神

石賢士神

世間多有亡人魄持其家

世間亡者多有見神

世間多有狗作變怪



世間多有精物

世間多有伐木出血以爲怪者

世間多有蛇作怪者

世間人家多有見赤白光

山澤卷十

五嶽

四瀆

林

麓

京

陵

丘

墟

阜

培

藪

澤

沈



沛

湖

波

渠

溝

洫

風俗通

目錄

六

目錄終



風俗通義卷一

漢 汝南應劭著 應山陳嘉猷校

皇霸

蓋天地剖分，萬物萌毓，非有典藝之文，堅基可據，推當今以覽太古，自昭昭而本冥冥，乃欲審其事而建其論，董其是非而綜其詳矣。言也實爲難哉。故易紀三皇，書敘唐虞，惟天爲大，唯堯則之，巍巍其有成功，煥乎其有文章，自是以來，載籍昭著，然而立談者人異，綴文者家舛，斯乃楊朱哭於岐路，墨翟悲於練素。

者也是以上述三皇下記六國備其終始曰皇霸

三皇

春秋運斗樞說伏羲女媧神農是三皇也。皇者天天  
不言四時行焉百物生焉。三皇垂拱無爲設言而民  
不違道德元泊有似皇天故稱曰皇。皇者中也光也。  
宏也。含宏履中開陰陽布剛上含皇極其施光明指  
天畫地神化潛通煌煌盛美不可勝量。禮號謚記說  
伏羲祝融神農含文嘉記虛戲燧人神農伏者別也。  
變也。戲者獻也法也。伏羲始別八卦以變化天下大



下法則。咸伏貢獻。故曰伏羲也。燧人取鑽木取火。炮  
生爲熟。令人無復腹疾。有異於禽獸。遂天之意。故曰  
遂人也。神農神者信也。農者濃也。始作耒耜。教民耕  
種。美其衣食。德濃厚若神。故爲神農也。尚書大傳說。  
遂人爲遂皇。伏羲爲戲皇。神農爲農皇也。遂人以火  
紀。火太陽也。陽尊。故託遂皇於天。伏羲以人事紀。故  
託戲皇於人。蓋天非人不因。人非天不成也。神農悉  
地力。種穀疏。故託農皇於地。天地人道備而三五之  
運興矣。

謹按易稱古者伏羲氏之王天下也。仰則觀象於天。俯則觀法於地。始作八卦以通神明之德。以類萬物之情。結繩爲網罟。以佃以漁。伏羲氏沒。神農氏作。斲木爲耜。揉木爲耒。耒耜之利。以教天下。日中爲市。致天下之民。通其變。使民不倦。神而化之。使民宜之。唯獨敘二皇不及遂人。遂人功重於祝融女媧。文明大見。大傳之義斯近之矣。

五帝

易傳禮記春秋國語太史公記黃帝顓頊帝嚳帝堯



帝舜是五帝也

謹按易尚書大傳天立五帝以爲相四時施生法度  
明察春夏慶賞秋冬刑罰帝者任德設利以則象之  
言其能行天道舉錯審諦黃帝始制冠冕垂衣裳上  
棟下宇以避風雨禮文法度興事創業黃者光也厚  
也中和之色德四季與地同功故先黃以別之也顓  
者專也項者信也言其承易文之以質使天下蒙化  
皆貴貞懋也譽者考也成也言其考明法度醇美譽  
然若酒之芬香也堯者高也饒也言其隆興煥炳最

高明也。推行道德。舜者推也。循也。言其循堯緒也。

三王

禮號謚記說夏禹殷湯周武王是三王也。尚書說文王作罰刑茲無赦。詩說有命自天。命此文王。文王受命有此武功。儀刑文王。萬國作孚。春秋說王者孰謂謂文王也。

謹按易稱湯武革命。尚書武王戎車三百兩。虎賁八百人。擒紂於牧之野。惟十有三祀。王訪於箕子。詩云。亮彼武王。襲伐大商。勝殷遏劉。耆定武功。由是言之。



武王審矣。論語文王率殷之叛國以服事殷。時尚臣屬何緣便得列三王哉。經夫文王三分天下有其二。王業始兆於此耳。俗儒新生不能採綜多其辨論。至於訟閱大王王季。皆見追號。豈可復謂已王乎。禹者輔也。輔續舜後。庶績洪茂。自堯以上王者也。子孫據國而起。功德浸盛。故造美論。舜禹本以白衣砥行。顯名升爲天子。雖復更制。不知名著。故因名焉。經曰有鰥在下。曰虞舜僉曰伯禹。禹平水土是也。湯者攘也。昌也。言其攘除不軌。改亳爲商。成就王道。天下熾盛。



文武皆以其所長。夫擅國之謂王，能制割之謂王，制殺生之威之謂王，王者往也，爲天下所歸往也。

五霸

春秋說齊桓晉文秦繆宋襄楚莊，是五霸也。

謹按春秋左氏傳夏后太康，娛於耽樂，不循民事，諸侯讎差，於是昆吾氏乃爲盟主，誅不從命以尊王室。及殷之衰也，大彭氏、豕韋氏復續其緒，所謂王道廢而霸業興者也。齊桓九合一匡，率成王室，責彊楚之罪，復青茅之貢，晉文爲踐土之會，修朝聘之禮，納襄



冠帶翼戴天子。孔子稱民。到於今受其賜。又曰。齊桓  
正而不譎。晉文譎而不正。至於三國。旣無歎譽一言。  
而繆公受鄭其言。置戎而去。違黃髮之詐。而遇殺之。  
敗殺賢臣百里奚。以子車氏爲殉。詩黃鳥之所爲作。  
故諡曰繆。襄公下度德量力。慕名而不綜實。六鷁五  
石。先著其異。覆軍殘身。終爲僂笑。莊王僭號。自下摩  
上。觀兵京師。問鼎輕重。恃彊肆忿。幾亡宋國。易子析  
骸。厥禍亦巨。皆無典徵。繼絕尊事王室之功。世之紀  
事者。不詳察其本末。至書於竹帛。同之伯功。或誤後

生。豈不暗乎。伯者長也。白也。言其咸建五長功實明  
白。武曰。霸者把也。駁也。言把持天子政令。糾率同盟  
也。桓公問管仲。吾何君也。對曰。狄困於衛。復兵不救。  
須臾乃往。存之仁不純。爲霸君也。蓋三統者。天地人  
之始。道之大綱也。五行者。品物之宗也。道以三興。德  
以五成。故三皇五帝三王五伯。至道不遠。三五復反。  
譬若循連環。順鼎耳。窮則反本。終則復始也。

六國

楚之先。出自帝顓頊。其裔孫曰陸終。娶於鬼方氏。是



謂女滇蓋孕而三年不有啓其左脅三人出焉啓其  
右脅三人又出焉其六曰季連是爲芊其後有鬻熊  
子爲文王師成王舉文武勲勞而封熊繹於楚食子  
男之采其十世稱王懷王佞臣上官子簡斥遠忠臣  
屈原作離騷之賦自投汨羅水因爲張儀所欺客死  
於秦到土負芻遂爲秦所滅百姓哀之爲之語曰楚  
雖三戶亡秦必楚自顓頊至負芻六十四世凡千六  
百一十六載燕召公奭與周同姓武王滅紂封召  
公於燕成王時人據三公出爲一伯自陝以西召公

王之當農桑之時。重爲所煩勞。不舍鄉亭。止於棠樹之下。聽訟決獄。百姓各得其所。壽百九十餘。乃卒。後人思其德美。愛其樹。而不敢伐。詩甘棠之所作也。九世稱侯。八世稱公。十世稱王。到王喜爲秦所滅。燕外迫蠻貊。內笮齊晉。崎嶇疆國之間。最爲弱小。幾滅者數矣。然社稷血食者八九百載。於姬姓獨後。亡非盛德之遺烈。豈其然乎。韓之先與周同姓。武子事晉。獻公封於韓。原因以爲姓。韓厥因卜者之辭。陳成季之功。紹趙氏之孤。違陳嬰之義。爲晉名卿。寔天所相。



其四代始與趙魏俱得列爲諸侯矣。五世稱王。到王安爲秦所滅。魏之先畢公高之後也。畢公與周同姓。武王滅紂。封高於畢。因以爲姓。其裔孫曰畢萬。事晉獻公。獻公伐魏。滅之以封萬。卜偃曰。畢萬之後必大。萬盈數。魏大名也。天子曰兆民。諸侯曰萬民。今名之大以從盈數。以是有衆。不亦宜乎。其六世稱侯。侯之孫稱王。到王假爲秦所滅。趙之先與秦同祖。其裔孫曰造父。於周穆王爲御。驊騮耳之乘。西謁西王母。東滅徐偃王。日馳千里。帝念其功。賜以趙城。因



以爲姓。子叔帶始生，周事晉，其後簡子地過於諸侯。權重於晉，君簡子疾，五日不知人，大夫皆懼，呼鬻巫鵲視之。出，董安于問扁鵲曰：「血脈治也，勿怪。昔秦穆公嘗如此，七日而寤。寤之日，告公孫支與子輿曰：『我之帝所甚樂，吾所以久者，適有學也。』帝告我晉國且大亂，五世不安，其後將霸，未老而死。霸者之子，且令國男女無別。公孫支書而藏之秦策，於是出，大獻公之亂，文公之霸，而襄公之敗，秦師於殽，而歸縱淫，此子所聞，今主君之病，與之同，不出三日，病必間，有言。」



遊於鈞天，廣樂於九奏萬舞，不類三代之樂，其聲動心。有一熊欲援我，射之中熊死。有羆來，我又射之中羆死。帝甚嘉之，賜我二笥皆有副。吾見兒在帝側，屬我翟犬曰：「及汝子之壯也，以賜之。」帝告我，晉國且衰，十世而亡。嬴姓將大敗周人於范，魁之西亦不能有也。董安于受言而藏之，以扁鵲之言告簡子，賜扁鵲田四萬畝。他日簡子出，有人當道，辟之不去。從者將刃，當道者曰：「吾有欲謁於主君，從者以聞。」簡子召之。

曰。嘻。吾有所見。子晰也。當道者曰。屏左右。願有以謁。  
簡子屏人。當道者曰。主君之病。臣在帝側。簡子曰。然。  
子之見我何爲。當道者曰。帝令主君射熊羆。皆死。簡  
子曰。是且何也。當道者曰。晉國且大難。主君首之。帝  
令主滅二卿。夫熊羆皆其祖也。簡子曰。帝賜我二筭。  
皆有副何也。當道者曰。主君之子將尅二國於翟。皆  
子姓也。簡子曰。吾見兒在帝側。屬我一翟犬。曰及汝  
子之長。以賜之。夫兒何說以賜翟犬。當道者曰。兒主  
君之子也。翟犬代之先也。主君之子其必有代。及主



君之後嗣。且有革政而胡服。并二國於翟。簡子問其  
姓而延之。以官當道者曰。臣野人。致帝命耳。遂不見。  
無幾。范中行作亂。簡子滅之。此熊之効應也。簡子卒。  
無卹立。是爲襄子。智伯攻襄子。襄子奔之保晉陽。原  
過從後至。王澤見三人自帶以上不可見。與原過竹  
三節莫通。爲我以是遺趙無恤。原過旣至。以告襄子。  
齋三日。親自剖竹。有朱書曰。無恤。余霍太山陽侯大  
吏。三月丙戌。余將使汝及滅智氏。亦立我三百邑。余  
將使賜若林胡之地。至於後世。且有仇王。赤黑龍面。



鳥屬鬚眉髭髯。大膺大匈。脩下而馮上。左任介。乘奄有河室。至於休溷諸貉。南伐晉別。北滅黑姑。襄子再拜受三神之令。三國攻晉陽。歲餘乃以汾水灌其城。城不沒者三板。城中懸釜而炊。易子而食。張孟談乃夜出見韓魏。韓魏反與合謀而滅智氏。共分其地。於是趙北有代。南并知山。遂祀三神於百邑。使原過主霍太山。至武靈王。竟胡服騎射。辟地千里。到王遷信。秦反間之言。殺其良將李牧。而任趙括。遂爲所滅。此童謠曰。趙爲號。秦爲笑。以爲不信。視地上生毛。陳



完字敬仲，陳厲公之子也。初懿氏卜妻之，其繇曰：是謂鳳凰于飛，和鳴鏘鏘。有媯之後，將育于姜。五世其昌，並于正卿。八世之後，莫之與京。周史有以周易筮之，遇觀之，否曰：是謂觀國之光，利用賓于王。此其代陳有國乎？不在此，其在異國。非此，其身在其子孫。光遠而自他有耀者也。厲公爲蔡所滅，殺國內亂，完奔于齊。齊侯以爲卿，辭曰：羈旅之臣，幸若獲宥，及於寬政，赦其不閑教訓，而免諸罪戾，弛於負擔，君之惠也。所獲多矣，敢辱高位，以速官謗。詩云：翹翹車乘，招我



以弓。豈不欲往。畏我友朋。使爲工正。飲桓公酒。樂曰。以火。辭曰。臣卜其晝。未卜其夜。不敢。君子曰。酒以成禮。弗繼以淫。義也。以君成禮。弗納於淫。仁也。桓公嘉之。愛敬日新。位比高國。始食田采。姓田氏焉。六世田成。殺簡公。其三世曰和。遷康公於海上。食一城以祠太公以下。後魏文侯乃使使言周天子及諸侯。列言於周室。其孫曰威王。到王建用后勝之計。又賓客多受秦金。勸王朝秦。不修戰備。秦兵平步入臨菑。民無敢格者。遷王建於共。國人歌之曰。松耶栢耶。亡建共。



有客耶疾建用客之不詳也

謹按戰國策太史公記秦孝公據殽函之固擁雍州之地君臣戮力以窺周室有席卷天下囊括八荒之意當是之時商君佐之內立法度務耕織修守戰之備外恃猛將銳卒因間伺隙略定西河之城南并漢中西定巴蜀東割膏腴之壤收要害之郡諸侯恐懼會盟而謀不愛尊爵重寶以致天下之士當此之時齊有孟嘗趙有平原楚有春申魏有信陵夫四豪者皆明智而忠信寬厚愛人兼韓魏燕趙宋衛中山之



衆。其後復有寧越、蘇秦、杜赫之屬爲之謀。陳軫、召滑、樂毅之徒通其意。吳起、孫臏、廉頗之屬制其兵。嘗以十倍之地，百萬之軍，攻秦。秦人開關延敵，六國之師遁逃而不敢進。秦無一矢遺鏃之費，而關東已困。於是從散約，敗爭割地而略秦。秦有餘力而制其弊，及秦始皇承六世之遺烈，抗長策而御宇內，吞二周而叱諸侯，履至尊而制六合，兼帝皇而威四海。于時議者恨楚之疏遠，屈原、魏不用，公子無忌，故國削以至於亡。秦因愚弱之極，運震電之蕭條，混壹海內，爲漢



驅除蓋乘天之所壞誰能支之雖阿衡宰政賁育馭  
戎何益於事且有彊兵良謀繼襲繼踵每輒挫切亦  
足以祛蔽啓蒙矣始皇自以關中之固金城千里子  
孫帝王萬世之業也遂恣睢舊習矯任其私知坑儒  
燔書以愚其黔首窮奢肆欲力役無饜毒流諸夏亂  
延蠻貊由是二世絕祀以成大漢之資高祖踐祚四  
海乂安世宗懷夷境崇演禮學制度文章冠於百王  
矣。

序作通

卷一

十三



風俗通義卷二

正失

孔子曰。衆善焉。必察之。衆惡焉。必察之。孟軻云。堯舜  
不勝其美。桀紂不勝其惡。傳言失指。圖景失形。衆口  
鑠金。積毀消骨。久矣其患之也。是故樂正后夔有一  
足之論。晉師已亥渡河有三豕之文。非夫大聖至明  
孰能原析之乎。論語名不正則言不順。易稱失之毫  
釐。差以千里。故糾其謬曰正失也。

樂正后夔一足

俗說夔一足而用精專故能調暢於音樂

謹按呂氏春秋魯哀公問於孔子樂正夔一足信乎孔子曰昔者舜以夔爲樂正始治六律和均五聲以通八風而天下服重黎又薦能爲音者舜曰夫樂天地之精得失之節故唯聖人爲能和樂之本夔能和平天下若夔一足矣故曰夔一足非一足行之

丁氏家穿井得一人

俗說丁氏家穿井得一人於井中也

謹按呂氏春秋宋丁氏無井常一人溉汲於外及自



穿井喜而告之。吾穿井得一人。傳之聞於宋君。公問其故。對曰。得一人之使。非得一人於井中也。

### 封泰山禪梁父

俗說岱宗上有金篋玉策。能知人年壽脩短。武帝探策得十八。因讀曰八十。其後果用耆長。武帝出璽印石。裁有兆。朕奉車子侯卽沒。其印乃止。武帝畏惡。亦殺去之。封禪書說黃帝升封泰山。於是有龍垂鬚髯。下迎黃帝。黃帝上騎。羣臣後宮從者七十餘人。小臣獨不得上。乃悉持龍髯。拔墮黃帝之弓。小臣百姓仰



望黃帝不能復。乃抱其弓而號。故後世因曰烏號弓。  
孝武皇帝時。齊人公孫卿言。漢之聖者。在高祖之孫。  
今歷正值黃帝之日。聖主亦當上封。則能神仙矣。  
謹按尚書禮。天子巡狩。歲二月。至於岱宗。孔子稱封  
泰山。禪梁父。可得而數七十有二。蓋王者受命易姓。  
改制。應天下太平功成。封禪以告平也。所以必於岱  
宗者。長萬物之宗。陰陽交代。觸石而出。膚寸而合。不  
崇朝而徧天下。唯泰山乎。封者立石高一丈二尺。尅  
之曰事天。以禮立身。以義事父。以孝成名。以仁四守。



之內莫不爲郡縣四夷八蠻咸來貢職與天下無極  
人民蕃息天祿永得祭上元尊而俎生魚壇廣十二  
丈高三尺階三等必於其上示增高也尅石紀號著  
已績也。或曰金泥銀繩印之璽下禪梁父禮祠地主  
去事之殺示增廣也。禪謂壇墀當有所與也。三皇禪  
於繹繹明已功成而去德者居之繹繹者無所指斥  
也。五帝禪於亭亭德不及於皇亭亭名山其身禪予  
聖人三王禪於梁父者信父者子言父子相信與也  
孝武皇帝封廣丈二尺高九尺其下有玉牒書秘書



江淮間一茅三脊爲神藉。五色土益雜封。縱遠方奇獸飛禽。及白雉加祠。兕牛犀象之屬。其享曰。天增授皇帝。泰元神筴。周而復始。皇帝敬拜泰靈。其夜有光如流星。晝有白雲起封中。於是作明堂汶上。令諸侯各治邸。車駕前後五至祠。以元鼎六年告封。改爲元封。武帝已年四十七矣。何緣反更得十八也。就若所云。明神禍福。必有徵應。權時倒讀焉。能誕招期乎。奉車子侯驂乘上下臣。不預封事。何因操印沒石乃止。暴病而死。悼愴無已。又言武帝與仙人對博。碁沒石。



中馬蹄迹處于今尚存虛妄若此非一事也予以空  
僞承乏東嶽忝素六載數聘祈祠咨問長老賢通上  
泰山者云謂璽處尅石文昧難知也殊無有金篋玉  
牒探籌之事春秋以爲傳聞不如親見見之人斯爲  
審矣傳曰五帝聖焉死三王仁焉死五伯智焉死其  
隕落崩薨之日不能咸至百年詩云三后在天論語  
曰古皆沒太史記黃帝葬於橋山騎龍升天豈不怪  
乎烏號弓者柘桑之林枝條暢茂烏登其上下垂著  
地烏適飛去後從撥殺取以爲弓因名烏號耳



葉令祠

俗說孝明帝時尚書郎河東王喬遷爲葉令。喬有神術。每月朔常詣臺朝。帝怪其數而無車騎。密令太史候望。言其臨至時。常有雙鳧從南飛來。因伏伺見鳧。舉羅但得一雙鳧耳。使尚方識視。四年中所賜尚書官屬履也。每當朝時。葉門鼓不擊。自鳴聞於京師。後天下一玉棺於廳事前。令臣吏試入。終不動搖。喬曰。天帝獨欲召我。沐浴服飾寢其中。蓋便立覆。宿夜葬於城東。土自成墳。縣中牛皆流汗吐舌。而人無知者。



號葉君祠。牧子班錄皆先謁拜。吏民祈禱無不如意。若有違犯立得禍。明帝迎取其鼓置都亭下。略無音聲。但云葉太史候望在上西門。上遂以占星辰省察氣祥。言此冷卽僊人王喬者也。

謹按春秋左氏傳。葉公子高。姓沈。名諸梁。古者令曰公。忠於社稷。惠恤萬民。方城之外。莫不欣戴。白公勝作亂。子西子期劫惠王以兵。葉公自葉而入。至於北門。或遇之曰。君胡不胄。國人望君如望慈父母焉。盜賊之矢。若傷君。是絕民望也。若之何不胄。乃胄而進。



又遇一人曰。何爲胄。國人望君如望歲焉。日日以幾。若見君面。是得艾也。人知不死。其亦無有奮心。猶將旌君以徇於國。而又掩面以絕民望。不亦甚乎。乃免胄而進之。與國人攻白公。奔山而縊。生烹石乞。迎反惠王。整肅官司。退而老於葉。及其終也。葉人追思而立祠。功施於民。以勞定國。兼茲二事。固祠典之所先也。此乃春秋之時。何有近孝明乎。周書稱靈王太子晉。幼有盛德。聰明博達。師曠與言。弗能尚也。晉年十五。顧而問曰。吾聞大師能知人年之短長也。師曠對



曰女色赤白女聲清女色不壽。晉曰然。吾後三年將  
上賓於天。女慎。無言。禍將及女。其後太子果死。孔子  
聞之曰。惜夫。殺吾君也。後世以其自豫知其死。傳稱  
王子喬仙。或人問仙。楊雄以爲虛。羲神農黃帝堯舜  
殞落。文王葬畢。孔子葬魯城之北。獨不愛其死乎。知  
非人之所能也。生乎生乎。吾恐名生而實死也。國家  
畏天之威。思求譴告。故於上西門城上。候望近太史  
寺。令丞躬親靈臺。位國之陽之安別在宮中。懼有得  
失。故參之也。何有伺一飛鳧。遂建其處乎。世之矯誣。



豈一事哉

燕太子丹天爲雨粟，烏白頭，馬生角，厨人生害足，井上株木跳度瀆。

俗說燕太子丹爲質於秦，始皇執欲殺之，言能致此瑞者，可得生活。丹有神靈，天爲感應，於是遣使歸國。謹按太史記燕太子丹與秦始皇遇之，益不善。丹恐而亡歸，歸求勇士荆軻、秦武陽，函樊於期之首，貢督亢之地圖。秦王大悅，禮而見之。變起兩楹之間，事敗而荆軻立死。始皇大怒，乃益發兵伐燕，燕王走保遼。



東使使斬丹以謝秦。燕亦遂滅。丹畏死逃歸耳。自爲其父所戮。手足圯絕。安在其能使兩粟其餘云云乎。原其所以有茲語者。丹實好士。無所愛恡也。故閭閻小論飭成之耳。

### 孝文帝

孝成皇帝好詩書。通覽古今。間習朝廷儀體。尤善漢家法度。故事常見中壘校尉劉向。以世俗多傳道孝文皇帝。小生於軍。及長大有識。不知父所在。日祭於代東門外。高帝數夢見一兒。祭已使使至代求之。果

得文帝立爲代王。及後徵到後期不得立。日爲再中。及卽位爲天子。躬自節儉。集上書囊以爲前殿帷常。居明光宮聽政。爲皇太薄后持三年服。廬居枕塊。如禮。至以發大病。知後子不能行三年之喪。更制三十。六日服。治天下致升平。斷獄三百人。粟升一錢。有此。事不同。對曰皆不然。

謹按漢高三年。魏王豹叛。漢附楚。漢使大將韓信擊。虜豹姬薄夫人。傳詣雒陽織室。漢王見薄姬內後宮。幸之主文帝二年。而爲王者子。常居宮闕內。不棄捐。



軍中祭代東門高皇后八年後九月巳酉夕卽位就  
未央幸前殿下赦令卽位時以昏夜日不再中文帝  
雖節儉未央前殿至奢雕文五采畫華懷壁璫軒檻  
皆飾以黃金其勢不可以書囊爲帷奢儉好醜不相  
副侔又文帝以後元年六月巳亥崩未央宮在時平  
常聽政宣室不居明光宮及皇太薄后以孝景二年  
四月壬子薨葬南陵文帝先太后崩不爲皇太薄后  
持三年服文帝遵漢家基業初定重承軍旅之後百  
姓新免於干戈之難故文帝宜因修泰餘政教輕刑



事少與之休息。以儉約節欲。自持初開籍田。躬勸農  
耕。桑務民之本。卽位十餘年。時五穀豐熟。百姓足。倉  
廩實。蓄積有餘。然文帝本脩黃老之言。不甚好儒術。  
其治尚清淨無爲。以故禮樂庠序未脩。民俗未能大  
化。苟溫飽完給。所謂治安之國也。其後匈奴數犯塞。  
侵擾邊境。單于深入寇掠。賊害北地都尉。殺略吏民。  
係虜老弱。驅畜產。燒積聚。候騎至北泉。烽火通長安。  
京師震動。無不憂懣。是時大發興材官騎士十餘萬。  
軍長安。帝遣丞相灌嬰擊匈奴。文帝自勞兵。至太原。



代郡由是北邊置屯待戰。設備胡兵連不解。轉輸  
絡繹。費損虛耗。因以年歲穀不登。百姓饑乏。穀糴常  
至石五百。時不升一錢。前待詔賈捐之爲孝元皇帝  
言。太宗時民賦四十。斷獄四百餘。案太宗時民重犯  
法。治理不能過中宗之世。地節元年天下斷獄四萬  
七千餘人。如捐之言。復不類。前世斷獄皆以萬數。不  
三百人。文帝卽位二十三年。日月薄蝕。地數震動。毀  
壞民廬舍。關東二十九山同日崩潰。水出河決酸棗。  
大風壞都。雨雹如桃李。深者厚三尺。狗馬及人皆生

角大雪蝗蟲。文帝下詔書曰。間者陰陽不調。日月薄蝕。年穀不登。大遭旱蝗。饑饉之害。謫見天地。災及萬民。丞相御史議可以助百姓之急。推此事類。似不及太宗之世。不可以爲升平。上曰。吾於臨朝統政。施號令何如。向未及對。上謂向校尉。帝師傅耆舊。洽聞親事先帝。歷見三世得失。事無善惡。如聞知之。其言勿有所隱。向曰。文帝時政頗遺失。皆所謂悔愆小疵耶。嘗輦過郎署。問中郎馮唐。以趙將廉頗馬服唐言。今雖有此人。不能用也。推輦而去。還歸禁中。召責讓唐。



頓首陳言。聞之於祖父。道廉頗。李牧。爲邊將。市租諸  
入皆輸幕府。而趙王不問多少。日擊牛灑酒。勞賜士  
大夫。賞異有故。能立威名。今臣竊聞雲中太守魏尚。  
邊之良將也。匈奴常犯塞爲寇。尚追之。吏士爭居前。  
樂盡死力。斬首上功。誤差數級。下之吏。尚竟抵罪。由  
是言之。雖得廉頗。李牧。不能用也。及河東太守季布。  
治郡有聲。召欲以爲御史大夫。左右或毀言使酒。後  
不用。布見辭去。自陳曰。臣幸得待罪河東。無故而見  
徵召。此人必以臣欺國者。旣到無用。此人亦有以毀



傷臣者。今以一人言則進之。以一人言則退之。臣恐天下有以見朝廷短也。上有慙色。卒遣布之官。及太中大夫鄧通。以佞幸吮癰瘍。瘰癧汁見愛。擬於至親。賜以蜀郡銅山。令得鑄錢。通私家之富。侔於王者。封君又爲微行。數幸通家。文帝代服衣。蜀襲氊帽。騎駿馬。從侍中近臣常侍期門武騎。獵漸臺下。馳射狐兔。畢雉刺彘。是時待詔賈山諫。以爲不宜數從郡國賢良吏出遊獵。重令此人負名不稱其與。及太中大夫賈誼亦數陳止遊獵。是時誼與鄧通俱侍中同位。誼又



惡通爲人數廷譏之。由是疏遠。遷爲長沙太傅。旣之  
官內不自得。及渡湘水。投吊書曰。闕茸尊顯。佞諛得  
意。以哀屈原。離讒邪之咎。亦因自傷。爲鄧通等所愬  
也。成帝曰。其治天下。孰與孝宣皇帝。向曰。中宗之世。  
政教明。法令行。邊境安。四夷親。單于款塞。天下殷富。  
百姓康樂。其治過於太宗之時。亦以遭遇匈奴賓服。  
四夷和親也。上曰。後世皆言文帝治天下。幾至太平。  
其德比周成王。此語何從生。向對曰。生於言事。文帝。  
禮。言。事。者。不。傷。其。意。羣。臣。無。小。大。至。卽。便。從。容。言。上。



止輦聽之。其言可者稱善。不可者喜笑而已。言事多  
褒之後。人見遺文。則以爲然。世之毀譽。莫能得實。審  
形者少。隨聲者多。或至以無爲有。故曰堯舜不勝其  
善。桀紂不勝其惡。桀紂非殺父與君也。而世有殺君  
父者。人皆無道。如桀紂。此不勝其惡。故若文帝之仁  
賢。不勝其善。世俗褒揚。言其德比成王。治幾太平也。  
然文帝之節儉約身。以率先天下。忍容言者。含咽臣  
子之短。此亦通人難及。似出於孝宣皇帝者也。如其  
聰明遠識。不怠數十年事。制持萬幾。天資治理之材。



恐文帝亦且不及孝宣皇帝。向以爲如此。及至世間言文帝小生於軍中。長大祭代東門外。使者求得之。因立爲代王。徵當卽位。後期日爲之再中。集上書囊以爲前殿帷。常居光明宮聽政。爲薄太后持三年服。治天下致升平。斷獄三百人粟一升一錢。凡此十餘事。皆俗人所妄傳言過其實。及傳會或以爲前皆非。是如劉向言。

東方朔

俗言東方朔。太白星精。黃帝時爲風后。堯時爲務成。



子周時爲老聃。在越爲范蠡。在齊爲鴟夷子皮。言其神聖能興王霸之業。變化無常。

謹按漢書東方朔平原人也。孝武皇帝時。招延賢良文學之士。待以不次之位。故四方多上書言得失。自銜鬻者。於是朔詣闕自陳。十二失父。長養兄嫂。年十三學書。十四擊劍。十六誦詩。十九習孫吳兵法。又常服子路之言。臣朔年二十三。長九尺三寸。目若懸珠。齒若編貝。勇若孟賁。捷若慶忌。廉如鮑叔。信若尾生。若此。可以爲天子大臣矣。朔文辭不遜。高自稱譽。由



是見偉稍益親幸。官至太中大夫。倡優畜之不豫國政。劉向少時數問長老賢通於事。及朔時人皆云朔口諧倡辯。不能持論。喜爲凡庸誦說。故今後世多傳聞者。而揚雄亦以爲朔言不純。師行不純。德其流風遺書蔑如也。然朔所以名過其實。以其恢誕多端。不名一行。應諧似優。不窮似智。正諫似直。穢德似隱。非夷齊。是柳惠。其滑稽之雄乎。朔之逢古射覆。其事浮淺。行於衆僮兒牧豎。莫不眩耀而後之。好事者因取奇言怪語附著之耳。安在能神聖歷世爲輔佐哉。



淮南王安神仙

俗說淮南王安招致賓客方術之士數千人作鴻賓苑秘枕中之書鑄成黃白白日升天

謹按漢書淮南王安天資辨博善爲文辭孝武以屬諸父甚尊之招募方伎怪迂之人述神仙黃白之事財殫力屈無能成獲乃謀叛逆尅皇帝璽丞相將軍大夫已下印漢使符節法冠趙王彭祖列侯讓等議曰安廢法行邪僻詐僞心以亂天下營惑百姓背叛宗廟春秋無將將而必誅安罪重於將反形已定圖



書印及他逆無道事驗明白。丞相宏廷尉湯以聞。上使宗正以符節治王安自殺。太子諸所與謀皆取夷國除爲九江郡。親伏白刃。與衆棄之。安在其能神仙乎。安所養士或頗漏亡。耻其如此。因飾詐說。後人吠聲遂傳形耳。

### 王陽能鑄黃金

漢書曰。說王陽雖儒生。自寒賤。然好車馬衣服。極爲鮮好。而無金銀文繡之物。及遷徙去處。所載不過囊衣。不蓄積餘財。去位家居。亦布衣蔬食。天下服其廉。



而怪其奢，故俗傳王陽能作黃金。

謹按太史記秦始皇欺於徐市之屬，求三山於海中，求神仙隱形體，自謂想蓬萊而不免沙丘之禍。孝武皇帝，茲益迷謬，文成五利，處之不疑，妻以公主，賜以甲第，家累萬金，身佩四印，辭窮情得，亦旋梟裂。淮南王安，銳精黃白，庶幾輕舉，卒離親伏白刃之罪。劉向得其遺文，奇而獻之成帝，令典尚方鑄作，事費甚多。而方不驗，効向大辟繫須冬獄。兄陽成侯乞入國半，故得減死。秦漢以天子之貴，四海之富，淮南竭一國。



之貢稅向假尚方之饒。然不能有成者。夫物之變化。固自有極。王陽何人。獨能乎哉。語曰。金不可作。世不可度。王陽居官食祿。雖爲鮮明。車馬衣服。亦能幾所。何足怪之。乃傳俗說。班固之論。陋於是矣。

### 宋均令虎渡江

九江多虎。百姓苦之。前將募民捕取。武吏以除賦課。郡境界皆設陷穽。後太守宋均到。乃移記屬縣曰。夫虎豹在山。鼯鼯在淵。物性之所託。故江淮之間有猛獸。猶江北之有鷄豚。今數爲民害者。咎在貪殘居職。



使然而反逐捕。非政之本也。壞檻穽。勿復課錄。退貪殘。進忠良。後虎悉東渡江。不爲民害。

謹按尚書。武王戎車三百兩。虎賁三千人。擒紂於牧野。言猛怒如虎之奔赴也。詩美南仲闕如哮虎。易稱大人虎變其文炳。君子豹變其文蔚。傳曰。山有猛虎。草木茂長。故天之所生。備物致用。非以傷人也。然時爲害者。乃其政使然也。今均思求其政。舉清黜濁。明報應。宜不爲災。江渡七里。上下隨流。近有二十餘虎。山栖穴處。毛鬣豈能犯陽侯。凌濤瀨而橫厲哉。俚



語狐欲渡河。無奈尾何舟人楫櫂。猶尚畏怖。不敢迎上。與之周旋。云悉東渡。誰指見者。堯舜欽明在上。稷契允懿於下。當此時也。寧復有虎耶。若均登據三事。德被四海。虎豈可抱負相隨。乃至鬼方絕域之地乎。

彭城相袁元服

俗說元服父字伯楚。爲光祿卿。於服中生此子。時年長矣。不孝莫大於無後。故收舉之。君子不隱其過。因以服爲字。

謹按元服名賀。汝南人也。祖父名原。爲侍中。安帝始



加元服，百官會賀。臨嚴垂出而孫適生，喜其嘉會，因名曰賀，字元服。原父安爲司徒，忠蹇匪躬，盡誠事國，啓發和帝，誅討竇氏，中興以來最爲名宰。原有堂構之稱，矜於法度。伯楚名彭，清擬夷叔，政則冉季，歷典三郡，致位上列。賀早失母，不復繼室，云曾子失妻而不娶，曰：「吾不及尹吉甫，子不如伯奇。」以吉甫之賢，伯奇之孝，尚有放逐之敗，我何人哉？及臨病困，勅使留葬侍衛先公，慎無迎取。汝母喪柩，如亡者，有知往來不難如其無知，祇爲煩耳。虞舜葬於蒼梧，二妃不從。



經典明文勿違吾志。清高舉動皆此類也。何其在服  
中生子而名之賀者乎。雖至愚人猶不云耳。予爲蕭  
令。周旋謁辭。故司空宣伯應賢。相把臂言。易稱天地  
大德曰生。今俗間多有禁忌。生三子者。五月生者。以  
爲妨害父母。服中子犯禮傷孝。莫肯收舉。袁元服功  
德爵位。子孫巍巍。仁君所見。越王勾踐。民生三子。與  
乳母孟嘗君對其父。若不受命於天。何不高戶。誰能  
及者。夫學問貴能行。君體博雅。政宜有異乎。答曰。齊  
楚之事。敬聞命矣。至於元服。其事如此。明公旣爲鄉

里超然遠覽，何爲過聆晉語，簡在心事乎？於是欣然  
悅服，續以大言，苟有過人，必知之。我能勝仲尼哉？元  
服子夏甫，前後徵命，終不降志。亞作者之遺風矣。正  
甫亦有重名，今見沛相，載德五世，而被斯言之玷，恐  
多有宣公之論，故備記其終始。



風俗通義卷三

愆禮

夫聖人之制禮也。事有其制。曲有其防。爲其可傳。爲其可繼。賢者俯就。不肖跂及。是故子張過而子夏不及。然則無愈。子路喪姊。暮而不除。仲尼以爲大譏。況於忍能矯情直意而已也哉。詩云。不愆不忘。率由舊章。論語不爲禮無以立。故注近世苟妄曰愆禮也。

九江太守武陵威生不識母。常自悲感。游學京師。還於陵谷中。見一老母。年六十餘。因就問母。



姓爲何曰陳家女李氏何故獨行曰我孤獨欲  
依親家子威再拜長跪自白曰子威少失慈母  
姓陳舅氏亦李又母與亡親同年會遇於此乃  
天意也因載歸家供養以爲母

謹按禮繼母如母慈母如母謂繼父之室慈愛已皆  
有母道故事之如母也何有道路之人而定省世間  
共傳丁蘭刻木而事之今此之事豈不是似如仁人  
惻隱哀其無歸直可收養無事正母之號耳

大將軍掾燉煌宣度爲師大常張文明制杖



謹按禮記孔子之喪門人疑所服子貢曰昔夫子之  
喪顏淵若喪子而無服至子路亦然請喪夫子如父  
而無服羣居則否今人乃爲制杖同之於父論者旣  
不匡糾而云觀過知仁謂心之哀惻終始一者也凡  
今杖者皆在權戚之門至有家遭濟衰同生之痛俯  
伏墳墓而不歸來真不愛其親而愛他人者也無他  
也庶福報耳凡庸小生夫何譏稱然宜度涼州知名  
士吾是以云耳

山陽大守汝南薛恭祖喪其妻不哭臨殯於棺

上大言自同恩好四十餘年。服食祿賜男女成人。幸不爲夭。夫復何恨哉。今相及也。

謹按禮爲適妻杖重於宗也。妻者既齊於已。澄灑酒以養姑舅。契濶中饋。經理蠶織。垂統傳重。其爲恩篤勤至矣。且鳥獸之微。尚有回翔之思。啁噍之痛。何有死喪之感。終始永絕。而曾無惻容。尙當內崩傷外。自矜飭此爲矯情僞之至也。俚語婦死腹悲。唯身知之。又言妻非禮所與。此何禮也。豈不悖哉。大尉山陽王龔與諸子並杖。太傅汝南陳蕃袁隗皆制衰經。列在



服位躬入隧哀以送之。近得禮中王過矣。

諸子魏杖亦

宏農太守河內吳匡伯康少服

事號爲敏達

爲侍御史與長樂少府黃瓊共

清河王事文

書印成甚嘉異之後匡去濟南

瓊爲司空比

比援舉起家拜尚書遷宏農班

勸耕道於澠

池聞瓊薨卽發喪制服上病載

車還府

謹按春秋大夫出使聞父母之喪徐

而不反君追

還之禮也匡雖爲瓊所援舉由郡縣

曹州治中兵



曹位朝廷尙書也。凡所按選，豈得復爲君臣者耶？今  
匡與瓊其是矣。剖符守境，勸民耕桑，肆省冤疑，和解  
讐怨，國之大事，所當勤恤，而顧私恩，傲狠自遂，若宮  
車宴駕，何以過茲？論者不深察而歸之厚，多有是言。  
及其人患失而亦曰其然。司空袁周陽舉荀慈明有  
道，太尉鄧伯條舉訾孟直方正，二公薨，皆制齊衰，世  
非一然。荀訾通儒於義足責，或舉者名位斥落，子孫  
無繼，多不親至，何乃衰乎？過與不及，古人同稱吊服  
之制，斯近之矣。



河南尹太山羊翮祖在家平原相封子衡葬母  
子衡故臨太山數十日時翮祖上河南矣子衡  
四從子舅慈復爲太山士大夫用此行者數百  
人皆齊衰經帶時與太尉府自劾歸家故侍御  
史胡毋季皮獨過相候求欲作衰謂君不爲子  
衡作吏何制服曰衆人若此不可獨否又謂足  
下徑行自可今反相靡令子失禮僕豫愆古有  
吊服可依其制因爲裁縞冠幘袍單衣定大爲  
同作所非然潁川有識陳元方韓元長綦母廣

明咸嘉是焉

謹按禮爲舊君齊衰三月。謂策名委質爲臣使者也。子衡臨郡日淺。無他功惠。又非其身。嗣祖位則亞卿。雅有令稱。義當綱紀人倫。爲之節文。而首倡導犯禮違制。使東嶽一郡朦朧焉。豈不愍哉。由邠人失兄子。臯爲之衰。雖失於子衡。歸於舅慈者矣。

太原郝子廉。饑不得食。寒不得衣。一介不取。詣人。曾過姊飯。畱十五錢。默置席下。去。每行飲水。

常投一錢井中。



謹按易稱天地交萬物生人道交功勳成語願事君  
衣輕裘與朋友共敝之而無憾士相見之禮費用牖  
雉受而不拒而交答焉唯祭飯然後拜之孔子食於  
施氏未嘗不飽何有同生之家而顧錢者哉傷恩薄  
禮弊之至也孟軻譏仲子吐鴟鴞之羹而食井上苦  
李鮑焦耕田而食穿井而飲非妻所織不衣餓於山  
中食棗或問之此棗子所種耶遂嘔吐立枯而死世  
不乏異惟其似旃孔子疾時貪昧退思狷狷者有  
所不爲亦其介也



南陽張伯大，鄧子敬小伯大三年，以兄禮事之。伯大臥床上，敬寢下小榻，言常恐清旦朝拜俱去。鄉里居緱氏城中，亦教授，坐養聲價。伯大爲議郎，益州太守，子敬辟司徒公車徵。

謹按禮記十年兄事之，五年肩隨之，詩云如切如磋，如琢如磨，朋友衎衎，閭閻各長其儀也。凡兄弟相愛，尚同輿而出，同床而寢，今相校三年耳。幸無骨肉之屬，坐作鬼怪。旦朝言恐，論語恭而無禮，則勞且晏，平仲稱善與人交，豈徒拜伏而已哉。易設四科，出處語。



默傳曰朝廷之人入而不能出山林之民往而不能  
反二者各有所長而棄聖絕知遯世保真當竄深山  
樂天知命今居緱氏息偃城郭往來帝都招延賓客  
無益誨人拱默而已飾虛矜僞誑世耀名辭細卽巨  
終爲利動春秋譏宋伯姬女而不婦今二子屑屑遠  
大矣矣。

公車徵士汝南夏甫少舉孝廉爲司徒掾人間  
之事無所關也其後閉戶塞牖不見賓客清旦  
東向再拜朝其母念時時往就之子亦不得見



復踰拜耳。頭不著巾。身無單衣。足常木屨。食止  
塲菜。云我無益家事。莫之能彊。及母終亡。不列  
服位。

謹按孝經。生事愛敬。死事哀感。一家之中。踰若異域。  
下牀闢拜。遠於愛敬者矣。祖載崩隧。又不得送。遠於  
哀感者矣。巾所以飾首衣。所以蔽形。此乃士君子所  
以自別於夷狄者也。唯喪者訟者。露首草舍。餘曷有  
哉。長沮丈人。避世之士。猶止子路殺雞黍見其子焉。  
何有藏一室中。不出戶庭。以此爲高。斯亦婞婞鯁趨。



而過庭聞詩聞禮而陳亢喜於得三不當近之何乃  
若茲者乎

公車徵士豫章徐孺子比爲太尉黃瓊所辟禮  
文有加孺子隱者初不答命瓊薨旣葬負笥舁  
涉齋一盤酸哭於墳前孫子琰故五官中郎將  
以長孫制杖聞有哭者不知其誰亦於倚廬哀  
泣而已孺子無有謁刺事訖便去子琰大怪其  
故遣瓊門生茅季瑋追請辭謝終不肯還

謹按禮凡追喪者旣哭興踊進問其故哀之至也孺



子所以經三千里越渡山川而親至者。非徒徇於已。  
顧義報乎。哭醢墳前是也。訖當卽其帳。衾問勞子琰。  
子琰宿有善名。在禮無違。儻見微闕。教誨可乎。如何。  
儵忽甚於路人。昔黥傲忽於嗟來。然君子猶以爲其。  
嗟可去。謝可食。今與黃有恩。故矣。孝子寢伏苦塊。又。  
孺子到便詣墳。無介夫何爲哉。



風俗通義卷四

過譽

孔子稱大哉中庸之爲德其至已乎又曰君子之道忠恕而已至於許以爲直隱以爲義枉以爲厚僞以爲名此衆人之所致譽而明主之所必討蓋觀過知仁謂中心篤誠而無妨於化者故覆其違理曰過譽也

長沙太守汝南郅惲君章少時爲郡功曹郡俗冬饗百里內縣皆齎牛酒到府宴飲時太守司

徒歐陽欽臨饗禮訖教曰西部督郵繇延天資  
忠貞稟性公方典部折衝摧破姦雄不嚴而治  
書曰安民則惠黎民懷之蓋舉善以教則不能  
者勸今與諸儒共論延功顯之于朝主簿讀教  
戶吏引延受賜恆前跪曰司正舉觥以君之罪  
告謝于天明府有言而誤不可覆掩按延資性  
貪邪外方內圓朋黨構姦罔上害民所在荒亂  
虛而不治怨慝並作百姓苦之而明府以惡爲  
善股肱莫爭此旣無君又復無臣君臣俱喪孰



與偏有君雖傾危臣子扶持不至於亡。惲敢再拜奉觥。歎甚慙。

謹按禮諫有五。風爲上。狷爲下。故入則造膝。出則詭辭。善則稱君。過則稱已。暴諫露言。罪之大者。而歎於饗中。用延爲吏。以紫亂朱。大妨王命。造次顛沛。不及諷諭。雖舉觥。彊歎可行也。今惲久見授任。職在昭德。塞違。爲官擇人。知延合邪罔上。害民所在。荒亂怨慝。並作。此爲惡積愆。非一旦一夕之漸也。孔子以匹夫朋徒無幾。習射矍相之圃。三哲而去者過半。汝南中



土大郡。方城四十。養老復敬化之至。延姦疊彰著。無與比崇。臧文仲有言。見無禮於君者。若鷹鷂之逐鳥雀。農夫之務去草也。何敢宿留。不卽彈黜姦佞。而須於萬人之中。乃暴引之。是爲陷君。君子不臨深以爲高。不因少以爲多。況創病君父以爲已功者哉。而論者苟眩虛聲。以爲美談。汝南楚之界也。其俗急疾。有氣決然。自君章之後。轉相放式。好干上怵。伎以采名譽。未流論起於愛憎。政在陪隸也。

司空潁川韓稜。少時爲郡主簿。太守興被風病。



恍忽誤亂稜陰扶輔其政出入二年署置教令  
無愆失興子嘗出教欲轉徙吏稜執不聽由是  
發露被考興免官稜坐禁固章帝卽位一切原  
除也

謹按易稱守位以仁尚書無曠庶官詩云彼君子不  
素餐兮論語陳力就列不能者止漢典史病百日應  
免所以卹民急病懲俗逋慝也今興官尊任重經略  
千里當聽訟侍祠班詔勸課早朝盱食夕惕若厲不  
以榮祿爲樂而以黔首爲憂位過招殃靈督其豐風



疾恍忽有加無瘳。稜統機括。知其虛實。當聽上病以  
禮選引。何有上欺天子。中誣方伯。下誑史民。扶輔耄  
亂。政自已出。雖幸無闕。罪已不容於誅矣。爲人謀而  
不忠。愛人而以姑息。凡人不可。沉於君子乎。上令與  
負貪昧之罪。子被署用之愆。章問洵赫。父子湮沒。執  
事如此。謂禮義何。稜宜禁固終身。中原非是。

太原周黨伯況。少爲卿佐。發黨過於人中。辱之。  
黨學春秋長安。聞報讐之義。輟講下辭。歸報讐  
到與卿佐相聞。期闕日。卿佐多從正往。使卿佐



先拔刀然後相擊佐欲直令正擊之黨被創困  
乏佐服其義勇後與養之數日蘇興乃知非其  
家卽徑歸其立勇吳乃至於是

謹按孝經身體髮膚受之父母不敢毀傷孝之始也  
樂正子春下堂而傷足三月不出旣瘳矣猶有憂色  
身無擇行口無擇言脩身慎行恐辱先也而伯況被  
發則得就業卿佐雖云凶暴何緣侵已今見辱者必  
有以招之身自取焉何尤於人親不可辱在我何傷  
凡報讐者謂爲父兄耳豈以一朝之忿而肆其狂怒



者哉。既遠春秋之義。殆今先祖不復血食。不孝不智而兩有之。歸其義勇。其義何居。

汝南陳茂君因爲荊州刺史時。南陽太守灌恂。本名清能。茂不入宛城。引車到城東。爲友人衛修母拜到州。恂先是茂客仕蒼梧。還到修家。見修母婦說修坐事繫獄當死。因詣府門。移辭乞恩。隨輩露首入坊中。容止嚴恪。鬚眉甚偉。太守人驚。不覺白起。立賜巾延請。甚嘉敬之。卽焉出。脩南陽士大夫。謂恂能救解修。茂彈繩不撓。修



竟極罪。恂亦以他事去。南陽疾惡殺修爲之語。

曰：衛修有事，陳茂治之。衛修無事，陳茂殺之。

謹按春秋王人之微，處于諸侯之上，坐則專席，止則專館。朱軒駕駟，威烈赫奕，就恂素爲官速謗，當便入傳引見詰問，糾其贓狀，以時列聞。文王日昃不暇食，周公坐而俟旦，且非爲已私皆公也。何有忘百姓塗炭之急，便乃光照舊交之問乎？鮑宣州牧行部，多宿下亭，司直舉劾，以爲輕威捐命，坐之刑黜。今茂混棄天常進止由已，孰使毀之？小人譽之，自我爲之。古人



病諸以爲大譏茂與脩善由鴟鴞之愛其子適所以害之者。

度遼將軍安定皇甫規威明連在大位欲退避弟數上病不見聽會友人上郡太守王晏物故規素縞到下亭迎喪發服送之因令客密告并州刺史胡芳言規擅遠軍營赴私違公當及舉奏答曰威明欲得避弟故作激發我爲朝廷惜其功用何能爲此私家計耶規後爲中郎將督并涼益三州時有黨事懼見及因先自上言臣



前薦故太常張煥才任將帥是附黨也。又臣論  
輸左校時太學生張鳳等上書訟臣是爲黨人  
所附也。昔有畏舟之危而自投水者。蓋憂難與  
處。樂其亟決。

謹按詩云。淑人君子其儀不忒。其儀不忒。正是四國。  
傳曰。一心可以事百君。百心不可事一君。論語夫子。  
溫良恭儉讓以得之。立朝忘家。卽戎忘身。身且忘之。  
況於第乎。方殊俗越溢。大爲邊害。朝廷比辟公盱食。  
規義在出身。折衝弭難。而誅伐已定。當見鎮慰。何有。

挾功苟念去位，第實雋德，不患無位，而徒闢茸，何所  
堪施。疆推轂之，亂儀干度。孝武皇帝爲驃騎將軍霍  
去病治第舍，勅令視之曰：何奴不滅，何以家爲。去病  
外戚末屬，一切武夫，尚能抗節洪毅，而規世家純儒。  
何獨負哉。又以黨事先自勞銜，如有白駿，其於及已  
而形兆，有不可得。唯是從何憚於病，曰：畏舟之危，自  
投於水，憂難於處，樂其亟決。王幸必不坐，太誓有云：  
民之所欲，天必從之。天作孽，猶可違，自作孽，不可逭。  
人之所忌，天自取之。蓋最揚慝，勳著王室，言事過差。



皆伏大辟。以隆主威。抑驕侵也。規顧弟私也。雖局姦也。誘巧詐也。畏舟慢也。四罪是矣。殺決可也。

南陽五世公爲廣漢太守。與司徒長史段遼叔同歲。遼叔太子名舊。才操鹵鈍。小子髡旣見齒鄉黨。到見股肱曰。太守與遼叔同歲。恩結締素。薄命早亡。幸來臨郡。今年且以此相饒。舉其子。如無罪得至後歲。貫魚之次。敬不有違。有主簿柳對曰。明府謹終追遠。興微繼絕。然舊實不如髡。宜可授之。世公於是厲聲曰。丈夫相臨。見女



尚欲舉之。何謂高下之間耶。釋兄用弟。此爲故  
缺段氏之家。豈稱相遭遇之意乎。竟舉舊也。世  
公轉換南陽。與東萊太守蔡伯起同歲。欲舉其  
子伯起。自乞子瓚尚弱。而弟琰幸以成人。是歲  
舉琰。明年復舉瓚。瓚十四。未可見衆。常稱病遣。  
詣生交。到十八。乃始出治劇。平春長。上書臣甫  
弱冠。未任宰御。乞畱宿衛。尚書劾奏。增年。受選  
減年。避劇。請免瓚官。詔書左遷武當左尉。會車  
騎將軍馮緄南征武陵蠻夷。緄與伯起同時公。



府辟瓚爲軍曲侯瓚歸臥家軍功除新陽長官

至下邳相

謹按古無孝廉唯有貢士貢士恩義經傳無以也春秋諸侯朝覲會遇大夫亦豫其好禮記曰大夫三月葬同位畢至此言謹終悼亡不說子弟當見寵拔也魯有郈成叔聘衛右宰穀畱而觴之陳樂而不樂酒酣而不飲送以璧其妻孥隳宅而居之分祿而食之其子長乃辟孔子稱可寄百里之命託六尺之孤臨大節而不可奪相與之義具於此矣語有曰白頭如



新交蓋如舊簞食壺漿。會於樹陰。臨別眷眷。念在報効。何有同歲相臨而可拱默者哉。春秋因其可褒而褒之。若乃世公二郡之舉。斯爲過矣。然世人亦多淺薄。在者寡愍勤之誼。亡者無顧覆之施。饑寒緩急視之若遺。非徒如此而已。至有可否之際。受刑誅者。人各有心。爾不可得。夫孝廉平除。則有社稷民人傷及民人實宜料度。以爲後圖。

汝南戴幼起。三年服竟。讓財與兄。將妻子出客舍中。住官池田。以耕種爲上計史。獨軍載衣資。



表汝南太守上計史戴紹車後舉孝廉爲陝令  
謹按禮有東宮西宮辟子之私不足則資有餘亦歸  
之於宗也此言兄弟無離異之義也凡讓財者類與  
弟子弟尚幼恩情注希有與兄旣出之日可居冢下  
冢無屋宗家猶有羸田廬田可首張力者耳何必官  
池客舍旣推獨車復表其上爲其飾僞良亦昭晰幼  
起同辟有薛孟嘗者與子弟共居弟子常求分力不  
能止固乃聽之都與奴婢引其老者曰與我共事汝  
不能使之田屋取其荒壞者曰我少時所作買意所



戀也。器物取其久者曰。我服食久。身口安之也。外有  
其分之名。內實十三耳。子弟無幾盡之。輒復更分如  
此者數。傳稱袁盎三兄。子分而供其公家之費。此其  
然矣。論語泰伯三讓。民無得而稱之焉。何有讓數十  
萬。畏人而不知。欲令皦皦。乃如是乎。方之袁薛。差以  
千里。凡同居上也。通有無次也。讓其下耳。凡若勿起  
仍斯不足貴矣。

江夏太守河內趙仲讓。舉司隸茂材。爲高唐令。  
不乘輦車。徑至高唐。變易名姓。止都亭中十餘



日默入市里。觀省風俗。已呼亭長問新令爲誰。  
從何官來。何時到也。曰。縣已遣吏迎。垂有起居。  
曰。正我是也。亭長怖遽。拜謁竟。便具吏。其日入  
舍。乃謁府。數十日無故便去。爲郡功曹所選。頗  
有不用。因稱狂亂。首走出府門。太守以其宿有  
重名。忍而不罪。後爲大將軍梁冀從事中郎。將  
冬月坐庭中。向日解衣裘捕虱。已因傾臥厥形  
悉表露。將軍夫人襄城君云。不潔清。當亟推問。  
將軍歎曰。是趙從事絕高士也。他事若此。非一



也

謹按詩云、不愆不忘、率由舊章、左氏傳曰、舊章不可  
無也、凡張官置吏、爲之律度、故能攝固其位、天下無  
覬覦也、今仲讓不先謁府、乃徑到縣、俱譟吏民、爾乃  
入舍、論語升車必正立執綬、不內顧、不掩不備、不見  
人短、見禮記戶有二屨不入、將上堂聲必揚、家且猶  
若此、況於長吏乎、君子之仕行其道也、民未見德、唯  
詐是聞、遠薦功曹、策名委質、就有不合、當徐告退、古  
旣待放、須起乃逝、何得亂道、進退自由、傲狠天常、若



無君父。洪範陳五事。以貌爲首。孝經列三法。以服爲先。仲讓居有田業。加之祿賜。勢可免凍餒之厄。未必須冬日之煖也。利不體皆此也。河內殷之舊都。國分爲三。康叔之風。旣激而紂之化。由存其俗。士大夫本矜好大言。而少實行。

作通事卷四終

齊世大言而史官存

然三鼎鼎之風而必而後出。分由齊其辭士大夫士

所冬日之數也。時不離外此。必而內強。之昔時。國

亦有勸。無言田。然。必。而。強。而。更。東。之。風。未。及

齊。世。大。言。而。史。官。存。然。三。鼎。鼎。之。風。而。必。而。後。出。分。由。齊。其。辭。士。大。夫。士。所。冬。日。之。數。也。時。不。離。外。此。必。而。內。強。之。昔。時。國。亦。有。勸。無。言。田。然。必。而。強。而。更。東。之。風。未。及。齊。世。大。言。而。史。官。存。



風俗通義卷五

十反

易記出處默語。書美九德咸事。同歸殊塗。一致百慮。不期相反。各有云尚而已。是故伯夷讓國以採薇。展禽不去於所生。孔丘周流以應聘。長沮隱居而耦耕。墨翟摩頂以放踵。楊朱一毛而不爲。干木息偃以藩魏。包胥重璽而存郢。夷吾朱紼以三歸。平仲辭邑而灌纓。惠施從車以百乘。伯扈徒步而裸形。甯戚商歌以干祿。顏闔踰牆而遁榮。高柴趣門以避難。季路求



入而隕零。端木結駟以貨殖。顏回屢空而弗營。孟獻  
高宇以美室。原憲蓬門而株楹。傳曰：人心不同，有如  
其面。古今行事，是則然矣。比其舛曰十反。

太尉沛國劉矩，叔方，父字叔遼，累祖卿尹，好學。  
敦整士，名不休揚，又無力援，仕進陵遲，而叔方  
雅有高問，遠近偉之。州郡辟請，未嘗答命。往來  
京師，委質通門。大尉徐防，太傅桓焉，二公嘉其  
孝敬，慰愍契濶，爲之先後。叔遼由此辟公府，博  
士徵議郎。叔方爾乃飄然改志，以禮進退，三登



台袞號爲名宰。陽翟令左馮翊田煇叔都兄  
字威都俱合純懿。不隕洪祚。叔都最爲知名。郡  
常欲爲察授之。煇耻越賢兄。懼不得免。因緣他  
疾。遂托病瘖。家人妻子莫知其情。人數恐灼持  
之有度。後在田舍。天連陰雨。友人張子平吉仲  
考等密共穿踰。奪取衣衾。窮夜獨處。迫切至矣。  
然無聲響。徒暗暗而已。子平因前抱持曰。我某  
公也。謂汝避兄耳。何意真然耶。天喪斯人。吾儕  
將何效乎。相對歔歔。哀動左右。間積四歲。威都



果舉遷安定長史，據輜垂綏，還歷鄉里，薦祀祖  
考。叔都沃醊神坐，頽仰因語。是月，司隸太尉大  
將軍同時並辟爲侍御史，舉茂材，不幸早隕，威  
都官至武都太守、太尉掾。汝南范滂、孟博，天  
資聰叡，辨於持論，舉孝廉。光祿主事、京師歸德  
四方影附。父字叔矩，遭母憂，旣葬之後，饘粥不  
贍。叔矩謂其兄弟禮不言事，辯杖而起。今俱匍  
匐號咷，上闕奠醑，下困糊口，非孝道也。因將人  
客於九江，田種蓄牧，多所收穫，以解債負。土成



家立祀三年服闋二兄仕進叔矩以自替於喪  
紀獨寢墳側服制如初哀猶未歇郡舉至孝拜  
中司勾章長病去官博士徵兄憂不行司徒梁  
國盛允字子翩爲議郎慕孟博之德貪樹於有  
禮謂孟博家公區區欲辟大臣宜令邑人廉薦  
之孟博厲聲曰老夫年尊絕意世事又海內清  
高當路非一退而告人子翩欲德我我不受也  
子翩亦以恨遂不得辟孟博病去受事而常幹  
宰相之職



謹按禮父爲士子爲天子武王建有周之號諡大王  
王季言王業肇於此矣越裳重九譯獻白雉周公薦  
陳祖廟曰先人之德有天下尊歸於父此人道之極  
前漢詔曰海內大亂兵革並起朕被堅執銳自率士  
卒犯危難平暴亂偃兵息民天下大安此皆太公之  
教訓也今上等號曰太上皇春秋之義因其可褒而  
褒之孝經曰敬其父則子悅叔矩則其孝敬則弼身  
苦思率禮無違矣則其友于則褒兄委榮盡其哀情  
矣則其學藝則家法洽覽誨人不倦矣則其政事則



施於已試靡有闕遺矣。君子百行，子產有四，凡在他  
姓尚宜褒之，況於父乎？敬意之至，猶用夷悅，況於寵  
族乎？抗爽言以拒厚旨，抑所生以爲已高，忍能厲然  
獨享其榮，若乃不令之下愚，流貨財於權嬖，此罪人  
也。田輝託疾上也，劉矩屈體次也，范滂吾無取焉耳。  
巴郡太守太山但望伯門，爲司徒掾，同產子作  
客，殺繫，望自劾去。星行電征，數日歸趨詣府，露  
首肉袒辭謝。太守太尉李固謝與相見，頓頭流  
血，自說弟薄命早亡，以孤爲託，無義方之教，自



陷罪惡。自男穿旣與知情。幸有微嗣。乞以代之。  
言甚哀切。李公達於原度。卽活出之。○高唐令  
樂安周糾。孟玉爲大將軍掾。弟子使客殺人。捕  
得。太守盛亮陰爲宿留。糾亦自劾去。詣府。亮與  
相見。不乞請。又不辭謝。亮告賓客周孟玉。欲作  
抗直。不恤其親。我何能任憲乎。遂斃于獄。弟婦  
不哭。死子而哭孟玉。世人誤之。猶以爲高。

謹按春秋。叔牙爲慶父殺。般閔公大惡之。甚而季子  
緣獄有所歸。不探其情。緩追逸賊。親親之道。州吁旣



殺其君而虐用其人石碣惡之而厚與焉大義滅親  
君子猶曰純臣之道備矣於恩未也君親無將王誅  
宜耳今二家之子幸非元惡但望誠心內發哀情外  
露義動君子合禮中矣周糾苟執果毅忽如路人昔  
樂羊爲魏伐中山歎其子羹文侯壯其功而疑其心  
秦西巴蜀命放獸而孟氏旋進其位麀猶不忍況弟  
子乎孟軻譏無惻隱之心傳曰於厚者薄則無所不  
薄矣

豫章太守汝南封祈武興泰山太守周乘子居



爲太守李張所舉。函封未發。張病物故。夫人於柩側下帷。見六孝廉曰。李氏蒙國厚恩。據重任。名嘉休懿。相授歲貢。上欲報稱聖朝。下欲流惠氓隸。今李氏獲保首領。以天年終。而諸君各懷進退。未肯發引。妾幸有三孤足統喪紀。正相追隨。蓬墩墳柏。何若曜德王室。昭顯亡者。亡者有靈。實寵賴之。歿而不朽。此其然乎。於是周乘顧謂左右。諸君欲行。周乘當止者。莫逮。郎君盡其哀惻。乘與鄭伯堅卽日辭行。祈與黃叔度。郅伯嚮。



盛孔叔留隨轎柩乘拜郎遷陵長治無異稱意  
亦薄之。其官與祈相反俱爲侍御史公車令享  
相位焉。

謹按孝經資於父母以事君君親臨之厚莫重焉春  
秋國語民生於三事之如一禮斬衰公士大夫衆生  
爲其君乘雖見察授函封未發未離陪隸不與賓于  
王爵諸臨城社民神之主也義當服慙關其祀紀夫  
人雖有懇切之教蓋子不以從令爲孝而乘囂然要  
勤同儕去喪卽寵謂能有功異也明試無效亦旋告



退安在其顯君父德美之有。

河內太守府廬江周景仲嚮每舉孝廉請之上  
堂家人宴飲皆令平仰言笑晏晏如是三四臨  
發贈以衣齊皆出自中子弟中外過歷職署踰  
於所望曰移臣作子於之何有○河內太守司  
徒潁川韓演伯南舉孝廉唯臨辭一與相見無  
所寵拔曰我已舉若豈可令恩福積於一門乎  
謹按春秋左氏傳夫舉無他也唯善所在親疏一也  
祈奚稱其讐不爲諂立其子不爲比舉其偏不爲黨



建一官而三物成。晉國賴之。君子歸焉。蓋人君者。闢門開窓。號咷博求。得賢而賞。聞善若驚。無適也。無莫也。周不綜臧否。而務蘊崇之。韓演不惟善。是務越此一槩。夫不擇而彊用之。與可用而敗之。其罪一也。

安定太守汝南胡伊伯。建平長樊紹孟建。俱爲司空。虞放掾屬。放遜位自劾。還家。郡以伊爲主簿。迎新太守曰。我是宰士。何可委質於二朝乎。因出門名戶占繫陳國。紹曰。柳下惠不去父母之國。君子不辭下位。獨行服事。後公黃瓊大以



爲恨、移書汝南論正主者、吏絕紹文書而更辟

伊

謹按春秋尊公曰宰、其吏爲士、言於四海無所不統  
焉、孟軻稱不枉尺以直尋、況於枉尋以直尺、柳下惠  
不枉道以事人、故三黜而不去、孔子謂之不恭、今紹  
見編會、以禮遊引耳、其義不同於此、伊心明審、自求  
多福、近靈帝之末、司徒掾宏農董君考上名典、君事  
不得、自劾、誓以家急假、太守季崇請乞相見、頻領功  
曹、與俱班錄、訖乃謝遣、時公袁隗意亦非之、然彈糾



自是之後。彌以滋甚。郡用從事。縣用府吏。上下溷淆。良可穢也。詩云。雖無老成人。尚有典刑。國之大綱也。可不申勅小懲而大戒哉。

宗正南陽劉祖奉爲郡屬曹吏。左騎校尉薛丞君卓爲戶曹史。太守公孫慶當祠章陵。舊俗常以衣冠子孫。容止端嚴。學問通覽。任顧問者。以爲御史時功。曹白用劉祖。祖曰。旣託帝王肺腑。過聞前訓。不能備光輝胥附之任。而當側身陪乘。執策握革。有死而已。無能爲役。薛丞因前自



白，今明公垂出，未有御者，雖云不敏，敢充人之  
周旋，進退補察，時闕言出成謨，大見敬重，亦以  
祖爲高，歲盡俱舉孝廉。

謹按周禮保氏掌六藝之敎，其一曰御，論語曰吾何  
執執御乎，子適衛冉子僕有政事之士列於四友，然  
猶御者不爲役也，春秋左氏傳晉悼公卽位，程鄭爲  
乘馬御，訓羣騶知禮，今國家大駕大僕親御他出奉  
車都尉寧可復言執策握革而辭讓之乎，凡黔首皆  
五帝子孫，何獨今之肺腑當見優異也，宗廟之人或



在訓詁人之化也何日之有舊時長吏質樸子皆駕  
御故曰從見君臣父子其揆一也臣不肯御子豈可  
然公子遂偃蹇不使下陵上替能無亂乎劉祖幸免  
罪戾而見褒賞公孫於是失政刑矣

聘士彭城姜肱伯雅京兆韋質休明靈帝踐祚  
太后臨朝陳竇以忠見害中常侍曹節秉國之  
權大作威福翼寵名賢以弭已謗於是起姜肱  
爲犍爲太守著東海相肱告其人吾以虛獲實  
蘊藉聲價盛明之際尚不委質况今政在家哉



遂乘桴浮海莫知其極而著驩以承命駕言宥  
征民不見德惟戮是聞論輸左校

謹按易稱君子之道或出或處或默或語傳曰朝廷  
之人入而不能出山林之士往而不能返言各有長  
也孔子嘉虞仲夷逸作者七人亦終隱約姜肱高尚  
其事見得思義豈不綽綽有餘裕哉韋著邁種其德  
少有云補可也虐刑以逞民心怨痛德薄位尊力小  
任重古人懼旃鮮能不及矣

趙相汝南李統少幼爲冀州刺史況所奏耳目



不聰明股肱掾史咸用忿憤欲詣闕自理統聞  
知之歷收其家遣吏追還曰統久忝重任負於  
素餐年漸七十禮在懸車頃被疾病念存首正  
比自乞歸未見聽許州家幸能爲統得去實至  
願也居無幾果徵時冀州有疑獄章帝見問統  
統處當詳平克厭上心曰君大聰明刺史侵君  
統曰臣受國厚恩官尊祿重不能自竭有以報  
稱久抱重疾氣力羸露耳聾目眩守虛墮越自  
分奄忽填壑猥得承望闕廷親見御座不勝其



喜權時有瘳。辭出之後。必復故也。刺史不侵臣也。上悅其遜。卽日免。況拜統侍中。司徒九江朱伉。以年老爲司隸。虞詡所奏。耳目不聰明。見掾屬大怒曰。顛而不扶。焉用彼相。君勞臣辱。何用爲。於是東閣祭酒周舉曰。昔聖帝明王。莫不歷象日月星辰。以爲鏡戒。熒惑比有變異。豈能手書密以上聞。伉曰。可自力也。舉爲劄草。臣聞易曰。天垂象。見吉凶。觀乎天文。以察時變。臣竊見九月庚辰。今月丙辰。過熒惑於東井。辟金光。



經術淺末不曉天官見其非常昭昭再見誠切怪之誠慙憤夫月者太陰熒惑火星不宜相干臣聞盛德之主不能無異但當變改有以供御孔子曰雖明天子熒惑必謀禍福之徵慎察用之孝宣皇帝地節元年月蝕熒惑明年有霍氏亂孔子曰火上不可握熒惑班變不可息志帝應其修無極此言熒惑火精尤史家所宜察也楚莊曰災異不見寡人其亡今變異屢臻此天以佑助漢室覺悟國家也臣



誠懼史官畏忌，不敢極言。惟陛下深留聖思，按  
圖書之文，鑒古今之戒，召見方直，極言而靡諱。  
親賢納忠，推誠應人，猶影響也。宋景公有善言，  
熒惑徙舍，延年益壽，況乎至尊，感不旋日。書曰：  
天威匪謐，言天德輔誠也。周公將浚，戒成王以  
左右常伯，常任準人，綴衣虎賁，言此五官存亡  
之機，不可不謹也。臣願陛下思周旦之言，詳左  
右清禁之內，謹供養之官，嚴宿衛之身，申勅屢  
省，務知戒慎，以退未萌，以此無疆，謹制劄自力。



手書密上上覽。俛表嘉其忠謨。俛日數病。手能  
細書。詔案大臣。苟肆私意。詔坐上謝。俛蒙慰勞。  
謹按論語能以禮讓爲國乎。何有。夫子溫良恭儉讓  
以得之。傳曰。心苟不競。何憚於病。未俛位極人臣。視  
事數年。訖無一言。彌縫時闕。又俛年且九十。足以懣  
憤。義當自引以避賢路。就使有在。欣以俟命耳。何能  
乃發忿。欲自提理。周舉爲人謀而不忠。維訖匡陳。起  
自營衛。夫奉義順之。謂禮。愛人而不以德。不可謂仁。  
信不由中。文辭何爲。向遇中宗永平之政。赦罪不暇。



何慰勞之有。李統內省不疚。進對溫雅。明主是察。終爲長者。

蜀郡太守潁川劉勝。季陵去官在家。閉門却掃。歲時致敬。郡縣答問而已。無所褒貶。雖自枝葉莫力。太僕杜密。周甫亦去北海相在家。每至郡縣。多所陳說。牋記括屬太守王昱。頗厭苦之。語次聞得京師書。公卿舉故大臣劉季陵高士也。當急見徵。密知以見激。因曰。明府在九重之內。臣吏惶畏天威。莫敢盡情。劉勝位故大夫。見禮



上賓俯伏甚於鼈蟬。冷澁比如寒蜩。無能往來。此罪人也。清雋就義。隱居篤學。時所不綜。而密達之。寃疑勳賢。成陳之罪。所折而密啓之。明府賞賢得中。令聞休揚。雖自天然之姿。猶有萬分之一。詩不云乎。雨我公田。遂及我私。人情所有。庶不爲闕。旣不善是多見譏論。夫何爲哉。於是昱甚悅服。待之彌厚。

謹按論語澹臺滅明。非公事未嘗至於偃之室也。君子思不出其位。孟軻亦以爲達則兼濟天下。窮則獨



善其身。劉勝在約思純，其靜已甚。若時意宴及言論折中，亦無嫌也。杜密婆娑府縣，干與王政，就若所云，猶有公私。旣見譏切，不整坐謝負，而多伐善，以爲己力，惟顏之厚博而俗矣。



俗通義卷六

聲音

易稱先王作樂崇德殷薦之上帝以配祖考詩云鐘鼓鐃鐃磬管鎗鎗降福穰穰書曰擊石拊石百獸率舞鳥獸且猶感應而況於人乎況於鬼神乎夫樂者聖人所以動天地感鬼神按萬民成性類者也故黃帝作咸池顓頊作六莖嚳作五英堯作大章舜作韶禹作夏湯作濩武王作武周公作勺勺言能斟勺先祖之道也武言以功定天下也濩言救民也夏大承



二帝也。韶繼堯也。大章章之也。五英英華茂也。六莖  
及根莖也。咸池備矣。其後周室陵遲。禮崩樂壞。諸侯  
恣行競悅。所習桑間濮上。鄭衛宋趙之聲。彌以放遠。  
滔湮心耳。乃忘中和。亂政傷民。致疾損壽。重遭暴秦。  
遂以闕忘。漢興制氏世掌大樂。頗能紀其鏗鏘。而不  
能說其義。武帝始定郊祀。巡狩告封。樂官多所增飾。  
然非雅正。故繼其條暢曰聲音也。昔黃帝使伶倫自  
大夏之西。崑崙之陰。取竹於嶰谷。生其竅厚均者。斷  
兩節而吹之。以爲黃鍾之管。制十二筩以聽鳳之鳴。



其雄鳴爲六，雌鳴亦爲六。天地之風氣正而十二律之五聲於是乎生，八音於是乎出。聲者，宮、商、角、徵、羽也。音者，土曰埙，匏曰笙，革曰鼓，竹曰管，絲曰絃，石曰磬，金曰鐘，木曰柷。詩曰：鶴鳴九臯，聲聞于天。書八音，克諧，無相奪倫，由是言之，聲本音末也。

商

謹按劉歆《鐘律書》：商者，章也。物成熟可章，度也。五行爲金，五常爲義，五事爲言，凡歸爲臣。

角



謹按劉歆鐘律書角者觸也。物觸地而出。戴芒角也。五行爲木。五常爲仁。五事爲貌。凡歸爲民。

宮

謹按劉歆鐘律書宮者中也。居中央。暢四方。倡始施生。爲四聲綱也。五行爲土。五常爲信。五事爲思。凡歸爲君。

徵

謹按劉歆鐘律書徵者祉也。物盛大而繁祉也。五行爲火。五常爲禮。五事爲視。凡歸爲事。



羽

謹按劉歆鐘律書羽者宇也。物始藏宇覆之也。五行  
爲水。五常爲智。五事爲德。凡歸爲物。故聞其宮聲。使  
人溫潤而廣大。聞其商聲。使人方正而好義。聞其角  
聲。使人整齊而好禮。聞其徵聲。使人惻隱而博愛。聞  
其羽聲。使人善養而好施。宮聲亂者。則其君驕。商聲  
錯者。則其臣壞。角聲謬者。則其民怨。徵聲洪者。則其  
事難。羽聲差者。則其物亂。春宮秋律。百卉必凋。秋宮  
春律。萬物必榮。夏宮冬律。雨電必降。冬宮夏律。雷必



發聲夫音樂至重。所感者大。故曰知禮樂之情者能作。識禮樂之文者能述。作者之謂聖。述者之謂明。明聖者述作之謂也。

塤

一作壎者古今字也

謹按世本暴辛公作塤。詩云天之誘民如塤如篪。塤燒土也。圍五寸半。長三寸半。有四孔。其二通。凡爲六孔。

笙

謹按世本隨作笙。長四寸。十二簧。像鳳之身。正月之



音也。物生故謂之笙。詩云：我有嘉賓，鼓瑟吹笙。大笙謂之篥，小者謂之和。

### 鼓

謹按易稱鼓之以雷霆，聖人則之，不知誰所作也。鼓者郭也，春分之音也。萬物郭皮甲而出，故謂之鼓。周禮六鼓雷鼓八面，路鼓四面，鼙鼓晉鼓皆二面。詩云：擊鼓其鏜。論語：小子鳴鼓而攻之可也。

### 管

謹按詩云：嘒嘒管聲。簫管備舉。禮樂記：管漆竹，長一



尺六孔十二月之音也。物貫地而牙故謂之管。尚書  
大傳。舜之時西王母來獻其白玉琯。昔章帝時零陵  
文學奚景於冷道舜祠下得生白玉管。知古以玉爲  
管。後乃易之以竹耳。夫以玉作音故神人和。鳳皇儀  
也。

瑟

謹按世本。宓戲作八尺一寸四十五絃。黃帝書。秦帝  
使素女鼓瑟而悲。帝禁不止。故破其瑟爲二十五絃。  
春秋師曠爲晉平公奏清徵之音。有元鶴二八從南。



來進於廊門之扈，再奏之而成列。三奏之，則延頸而鳴，舒翼而舞。音中宮商，聲聞于天。平公大說，坐者皆喜。平公提觴而起，爲師曠壽。反坐而問曰：「音莫悲於清徵乎？」師曠曰：「不如清角。」平公曰：「清角可得聞乎？」師曠曰：「不可。昔黃帝駕象車，交龍畢方，並轄，蚩尤居前，風伯進掃，雨師灑道，虎狼在後，虫蛇伏地，大合鬼神於泰山之上，作爲清角。今主君德薄，不足以聽之。聽之將恐有敗。」平公曰：「寡人老矣，所好者音也，願遂聞之。」師曠不得已而鼓之。一奏之，有雲從西北起，再



奏之暴風亟至。大雨灑沛。裂帷幕。破俎豆。墮廊瓦。凡坐者散走。平公恐懼。伏於室側。身遂疾痛。晉國大旱。赤地三年。故曰不務德治而好五音。則窮身之事也。今瑟長五尺五寸。非正器也。

磬

謹按世本。毋句作磬。尚書豫州錫貢磬錯。詩云笙磬同音。論語子擊磬於衛。有荷蕢而過者曰有心哉。

鐘

謹按世本垂作鐘。秋分之音也。詩鼓鐘于宮。聲聞于



外論語云樂云樂云鐘鼓云乎哉周景王將鑄大鐘  
單穆公諫夫先王之制鐘也大不出均里不過石律  
度量衡於是乎生小大器用於是乎出故聖人慎之  
今王作鐘聽之弗及比之不度鐘磬不可以知和制  
度不可以出節無益於樂而鮮民財將焉用之

### 祝

謹按禮樂記祝漆桶方畫木方三尺五寸高尺五寸  
中有椎上用祝止音爲節書曰合止祝故笙鏞以聞  
聲所以五者繫五行也音所以八者繫八風也傳曰



入音之變不可勝聽也。由經五藝六而其枝別葉布繁華無已也。

琴

謹按世本神農作琴。尚書舜彈五絃之琴。歌南風之詩而天下治。詩云我有嘉賓。鼓瑟鼓琴。雅琴者樂之統也。與八音並行。然君子所常御者。琴最親密。不離於身。非必陳設於宗廟鄉黨。非若鐘鼓羅列於虞懸也。雖在窮閭陋巷。深山幽谷。猶不失琴。以爲琴之大。小得中而聲音和大。聲不譁人而流漫。小聲不湮滅。



而不聞適足以和人意氣感人善心故琴之爲言禁也雅之爲言正也言君子守正以自禁也夫以正雅之聲動感正意故善心勝邪惡禁是以古之聖人君子慎所以自感因邪禁之適故近之間居則爲從容以致思焉如有所窮困其道閉塞不得施行及有所通達而用事則著之於琴以抒其意以示後人其道行和樂而作者命其曲曰暢暢者言其道之美暢猶不敢自安不驕不溢好禮不以暢其意也其遇閉塞憂愁而作者命其曲曰操操者言遇菑遭害困厄窮



迫。雖。怨。恨。失。意。猶。守。禮。義。不。懼。不。樂。道。而。不。失。其。  
操。者。也。伯。子。牙。方。鼓。琴。鍾。子。期。聽。之。而。意。在。高。山。子。  
期。曰。善。哉。乎。巍。巍。若。泰。山。頃。之。間。而。意。在。流。水。鍾。子。  
又。曰。善。哉。乎。湯。湯。若。江。河。子。期。歎。伯。牙。破。琴。絕。絃。終。  
身。不。復。鼓。以。爲。世。無。足。爲。音。者。也。今。琴。長。四。尺。五。寸。  
法。四。時。五。行。也。七。絃。者。法。七。星。也。

空侯

又坎侯

謹按漢書孝武皇帝賽南越禱祠太一后土始用樂  
人侯調依琴作坎坎之樂言其坎坎應節奏也侯以



姓冠章耳。或說空侯取其空中。琴瑟皆空。何獨坎侯耶。斯論是也。詩云。坎坎鼓我。是其文也。

### 箏

謹按禮樂記。五絃筑身也。今并涼二州箏形如瑟。不知誰所改作也。或曰秦蒙恬所造。

### 筑

謹按太史公記。燕太子丹遣荆軻欲西刺秦王。與客送之。易水而設祖道。高漸離擊筑。荆軻和歌。爲濮上音。士皆垂髮涕泣。後爲羽聲慷慨而索驥。目髮盡上。



指冠荆軻入秦事敗而死。漸離變名易姓，爲人庸保，匿作於宋子。久之，作苦，聞其家堂上客擊筑，伎癢不能出言曰：彼有善不善？從者告其主曰：彼庸乃知言。竊言是非。家丈人作樂召前使擊筑，一坐稱美，賜酒而漸離念久畏約，毋窮已時，乃退出裝匣中筑與其善衣，更容貌而前。莫不驚愕。下與亢禮，以爲上客。使擊筑，歌無不涕泣而去者。宋子客傳之，聞於秦始皇。始皇召見，人有識者，乃高漸離。始皇惜其善擊筑，重殺之，乃矐其目，使擊筑，未嘗不稱。稍益近之，漸離



乃以鉛置筑木中。後進得近，舉筑朴。始皇不中，於是遂誅。

缶

謹按易稱日昃之離，不鼓缶而歌，詩云坎其擊缶，宛  
丘之道。缶者瓦器，所以盛漿，秦人鼓之以節歌。太史  
公記趙惠文王與秦昭王會於澠池，秦王飲酒酣，曰  
寡人竊聞趙王好音，請奏瑟。趙王鼓瑟，秦御史前曰  
某日秦王與趙王會飲，令趙王鼓瑟。藺相如前曰竊  
聞秦王善爲秦聲，請奏缶以相樂。秦王怒，不許。於是



相如進曰。五步之內。相如請得以頸血濺大王矣。左右欲刃相如。張目叱之。皆靡。於是秦王不懌。爲一擊缶。相如顧召御史書曰。秦王爲趙王擊缶也。

笛  
簫同

謹按樂記。武帝時。丘仲之所作也。笛者。滌也。所以蕩滌邪穢。納之於雅正也。長二尺四寸七孔。其後又有羌笛。馬融笛賦曰。近世雙笛從羌起。羌人伐竹木。及已龍鳴。水中不見。後截竹吹之音。相似。剡其上孔。通洞之材。以當樞。便易持。京君明賢譜音律。故本四孔。



加以一君明所如孔後出是謂商聲五音

批把

謹按此近世樂家所作不知誰也以千批把因以爲名長三尺五寸法天地人與五行四象四時

竽

謹按禮記管三十六簧也長四尺二寸今二十三管

簧

謹按世本女媧作簧簧笙中簧也詩云吹笙鼓簧承筐是將



簫

謹按周禮簫師氏掌教國子吹簫詩云以簫不僭簫樂之器竹管三孔所以和衆聲也

篪

與池同

謹按世本蘇成公作篪管樂十孔長尺一寸詩云伯氏吹塤仲氏吹篪

簫

謹按尚書舜作簫韶九成鳳凰來儀其形參差象鳳之翼十管長一尺



籟

謹按禮樂記三孔籟也。大者謂之簫，其中謂之仲，小者謂之箛。

荻

謹按漢書舊注，荻吹鞭也。荻者撫也，言其節撫威儀。

荻


謹按漢書注，荻，籟也。言其聲音荻荻，名自定也。

風俗通義卷六終



明倫彙編 家範典 卷六





























風俗通義卷七

窮通



易稱懸象著明莫大乎日月。然時有昏晦。詩美滔滔。江漢南北之紀。然時有壅滯。論語曰。天縱之莫盛於聖。然時有困否。日月不失其體。故蔽而復明。江漢不失其源。故窮而復通。聖人不失其德。故廢而復興。非唯聖人。俾爾亶厚。夫有恒者。亦允臻矣。是故君子厄窮而不閔。勞辱而不苟。樂天知命。無怨尤焉。故錄先否。後喜曰。窮通也。



孔子困於陳蔡之間七日不嘗粒。藜羹不糝而猶絃琴於室。顏回擇菜於戶外。子路子貢相與言曰。夫子逐於魯。削迹於衛。拔樹於宋。今復見厄於此。殺夫子者無罪。籍夫子者不禁。夫子絃歌鼓舞未嘗絕音。蓋君子之無耻也若此乎。顏回無以對。以告孔子。孔子恬然推琴喟然而歎曰。由與賜小人也。召吾語之。子路與子貢入。子路曰。如此可謂窮矣。夫子曰。由是何言也。君子通於道之謂通。窮於道之謂窮。今丘抱仁義之道。以遭亂性之患。其何窮之爲。故內省不疚於



道臨難而不失其德。大寒既至，霜雪既降，吾是以知  
松栢之茂也。昔者桓公得之莒，晉文公得之曹，越得  
之會稽，陳蔡之厄於止其幸乎？自衛反魯，刪詩書，定  
禮樂，制春秋之義，著素王之法，復相定公會于夾谷，  
昭舊以正其禮，抗辭以拒其侮。齊人謝過，來歸鄆，謹  
龜陰之田焉。

孟軻受業於子思，既通，游於諸侯，所言皆以爲迂遠  
而濶於事情。然終不屈道趣舍，枉尺以直尋。嘗仕於  
齊，位至卿，後不能用。孟子去齊，尹士曰：「不識王之不



可以爲湯武則是不明也，識其不可然且至，則是干祿也。千里而見王，不遇故去，三宿而後出，晝是何濡滯也？軻曰：夫尹士烏知予哉？千里而見王，是予所欲也，不遇故去，豈予所欲哉？予不得已也。予三宿而出，晝於予心，猶以爲速。王庶幾改諸？王如改之，則必反予。夫出晝而王不予追也，予然後浩然有歸志。魯平公駕將見孟子，嬖人臧倉謂曰：何哉？君所謂輕身以先於匹夫者，以爲賢乎？樂正子曰：克告於君，君將爲來見也。嬖人有臧倉者，汨君，君是以不果。曰：行或使。



之止或尼之行止非人之所能也吾不遇於魯侯天  
也臧氏之子焉能使予不遇哉又絕糧於鄒薛困殆  
甚退與萬章之徒序詩書仲尼之意作書中外十一  
篇以爲聖王不作諸侯恣行處士橫議楊朱墨翟之  
言盈於天下天下之言不歸楊則歸墨楊氏爲我是  
無君也墨氏兼愛是無父也無父無君是禽獸也楊  
墨之道不息孔子之道不著是邪說誣民充塞仁義  
也仁義充塞則率獸食人人將相食也吾爲此懼開  
先王之道距楊墨放淫辭正人心熄邪說以承三聖



者予豈好辯哉予不得已也梁惠王復聘請之以爲上卿

孫況齊威宣王之時聚天下賢士於稷下尊寵若鄒衍田駢淳于髡之屬甚衆號曰列大夫皆世所稱咸作書刺世是時孫卿有秀才年十五始來游學諸子之事皆以爲非先王之法也孫卿善爲詩禮易春秋至襄王時而孫卿最爲老師齊尚循列大夫之缺而孫卿三爲祭酒焉齊人或讒孫卿乃適楚楚相春申君以爲蘭陵令人或謂春申君湯以七十里文王以



百里孫卿賢者也。今與之百里地，楚其危乎？春申君謝之，孫卿去之游趙，應聘於秦。是時七國交爭，尚於權詐，而孫卿守禮義，貴術籍，雖見窮擯而猶不黜其志。作書數十篇，疾濁世之政，國亂君危，相屬不遵大道，而營乎巫祝，信禳祥。蘇秦張儀以邪道說諸侯，以大貴顯，隨而笑之曰：夫不以其道進者，必不以其道仕。又小五伯以爲仲尼之門，羞稱其功。後客或謂春申君曰：伊尹去夏入殷，殷王而夏衰；管仲去魯入齊，魯弱而齊彊。故賢者所在，君尊國安。今孫況天下賢

人所去之國，其不安乎？春申君使請孫況，況遣春申君書刺楚國，因爲歌賦以遺春申君。因不得已，乃行，復爲蘭陵令焉。

虞卿游說之士也。一見趙孝成王，賜黃金百鎰，白璧一雙，再見拜爲上卿，故號爲虞卿。其後范雎之仇魏齊亡過平原君，於是秦昭王請平原君，願爲布衣之交，與飲數日。請曰：周文王得呂尚而以爲太公，齊桓得管夷吾而以爲仲父。今范君亦寡人之叔父也。范君之仇在君之家，願使人取其頭，不然，吾不出君於



關平原君曰貴而交者爲賤也富而友者爲貧也大  
魏齊者勝之交也。在固不出。況今又不在。臣所乎。昭  
王乃遣趙王書曰。范君之仇。魏齊在平原君家。王使  
人疾持其頭來。不然。吾舉兵而伐趙。又不出王之弟  
於關。趙孝成王乃發卒圍平原君家。急。魏齊夜亡。出  
見趙相虞卿。虞卿度趙王終不可說。乃解其印與魏  
齊間行。念諸侯莫可以赴急者。乃復走大梁。欲因信  
陵以至楚。而信陵君聞之。畏秦猶與。未肯見。曰。虞卿  
何如人哉。時侯嬴在傍。曰。人固未易知。知人亦未易



也。夫虞卿一見趙王，賜白璧一雙，黃金百斤，再見拜爲上卿。三見平受相印，萬戶侯。當是之時，天下爭知之。夫魏齊窮困過虞卿，虞卿不敢重爵祿之尊，解相印，捐萬戶侯，而間行以急士窮而歸公子。公子曰：何如人？知人固未易也。信陵君大慚，駕如野迎之。魏齊聞信陵君之初重見之，大怒而自刎。趙王聞之，卒取其頭與秦。秦乃遣平原君。虞卿遂畱於魏。魏趙畏秦，莫復用，困而不得意，乃著書八篇，號虞氏春秋焉。孟嘗君逐於齊，見反，譚子迎於澹，曰：君怨於齊大夫乎？



孟嘗君曰。有譚子曰。如意則殺之乎。夫富貴則人爭歸之。貧賤則人爭去之。此物之必至而理之固然也。願君勿怨。請以市論朝而盈焉。夕而虛焉。非朝愛之而夕憎之也。求在故。往亡故。去孟嘗君曰。謹受命。於是削所怨者名而已。

韓信常從南昌亭長。食數月。亭長妻患之。乃晨早食。食時。信往。不爲具食。信亦知意。遂絕去。釣城下。有一漂母。見信饑。飯之。竟漂數十日。信曰。吾必重報母。母怒曰。大丈夫不能自食。吾哀王孫耳。豈望報乎。淮陰



少年有侮信者曰。君雖姣麗。好帶長劒。怯耳。能刺我。不能則出。我跨下。於是信熟視之。俛出跨下。匍匐。一市人皆笑。以爲信怯。後佐命大漢。功冠天下。封爲楚王。賜所食母千金。及亭長與百錢。公小人也。爲德不竟。召辱信之少年。以爲中尉。告諸侯將相曰。此人壯士也。方辱我時。豈不能殺之。殺之無名。故忍至於此也。

韓安國爲梁中大夫。坐法抵罪。蒙獄吏曰。甲辱安國。安國曰。死灰獨不復然乎。田甲曰。然則溺之。居無幾。



梁內史缺。孝景皇帝遣使者卽拜安國爲內史。起徙中爲二千石。田甲亡。安國曰：「甲不就官，我滅乃宗。」甲肉袒謝。安國笑曰：「公等可與治乎？」卒善遇之。

李廣去雲中太守，屏居藍田南山中射獵。嘗夜從一騎出飲田間，還霸陵，尉呵止廣。廣騎曰：「故李將軍。」尉曰：「今將軍尚不得夜行，何故也？」宿亭下，居無何，匈奴入遼西，大爲邊害。於是孝武皇帝乃召廣爲比平太守。廣請霸陵尉與俱至軍，斬之。上書謝罪，上報曰：「將軍者國之爪牙也。」司馬法曰：「登車不式，遭喪不服，振」



旅撫師以征不服。率三軍之心。同戰士之力。故怒形則千里竦。威振則萬物伏。是以名聲暴於夷貊。威稜懾乎鄰國。夫報忿除害。捐殘去殺。朕之所圖。於將軍也。若乃免冠徒跣。稽顙請罪。豈稱朕之指哉。

太尉沛國劉矩。叔方爲尚書令。失將軍梁冀意。遷常山相去官。冀妻兄孫禮爲沛相。矩不敢還鄉里訪友。人彭城環玉都。玉都素敬重矩。欲得其意。喜於見歸。爲除處所。意氣周密。人有謂玉都者。禍至無日。何宜爲其主乎。玉都因事遠出。家人不復占問。暑則鬱蒸。



寒則凜凍。且饑且渴。如此一年。矩素直亮。衆談同愁。冀亦舉寤。轉薄爲厚。上補從事中郎。復爲尚書令。五卿三公。爲國光鎮。王都慙悔自絕。司徒中山祝恬字伯休。公車徵。道得溫病。過友人鄴令謝著。著拒不通。因載病去。至汲。積六七日。止客舍中。諸生曰。今君所苦浼結。困無醫師。聞汲令好事。欲往語之。恬曰。謝著我舊友也。尚不相見。視汲令。初不相知。語之何益。歟。生命也。醫藥曷爲。諸生事急。坐相守。吉凶莫見。收舉便至寺門口。白。時令汝南應融。義高聞之。驚愕。卽嚴

便出。徑詣牀蓐。手自收模。對之垂涕。曰。伯休不世英  
才。當爲國家幹輔。人何有生相知者。默止客舍。不爲  
人所知。邂逅不自貞哉。家上有尊老。下有弱小。願相  
隨。俱入解傳。伯休辭讓。融遂不聽歸。取衣車厚其薦  
蓐。躬自御之。手爲丸藥。口嘗饘粥。身自分熱。三四日  
間。加甚劣極。便制衣棺器。送終之具。後稍加損。又謂  
伯休吉凶。不諱憂怖。交心間。羸作備具。相對悲喜。宿  
止傳中數十餘日。伯休彊健入舍。後室家酣宴。乃別。  
伯休到。拜侍中尚書僕射。令豫章太守大將軍從事。



中郎義高爲廬江太守。八年遭母喪，停柩官舍，章百餘上得聽行服未闋，而恬拜司隸，薦融自代。歷典五郡，名冠遠近。著去鄴，淺薄流聞，不爲公府所取。司徒潁川韓演伯南爲丹陽太守，坐從兄季朝爲南陽太守刺探尚書，演法車徵以非身中贓，豐道路聽其從容。至蕭，蕭令吳斌演同歲也，未至謂其賓從到蕭，乃一相勞，而斌內之狴犴，堅其鑕挺，躬將兵馬送之出境。從事汝南閻符迎之於杼秋，相得，令止傳舍，解其桎梏，入與相見，爲致餼。異曰：「明府所在流稱，今



以公徵往便原除不宜深入以介意意氣過於所望到亦遇赦其間無幾演爲沛相斌去官乃臨中台首辟符焉

太傅汝南陳蕃傳舉去光祿勳還到臨潁巨陵亭從者擊亭卒數下亭長閉門收其諸生人客皆厭毒痛欲復收蕃蕃曰我故大臣有罪州郡尚當先請今約勅兒客無素幸皆坐之何謂乃欲相及相守數時會行亭掾至困乃得免時令范伯弟亦卽殺其亭長蕃本召陵父梁父令別仕平與其祖東太守家在召



陵歲時往祠，以先人所出重難解亭止諸家舍。時令劉子興亦本此庸，不肯出候，股肱爭之，爾乃會其冢上，蕃持板迎之，長跪，令徐乃下車，卽坐，不命去板，辭意又不謙恪，蕃深忿之，令去顧，賓客平輿老夫何欲召陵令哉，不但爲諸家故耶。而爲小豎子所慢，孔子曰：假我數年乎？其明年桓帝赫然誅五侯，鄧氏海內望風草偃，子興以臆疾見彈，埋於當世矣。蕃起於家，爲尚書僕射、太中大夫、太尉。謹按尚書曰：人惟求舊，詩云：雖有兄弟，不如友生。論



語久要不忘平生之言。周禮九兩友以任得民。是以  
隋會圖其身而不遺其友。鮑叔度其德而固推管子。  
厥後陵遲。彌已凋翫。伐木爲鳥鳴之刺。谷風有弃予  
之怨。陳餘張耳。攜手遯秦。友猶父子。及據國爭權。還  
爲豺虎。自漢所稱王貢彈冠。蕭朱結綬。博育復隙。其  
終始以交爲難。況容悅偶合。而能申固其好者哉。故  
長平之吏。移於冠軍。魏其之客。移於武安。鄭當汲黯。  
亦旋復然。翟公疾之。乃書其門。一歎。一生。乃知交情。  
一貴。一賤。交情乃見。自古患焉。非直今也。韓信寵秩



出跨下之人。斯難能也。安國不念舊惡。合禮中平。李  
廣因威歸忿。非義之禮。宣尼暨陳。皆降而復升。兼濟  
天下。唯虞卿逼於彊秦。獨善其身。續述篇籍。垂訓後  
昆。昔子夏心戰則癰。道勝如肥。何必高祿豐爵。以爲  
融懿也。

風俗通義卷七終





風俗通義卷八

祀典

禮天子祭天地山川歲徧春秋國語凡禘郊宗祖報此五者國之典禮、加以社稷山川之神、皆有功烈於民者也、及前哲令德之人、所以爲質者也、及天之三辰、所昭仰也、地之五行、所生殖也、九州名山川澤所出財用也、非是族也、不在祀典、禮矣、論語非其鬼而祭之、諂也、又曰淫祀無福、是以泰山不享季氏之旅、而易美西鄰、禴祭蓋重祀而不貴牲、敬實而不



求華也。自高祖受命，郊祀祈望，世有所增。武帝尤敬鬼神，于時盛矣。至平帝時，天地六宗已下，及諸小神，凡千七百所。今營、禺夷、泯宰、器闕亡，蓋物盛則衰，自然之道。天其或者欲反本也。故記敘神物曰：祀典也。

先農

謹按春秋左氏傳曰：夏四月三卜郊，不從，乃免牲。孟獻子曰：吾乃今而知有卜筮。夫郊祀后稷以祈農事也，是故啟蟄而郊，郊而後耕。今既耕而卜郊，宜其不從也。周四月，今二月也。先農之時也。孝文帝二年，正



月詔曰農者天下之本其開籍田朕躬帥耕以給宗廟粢盛今民間名曰田官古者使民如借故曰籍田

### 社神

孝經說社者土地之主土地廣博不可徧敬故封土以爲社而祀之報功也周禮說二十五家置一社但爲田祖報求詩云乃立冢土文曰以御田祖以祈甘雨

謹按春秋左氏傳曰共工有子曰勾龍佐顓頊能平九土爲后土故封爲土公祀以爲社非地祇

稷神

孝經說、稷者五穀之長、五穀衆多、不可徧祭、故立稷而祭之。

謹按春秋左氏傳、有烈山氏之子曰柱、能殖百穀蔬菓、故立以爲稷正也。周棄亦以爲稷正也。周棄亦以爲稷、自商以來祀之、禮緣生以事歿、故社稷人祀之也。則祭稷穀不得稷米、稷反自食也。而邾文公用繒子、子次睢之社、司馬子魚諫曰、古者六畜不相爲用、祭以爲人也。民人神之主也、用人其誰享之。詩云、吉



日庚午。旣伯旣禱。豈復殺馬以祭馬乎。孝經之說於斯悖矣。米之神爲稷。故以癸未日祠稷於西南。水勝火爲金相也。

### 靈星

俗說縣令問主簿靈星在城東南何法。主簿仰答曰。唯靈星所以在東南者亦不知也。

漢書郊祀志。高祖五年。初置靈星祀。后稷也。歐爵簋揚田農之事也。

謹按祀典旣以立稷。又有先農。無爲靈星復祀后稷。

也。左中郎將賈逵說以爲龍第三有大田星。靈者神也。故祀以報功。辰之神爲靈星。故以壬辰日祀靈星於東南。金勝木爲土相也。

竈神

禮器記曰。臧文仲安知禮。燔柴於竈。竈者老婦之祭也。故盛於盆。尊於瓶。

周禮說頤頤頤氏有子曰黎。爲祝融。祀以爲竈神。

謹按明堂月令。孟冬之月。其祀竈也。五祀之神。王者所祭。古之神聖。有功德於民。非老婦也。漢記南陽陰



子方積恩好施喜祀竈臘日晨炊而竈神見再拜受神時有黃羊因以祀之其孫識執金吾封原鹿侯興衛尉鮑陽侯家凡二侯牧守數十其後子孫常以臘日祀竈以黃羊。

### 風伯

楚辭說後飛廉使奔屬飛廉風伯也謹按周禮以柳燎祀風師風師者箕星也箕主簸揚能致風氣易巽爲長女也長者伯故曰風伯鼓之以雷霆潤之以風雨養成萬物有功於人王者祀以報

功也。戊之神爲風伯。故以丙戌日祀於西北。火勝金。爲木相也。

雨師

春秋左氏傳說共工之子爲元冥師。鄭大夫子產禮於元冥。雨師也。

謹按周禮以槱燎祀雨師。雨師者畢星也。詩云。月離于畢。俾滂沱矣。易師卦也。土中之衆者莫若水。衆者師也。雷震百里。風亦如之。至于太山不崇朝而徧雨天下。異於雷風。其德散大。故獨稱師也。丑之神爲



雨師故以巳丑日祀雨師於東北土勝水爲火相也

桃梗 葦茭 畫虎

謹按黃帝書上古之時有荼與鬱壘昆弟二人性能執鬼度朔山上章桃樹下餽閱百鬼無道理妄爲人禍害荼與鬱壘縛以葦索執以食虎於是縣官常以臘除夕飾桃人垂葦茭畫虎於門皆追效於前事冀以衛凶也桃梗梗者更也歲終更始受介祉也戰國策齊語孟嘗君將西入秦諫者千數而弗聽蘇秦欲止之曰臣之來也過於牆上有土偶人焉與桃梗相



與語謂土偶人曰子西岸之土也。堦子以爲人。至歲八月天霖雨。澗水至則子燼矣。曰不然。吾西岸之土也。燼則復西岸耳。子東國桃木也。削子以爲人。隆雨下。澗水至。洗子而汎汎。將何如矣。夫秦四塞之國。譬若虎口。而入之則不知其可。孟嘗乃止。春秋左氏傳曰。魯襄公朝楚。會楚康王卒。楚人使公親禭。公患之。叔孫穆叔曰。祓殯而禭。則有帛也。乃使巫以桃茢先祓殯。楚人弗禁。旣而悔之。古者日在北陸而藏冰。深山窮谷其藏之也。黑牡秬黍以享司寒。其出之也。桃



弧棘矢以除其災也。葦茭傳曰：葦葦有藂，呂氏春秋  
湯始得伊尹，祓之於廟，薰以葦葦。周禮卿大夫之子  
名曰門子，論語誰能出不由戶，故用葦者，欲人子孫  
蕃殖，不失其類。有如葦葦，茭者，交易陰陽代興也。虎  
者陽物，百獸之長也，能執搏挫銳，噬食鬼魅，今人卒  
得惡遇，燒燭虎皮飲之，擊其爪，亦能辟惡，此其驗也。

### 雄雞

俗說雞鳴將旦，爲人起居，門亦昏閉晨開，扞難守固，  
禮貴報功，故門戶用雞也。



青史子書說雞者東方之牲也歲終更始辨秩東作萬物觸戶而出故以雞祀祭也

太史丞鄧平說臘者所以迎刑送德也大寒至常恐陰勝故以戌日臘戌者溫氣也用其氣日殺雞以謝刑德雄著門雌著戶以和陰陽調寒配水節風雨也謹按春秋左氏傳周大夫賓孟適郊見雄雞自斷其尾歸以告景王曰憚其爲犧也山海經曰祠鬼神皆以雄雞魯郊祀常以丹雞祀日以其朝聲赤羽去魯侯之咎今人卒得鬼刺并悟殺雄雞以傳其心上病



賊風者作雞散東門。雞頭可以治蠱。由此言之雞主以禦死辟惡也。

### 殺狗磔邑四門

俗說狗別賓主善守禦故著四門以辟盜賊也。

謹按月令九門磔禳以畢春氣蓋天子之城十有二門東方三門生氣之門也不欲使死物見於生門故獨於九門殺犬磔禳犬者金畜禳者却也抑金使不害春之時所生令萬物遂成其性火當受而長之故曰以畢春氣功成而退木行終也。



太史公記秦德公始殺狗磔邑四門以禦蠱菑。今人殺白犬以血題門戶。正月白犬血辟除不祥。取法於此也。

臘

謹按韓子書山居谷汲者臘臘而買水。楚俗常以十二月祭飲食也。又曰嘗新始殺也。食新曰臘臘。

臘

謹按禮傳夏日嘉平殷曰清祀周曰大蜡漢改爲臘。臘者獵也。言田獵取獸以祭祀其先祖也。或曰臘者



接也。新故交接，故大祭以報功也。漢家火行衰於戊，故曰臘也。

祖

謹按禮傳，共工之子曰脩，好遠遊，舟車所至，足跡所達，靡不窮覽，故祀以爲祖神。祖者，徂也。詩云：韓侯出祖，清酒百壺。左氏傳：襄公將適楚，夢周公祖而遣之，是其事也。詩云：吉日庚午，漢家盛於午，故以午祖也。

禊

謹按周禮，男巫掌望祀望衍，旁招以茅，女巫掌歲時

以祓除釁浴。禊者潔也。春者蠢也。蠢蠢搖動也。尚書以殷仲春。厥民析。言人解療生疾之時。故於水上釁潔之也。巳者祉也。邪疾已去。祈分祉也。

司命

謹按詩云。芄芃械櫜。薪之標之。周禮標燎司中司命文昌也。司中文昌上六星也。標者積薪燔柴也。今民間獨祀司命耳。刻木長尺二寸爲人像。行者檐篋中。居者別作小屋。齊天地大尊重之。汝南餘郡亦多有。皆祠以腊。率以春秋之月。



風俗通義卷九

恠神

禮天子祭天地五嶽四瀆諸侯不過其望也大夫五祀士門戶庶人祖蓋非其鬼而祭之諂也又曰淫祀無福是以隱公將祭鍾巫遇賊蕩氏二世欲解淫神聞樂劫弑仲尼不許子路之禱而消息之節平荀螢不從桑林之祟而蓄侯之疾問由是觀之則淫躁而畏者災自取之厥咎饗應反誠據義內省不疚者物莫能動禍轉爲福矣傳曰神者中也恠者疑也孔子

碑土之惟爲墳爭論語子不語怪力亂神故采其見  
著者曰惟神也

世間多有見怪驚怖以自傷者

謹按管子書齊公出於澤見衣紫衣大如轂長如轆  
拱手而立還歸寢疾數月不出有皇士者見公語驚  
曰物惡能傷公公自傷也此所謂澤神委蛇者也唯  
霸主乃得見之於是桓公欣然笑不終日而病愈予  
之祖父柳爲汲令以夏至日詣見主簿杜宣賜酒時  
北壁上有懸赤弩照於杯形如蛇宣畏惡之然不敢



不飲其日便得胸腹痛切妨損飲食大用羸露攻治萬端不爲愈後郴因事過至宣家闕視問其變故云畏此蛇蛇入腹中郴還聽事思惟良久顧見懸弩必是也則使門下史將鈴下待徐扶輦載宣於故處設酒杯中故復有蛇因謂宣此壁上弩影耳非有他恠宣遂解甚夷憚由是瘳平官至尚書歷四郡有威名焉

世間多有惡夢變難必效

謹按晏子春秋齊景公病水十日夜夢與二日鬪而



不勝。晏子朝。公曰。吾夢與二日鬪。寡人不勝我。其死也。晏子對曰。請召占夢者。立於閭。使以車迎。召占夢者至。曰。曷爲見召。晏子曰。公夢與二日鬪。不勝。恐必死也。占夢者曰。請反具書。晏子曰。無反書。公無所病。病者陰也。日者陽也。一陰不勝二陽。公病將已。居三日。公病大愈。且賜占夢者曰。此非臣之功也。晏子教臣對也。公召晏子。將賜之。晏子曰。占夢者以臣之言對。故有益也。使臣身言之。則不信矣。此占夢者之力也。臣無功焉。公召吏而使兩賜之。晏子不爲奪。人之



功占夢者不蔽人之能。

城陽景王祠

謹按漢書朱虛侯劉章齊悼惠王子高祖孫也宿衛  
長安年二十有氣力高后攝政諸呂擅恣章私忿之  
嘗入侍宴飲章爲酒吏自請曰臣將種也請得軍法  
行酒有詔可酒酣章進歌舞已而復曰請爲太后耕  
田歌太后笑曰顧汝父知田耳若生而爲王者子安  
知田乎曰臣知之深耕廣種立苗欲疏非其種者鋤  
而去之太后默然頃之諸呂有亡酒者章拔劍追斬



之而還報曰。有亡酒一人。臣謹行軍法斬之。太后左右大驚。業許之矣。無以罪也。自是諸呂畏憚。雖大臣亦皆依之。高后崩。諸呂作亂。欲危社稷。章與周勃共誅滅之。尊立文帝。封城陽王。賜黃金千斤。立二年薨。城陽今莒縣是也。自琅琊青州六郡及渤海都邑鄉亭聚落。皆爲立祠。造飾五二千石車。商人次第爲之立服帶綬。備置官屬。烹殺謳歌。紛籍連日。轉相誑曜。言有神明。其譴問禍福立應。歷載彌久。莫之匡糾。唯樂安太傅陳蕃。濟南相曹操。一切禁絕。肅然政清。陳



曹之後稍復如故。安有鬼神能爲病者哉。予爲營陵令。以爲章本封朱虛。并食此縣。春秋國語。以勞定國能御大災。凡在於他尚列祀典。章親高祖之孫。進說耕田軍法。行酒時固有大志矣。及誅諸呂。尊立太宗。功冠天下。社稷已寧。同姓如此。功烈如彼。餘郡禁之可也。朱虛與莒宜常血食。於是乃移書曰。到聞此俗舊多淫祀。靡財妨農。長亂積惑。其侈可忿。其愚可懲。昔仲尼不許子路之禱。晉悼不解桑林之祟。死生有命。吉凶由人。哀哉黔黎。漸染迷謬。豈樂也哉。莫之徵。



耳。今條下禁申約吏民爲陳利害。其有犯者便收朝  
廷。若私遺脫。彌彌不紀。主者髡截。歎無反已。城陽景  
王縣甚尊之。惟王弱冠。內侍帷幄。呂氏恣睢。將危漢  
室。獨見先識。權發酒令。抑邪扶正。忠義洪毅。其歆禋  
祀禮亦宜之。於駕乘烹殺倡優男女雜錯。是何謂也。  
三邊分拏。師老器弊。朝廷旰食。百姓囂然。禮興在有  
年。饑則損自今。聽歲再祀。備物而已。不得殺牛遠迎。  
他倡賦會宗落造設紛華。方廉察之明爲身計而復  
僭失罰與上同。明除見處。勿後中覺。



九江遂適有唐居山名有神衆巫共爲取公姬  
歲易男不得復娶女不得復嫁百姓苦之

謹按時太守宋均到官主者白出錢給聘男子女均  
曰衆巫與神合契知其旨欲卒取小民不相當於是  
勅條巫家男女以備公姬巫扣頭服罪乃殺之是後  
遂絕

會稽俗多淫祀好卜筮民一以牛祭巫祝賦歛  
受謝民畏其口懼被祟不敢拒逆是以財盡於  
鬼神產匱於祭祀或貧家不能以時祀至竟言



不敢食牛害或發病且死先爲牛鳴其畏懼如此。

謹按時太守司空第五倫到官先禁絕之掾吏皆諫倫曰夫建功立事在敢斷爲政當信經義言淫祀無福非其鬼而祭之諂也律不得屠殺少齒令鬼神有知不妄飲食民間使其無知又何能禍人遂移書屬縣曉諭百姓民不得有出門之祀督課部吏張設罪罰犯尉以下坐祀依託鬼神恐怖愚民皆按論之有屠生輒行罰民初恐怖頗搖動不安或接祝妄言倫



勅之愈急。後遂斷無復有禍祟矣。

### 鮑君神

謹按汝南鮑陽有於田得麤者其主未往取也商車十餘乘經澤中行望見此麤著繩因持去念其不事持一鮑魚置其處有頃其主往不見所得麤反見鮑魚澤中非人道路。惟其如是大以爲神轉相告語治病求福多有效驗因爲起祀舍衆巫數十帷帳鍾鼓方數百里皆來禱祀號鮑君神其後數年鮑魚主來歷祠下尋問其故曰此我魚也當有何神上堂取之



遂從此壞傳曰物之所聚斯有神言人共獎成之耳

李君神

謹按汝南南頓張助於田中種禾見李核意欲持去  
顧見空桑中有土因殖種以餘漿溉灌後人見桑中  
反復生李轉相告語有病目痛者息陰下言李君令  
我目愈謝以一豚目痛小疾亦行自愈衆犬吠聲因  
盲者得視遠近翕赫其下車騎常數千百酒肉滂沱  
間一歲餘張助遠出來還見之驚云此有何神乃我  
所種耳因就斫也



石賢士傳

謹按汝南汝陽彭氏墓路頭立一石人、在石獸後、田家老母到市買數片餌、暑熱行疲頓息石人下小憩、遺一片餌去、忽不自覺、行道人有見者、時客適會問、因有是餌、客聊調之、石人能治病、愈者來謝之、轉語頭痛者摩石人頭、腹痛者摩其腹、亦還自摩他處、於此凡人病自愈者、因言得其福力、號曰賢士、輜輶擊帷帳絳繒、絲竹之音、聞數十里、尉部常往護視、數年亦自歇、未復其故矣、

世間多有亡人鬼持其家語聲氣所說良是

謹按陳國張漢直到南陽從京兆尹延叔堅讀左氏傳行後數月鬼物持其女弟言我痛死喪在陌上常苦饑寒操一量不措挂柴後昔上傳子方送我五百錢在北塘中皆亡取之又李幼一頭牛文券在書篋中往求索之悉如其言婦尚不知有此女新從犂家來非其所受人哀傷益以爲審父母諸弟衰經到來迎喪去精舍數里遇漢直與諸生十餘人相追漢直顧見其家恠其如此家見漢直謂其鬼也惆悵良久



漢直乃前爲父拜說其本末且悲且喜凡所聞見若此非一夫死者漸也鬼者歸也精氣消越骨肉歸于土也夏后氏用明器殷人用祭器周人兼用之視民疑也子貢問孔子歿者其有知乎曰賜爾死自知之由未晚也董無心云杜伯死親射宣王於鎬京予以爲桀紂所殺足以成軍可不須湯武之衆古事旣察且復以今驗之人相啖食甚於畜生凡菜肝鱉臠尚能病人人用物精多有生之最靈者也何不芥蒂於其胷腹而割裂之哉猶死者無知審者矣而時有漢



直爲狗鼠之所爲

世間亡者多有見神語言飲食其家信以爲是  
益用悲傷

謹按司空南陽來季德停喪在殯忽然坐祭牀上顏色服飾聲氣熟是也孫兒婦女以次教誠事有條貫鞭撻奴婢皆得其過飲食飽滿辭訣而去家人大哀剝斷絕如是三四家益厭苦其後飲醉形壞但得老狗便朴殺之推問里頭沽酒家狗

世間多有狗作變恠朴殺之以血塗門戶然衆



得咎殃

謹按桂陽太守汝南李叔堅。少時爲從事在家。狗人立行。家言當殺之。叔堅云。犬馬諭君子。狗見人行。效之何傷。叔堅見縣令還。解冠榻上。狗戴持走。家大驚。時復云。誤觸冠。冠纓挂著之耳。狗於竈前蓄火。家益恠恠。復云。兒婢皆在田中。狗助蓄火。幸可不煩鄰里。此有何惡。里中相罵。不言無狗恠。遂不肯殺。後數日。狗自暴死。卒無纖介之異。叔堅辟大尉掾。固陵長原武令。終享大位。子條蜀郡都尉。威龍司徒掾。凡變恠。



皆婦女下賤。何者。小人愚而善畏。欲信其說。類復裨增。文人亦不證察。與俱悼懾。邪氣承虛。故速咎證。易曰。其亡斯自取災。若叔堅者。心固於金石。妖至而不懼。自求多福。壯矣乎。

昔晉文公出獵。見大蛇。高如隄。其長竟路。文公曰。天子見妖。則脩德。諸侯脩政。大夫脩家。士脩身。乃卽齋館。忘食與寢。請廟曰。孤犧牲。瘞蠡幣帛。不厚。罪一也。遊逸無度。不卹國政。罪二也。賦役重數。刑罰慘尅。罪三也。有三罪矣。敢逃死乎。其役守蛇吏。夢天殺蛇。曰。



何故當聖君道爲。及明視之。則已臭爛。

武帝時迷於鬼神。尤信越巫。董仲舒數以爲言。武帝欲驗其道。令巫詛仲舒。仲舒朝服南面。誦詠經論。不能傷害。而巫者忽死。

世間多有精物。妖怪百端。

謹按魯相右扶風臧仲英爲侍御史。家人作食。設案歛。有不清塵土。投汙之。炊臨熟。不知釜處。兵弩自行。火從篋籠中起。衣物燒盡。而籠故完。婦女婢使悉亡其鏡。數日堂下擲庭中。有人聲言汝鏡。孫女年三四

歲亡之求不能得。二三日乃於清中糞下啼。若此非  
一。汝南有許季山者，素善卜卦，言家當有老青狗物。  
內中婉御者益喜與爲之。誠欲絕殺此狗，遣益喜歸  
鄉里，皆如其言。因斷無纖介。仲英遷太尉長史。  
汝南汝陽西門亭有鬼魅，賓客宿止有死亡，其厲厭  
者皆亡髮失精。尋問其故，云先時頗已有怖物，其後  
郡侍奉掾宜祿鄭奇來去亭六七里，有一端正婦人  
乞得寄載。奇初難之，然後上車入亭，趨至樓下吏卒  
檄白樓不可上，云我不惡也。時亦昏冥，遂上樓與婦



人棲宿未明發去。亭卒上樓掃除見死婦大驚走白  
亭長。亭長擊鼓會諸廬吏共集診之。乃亭西北八里  
吳氏婦新亡。以夜臨殯火滅。火至失之家。卽持去。奇  
發行數里腹痛。到新頓利陽亭加劇物故。樓遂無敢  
復上。

謹按北部督郵西平到伯夷年三十所。大有才決。長  
沙太守到君章孫也。日晡時到亭勅前導人錄事掾  
白。今尚早。可至前亭。曰欲作文書便留。吏卒惶怖言  
當解去。傳云督郵欲於樓上觀望。亟掃除。須臾便上。



未冥樓鐙階下復有火。勅我思道不可見火滅去。吏知必有變。當用赴照。但藏置壺中耳。既冥。整服坐誦六甲孝經。易本訖。臥有頃。更轉東首。以絮巾結兩足。幘冠之。密拔劍解帶。夜時有正黑者四五尺稍高。走至柱屋。因覆伯夷。持被掩足。蹠脫幾失。再三。徐以劍帶擊魑脚。呼下火上照。視老狸正赤。略無衣毛。持下燒殺。明旦發樓屋。得所髡人。結百餘。因從此絕。伯夷。寧孝廉。益陽長。楚辭云。鼈令屍亡。泝江而上。到崕山下。撫起蜀人神。之尊立爲王。漢淮陽太守尹齊共治。



嚴酷死未及殮。怨家欲燒之。屍亦飛去。見於書傳。樓上新婦。豈虛也哉。

世間多有伐木血出以爲怪者

謹按桂陽太守江夏張遼叔高。去鵬令家居買田。田中有大樹十餘圍。扶疎蓋數畝地。播不生穀。遣客伐之。木中血出。客驚怖歸。具事白叔高。大怒。老樹汁出。此何等血。因自嚴行。復斫之。血大流灑。叔高使先斫其枝。上有一空處。白頭公可長四五尺。忽出往赴叔高。高乃逆格之。凡殺四頭。左右皆怖伏地。而叔高恬

如也。徐熟視非人非獸也。遂伐其木。其年應司空辟。侍御史兗州刺史。以二千石之尊。過鄉里。薦祝祖考。白日繡衣。榮羨如此。其禍安居。春秋國語曰。木石之恠。夔魍魎。物惡能害人乎。

世間多有蛇作恠者

謹按車騎將軍巴郡馮緄。鴻卿。爲議郎。發綬笥。有二赤蛇。可長二尺。分南北走。大用憂怖。許季山孫。字寧方。得其先人秘要。緄請使卜。云君後二歲。當爲邊將。東北四五里官。以東爲名。復五年。爲大將軍南征。此



吉祥鴻卿意威名解實應且惑。居無幾拜尚書遼東  
太守廷尉太常會武陵蠻夷黃高攻燒南郡鴻卿以  
威名素著選登亞將統六師之任奮號虎之勢後爲  
屯騎校尉將作大匠河南尹復再臨理官紀數方面  
如寧方之言春秋外蛇與內蛇鬪文帝時亦復有此  
傳志著其云爲而鴻卿獨以終吉豈所謂或得神以  
昌乎。

世間人家多有見赤白光爲變恠者

謹按太尉梁國橋元公祖爲司徒長史五月末所於



中門外臥。夜半後見東壁正白如開門。明呼問左右。左右莫見。因起自往。手收莫之。壁白如故。還牀復見之。心大悸動。其旦予適往候之。語次相告。因爲說鄉人有董彥興者。卽許季山外孫也。其探頤索隱。窮神知化。雖睦孟京房。無以過也。然天性褊狹。羞於卜術。間來候師王叔茂。請起往迎。須臾便與俱還。公祖虛禮盛饌。下席行觴。彥興自陳。下土諸生。無他異分。幣重言甘。誠有踧踖。頗能別者。願得從事。公祖辭讓再三。爾乃聽之曰。府君當有恠白光如門明者。然不爲



害也。六月上旬雞鳴時，南家哭聲十也。到秋節遷此  
行郡，以金爲名位。至將軍三公，公祖曰：「惟異如此，救  
族不暇，何能致望於所不圖？」此相饒耳。到六月九日  
未明，太尉楊秉暴薨。七月二日，拜鉅鹿太守。鉅邊有  
金，後爲度遼將軍。歷登三事。今妖見此而應在彼，猶  
趙鞅夢童子裸歌而吳入郢也。

風俗通義卷九終

風俗通卷九

世所慕者平好相而莫入能者

今所慕者強謀軍國然三事今知是

世所大暢然集暴強子民二百餘里

其不強治能強望外民不隨而附

計所以金鐵治民平能軍之公

世所六月士更勝他世而守地



風俗通義卷十

山澤

孝經曰。聖不獨立。智不獨治。神不過天地同靈。造虛由立五嶽。設三台。傳曰。五嶽禪三公。四瀆視諸侯。其餘或伯或子男大小爲差。尚書咸秩無文。王者報功。以次秩之。無有文也。易稱山澤通氣。禮名山大澤不以封諸侯。故積其類曰山澤也。

五嶽

東方泰山。詩云。泰山巖巖。魯邦所瞻。尊曰岱宗。岱者

長也。萬物之始，陰陽交代，雲觸石而出，膚寸而合，不  
崇朝而徧雨天下。其惟泰山乎？故爲五嶽之長。王者  
受命，易姓改制，應天功成，封禪以告天地。孔子曰：封  
泰山，禪梁父，可得而數。七十有二。岱宗廟在博縣西  
北三十里。山虞長守之。十月日合凍，臘月日涸凍。正  
月日解凍，皆太守自侍祠。若有穢疾，代行事。法七十  
萬五千三牲，燔柴上福脯三十朐。縣次傳送京師。四  
嶽皆王同禮。南方衡山，一名霍。霍者，萬物盛長垂枝  
布葉霍然而大。廟在廬江潯縣。西方華山，華者華也。



萬物滋然變華於西方也。廟在宏農華陰縣。北方恒山，恒者常也。萬物伏藏於北方，有常也。廟在中山上曲陽縣。中央曰嵩高，嵩者高也。詩云：嵩高惟嶽，峻極于天。廟在潁川陽城縣。

謹按尚書歲二月東巡狩，至于岱宗，柴。岱宗泰山也。望秩于山川，遂見東后，東后諸侯也。合時月正日，同律度量衡，修五禮五玉三帛二牲一死贊。五月南巡狩，至于南嶽，南嶽衡山也。八月西巡狩，至于西嶽，西嶽華山也。十二月北巡狩，至于北嶽，北嶽恒山也。皆



如岱宗之禮。中嵩高也。王者所居故不巡焉。巡者循也。狩者守也。道德太平。恐遠不同化。幽隱有不得所者。故自親行之也。所以五載一出者。蓋五歲再閏。天道大備。嶽者。埆坊考德黜陟幽明也。

四瀆

河出燉煌塞外崑崙山。發源注海。易河出圖。聖人則之。禹貢九河既道。詩曰河水洋洋。廟在河南滎陽縣。河隄謁者掌四瀆禮祠與五嶽同。江出蜀郡湔流互微。外嶧山入海。詩云江漢陶陶。禹貢江漢朝宗于海。



廟在廣陵江

出南陽平氏桐栢大復山東南

入海禹貢海岱及淮淮沂其乂詩云淮水湯湯廟在  
平氏縣濟出常山房子贊皇山東入沮禹貢浮于汶  
達于濟廟在東郡臨邑縣

謹按尚書大傳禮三正記江河淮濟爲四瀆瀆者通  
也所以通中國垢濁民陵居殖五穀也江者貢也珍  
物可貢獻也河者播爲九流出龍圖也淮者均均其  
務也濟者齊齊其度量也

林

謹按詩云殷商之旅其會如林傳曰山林之士往而不能反禮記將主泰山必先有事於配林林樹木之所聚生也。今配林在泰山西東五六里予前臨郡因侍祀之行故往觀之樹木蓋不足言猶七八百載間有衰索乎。

麓

謹按尚書堯禪舜納于大麓麓林屬於山者也。春秋沙麓崩傳曰麓者山足也。詩云瞻彼旱麓易稱卽鹿無虞以從禽也。



京

謹按爾雅正之絕高大者爲京。謂非人力所能成。乃天地性自然也。春秋左氏傳莫之與京。國語趙文子與叔向遊於九京。今京兆京師。其義取於此。

陵

謹按詩云如山如陵。易曰伏戎于莽。升其高陵。又天險不可升。地險山川邱陵。春秋左氏傳曰。殽有二陵。其南陵夏后臯之墓也。其北陵文王之所避風雨也。殽在宏農澠池縣。其語曰。東殽西殽。澠池所高。國語

周單子會晉厲公於加陵。爾雅曰：陵莫大於加陵。言其獨高厲也。陵有天性自然者。今王公墳壟各稱陵也。

止

謹按尚書：民乃降止度土。堯遭洪水，萬民皆山棲巢居以避其害。禹決江疏河，民乃下止。營度夷墳之場，而邑落之故止之。字二人立一上，一者地也。四方高中央下，像形也。詩云：至于頓止。宛止之下，論語他人之賢止陵也。爾雅曰：天下有名止五，其三在河南二。



在河北

墟

謹按尚書舜生姚墟傳曰郭氏之墟墟者虛也郭氏古之諸侯善善不能用惡惡不能去故善人怨焉惡人存焉是以敗爲止墟也今故廬居處高下者亦名爲墟姚墟在濟陰城陽縣帝顓頊之墟闕伯之墟是也

阜

謹按詩云如山如阜春秋左氏傳魯公伯禽宅曲阜

之地阜者茂也。言平地隆踊不屬於山陵也。今曲阜在魯城中委曲長七八里。雒北芒坂卽爲阜也。

培

謹按春秋左氏傳培塿無松柏言其卑小。部者阜之類也。今齊魯之間田中少高卬名之爲部矣。

藪

謹按爾雅藪者澤也。藪之爲言厚也。草木魚鱉所以厚養人君與百姓也。魯有秦野。晉有秦陸。秦有陽紆。宋孟諸。楚有雲夢。吳有具區。齊有海隅。燕有昭餘。



齊鄭有圃田，周有焦、漢、濩。今漢有九州之藪。楊州曰具區，在吳縣之西。荊州曰雲夢，在華容縣南。今有雲夢、長掌之。豫州曰圃田，在中牟縣西。青州曰孟諸，不知在何處。兖州曰大野，在鉅鹿縣北。雍州曰弦蒲，在汧縣北。蒲谷亭，幽州曰奚養，在虎縣東。冀州曰泰陸，在鉅鹿縣西北。并州曰昭餘祁，在鄆縣北。其一藪推求未得其處，尚書紂爲逋逃淵藪。春秋左氏傳曰：山藪藏疾。又曰：藪之薪蒸，虞侯守之是也。

澤

謹按尚書雷夏既澤。詩云彼澤之陂。有蒲與荷。傳曰。水草交厝。名之爲澤。澤者。言其潤澤萬物。以阜民用也。春秋左氏傳曰。澤之芟蒲。舟鮫守之。韓詩內傳。舜漁雷澤。雷澤在濟陰城陽縣。

沉

謹按傳曰。沉者莽也。言其平望莽莽無涯際也。沉澤之無水。斥鹵之類也。今俗語亦曰沉。

沛

謹按尚書春秋公羊傳。齊景公循海面東。師大陷沛。



澤之中。左氏傳齊景田于沛。招虞八以弓。傳曰。送逸禽之超大沛。沛者草木之蔽茂。禽獸之所蔽匿也。

### 湖

謹按春秋國語。伍子胥諫吳王。與我爭五湖之利。非越乎。及越滅吳。范蠡乘扁舟於五湖。湖者言流瀆四面所潏也。川澤所仰以溉灌也。今廬江臨丹陽蕪湖縣是也。

### 陂

謹按傳曰。陂者繁也。言因下鍾水以繁利萬物也。今

陂皆以溉灌。今汝南富陂縣是也。

渠

謹按傳曰。渠者水所居也。秦時韓人鄭國穿渠。孝武帝時。趙中大夫白公復穿渠。故其語曰。田於何所。池陽谷口。趙國在前。白渠起後。舉鍾爲雲。決渠爲雨。涇水一石。其塹數斗。且溉且糞。長我稷黍。衣食京師。數百萬口。又鄭當時穿渠以利漕道。若此。非一官民俱賴其饒焉。

溝



謹按周禮溝者溝也廣四尺深四尺漢書高祖與項羽要割鴻溝以東爲楚是也鴻溝在滎陽縣

洫

謹按周禮十里爲成成間廣八尺深八尺故謂之洫論語曰禹盡力乎溝洫

風俗通義卷十終

屈作通

卷十

八

漢書曰高祖元年

封功臣于東漢

謝

要時節以東

西晉書曰



右風俗通十卷漢泰山太守汝南應劭仲遠撰按  
本傳云劭撰風俗通以辨物類名號識時俗嫌疑  
文雖不典後世服其洽聞凡所著述百三十六篇  
內風俗通義隋志三十一卷唐志作三十卷文獻  
通考惟存十卷而劭自序亦祇云一十卷或後人  
見此書散佚祇據現存成數爲說并序文改之耳  
陳氏謂餘略見庾仲容子鈔考後漢書五行志注  
於董逃烏臘之讖夜龍伯夏之妖引風俗通皆不  
見今本而廣韻及通鑑注引風俗通氏姓篇尤多

則其所可考見者又不止庾氏子鈔也今祇就叢  
書本校正其以風俗通名書說見自序不復論焉  
汝上王謨識



人物志

入性爲之原而情者性之流也性發  
於內情導於外而形色隨之故邪正  
態度變露莫狀溷而莫覩其真也惟  
至哲爲能以材觀情索性尋流照原  
而善惡之迹判矣聖人沒諸子之言

性者各膠一見以倡惑於後是俾馳  
辨鬪異者得肆其說蔓衍天下故學  
者莫要其歸而天理幾乎息矣予好  
闢古書於史部中得劉邵人物志十  
二篇極數萬言其述性品之上下材  
質之兼偏研幽摘微一貫於道若度



之長短權之輕重無銖髮蔽也大抵  
考諸行事而約人於中庸之域誠一  
家之善志也由魏至宋歷數百載其  
用尚晦而鮮有知者吁可惜哉矧蟲  
篆淺技無益於教者猶刊鏤以行於  
世是書也博而暢辨而不肆非衆說

之流也王者得之爲知人之龜鑑士  
君子得之爲治性修身之櫟栝其効  
不爲小矣予安得不序而傳之媿夫  
良金美玉簾櫳一啓而觀者必知其  
寶也宋阮逸撰



人物志目錄

卷上

九徵

體別

流業

材理

卷中

材能

利害

卷下

八錄

接識

英雄

八觀

卷下

七繆

效難

釋爭



人物志卷上

魏 廣平劉邵著

奉新羅蘭玉校

九徵第一

人物情性志氣不同  
徵神見貌形驗有九

蓋人物之本出乎情性。情性之理甚微而元。非聖人之察其孰能究之哉。凡有血氣者莫不含元一以爲質。稟陰陽以立性。體五行而著形。苟有形質。猶可卽而求之。凡人之質量中和最貴矣。中和之質必平淡無味。故能調成五材。變化應節。是故觀人察質必先察其平淡。而後求其聰明。聰明者陰陽之精。陰陽清



和則中獻外明。聖人淳耀。能兼二美。知微知章。自非  
聖人。莫能兩遂。故明白之士。達動之機。而暗於元慮。  
元慮之人。識靜之原。而困於速捷。猶火日外照。不能  
內見。金水內映。不能外光。二者之義。蓋陰陽之別也。  
若量其材質。稽諸五物。五物之徵。亦各著於厥體矣。  
其在體也。木骨。金筋。火氣。土肌。水血。五物之象也。五  
物之實。各有所濟。是故骨植而柔者。謂之宏毅。宏毅  
也者。仁之質也。氣清而朗者。謂之文理。文理也者。禮  
之本也。體端而實者。謂之貞固。貞固也者。信之基也。



觔勁而精者謂之勇敢。勇敢也者義之決也。色平而暢者謂之通微。通微也者智之原也。五質恒性故謂之五常矣。五常之別列爲五德。是故溫直而擾毅木之德也。剛塞而宏毅金之德也。愿恭而理敬水之德也。寬栗而柔立土之德也。簡暢而明砭火之德也。雖體變無窮猶依乎五質故其剛柔明暢貞固之徵著乎形容。見乎聲色發乎情味各如其象故心質亮直其儀勁固。心質休決其儀進猛。心質平理其儀安閑。夫儀動成容各有態度直容之動矯矯行行休容之



動業業踰踰德容之動顒顒印印夫容之動作發平  
心氣心氣之徵則聲變是也夫氣合成聲聲應律呂  
有和平之聲有清暢之聲有圓衍之聲夫聲暢於氣  
則實存貌色故誠仁必有溫柔之色誠勇必有矜奮  
之色誠智必有明達之色夫色見於貌所謂徵神徵  
神見貌則情發於目故仁目之精懿然以端勇膽之  
精曄然以彊然皆偏至之材以勝體爲質者也故勝  
質不精則其事不遂是故直而不柔則木勁而不精  
則力固而不端則愚氣而不清則越暢而不平則蕩



是故中唐之質異於此類五常。既備包以澹味五質。  
內充五精。外章是以目彩五暉之光也。故曰物生有  
形。形有神情。能知精神。則窮理盡性。性之所盡。九質  
之徵也。然則平陂之質在於神明。暗之實在於精。勇  
怯之勢在於筋。強弱之植在於骨。躁靜之決在於氣。  
慘懔之情在於色。衰正之形在於儀。態度之動在於  
容。緩急之狀在於言。其爲人也。質素平澹。中叡外朗。  
筋勁植固。聲清色懔。儀正容直。則九徵皆至。則純粹  
之德也。九徵有違。則偏雜之材也。三度不同。其德異



稱故偏至之材。以材自名。兼德之人。更爲美號。是故兼德而至。謂之中庸。中庸也者。聖人之目也。具體而微。謂之德行。德行也者。大雅之稱也。一至謂之偏材。偏材小雅之質也。一徵謂之依似。依似亂德之類也。一至一違。謂之間雜。間雜無恒之人也。無恒依似皆風人末流。末流之質。不可勝論。是以畧而不槩也。

體別第二

稟氣陰陽性有剛柔  
拘抗文質體越各別

夫中庸之德。其質無名。故鹹而不齲。淡而不醎。質而不縵。文而不績。能威能懷。能辨能訥。變化無方。以達



爲節。是以抗者過之。而拘者不逮。夫拘抗違中。改善  
有所章。而理有所失。是故厲直剛毅。材在矯正。失在  
激訐。柔順安恕。每在寬容。失在少決。雄悍傑健。任在  
膽烈。失在多忌。精良畏慎。善在恭謹。失在多疑。強楷  
堅勁。用在楨幹。失在專固。論辨理繹。能在釋結。失在  
流宕。晉博周給。宏在覆裕。失在溷濁。清介廉潔。節在  
儉固。失在拘局。休動磊落。業在攀躋。失在疏越。沉靜  
機密。精在元微。失在遲緩。樸露徑盡。質在中誠。失在  
不微。多智韜情。權在譎畧。失在依違。及其進德之日。



不止揆中庸以戒其材之拘抗。而指人之所短以益其失。猶晉楚帶劍遞相詭反也。是故彊毅之人狠剛。和不戒其彊之搪突。而以順爲撓。厲其抗。是故可以立法。難與入微。柔順之人緩心寬斷。不戒其事之不懾。而以抗爲劇。安其舒。是故可與循常。難與權疑。雄悍之人氣奮勇決。不戒其勇之毀跌。而以順爲恒。竭其勢。是故可與涉難。難與居約。懼慎之人畏患多。忌不戒其悞於爲義。而以勇爲狎。增其疑。是故可與保全。難與立節。凌階之人秉意勁特。不戒其情之固。



護而。以辨爲僞。強其專。是故可以持正。難與附。衆辨  
博之人。論理。贈給。不戒其辭之汎濫。而以楷爲繫。遂  
其流。是故可與汎序。難與立約。宏普之人。意愛周洽。  
不戒其交之溷雜。而以介爲狷。廣其濁。是故可以撫  
衆。難與厲俗。狷介之人。砭清激濁。不戒其道之隘狹。  
而以普爲穢。益其拘。是故可與守節。難以變通。休動  
之人。志慕超越。不戒其意之大猥。而以靜爲滯。果其  
銳。是故可以進趨。難與持後。沉靜之人。道思廻復。不  
戒其靜之遲後。而以動爲疏。美其愜。是故可與深慮。



難與捷速。樸露之人中疑實。碩不戒其實之野直。而以譎爲誕。露其誠。是故可與立信。難與消息。韜譎之人。原度取容。不戒其術之離正。而以盡爲愚。貴其虛。是故可與讚善。難與矯違。夫學所以成材也。恕所以推情也。偏材之性不可移轉矣。雖教之以學。材成而隨之以失。雖訓之以恕。推情各從其心。信者逆信。詐者逆詐。故學不入道。恕不周物。此偏材之益失也。

流業第三

三材爲源習者爲流  
流漸失源其業各異

蓋人流之業十有二焉。有清節家。有法家。有術家。有



國體有器能有臧否有伎倆有智意有文章有儒學  
有口辯有雄傑若夫德行高妙容止可法是謂清節  
之家延陵晏嬰是也建法立制彊國富人是謂法家  
管仲商鞅是也思通道化策謀奇妙是謂術家范蠡  
張良是也兼有三材三材皆備其德足以厲風俗其  
法足以正天下其術足以謀廟勝是謂國體伊尹呂  
望是也兼有三材三材皆微其德足以率一國其法  
足以正鄉邑其術足以權事宜是謂器能子產西門  
豹是也兼有三材之別各有一流清節之流不能宏



恕。好尚譏訶。分別是非。是謂臧否。子夏之徒是也。法  
家之流。不能創思遠圖。而能受一官之任。錯意施巧。  
是謂伎倆。張敞趙廣漢是也。術家之流。不能創制垂  
則。而能遭變用權。權智有餘。公正不足。是謂智意。陳  
平韓安國是也。凡此八業。皆以三材爲本。故雖波流  
分別。皆爲輕事之材也。能屬文著述。是謂文章。司馬  
遷班固是也。能傳聖人之業。而不能幹事施政。是謂  
儒學。毛公貫公是也。辯不入道。而應對資給。是謂口  
辯。樂毅曹丘生是也。膽力絕衆。材畧過人。是謂驍雄。



自起韓信是也。凡此十二材。非人臣之任也。主德不預焉。主德者。聰明平淡。總達衆材。而不以事自任者。也是故。主道立。則十二材各得其任也。清節之德。師氏之任也。法家之材。司寇之任也。術家之材。三孤之任也。三材純備。三公之任也。三材而微。冢宰之任也。臧否之材。師氏之佐也。智意之材。冢宰之佐也。伎倆之材。司空之任也。儒學之材。安民之任也。文章之材。國史之任也。辯給之材。行人之任也。驍雄之材。將帥之任也。是謂主道得而臣道序。官不易方而太平用。



成若道不平淡。與一材同用。好則一材處權而衆材失任矣。

材理第四

材既殊塗理亦異趣故講羣材至理乃定

夫建事立義莫不須理而定。及其論難鮮能定之。夫何故哉。蓋理多品而人異也。夫理多品則難通。人材異則情詭。情詭難通則理失而事違也。夫理有四部。明有四家。情有九偏。流有七似。說有三失。難有六構。通有八能。若夫天地氣化盈虛損益道之理也。法制正事。事之理也。禮教宜適義之理也。人情樞機情之



理也。四理不同其於才也。須明而章。明待質而行。是故質於理合。合而有明明足見理。理足成家。是故質性平淡。思心元微。能通自然道理之家也。質性警徹。權畧機捷。能理煩速事理之家也。質性和平。能論禮教。辯其得失。義禮之家也。質性機解。推情原意。能適其變。情理之家也。四家之明既異。而有九偏之情。以性犯明。各有得失。剛畧之人不能理微。故其論大體。則宏博而高遠。歷纖理則宕往而疏越。抗厲之人不能迴撓。論法直則括處而公正。說變通則否戾而不。



入堅勁之人好攻其事實指機理則穎灼而徹盡涉  
大道則徑露而單持辯給之人辭煩而意銳推人事  
則精識而窮理卽大義則恢愕而不周浮沉之人不  
能沉思序疏數則豁達而傲博立事要則熾炎而不  
定淺解之人不能深難聽辯說則擬鑿而愉悅審精  
理則掉轉而無根寬恕之人不能速捷論仁義則宏  
詳而長雅趨時務則遲緩而不及溫柔之人力不休  
強味道理則順適而和暢擬疑難則濡悞而不盡好  
奇之人橫逸而求異造權譎則倜儻而褻壯案清道



則詭常而恢迂。此所謂性有九偏。各從其心之所可。以爲理。若乃性不精暢。則流有七似。有漫談陳說。似有流行者。有理少多端。似若博意者。有迴說合意。似若讚解者。有處後持長。從衆所安。似能聽斷者。有避難不應。似若有餘而實不知者。有慕通口解。似悅而不憚者。有因勝情失窮。而稱妙。跌則倚蹠。實求兩解。似理不可屈者。凡此七似。衆人之所惑也。夫辯有理勝。有辭勝。理勝者。正白黑以廣論。釋微妙而通之。辭勝者。破正理以求異。求異則正失矣。夫九偏之材有。



理者眇矣。必也聰能聽序。思能造端。明能見機。辭能  
辯意。捷能攝失。守能待攻。攻能奪守。奪能易予。兼此  
八者。然後乃能通於天下之理。通於天下之理。則能  
通人矣。不能兼有八美。適有一能。則所達者偏。而所  
有異日矣。是故聰能聽序。謂之名物之材。思能造端。  
謂之構架之材。明能見機。謂之達識之材。辭能辯意。  
謂之瞻給之材。捷能攝失。謂之權捷之材。守能待攻。  
謂之持論之材。攻能奪守。謂之推徹之材。奪能易予。  
謂之貿說之材。通材之人。既兼此八材。行之以道。與



通人言則同解而心喻與衆人言則察色而順性雖  
明包衆理不以尚人聰叡資給不以先人善言出已  
理足則止鄙誤在人過而不適寫人之所懷扶人之  
所能不以事類犯人之所姻不以言例及已之所長  
說直說變無所畏惡采蟲聲之善音贊愚人之偶得  
奪與有宜去就不留方其盛氣折謝不恡方其勝難  
勝而不矜心平志論無適無莫期於得道而已矣是  
可與論經世而理物也

口是心非其理難通

口是心非其理難通

口是心非其理難通

口是心非其理難通

口是心非其理難通

口是心非其理難通

口是心非其理難通

口是心非其理難通



人物志卷中

材能第五

材能大小其準不同  
量力而授所任乃濟

或曰。人材有能大而不能小。猶函牛之鼎。不可以烹雞。愚以爲此非名也。夫能之爲言。已定之稱。豈有能大而不能小乎。凡所謂能大而不能小。其語出於性有寬急。性有寬急。故宜有大小。寬宏之人。宜爲郡國使。下得施其功。而總成其事。急小之人。宜理百里。使事辦於已。然則郡之與縣。異體之大小者也。以實理寬急。論辯之。則當言大小異宜。不當言能大不能小。



也。若夫雞之與牛，亦異體之小大也。故鼎亦宜有大，小若以烹犢，則豈不能烹雞乎？故能治大郡則亦能治小郡矣。推此論之，人材各有所宜，非獨大小之謂也。夫人材不同，能各有異，有自任之能，有立法使人從之之能，有消息辨護之能，有德教師人之能，有行事使人譴讓之能，有司察糾摘之能，有權奇之能，有威猛之能。夫能出於材，材不同量，材能既殊，任政亦異。是故自任之能，清節之材也；故在朝也，則冢宰之任；爲國則矯直之政，立法之能，治家之材也；故在朝



也。則司寇之任爲國則公正之政。計策之能。術家之材也。故在朝也。則三孤之任爲國則變化之政。人事之能。智意之材也。故在朝也。則冢宰之佐爲國則諧合之政。行事之能。譴讓之材也。故在朝也。則司寇之任爲國則督責之政。權奇之能。伎倆之材也。故在朝也。則司空之任爲國則藝事之政。司察之能。臧否之材也。故在朝也。則師氏之佐爲國則刻削之政。威猛之能。豪傑之材也。故在朝也。則將帥之任爲國則嚴厲之政。凡偏材之人。皆一味之美。故長於辦一官而



短於爲一國。何者。夫。上。官。之。任。以。一。味。協。五。味。一。國。之。政。以。無。味。和。五。味。又。國。有。俗。化。民。有。劇。易。而。人。材。不。同。故。政。有。得。失。是。以。王。化。之。政。宜。於。統。大。以。之。治。小。則。迂。辨。護。之。政。宜。於。治。煩。以。之。治。易。則。無。易。策。術。之。政。宜。於。治。難。以。之。治。平。則。無。奇。矯。抗。之。政。宜。於。治。侈。以。之。治。弊。則。殘。諧。和。之。政。宜。於。治。新。以。之。治。舊。則。虛。公。刻。之。政。宜。於。糾。姦。以。之。治。違。則。衆。威。猛。之。政。宜。於。討。亂。以。之。治。善。則。暴。伎。倆。之。政。宜。於。治。富。以。之。治。貧。則。勞。而。不。困。故。量。能。授。官。不。可。不。審。也。凡。此。之。



能皆偏材之人也。故或能言而不能行。或能行而不能言。至於國體之人。能言能行。故爲衆材之雋也。人君之能異於此。故臣以自任爲能。君以用人爲能。臣以能言爲能。君以能聽爲能。臣以能行爲能。君以能賞罰爲能。所能不同。故能君衆材也。

### 利害第六

建法陳術以利國家  
及其弊也害歸於已

蓋人業之流各有利害。夫節清之業著于儀容。發於德行。未用而章其道。順而有化。故其未達也爲衆人之所進。既達也爲上下之所敬。其功足以激濁揚清。



師範僚友其爲業也無弊而常顯故爲世之所貴。法  
家之業本於制度待乎成功而效其道前苦而後治。  
嚴而爲衆故其未達也爲衆人之所忌已試也爲上  
下之所憚其功足以立法成治其弊也爲羣枉之所  
讐其爲業也有敝而不常用故功大而不終術家之  
業出於聰思待於謀得而章其道先微而後著精而  
且元其未達也爲衆人之所不識其用也爲明主之  
所珍其功足以運籌通變其退也藏於隱微其爲業  
也奇而希用故或沈微而不章智意之業本于原度



其道順而不忤。故其未達也。爲衆人之所容矣。已達也。爲寵愛之所嘉。其功足以讚明計慮。其敝也。知進而  
而不退。或離正以自全。其爲業也。謂而難持。故或先  
利而後害。臧否之業。本乎是非。其道廉而且砭。故其  
未達也。爲衆人之所識。已達也。爲衆人之所稱。其功  
足以變察是非。其敝也。爲詆訶之所怨。其爲業也。峭  
而不裕。故或先得而後離衆。伎倆之業。本于事能。其  
道辨而且速。其未達也。爲衆人之所異。已達也。爲官  
司之所任。其功足以理煩糾邪。其敝也。民勞而下困。



其爲業也細而不泰。故爲治之末也。

接識第七

推已接物俱識同體  
兼能之士乃達羣材

夫人初甚難知。而士無衆寡。皆自以爲知人。故以已  
觀人。則以爲可知也。觀人之察人。則以爲不識也。夫  
何哉。是故能識同體之善。而或失異量之美。何以論  
其然。夫清節之人。以正直爲度。故其歷衆材也。能識  
性行之常。而或疑法術之詭。法制之人。以分數爲度。  
故能識較方直之量。而不貴變化之術。術謀之人。以  
思謨爲度。故能成策略之奇。而不識遵法之良。器能



之人以辨護爲度。故能識方略之規。而不知制度之  
原。智意之人以原意爲度。故能識韜誦之權。而不貴  
法教之常。伎倆之人以邀功爲度。故能識進趣之功。  
而不通道德之化。臧否之人以伺察爲度。故能識訶  
砭之明。而不惕倜儻之異。言語之人以辨析爲度。故  
能識捷給之惠。而不知含章之美。是以互相非駁。莫  
肯相視。取同體也。則接詒而相得。取異體也。雖歷久  
而不知。凡此之類。皆謂一流之材也。若二至已上。亦  
隨其所兼。以及異數。故一流之人。能識一流之善。二



流之人能識二流之美。盡有諸流則亦能兼達衆材。故兼材之人與國體同。欲觀其一隅則終朝足以識之。將究其詳則三日而後足。何謂三日而後足。夫國體之人兼有三材。故談不三日不足以盡之。一以論道德。二以論法制。三以論策術。然後乃能竭其所長而舉之不疑。然則何以知其兼偏而與之言乎。其爲人也。務以流數杼人之所長而爲之名目。如是兼也。如陳以美欲人稱之。不欲知人之所有。如是者偏也。不欲知人則言無不疑。是故以深說淺益深益異。異



則相返反則相非是故多陳處直則以爲見美靜聽  
不言則以爲虛空抗爲高談則爲不遜遜讓不盡則  
以爲淺陋言稱一善則以爲不薄歷發衆奇則以爲  
多端先意而言則以爲分美因失難之則以爲不喻  
說以對反則以爲較已博以異雜則以爲無要論以  
同體然後乃悅於是乎有親愛之情稱舉之譽此偏  
材之常失。

### 英雄第八

自非平淡能各有名  
英爲文昌雄爲武稱

夫草之精秀者爲英獸之特羣者爲雄故人之文武

茂異取名於此。是故聰明秀出。謂之英。膽力過人。謂之雄。此其大體之別名也。若校其分數。則牙則須。各以二分。取彼一分。然後乃成。何以論其然。夫聰明者。英之分也。不得雄之膽。則說不行。膽力者。雄之分也。不得英之智。則事不立。是故英以其聰謀始。以其明見機。待雄之膽行之。雄以其力服衆。以其勇排難。待英之智成之。然後乃能各濟其所長也。若聰能謀始。而明不見機。乃可以坐論。而不可以處事。聰能謀始。明能見機。而勇不能行。可以循常。而不可以慮變。若



力能過人而勇不能行。可以爲力。人未可以爲先。登  
力能過人。勇能行之。而智不能斷事。可以爲先。登未  
足以爲將。帥必聰能謀始。明能見機。膽能決之。然後  
可以爲英。張良是也。氣力過人。勇能行之。智足斷事。  
乃可以爲雄。韓信是也。體分不同。以多爲目。故英雄  
異名。然皆偏至之材。人臣之任也。故英可以爲相。雄  
可以爲將。若一人之身。兼有英雄。則能長世。高祖項  
羽是也。然英之分。以多於雄。而英不可以少也。英分  
少。則智者去之。故項羽氣力蓋世。明能合變。而不能



聽采奇異。有一范增不用。是以陳平之徒皆亡歸高祖。英分多故羣雄服之。英材歸之。兩得其用。故能吞秦破楚。宅有天下。然則英雄多少能自勝之數也。徒英而不雄。則雄材不服也。徒雄而不英。則智者不歸往也。故雄能得雄。不能得英。英能得英。不能得雄。故一人之身兼有英雄。乃能役英與雄。能役英與雄。故能成大業也。

八觀第九

羣材異品志各異歸  
觀其通否所格者八

八觀者。一曰觀其奪救以明間雜。二曰觀其感變以



審常度。三曰觀其志質。以知其名。四曰觀其所由。以  
辨依似。五曰觀其愛敬。以知通塞。六曰觀其情機。以  
辨恕惑。七曰觀其所短。以知其長。八曰觀其聰明。以  
知所達。何謂觀其奪救。以明間雜。夫質有至有違。若  
至勝違。則惡情奪正。若然而不然。故仁出於慈。有慈  
而不仁者。仁必有恤。有仁而不恤者。厲必有剛。有厲  
而不剛者。若夫見可憐。則流涕。將分與。則恡嗇。是慈  
而不仁者。觀危急。則惻隱。將赴救。則畏患。是仁而不  
恤者。處虛義。則色厲。顧利慾。則內荏。是厲而不剛者。



然則慈而不仁者則恠奪之也。仁而不恤者則懼奪之也。厲而不剛者則慾奪之也。故曰慈不能勝恠。無必其能仁也。仁不能勝懼。無必其能恤也。厲不能勝慾。無必其能剛也。是故不仁之質勝則伎力爲害。器貪悖之性勝則強猛爲禍。梯亦有善情救惡不至爲害。愛惠分篤。雖傲狎不離。助善著明。雖疾惡無害也。救濟過厚。雖取人不貪也。是故觀其奪救而明間雜之情。可得知也。何謂觀其感變以審常度。夫人厚貌深情。將欲求之。必觀其辭旨。察其應贊。夫觀其辭旨。



猶聽音之善醜。察其應贊。猶視智之能否也。故觀辭  
察應。足以互相別識。然則論顯揚正白也。不善言應  
元也。經緯元白通也。移易無正雜也。先識未然聖也。  
追思元事獻也。見事過人明也。以明爲晦智也。微忽  
必識妙也。美妙不昧疎也。測之益深實也。假合炫耀  
虛也。自見其美不足也。不伐其能有餘也。故曰凡事  
不度。必有其故。憂患之色乏而且荒。疾疢之色亂而  
垢雜。喜色愉然以懌。愠色厲然以揚。妬惑之色冒昧  
無常。及其動作蓋竝言辭。是故其言甚懌而精色不



從者中有違也。其言有違而精色可信者辭不敏也。言未發而怒色先見者意憤溢也。言將發而怒氣送之者強所不然也。凡此之類徵見於外不可奄違。雖欲違之精色不從感愕以明雖變可知是故觀其感變而常度之情可知何謂觀其志質以知其名凡偏材之性二至以上則至質相發而令名生矣是故骨直氣清則休名生焉氣清力勁則烈名生焉勁智精理則能名生焉智直強慤則任名生焉集于端質則令德濟焉加之學則文理灼焉是故觀其所至之多



少而異名之所生可知也。何謂觀其所由以辨依似。夫純訐性違不能公正。依訐似直。以訐訐善。純宕似流。不能通道。依宕似通行。傲過節。故曰直者亦訐。訐者亦訐。其訐則同。其所以爲訐則異。通者亦宕。宕者亦宕。其宕則同。其所以爲宕則異。然則何以別之。直而能溫者德也。直而好訐者偏也。訐而不直者依也。道而能節者通也。通而時過者偏也。宕而不節者依也。偏之與依。忘同質違。所謂似是而非也。是故輕諾似烈而寡信。多易似能而無效。進銳似精而去速。訶



者似察而事煩計施似惠而無成面從似忠而退違  
此似是而非者也亦有似非而是者大權似姦而有  
功大智似愚而內明博愛似虛而實厚正言似訐而  
情忠夫察似明非御情之反有似理訟其實難別也  
非天下之至精其孰能得其實故聽言信貌或失其  
真詭情御反或失其賢賢否之察實在所依是故觀  
其所依而似類之質可知也何謂觀其愛敬以知通  
塞蓋人道之極莫過愛敬是故孝經以愛爲至德以  
敬爲要道易以感爲德以謙爲道老子以無爲德以



虛爲道。禮以敬爲本。樂以愛爲主。然則人情之實有  
愛敬之誠。則與道德同體。動獲人心而道無不通也。  
然愛不可少於敬。少於敬則廉節者歸之。而衆人不  
與。愛多於敬。則雖廉節者不悅。而愛接者死之。何則  
敬之爲道也。嚴而相離。其勢難久。愛之爲道也。情親  
意厚。深而感物。是故觀其愛敬之誠。而通塞之理可  
得而知也。何謂觀其情機以辨恕惑。夫人之情有六  
機。杼其所欲則喜。不杼其所能則怨。以自伐歷之則  
惡。以謙損下之則悅。犯其所乏則姻。以惡犯姻則妬。



此人性之六機也。夫人情莫不欲遂其志。故烈士樂奮力之功。善士樂督政之訓。能士樂治亂之事。術士樂計策之謀。辨士樂陵訕之辭。貪者樂貨財之積。幸者樂權勢之尤。苟贊其志。則莫不欣然。是所謂杼其所欲。則喜也。若不杼其所能。則不獲其志。不獲其志。則戚。是故功力不建。則烈士奮。德行不訓。則正人哀。政亂不治。則能者歎。敵能未弭。則術人思。貨財不積。則貪者憂。權勢不尤。則幸者悲。是所謂不杼其能。則怨也。人情莫不欲處前。故惡人之自伐。自伐皆欲勝。



之類也。是故自伐其善。則莫不惡也。是所謂自伐歷  
之則惡也。人情皆欲求勝。故悅人之謙。謙所以下之。  
下有推與之意。是故人無賢愚。接之以謙。則無不色  
懌。是所謂以謙下之則悅也。人情皆欲掩其所短。見  
其所長。是故人駁其所短。似若物冒之。是所謂駁其  
所乏則姻也。人情陵上者也。陵犯其所惡。雖見憎未  
害也。若以長駁短。是所謂以惡犯姻。則妬惡生矣。凡  
此六機。其歸皆欲處上。是以君子接物犯而不校。不  
校則無不敬。下所以避其害也。小人則不然。旣不見



機而欲人之順已。以佞愛敬爲見異。以偶邀會爲輕。苟犯其機。則深以爲怨。是故觀其情機而賢鄙之志可得而知也。何謂觀其所短以知所長。夫偏材之人皆有所短。故直之失也。訐。剛之失也。厲。和之失也。悞。介之失也。拘。夫直者不訐。無以成其直。旣悅其直。不可非其訐。訐也者。直之徵也。剛者不厲。無以濟其剛。旣悅其剛。不可非其厲。厲也者。剛之徵也。和者不悞。無以保其和。旣悅其和。不可非其悞。悞也者。和之徵也。介者不拘。無以守其介。旣悅其介。不可非其拘。拘



也者介之徵也。然有短者未必能長。也有長者必以短爲徵。是故觀其徵之所短。而其材之所長可知也。何謂觀其聰明以知所達。夫仁者德之基也。義者德之節也。禮者德之文也。信者德之固也。智者德之帥也。夫智出於明。明之於人。猶晝之待白日。夜之待燭火。其明益盛者。所見及遠。及遠之明難。是故守業勤學。未必及材。材藝精巧。未必及理。理義辨給。未必及智。智能經事。未必及道。道思元遠。然後乃周。是謂學不及材。材不及理。理不及智。智不及道。道也者。圓覆

變通。是故別而論之。各自獨行。則仁爲勝。合而俱用。則明爲將。故以明將仁。則無不懷。以明將義。則無不勝。以明將理。則無不通。然則苟無聰明。無以能遂。故好聲而實不充。則恢。好辯而理不至。則煩。好法而思不深。則刻。好術而計不足。則僞。是故釣材而好學。明者爲師。比力而爭。智者爲雄。等德而齊。達者稱聖。聖之爲稱。明智之極名也。是以觀其聰明。而所達之材可知也。



人物志卷下

七繆第十

人物之理妙而難明以情鑒察繆猶有七

七繆一曰察譽有偏頗之繆二曰接物有愛惡之惑三曰度心有小大之誤四曰品質有早晚之疑五曰變類有同體之嫌六曰論材有申壓之詭七曰觀奇有二尤之失夫采訪之要不在多少然徵質不明者信耳而不敢信目故人以爲是則心隨而明之人以爲非則意轉而化之雖無所嫌意若不疑且人察物亦自有誤愛憎兼之其情萬原不暢其本胡可必信

是故知人者以目正耳。不知人者以耳敗目。故州閭之士皆譽皆毀。未可爲正也。交遊之人譽不三周。未必信是也。夫實厚之士交遊之間。必每所在肩稱。上等援之下等推之。苟不能周。必有咎毀。故偏上失下。則其終有毀。偏下失上。則其進不傑。故誠能三周。則爲國所利。此正直之交也。故皆合而是。亦有違比。皆合而非。或在其中。若有奇異之材。則非衆所見。而耳所聽采。以多爲信。是繆於察譽者也。夫愛善疾惡。人情所常。苟不明質。或疎善善非。何以論之。夫善非者。



雖非猶有所是。以其所是順已所長。則不自覺情通。意親。忽忘其惡。善人雖善。猶有所乏。以其所乏。不明已長。以其所長。輕已所短。則不自知志乖氣違。忽忘其善。是惑於愛惡者也。夫精欲深微。質欲懿重。志欲宏大。心欲謙小。精微所以入神妙也。懿重所以崇德宇也。志大所以戡物任也。心小所以慎咎悔也。故詩詠文王。小心翼翼。不大聲以色。小心也。王赫斯怒。以對于天下。志大也。由此論之。心小志大者。聖賢之倫也。心大志大者。豪傑之雋也。心大志小者。微蕩之類。

也。心小志小者。拘懷之人也。衆人之察。或陋其心小。或壯其志大。是誤於小大者也。夫人材不同。成有早晚。有早智而速成者。有晚智而晚成者。有少無智而終無所成者。有少有令材。遂爲雋器者。四者之理。不可不察。夫幼智之人。材智精達。然其在童髦。皆有端緒。故文本辭繁。辯始給口。仁出慈恤。施發過與。慎生畏懼。廉起不取。早智者。淺惠而見速。晚成者。奇識而舒遲。終暗者。並困於不足。遂務者。周達而有餘。而衆人之察。不慮其變。是疑於早晚者也。夫人情莫不趣。



名利避損害。名利之路在於是得。損害之源在於非。  
失故人無賢愚。皆欲使是得在己。能明己是莫過同  
體。是以偏材之人。交遊進趨之類。皆親愛同體而譽  
之。憎惡對反而毀之。序異雜而不尚也。推而論之。無  
他故焉。夫譽同體。毀對反。所以証彼非而著己是也。  
至于異雜之人。於彼無益。於己無害。則序而不尚。是  
故同體之人。常患於過譽及其名蔽。則黜能相下。是  
故直者性奮。好人行直於人而不能受人之許。盡者  
情露。好人行盡於人而不能納人之徑。務名者樂人



之進趨過人而不能出陵已之後。是故性同而材傾。則相援而相賴也。性同而勢均。則相競而相害也。此又同體之變也。故或助直而毀直。或與明而毀明。而衆人之察。不辨其律理。是嫌於體同也。夫人所處異勢。勢有申壓。富貴遂達。勢之申也。貧賤窮匱。勢之壓也。上材之人。能行人所不能行。是故達有勞謙之稱。窮有著明之節。中材之人。則隨世損益。是故藉富貴則貨財充於內。施惠周於外。見瞻者求可稱而譽之。見援者闡小善而大之。雖無異材。猶行成而名立處。



貧賤則欲施而無財。欲援而無勢。親戚不能恤。朋友  
不見濟。分義不復立。恩愛浸以離。怨望者並至。歸非  
者日多。雖無罪尤。猶無故而廢也。故世有侈儉名由  
進退。天下皆富。則清貧者雖苦。必無委頓之憂。且有  
辭施之高。以獲榮名之利。皆貧則求假。無所告。而有  
窮乏之患。且生鄙吝之訟。是故鈞材而進有與之者。  
則體益而茂遂。私理卑抑有累之者。則微降而稍退。  
而衆人之觀。不理其本。各指其所在。是疑於申壓者  
也。夫清雅之美。著乎形質。察之寡失。失繆之由。恒在

二尤二尤之生與物異列故尤妙之人含精於內外  
無飾姿尤虛之人碩言瑰姿內實垂反而人之求奇  
不可以精微測其元機明異希或以貌少爲不足或  
以瑰姿爲巨偉或以直露爲虛華以巧飾爲真實是  
以早拔多誤不如順次夫順次長度也苟不察其實  
亦焉往而不失故遺賢而賢有濟則恨在不早拔  
拔奇而奇有敗則患在不素別任意而獨繆則悔在不  
廣問廣問而誤已則怨已不自信是以驥子發足衆  
士乃誤韓信立功淮陰乃震夫豈惡奇而好疑哉乃



尤物不世見而奇逸美異也。是以張良體弱而精強。爲衆智之雋也。荆叔色平而神勇。爲衆勇之傑也。然則雋傑者衆人之尤也。聖人者衆尤之尤也。其尤彌出者。其道彌遠。故一國之雋。於州爲輩。未得爲第也。一州之第。於天下爲根。天下之根。世有優劣。是故衆人之所貴。各貴其出已之尤。而不貴尤之所尤。是故衆人之明。能知輩士之數。而不能知第目之度。輩士之明。能知第目之度。不能識出尤之良也。出尤之人。能知聖人之教。不能究之入室之奧也。由是論之。人



物之理妙不可得而窮已

效難第十一

人材精微實自難知  
知之難審效薦之難

蓋知人之效有二難有難知之難有知之而無由得  
效之難何謂難知之難人物精微能神而明其道甚  
難固難知之難也是以衆人之察不能盡備故各自  
立度以相觀采或相其形容或候其動作或揆其終  
始或揆其儼象或推其細微或恐其過誤或循其所  
言或稽其行事八者遊雜故其得者少所失者多是  
故必有草創信形之誤又有居止變化之謬故其接



遇觀人也。隨行信名失其中情。故淺美揚露則以爲有異。深明沉漠則以爲空虛。分別妙理則以爲離婁。口傳甲乙則以爲義理。好說是非則以爲臧否。講目成名則以爲人物。平道政事則以爲國體。猶聽有聲之類。名隨其音。夫名非實用之不效。故曰名猶口進而實從事退。中情之人。名不副實。用之有效。故名由衆退而實從事。章此草創之常失也。故必待居止然後識之。故居視其所安達。視其所舉富。視其所與窮。視其所爲貧。視其所取。然後乃能知賢否。此又已試



非始相也。所以知質未足以知其略。且天下之人。不可得皆與遊處。或志趣變易。隨物而化。或未至而懸欲。或已至而易顧。或窮約而力行。或得志而從欲。此又居止之所失也。由是論之。能兩得其要。是難知之難。何謂無由得效之難。上材已莫知。或所識者在幼賤之中。未達而喪。或所識者未拔而先沒。或曲高和寡。唱不見讚。或身卑力微。言不見亮。或器非時好。不見信貴。或不在其位。無由得拔。或在其位。以有所屈迫。是以良材識真。萬不一遇也。須識真在位。識百不



一有也。以位勢值可薦致之。宜十不一合也。或明足識真。有所妨奪。不欲貢薦。或好貢薦而不能識真。是故知與不知相與分亂於總猥之中。實知者患於不得達效。不知者亦自以爲未識。所謂無由得效之難也。故曰知人之效有二難。

釋爭第十二

賢善不伐。况小事乎。釋忿去爭。必荷榮福。

蓋善以不伐爲大賢。以自矜爲損。是故舜讓于德而顯義。登聞。湯降不遲而聖敬。日躋。却至上人而抑下。滋甚。王叔好爭而終于出犇。然則卑讓降下者。茂進



之遂路也。矜奮侵陵者。毀塞之險途也。是以君子舉不敢越儀準。志不敢凌軌等。內勤已以自濟。外謙讓以敬懼。是以怨難不在於身。而榮福通於長久也。彼小人則不然。矜功伐能。好以陵人。是以在前者人害之。有功者人毀之。毀敗者人幸之。是故並轡爭先。而不能相奪。兩頓俱。而爲後者所趨。由是論之。爭讓之途。其別明矣。然好勝之人。猶謂不然。以在前爲速銳。以處後爲留滯。以下衆爲卑屈。以躡等爲異傑。以讓敵爲廻辱。以陵上爲高厲。是故抗奮遂往。不能自



反也。夫以抗遇賢。必見遜下。以抗遇暴。必搆敵難。敵難旣搆。則是非之理。必溷而難明。溷而難明。則其與自毀。何以異哉。且人之毀已。皆發怨憾而變生。豈也。必依託於事。飾成端末。其餘聽者。雖不盡信。猶半以爲然也。已之校報。亦又如之。終其所歸。亦各有半信。著於遠近也。然則交氣疾爭者。爲易口而自毀也。並辭競說者。爲貸手以自毆。爲惑繆。豈不甚哉。然原其所由。豈有躬自厚責。以致變訟者乎。皆有內恕不足。外望不已。或怨彼輕我。或疾彼勝已。夫我薄而彼輕。



之。則由我曲而彼直也。我賢而彼不知。則見輕非我咎也。若彼賢而處我前。則我德之未至也。若德鈞而彼先我。則我德之近次也。夫何怨哉。且兩賢未別。則能讓者爲雋矣。爭雋未別。則用力者爲憊矣。是故蘭相如以迴車。決勝於廉頗。寇恂以不鬪。取賢於賈復。物勢之反。乃君子所謂道也。是故君子知屈之可以爲伸。故含辱而不辭。知卑讓之可以勝敵。故下之而不疑。及其終極。乃轉禍而爲福。屈讐而爲友。使怨讐不延於後嗣。而美名宣於無窮。君子之道。豈不裕乎。



且君子能受纖微之小嫌。故無變聞之大訟。小人不能忍小忿之故。終有赫赫之敗辱。怨在微而下之。猶可以爲謙德也。變在萌而爭之。則禍成而不救矣。是故陳餘以張耳之變。卒受離身之害。彭寵以朱浮之郤。終有覆亡之禍。禍福之機。可不慎哉。是故君子之求勝也。以推讓爲利銳。以自修爲棚櫓。靜則閉嘿。泯之元門。動則由恭順之通路。是以戰勝而爭不形。敵服而怨不構。若然者。悔吝不存于聲色。夫何顯爭之有哉。彼顯爭者。必自以爲賢人。而人以爲險詖者。實



無險德則無可毀之義。若信有險德又何可與訟乎。  
險而與之訟。是桺兇而撓虎其可乎。怒而害人亦必  
矣。易曰險而違者訟訟必有衆起。老子曰夫惟不爭  
故天下莫能與之爭。是故君子以爭途之不可由也。  
是以越俗乘高。獨行於三等之上。何謂三等。大無功  
而自矜一等。有功而伐之二等。功大而不伐三等。愚  
而好勝一等。賢而尚人二等。賢而能讓三等。緩已急  
人一等。急已急人二等。急已寬人三等。凡此數者皆  
道之奇。物之變也。三變而後得之。故人莫能遠也。夫



夫道通變者然後能處之。是故孟之反以不伐獲  
聖人之譽。管叔以辭賞受嘉重之賜。夫豈詭遇以求  
之哉。乃純德自然之所合也。彼君子知自損之爲益。  
故功一而美二。小人不知自益之爲損。故一伐而並  
失。由此論之。則不伐者伐之也。不爭者爭之也。讓敵  
者勝之也。下衆者上之也。君子誠能覩爭途之名險。  
獨乘高於元路。則光暉煥而日新。德聲倫於古人矣。






右人物志三卷魏邯鄲劉劭孔才撰有傳見三國志云劭所撰述法論人物志之類百餘篇法論不傳人物志亦祇十六篇大意以人之材能志尚不同當以九徵八觀審察而任使之耳劭嘗奉詔作都官考課七十二條以綜核名實甄別人物因本此意著書故隋唐志均以此書人名家也時有散騎侍郎夏侯惠疏薦劭云深忠篤思體周於數凡所錯綜源流宏遠故性實之士服其平和良正清靜之士慕其元虛退讓文學之士嘉其推步詳審


法理之士明其分數精比意思之士知其沉深篤  
固文章之士愛其著論屬辭制度之士貴其化略  
較要策謀之士贊其明思通微裴松之雖以是爲  
多溢美之辭然觀夏侯所以稱薦劭者不卽得劭  
所以甄別人物之意歟唐志又載有劉炳注人物  
志三卷晁氏云此乃僞涼燉煌劉昞非炳也今叢  
書本猶題劉昞釋篇蓋卽指所釋各卷篇名而言  
或別有注本未見汝上王謨識





























PL  
2951  
113  
K11

新論目錄

卷一

清神

防慾

去情

韜光

崇學

專學

卷二



辨樂

履信

思順

慎獨

貴農

卷三

愛民

從化

法





賞罰

審名

鄙名

卷四

知人

薦賢

因顯

託附

參心隱

卷五

通塞

遇不遇

命相

妄瑕

適才

卷六

文武

均任



慎言

貴言

傷讒

慎隙

卷七

誠盈

明謙

大質

辨施

和性

殊好

卷八

兵術

閱武

明權

貴速

觀量

卷九



隨時

風俗

利害

禍福

貪愛

類感

卷十

正賞

激通

新論

目錄

四

惜時

言苑

九流

目錄終



新論卷一

梁 東莞劉勰著 南昌程遵岳校

清神第一

形者、生之器也。心者、形之主也。神者、心之寶也。故神靜而心和。心和而形全。神躁而心蕩。心蕩則形傷。將全其形、先在理神。故恬和養神、則自安於內。清虛棲心、則不誘於外。神恬心清、則形無累矣。虛室生白、吉祥至矣。人不照於燦金、而照於瑩鏡者、以瑩能明也。不鑑於流波、而鑑於靜水者、以靜能清也。鏡水以明



清之性故能形物之形。由此觀之神照則垢滅形靜則神清垢滅則內慾永盡神清則外累不入今清歌奏而心樂悲聲發而心哀神居體而遇感推移以此而言之則情之變動自外至也夫一哀一樂猶舉正性況萬物之衆而能拔擢以生心神哉故萬人彎弧以向一鵠鵠能無中乎萬物眩曜以惑一生生能無傷乎七竅者精神之戶牖也志氣者五臟之使候也耳目之於聲色鼻口之於芳味肌體之於安適其情一也七竅徇於好惡精神馳騖而不守志氣靡於



趯捨。則五臟滔蕩而不安。嗜慾連綿於外。心膈壅塞於內。蔓衍於荒淫之波。畱連於是非之境。而不敗德。傷生者。蓋亦寡矣。是以聖人清目而不視。靜耳而不聽。閉口而不言。棄心而不慮。貴身而忘賤。故尊勢不能動。樂道而忘貧。故厚利不能傾。容身而處。適情而游。一氣浩然。純白於衷。故形不養而性自全。心不勞而道自至也。

防慾第二

人之稟氣必有性情。性之所感者情也。情之所安者

慾也。情出於性而情違性。慾由於情而慾害情。情之傷性。性之妨情。猶煙冰之與水火也。煙生於火而煙鬱火。冰出於水而冰遏水。故煙微而火盛。冰泮而水通。性貞則精銷。情熾則性滅。是以珠瑩則塵埃不能附。性明則情慾不能染也。故林之性靜。所以動者。風搖之也。水之性清。所以濁者。土渾之也。人之性貞。所以邪者。慾眩之也。身之有慾。如樹之有蠅。樹抱蠅則還自鑿。身抱慾而返自害。故蝎盛則木折。慾熾則身亡。將收情慾。先歛五關。五關者。情慾之路。嗜好之



也目愛綵色、命曰伐性之斤耳樂淫聲、命曰攻心之  
鼓口貪滋味、命曰燠喉之煙身安舉駟、命曰召魔之  
機此五者所以養生亦以傷生耳目之於聲色鼻口  
之於芳味肌體之於安適其情一也然亦以之死亦  
以之生或爲賢智或爲庸愚由于處之異也譬由愚  
者之養魚鳥也見天之寒則內魚於溫湯之中而棲  
鳥於火林之上水木者所以養魚鳥也養之失理必  
至焦爛聲色芳味所以悅人悅之過理還以害生故  
明者剝情以遣累約慾以守貞食足以充虛接氣衣

足以蓋形禦寒。靡麗之華不以滑性。哀樂之感不以亂神。處於止足之泉。立於無害之岸。此全性之道也。夫蜂蠆螫指。則窮日煩擾。蚊蟲嗜膚。則通宵失寐。蚊蜂小害。指膚外疾。人入山則避蜂蠆。入室則驅蚊蟲。何者。以其害於體也。嗜慾攻心。正性顛倒。嗜慾大害。攻心內疾。方於指膚。亦以多也。外疾之害輕於秋毫。人知避之。內疾之害重於泰山。而莫之避。是棄輕患而負重害。不亦倒乎。人有牛馬放逸不歸。必知收之。情慾放逸而不知收之。不亦惑乎。將收情慾。必在



微情慾之萌。如木之將蘖。火之始熒。手可掣而斷。露  
可滴而滅。及其熾也。結條凌雲。煽燦章華。雖窮力運  
斤。竭池灌火。而不能禁其勢盛也。嗜慾之萌。耳目可  
關。而心意可鑰。至於熾也。雖褰情卷慾。而不能收其  
性敗也。如能塞先於未形。禁慾於危微。雖求悔悟。其  
可得乎。

去情第三

情者是非之主。而利害之根。有是必有非。能利亦能  
害。是非利害存於衷。而彼此還相疑。故無情以接物。



在遇而恒通。有情以接人。觸應而成礙。由此觀之。則情之所處。物之所疑也。是以謀揚譽人。而受譽者。不以爲德。身膚強飯。而蒙飽者。不以爲惠。嬰兒傷人。而被傷者。不以爲怨。侏儒嘲人。而獲嘲者。不以爲辱。何者。挾利以爲己。有情於譽飽。雖蒙惠而非德。無情於傷辱。雖獲毀而無憾。魚不畏網。而畏鵜。復讐者不怨。鎡鋸而怨其人。網無心而鳥有情。劒無情而人有心也。使信士分財。不如投策探鈎。使廉士守藏。不如閉局全封。何者。有心之於平。不若無心之不平也。有縱



之於廉、不若無慙之不廉也。今人目若驪珠、心如權衡、評人好醜、雖言得其實、彼必嫌怨、及其自照明鏡、摹倒其容、醜狀既露、則內慙而不怨、向之評者與鏡無殊、然而向怨今之慙者、以鏡無情而人有心也。三人居室、二人交爭、必取信於不爭者、以辨彼此之得失。夫不爭者未必平、而交爭者未必偏、而信於不爭者何也。以爭者之心、並挾勝情故也。飄瓦擊人、虛心觸已、是以聖人棄智、以全真、遺情以接物、不爲名尸、不爲謀府。混然無際、而俗莫能累矣。



韜光第四

物之寓世、未嘗不韜形滅影、隱質遐外、以全性棲命者也。夫含奇佩美、銜異露才者、未有不以此傷性毀命者也。故翠以羽自殘、龜以智自害、丹以含色磨肌、石以抱玉碎質。此四者、生於異俗、與人非不隔也、託性於山林、寄情於物外、非有求於人也。然而自賤伊患者、未能隱其形也。若使翠歛翮於明止之林、則解羽之患永脫。龜曳尾於暘谷之泥、則鑽灼之患不至。丹伏光於春山之底、則磨肌之患永絕。石亢體於元



園之曲。則剖琢之憂不及。故窮巖曲岫之梓。傑生於  
積石。頽貫青天。根鑿黃泉。分條布葉。輪菌磔磔。騏驎  
戲其下。鵷鷺游其顛。浮雲棲其側。清風激其間。終歲  
無毫釐之憂。免刀斧之入者。非與人有德也。能韜隱  
其質。故致全性也。路側之榆。樵人採其條。匠者伐其  
柯。餘有尺葉而爲行人所折者。非與人有仇也。然而  
致寇者。形不隱也。周鷄斷尾。獲免犧牲。山狙見巧。終  
必招害。由此言之。則出處之理。亦可知矣。是以古之  
有德者。韜迹隱智。以密其外。澄心封情。以定其內。內



定則神腑不亂。外密則形骸不擾。以此處身。不亦全乎。

崇學第五

至道無言。非立言。無以明其理。大象無形。非立象。無以測其奧。道象之妙。非言不津。津言之妙。非學不傳。未有不因學而鑒道。不假學以光身者也。夫繭繅以爲絲。織爲縑。紕續以黼黻。則王侯服之。人學爲禮儀。雕以文。濟而世人榮之。璽之不繅。則素絲蠹於筐籠。人之不學。則才智腐於心胃。海蚌未剖。則明珠不顯。



昆竹未斷、則鳳音不彰、性情未鍊、則神明不發。譬諸金、木、金性苞水、木性藏火、故鍊金則水出、鑽木而火生、人能務學、鑽鍊其性、則木慧發矣。青出於藍、而青於藍、染使然也。冰生於水、而冷於水、寒使然也。鏡出於金、而明於金、瑩使然也。戎夷之子、生而同聲、長而異語、教使然也。山抱玉而草木潤焉、川貯珠而岸不枯焉、口納滋味而百節肥焉、心受典誥而五性通焉、故不登峻岑、不知天之高、不瞰深谷、不知地之厚、不游六藝、不知智之深、遠而光華者、節也、近而愈明者、



學也。故吳篲質勁。非箬羽而不美。越劒性利。非淬礪而不銛。人性懷慧。非積學而不成。沿淺以及深。披闢而觀明。不可以傳聞稱。非得以汎濫善也。夫還鄉者。心務見家。不可以一步至也。慕學者情纏典素。不可以一讀能也。故爲山者。基於一簣之土。以成千丈之峭。鑿井者。起於三寸之坎。以就萬仞之深。靈珠如豆。不見其長。疊歲而大。饒舌如指。不覺其損。累時而折。懸巖滴溜。終能穿石。規車牽索。卒至斷軸。水非石之鑽。繩非木之鋸。然而斷穿者。積漸之所成也。耳形完。



而聽不聞者聾也、目形全而視不見者盲也、人性美而不監道者、不學也、耳之初窒、目之始昧、必不恡百金、逆醫千里、人不涉學、猶心之聾盲、不知遠近、明師以攻心術、性之蔽也、故宜尼臨沒、手不釋卷、仲舒垂卒、口不輟誦、有子惡卧、自碎其掌、蘇生患睡、親錐其股、以聖賢之性、猶好學無倦、矧庸人而可怠哉、

專學第六

學者出於心、心爲身之主、耳目候於心、若心不在學、則聽誦不聞、視簡不見、如欲鍊業、必先正心、而後理



義入焉。夫兩葉掩目，則冥默無覩；雙珠填耳，必寂寞無聞。葉作目蔽，珠爲耳鯁，二關外擁，視聽內隔，固其宜也。而離婁察秋毫之末，不聞雷霆之聲，季子聽清角之韻，不見嵩岱之形，視不關耳，而耳不見，聽不關目，而目不聞者，何也？心溺秋毫，意入清角，故也。是以心駐於目，必忘其耳，則聽不聞；心駐於耳，必遺其目，則視不見也。使左手畫方，右手畫圓，令一時俱成，雖執規矩之心，廻剡劂之手，而不能者，由心不兩用，則手不並運也。奕秋通國之善奕也，當奕之時，有吹笙



過者、傾心聽之、將圍未圍之際、問以夾道、則不知也、  
非夾道、暴深、情有蹇闇、笙獨之也、隸首、天下之善筭  
也、當筭之時、有鳴鴻過者、彎弧擬之、將發未發之間、  
問以三五、則不知也、非三五、難筭、意有暴昧、鴻亂之  
也、夾秋之夾、隸首之筭、窮微盡數、非有差也、然而心  
在笙鴻、而夾敗筭、撓者、是心不專一、游情外務也、瞽  
無目而耳不可以察、專於聽也、聾無耳而目不可以  
聞、專於視也、以瞽聾之微、而聽察聰視明審者、用心一  
也、夫蟬難取而黏之如掇、卷耳易採而不盈、傾筐是

故學者必精勤專心以入於神。若心不在學而強誦誦雖入於耳而不諦於心。譬若聾者之歌。效人爲之。無以自樂。雖出於口則越散矣。



新論卷二

辯樂第七

樂者。天地之聲。中和之紀。人情之所不能免也。人心喜則笑。笑則樂。樂則口欲歌之。手欲鼓之。足欲舞之。歌之舞之。容發於聲音。形發於動靜。而入於至道。音聲動靜。性術之變。盡於此矣。故人不能無樂。樂則不能無形。形則不能無道。道則不能無亂。先王惡其亂也。故制雅樂以道之。使其聲足樂而不淫。使其音調。穠而不詭。使其曲繁省而廉均。是以感人之善惡。不

使放心邪氣是先王立樂之情也。五帝殊時不相沿樂，三王異世不相襲禮，各像敷德，應時之變。故黃帝樂曰雲門，顓頊曰五莖，嚳曰六英，堯曰咸池，舜曰簫韶，禹曰大夏，湯曰大濩，武曰大武。此八樂之所以異名也。先王聞五聲，播八音，非苟欲愉心娛耳聽其鏗鏘而已，將順天地之體，成萬物之性，協律呂之情，和陰陽之氣，調八風之韻，通九歌之分，奏之園丘，則神明降用之；方澤則幽祇升，擊拊球石，則百獸率舞；樂終九成，則瑞禽翔，上能感動天地，下則移風易俗。此



德音之音。雅樂之情。盛德之樂也。明王旣泯。風俗凌遲。雅樂殘廢。而溺音競興。故夏甲作破斧之歌。始爲東音。殷辛作靡靡之樂。始爲北聲。鄭衛之俗好淫。故有溱洧桑中之曲。楚越之俗好勇。則有赴湯蹈火之歌。各咏其所好。歌其所欲。作之者哀。聽之者泣。由心之所感。則形於聲。聲之所感。必流於心。故哀樂之心。感。則焦殺。嗶緩之聲。應。濮上之音。作。則淫泆邪放之志。生。故延年造傾城之歌。漢武思靡嫚之色。雍門作松栢之聲。齊泯願未寒之服。荆軻入秦。宋意擊筑。歌。



於易水之上。聞者瞋目。髮直穿冠。趙王遷於房陵。心懷故鄉。作山水之謳。聽者嗚咽。泣涕流連。此皆滛泆。悽愴。憤厲。哀思之聲。非理性和情德音之樂也。桓帝聽楚琴。慷慨嘆息。悲酸傷心。曰善哉。爲琴若此。豈非樂乎。夫樂者聲樂而心和。所以和爲樂也。今則聲哀而心悲。灑淚而歔歔。是以悲爲樂也。若以悲爲樂。亦何樂之有哉。今悲思之聲。施於管絃。聽音者不滛則悲。滛則亂男女之辯。悲則感怨思之聲。豈所謂樂哉。故奸聲感人。而逆氣應之。逆氣成象。而滛樂興焉。正



聲感人而順氣應之。順氣成象而和樂興焉。樂不和順。則氣有蓄滯。氣有蓄滯。則有悖逆詐僞之心。淫泆妄作之事。是以奸聲亂色。不留聰明。淫樂慝禮。不接心術。使人心和而不亂者。雅樂之情也。故爲詩頌以宣其志。鐘鼓以節其耳。羽旄以制其目。聽之者不傾。視之者不邪。耳目不傾不邪。則邪音不入。邪音不入。則情性內和。情性內和。然後乃爲樂也。

### 履信第八

信者行之基。行者人之本。人非行無以成。行非信無

以立，故信之行於人，譬濟之須舟也。信之於行，猶舟之待楫也。將涉大川，非舟何以濟之？欲泛方舟，非楫何以行之？今人雖欲爲善而不知立行，猶無舟而濟川也。雖欲立行而不知立信，猶無楫而行舟也。是適郢土而首冥山，背道愈遠矣。自古皆有死，人非信不立。故豚魚著信之所及也。允哉斯言，非信不成。齊桓不背曹劌之盟，晉文不棄伐原之誓，吳起不虧移轅之賞，魏侯不乖虞人之期，用能德光於宇宙，名流於古今不朽者也。故春之得風，風不信則花萼不茂，花



夢不茂則發生之德廢，夏之得炎，炎不信則草木不長，草木不長則長羸之德廢，秋之得雨，雨不信則百穀不實，百穀不實則收成之德廢，冬之得寒，寒不信則水土不堅，水土不堅則安靜之德廢，以天地之靈氣不信，四時猶廢，而況於人乎？昔齊攻魯，求其岑鼎，魯侯僞獻他鼎而請盟焉。齊侯不信，使柳季云：『是則請受之。』魯使柳季，柳季曰：『君以鼎爲國信者，亦臣之國。今欲破臣之國，全君之國，臣所難也。』乃獻岑鼎。小邾射以邑奔魯，魯使季路要我，君無盟矣。乃使子路



辭焉。季孫謂之曰：千乘之國，不信其盟，而信子之一言，子何辱焉？子路曰：彼不臣而濟其言，是不義也，由不能矣。夫柳季、季路，魯之匹夫，立信於衡門，而聲馳於天下，故齊邾不信千乘之盟，而重二子之言，信之爲德，豈不大哉？秦孝公使商鞅攻魏，魏遣公子昂逆而拒之。鞅謂昂曰：昔鞅與公子善，今俱爲兩國將，不忍攻，願一飲醢。休二師，公子許焉，遂與之會。鞅伏甲虜之，擊破魏軍。及惠王卽位，疑其行詐，遂車裂於市。夫商鞅秦之貴臣，名重於海內，貪詐僞之小功，失誠



信之大義。一爲不信。終身取尤。卒至屠滅。爲天下笑。無  
信之弊。豈不重乎。故言必如言。信之符也。同言而信。  
信在言前。同教而行。誠在言外。君子知誠信之爲貴。  
必忱信而行。指麾動靜。不失其符。以施教則立。以蒞  
事則正。以懷遠則附。以賞罰則明。由此而言。信之爲  
行。其德大矣。

思慎第九

七緯順度。以光天象。五性順理。以成人行。行象爲美。  
美於順也。夫人爲失。失在於逆。故七緯逆。則天象變。

五性逆則人道敗變而不生災敗而不傷行者未之有也。山海爭水，水必歸海，非海求之，其勢順也。蹇利西南，就土順也，不利東北，登山逆也。是以去濕就燥，火之勢也。違高從下，水之性也。今導泉向澗，則爲易下之流，激波陸山，必成難昇之勢。水之無情，猶知違逆趣順，矧人心乎？故忠孝仁義，德之順也；悖傲無禮，德之逆也。順者福之門，逆者禍之府。由是觀之，逆性之難，順性之易，斷可識矣。今使孟說引牛之尾，尾斷，隕裂，不行十步。若環桑之條，以貫其鼻，縻以尋絢，被



髮童子騎而策之風於廣澤。恣情所趣何者。十步之行。非達於廣澤。被髮之童。非勇於孟說。然而近不及遠。強不如弱者。逆之與順也。司馬蒯瞞天下之攻劔者也。令提劔鋒而掉劔觚。必刎其指而不能以陷腐木。而况金甲乎。若提其觚而掉其鋒。雖則凡夫。可以陸斬犀象。水截蛟龍矣。順理而行。若執劔觚。逆情而動。如執劔鋒。欲無傷乎。后稷善播植。不能使禾稼冬生。逆天時也。禹善治水。鑿穴川。不能迴水西流。逆地勢也。人雖才藝卓絕。不能悖理成行。逆人道也。故循



理處情。雖愚蠢可以立名。反道爲務。雖賢哲猶有禍害。君子如能忠孝仁義。履信思順。自天祐之。吉無不利也。

慎獨第十

善者行之總。不可斯須離。可離非善也。人之須善。猶首之須冠。足之待履。首不加冠。是越類也。足不躡履。是夷民也。今處顯而修善。在隱而爲非。是清且冠履。而昏夜裸跣也。荃蓀孤植。不以巖隱而歇其芳。石泉潛流。不以澗幽而不清。人在暗密。豈以隱翳而廻操。



是以戒慎目所不覩，恐懼耳所不聞，居室如見賓入，  
虛如有人，故蘧瑗不以昏行變節，顏回不以夜浴改  
容，句踐拘於石室，君臣之禮不替，冀缺耕於垆野，夫  
婦之敬不虧，斯皆慎乎隱微，枕善而居，不以視之不  
見而移其心，聽之不聞而變其情也。謂天蓋高而聽  
甚卑，謂日蓋遠而照甚近，謂神蓋幽而察甚明。詩云  
相在爾室，尚不媿於屋漏，無曰不顯，莫予云覯，暗昧  
之事，未有幽而不顯，昏惑之行，無有隱而不彰，修操  
於明，行悖於幽，以人不知若人不知，則鬼神知之，鬼



神不知則已知之而云不知是盜鐘掩耳之智也。孔徒晨起爲善孜孜東平居室以善爲樂故身恒居善則內無憂慮外無畏懼獨立不慚影獨寢不媿衾上可以接神明下可以固人倫德被幽明慶祥臻矣。

貴農第十一

衣食者民之本也。民者國之本也。民恃衣食猶魚之須水。國之恃民如人之倚足。魚無水則不可以生。人失足必不可以步。國失民亦不可以治。先王知其如此而給民衣食故農祥且正。晨集姪訾陽氣憤盈土



木脉發、天子親耕於東郊、后妃躬桑於北郊、國非無  
良農也、而王者親耕、世非無蠶妾也、而后妃躬桑、上  
可以供宗廟、下可以勸兆民、神農之法曰、丈夫丁壯  
而不耕、天下有受其飢者、婦人當年而不織、天下有  
受其寒者、故天子親耕、后妃親織、以爲天下先是、以  
其耕不强者、無以養其生、其織不力者、無以蓋其形、  
衣食饒足、奸邪不生、安樂無事、天下和平、智者無所  
施其策、勇者無以行其威、故衣食爲民之本、而工巧  
爲其末也、是以雕文刻鏤、傷於農事、錦繡纂組、害於



女工農事傷則飢之本也。女工害則寒之源也。飢寒並至而欲禁人爲盜，是揚火而欲無炎，撓水而望其靜，不可得也。衣食足知榮辱，倉廩實知禮節，故建國者必務田蠶之實，棄美麗之華，以穀帛爲珍寶，比珠玉於糞土。何者？珠玉止於虛玩，而穀帛有實用也。假使天下瓦礫悉化爲和璞，砂石皆變爲隋珠，如值水旱之歲，瓊粒之年，則璧不可以禦寒，珠未可以充飢也。雖有奪日之鑑，代月之光，歸於無用也。何異畫爲西施，美而不可悅，刻作桃李，似而不可食也。衣之與



生人之所由。其最急者食爲本也。霜雪巖巖。苦  
蓋不可以代裘。室如懸磬。草木不可以當糧。故先王  
制國有九年之儲。可以備非常。救災厄也。堯湯之時。  
有十年之蓄。及遭九年洪水。七載大旱。不聞飢饉相  
望。捐棄溝壑者。蓄積多故也。穀之所以不積者。在於  
游食者多而農人少故也。夫螟螣秋生而秋死。一時  
爲災而數年乏食。今一人耕而百人食之。其爲螟螣  
亦以甚矣。是以先王敬授民時。勸課農桑。省游食之  
人。減徭役之費。則倉廩充實。頌聲作矣。雖有戎馬之

興水旱之沴國未嘗有憂民終爲無害也



新論卷三

愛民第十二

天生萬民而立之君。君則民之天也。天之養物。以治陰陽爲本。君之化民。以政教爲務。故寒暑不時則疾疫。風雨不節則歲飢。刑罰者。民之寒暑也。教令者。民之風雨也。刑罰不時則民傷。教令不節則俗弊。故水濁無掉尾之魚。土确無歲蕤之木。政煩無逸樂之民。政之於人。由琴瑟也。大絃急則小絃絕。大絃闕矣。夫足寒傷心。民勞傷國。足溫而心平。人佚而國寧。是故



善爲理者必以仁愛爲本。不以苛酷爲先。寬宥刑罰。以全人命。省徹徭役。以休民力。輕約賦歛。不匱人財。不奪農時。以足民用。則家給國富而太平可致也。人之於君猶子之於父母也。未有父母富而子貧。父母貧而子富也。故人饒足者非獨人之足。亦國之足也。渴乏者非獨人之渴乏。亦國之渴乏也。故有若曰。百姓足。君孰與不足。百姓不足。君孰與足。此之謂也。先王之治。上順天時。下養萬物。草木昆蟲不失其所。獺未祭魚。不施網罟。豺未祭獸。不修田獵。鷹隼未擊。不



張罽羅霜露未霑，不伐草木。草木有生而無識，鳥獸有識而無知。猶施仁愛以及之，奚況生人而不愛之乎？故君者，其仁如春，其澤如雨，德潤萬物，則人爲之死矣。昔太王居邠，而人隨之，仁愛有餘也。風沙之君，而人背之，仁愛不足也。仁愛附人，堅於金石，金石可銷，而人不可離，故君者壤也。人者卉木也，未聞壤肥而卉木不茂，君仁而萬人不盛矣。

從化第十三

君以民爲體，民以君爲心。心好之，身必安之；君好之，



民必從之。未見心好而身不從君欲而民不隨也。人之從君如草之從風。水之從器。故君之德風之與器也。人之情草之與水也。草之戴風風驚東則東靡風驚西則西靡。是隨風之東西也。水之在器器方則水方器圓則水圓。是隨器之方圓也。下之事上從其所行猶影之隨形響之應聲言不虛也。上所好物下必有甚。詩云誘人孔易言從上也。昔齊桓公好衣紫闔境盡被異綵。晉文公不好服美群臣皆衣牂羊魯哀公好儒服舉國皆着儒衣。趙武靈王好鷄鶩國人



冠鷄冠、紫非正色、狎非美毳、儒非俗服、鷄非冠、飭而競之者、隨君所好也。楚靈王好細腰、臣妾爲之約食、餓死者多。越王句踐好勇而搢鬪蛙、國人爲之輕命、兵死者衆。命者人之所重、死者人之所惡。今輕其所重、重其所惡者、何也？從君所好也。堯舜之人、可比屋而封、桀紂之人、可接屋而誅。非堯舜之民性盡仁義、而桀紂之人生輒紆邪、而善惡性殊者、染化故也。是以明君慎其所好、以正時俗、樹之風聲、以流來世。或者以爲上化而下不必隨、君好而人未必同也。故唐



堯之世而四凶縱，殷紂之時而三仁貞，漢文節儉而人庶奢，齊景奢而晏嬰儉，此未達之辭也。何者？冬之德陰而有寒，炎蕭正，夏之德陽而有霜霰，以天地之德，由不能一於陰陽，况其賢聖，豈能一於萬民哉？故權衡雖正，不能無毫釐之差，鈞石雖平，不能無抄撮之較。從君之譬，以多言之，唐堯居上，天下皆治，而四凶獨亂，猶曰堯治，治者多也；殷紂在上，天下皆亂，而三仁獨治，猶曰紂亂，亂者衆也。漢文節儉而人有奢，猶曰世儉，儉者多也；齊景大奢而晏嬰躬儉，猶曰國



奢奢者衆也。水性宜冷而有華陽溫泉。猶曰水冷。冷者多也。火性宜熱而有蕭丘寒炎。猶曰火熱。熱者多也。迅風揚波。高下相臨。山隆谷窪。差以尋常。較而望之。猶曰水平。舉大體也。故世之論事。皆取其多者。以爲之節。今觀言者。當顧言外之旨。不得拘文以害義也。

#### 法術第十四

法術者。人主之所執。爲治之樞也。術藏於內。隨務應變。法設於外。適時御人。人用其道。而不知其數者。術



者制焉。賢者更禮。不肖者拘焉。拘禮之人。不足以言事。制法之士。不足以論理。若握一世之法。以傳百世之人。由以一衣擬寒暑。一藥治痊瘕也。若載一時之禮。以訓無窮之俗。是刻舟而求劍。守株而待兔也。故制法者爲理之所由。而非所以爲治也。禮者成化之所宗。而非所以成化也。成化之宗。在於隨時。爲治之本。在於因世。未有不因世而欲治。不隨時而成化。以斯治政。未爲衷也。



治民御下莫正於法。立法施教莫大於賞罰。賞罰者國之利器而制人之柄也。故天以晷數成歲國以法教爲才。晷運於天則時成於地。法動於上則治成於下。晷之運也。先春後秋。法之動也。先賞後罰。是以溫風發春所以動萌華也。寒露降秋所以殞茂葉也。明賞有德所以勸善人也。顯罰有過所以禁下姦也。善賞者因民所喜以勸善。善罰者因民所惡以禁姦。故賞少而善勸。刑薄而姦息。賞一人而天下喜之。罰一人而天下畏之。用能教狹而治廣。用寡而功衆也。昔



王良之善御也，識馬之饑飽，規矩徐疾之節，故鞭策不載而千里可期。然不可以無鞭策者，以馬之有佚也。聖人之爲治也，以爵賞勸善，以仁化愛民，故刑罰不用，太平可致。然而不可廢刑罰者，以民之有縱也。是以賞雖勸善，不可無罰；罰雖禁惡，不可無賞。賞平罰當，則理道立矣。故君者，賞罰之所歸，誘人以趣善也。其利重矣，其威大矣，空懸小利，足以勸善，虛設輕威，可以懲奸。矧復張厚賞以施下，操大威以臨民哉。故一賞不可不信也，一罰不可不明也。賞而不要，當恐



信作雖賞不勸。罰而不明。雖刑不禁。不勸不禁。則善惡失理。是以明主一賞善。罰惡。非爲已也。以爲國也。適於已而無功於國者。不加賞焉。逆於已而有勞於國者。不施罰焉。罰必施於有過。賞必加於有功。苟能賞信而罰明。則萬人從之。若舟之循川。車之遵路。亦奚向而不濟。何行而弗臻矣。

### 審名第十六

言以繹理。理爲言本。名以訂實。實爲名源。有理無言。則理不可明。有實無名。則實不可辨。理由言明。而言



非理也。實中名辨，而名非實也。今信言以棄理，寔非  
得理者也。信名而畧實，非得實者也。故明者課言以  
尋理，不遺理而著言，執名以責實，不棄實而存名，然  
則言理兼通，而名實俱正。世人傳言，皆以小成大，以  
非爲是，傳彌廣而理逾乖，名彌假而實逾反，則迴犬  
似人，轉白成黑矣。今指犬似人，轉白成黑，則不類矣。  
專以類推，以此象彼，謂犬似獾，獾似狙，狙似人，則犬  
似人矣。謂白似細，細似黃，黃似朱，朱似紫，紫似緝，緝  
似黑，則白成黑矣。黃軒四面，非有八目，夔之一足，必



有獨脰。周人玉璞，其實死鼠。楚之鳳凰，乃是山鷄。愚谷智叟，而像頑稱。黃公美女，乃得醜名。魯八縫掖，實非儒行。東郭吹竽，而不知音。四面一足，本非真實。玉璞鳳凰，不是定名。魯人東郭，空濫美稱。愚谷黃公，橫受惡名。由此觀之，傳聞喪真，翻轉名實，美惡無定稱。賢愚無正目，俗之弊者不察。名實虛傳，說者卽似定真。聞野丈人，謂之田父。河上姁女，謂之婦人。堯漿禹糧，龍肝牛膝，謂之爲肉。掘井得人，言自土而出。三豕渡河，云彘行水上。凡斯之類，不可勝言。故狐狸二獸，



因其名便，合而爲一，蚩蚩巨虛，其實一獸，因其詞煩，分而爲二，斯雖成其名而不知敗其實，弗審其詞而不察其形，是以古人必慎傳名，近審其詞，遠取諸理，不使名害於實，實隱於名，故名無所容其僞，實無所蔽其真，此之謂正名也。

鄙名第十七

名者，命之形也；言者，命之名也。刑有巧拙，名有好醜。言有善惡，名言之善，則悅於人心；名言之惡，則忤於人耳。是以古人制邑名子，必依善名，名之不善，害於



實矣。昔畢萬以盈大會福。晉讐以怨偶逢禍。然盈大者不必盡吉。怨偶者不必皆凶。而人懷愛憎之意者。以其名有善惡也。今野人晝見堦子者。以爲有喜樂之瑞。夜夢見雀者。以爲有爵位之象。然見堦者未必有喜。夢雀者未必彈冠。而人悅之者。以其名利人也。水名盜泉。尼父不漱。邑名朝歌。顏淵不舍。里名勝母。曾子還軼。亭名栢人。漢侯夜遁。何者。以其名害義也。以堦雀之徵。無益於人。名苟近善。而世俗愛之。邑泉之大。生人所庇。名必傷義。聖賢惡之。由此而言。則善



惡之義在於名也。昔有貧人，命其狗曰富，命其子曰樂，方祭而狗入於室，叱之曰富，出祝曰不祥，家果有禍，其子後死，哭之曰樂，而不自悲也。莊公時有人字其長子曰盜，次子曰毆，盜持衣出耨，其母呼之曰盜，吏因縛之，其母呼毆，毆喻吏遽而聲不轉，但言毆毆，吏因毆之，盜幾至於殪，立名不善而受其弊，審名之宜，豈不信哉。



新論卷四

知人第十八

龍之潛也。慶雲未附。則與魚鱉爲鄰。驥之伏也。孫陽未賞。必與騶駘同櫪。士之翳也。知己未顧。亦與傭流雜處。自非洞明莫能分也。故明哲之相士。聽之於未聞。察之於未形。而鑒其神智。識其才能。可謂知人矣。若功成事遂。然後知之者。何異耳聞雷霆而稱爲聰。目見日月而謂之明乎。故孔方譔之相馬也。雖未追風逐電。絕塵滅影。而迅足之勢固已見矣。薛燭之賞



劍也。雖未陸斬元犀，水截輕羽，而銳刃之資亦已露矣。故范蠡吹於大寶，文種聞而拜之；鮑龍跪石而吟，仲尼爲之下車。堯之知舜，不違桑陰；文王之知呂望，不以永日；眉叅之微而形於色，音聲之妙而動於心。賢聖觀察，不待成功而知之也。陳平之棄楚歸漢，魏無知識其善謀；韓信之亡於黑水，蕭何知其能將。豈待吐六奇而後明，破趙魏而方識哉？若於臨機能謀，而知其智；犯難涉危，乃見其勇。是凡夫之識，非明哲之鑒。公輸之刻鳳也，冠距未成，翠羽未樹，人見其身。



者謂之龍鵷。見其首者名曰鶚鷁。皆訾其醜而笑其拙。及鳳之成。翠冠雲聳。朱距電搖。錦身霞散。綺翻焱發。翩然一翥。翱翔雲棟。三日而不集。然後讚其奇而稱其巧。堯遭洪水。浩浩滔天。蕩蕩懷山。下民昏墊。禹爲匹夫。未有功名。堯深知之。使治水焉。乃鑿龍門。斬荆山。導熊耳。通鳥鼠。櫛奔風。沐驟雨。面目黧黧。手足胼胝。冠絰不暇取。經門不及過。使百川東注于海。西被于流沙。生人免爲魚鱉之患。於是衆人咸歌詠。始知其賢。故見其朴而知其巧者。是王爾之知公輸也。



鳳成而知其巧者，是衆人之知公輸也。未有功而知其賢者，是堯之知禹也。有功而知其賢者，是衆人之知禹也。故知人之君未易遇也。侯生夷門抱關之吏，見知於無忌。豫子范中行之亡虜，蒙異於智伯。名尊而身顯，榮滿於當世。雖復刎頸魏庭，漆身趙地，揣情酬德，未報知己虛左之顧。國士之遇也。世之烈士，願爲君者授命，猶瞽者之思視，蹙者之想行，而目終不得開，足終不得伸，徒自悲夫。



國之需賢，譬車之恃輪，猶舟之倚楫也。車摧輪，則無以行；舟無楫，則無以濟。國乏賢，則無以理。國之多賢，如託造父之乘，附越客之舟，身不勞而千里可期；足不行而蓬萊可至。朝之乏賢，若鳳麟六翮，欲望背磨青天，臆衝絳煙，終莫由也。峻極之山，非一石所成；凌雲之榭，非一木所構；狐白之裘，非一腋之毳；宇宙爲宅，非一賢所治。是以古之人君，必招賢搜隱，人臣則獻士舉知。唐昇二八，流睦睦之風；周保十亂，播濟濟之詠。仲尼在衛，趙鞅折謀；干木處魏，秦人罷兵。宮奇



未亡。獻公不侵。子玉猶存。文公側坐。以此而言。則立  
政致治。折衝厭難者。舉賢之效也。夫連城之壁。瘞影  
荆山。夜光之珠。潛輝鬱浦。玉無翼而飛。珠無脛而行。  
揚聲於章華之臺。炫燿於綺羅之堂者。蓋人君之舉  
也。賢士有脛而不肯至。殆蠹材於幽岫。毀跡於柴華  
者。蓋人不能自薦。未有爲之舉也。古人競舉所知。爭  
引其類。才苟適治。不問世胄。智苟能謀。奚妨穉行。昔  
時人君。拔竒於困虜。擢能於屠販。內薦不避子。外薦  
不避讐。身受進賢之賞。名有不朽之芳。昔子貢問於



孔子曰誰爲大賢子曰齊有鮑叔鄭有子產子曰齊無管仲鄭無子產乎子曰吾聞進賢爲賢非賢爲不肖鮑叔薦管仲子皮薦子產未聞二子有所舉也進賢爲美逾身之賢矧復抑賢者乎故黔息碎首以明百里北郭刎頸以申晏嬰所以致命而不辭者爲國薦士滅身無悔忠之至也德之難也臧文仲不進展禽仲尼謂之竊位公孫宏不引董生汲黯指爲妬賢虞丘不薦叔敖樊姬貶爲不肖東閭不達髦士後行不正於路故爲國入寶不如能獻賢獻賢受上賞



蔽賢蒙顯戮，斯前識之良規，後代之明鏡矣。

因顯第二十

夫火以吹燹生焰，鏡以瑩拂成鑑。火不吹則無外耀之光，鏡不瑩必闕內影之照。故吹成火之光，瑩爲鏡之華。人之寓代，亦須聲譽以發光華。猶凡火鏡假吹瑩也。今雖智如樗里，才若賈生，居環堵之室，無知己之談，望迹流於地，聲聞於天，不可得也。柳下惠不遇仲尼，則貞潔之行不顯，未免於三黜之臣，無耻之人也。季布不遇曹丘，則百金之諾不揚，未離於凡庸無



羞之士也。二子所以德洽於當時，而聲流於萬代者，聖賢吹瑩也。昔有賣良馬於市者，已三旦矣，而市人不顧。乃謂伯樂曰：「吾賣良馬，而市人莫賞，今子一顧，請獻半馬之價。」於是伯樂造市來而迎睇之，去而目送之。一朝之價，遂至千金。此馬非昨爲駑駘，今成馱馱也。由人莫之賞，未有爲之顧眄者也。夫樟木盤根鈎枝，癭節蠹皮，輪囷擁腫，則衆人不顧。匠者採焉，製爲殿堂，塗以丹漆，畫爲黼藻，則百辟卿士莫不顧眄。仰視木性猶是也。而昔賤今貴者，良工爲之容也。荆



璣之珠、夜光之璧、薦之侯王、必藏之以玉匣、緘之以金縢、若闇以投人、則莫不相眚以愕。按劍而怒、何者、爲無因而至、故若物無所以因、良馬勞於馭闐、美材朽於幽谷、寶珠觸於按劍、名有所因而至、則良馬一顧千金、槃木光於紫殿、珠璧擊之玉匣。今人之居當代、雖抱才智、幽鬱窮閨、而無所因邪、未有爲之聲譽、先之以吹瑩、欲望身之光、名之顯、猶捫虛縛風、煎湯覓雪、豈可得乎。



夫含氣庶品，未有不託附物勢以成其便者也。故霜雁託於秋風，以成輕舉之勢；騰蛇附於春霧，志希凌霄之遊；歷鼠附於蛩蛩，以攀追日之步；碧蘿附於青松，以茂凌雲之葉。與夫鳥獸蟲卉之智，猶知因風假霧，託峻附高，以成其事。奚況於人，而無託附以就其名乎？故所託英賢，則跡光名顯；所附闇蔽，則身悴名朽。天之始旭，則目察輕煙；歲之將暮，則蓬卷雲中。目之能見，蓬之能高，託日之光，附風之勢也。綴羽於金鐵，置之於江湖，必也沈溺，陷於泥沙，非羽質重而性



沈所託沈也。載石於舟。置之江湖。則披風截波。汎颺長澗。非石質輕而性浮。所託浮也。搏牛之蝱。飛極百步。若附鸞尾。則一翥萬里。非其翼工。所託迅也。樓季足捷。追越奔光。若駕疲驪。則日不涉一舍。非其脛遲。所託蹇也。以是觀之。附得其所。則重石可浮。短翅能遠。附失其所。則輕羽淪溺。迅足成蹇。夫燕之巢幕。銜泥補綴。爛若綾紋。雖陶匠逞妙。不能爲之。可謂固矣。然凱旋別幕。則巢破子裂者。所託危也。鷦鷯巢葦之莖。紩之以絲髮。珠圓羅縐。雖女子運巧。不能爲之。可



謂固矣。然雷風歟至，則葦折卵破者何也？所託輕弱使之然也。故鳥有擇木之性，魚有選潭之情，所以務其翔集，蓋斯爲美也。

心隱第二十二

二儀之大，可以章程測也；三綱之動，可以圭表度也；雷霆之聲，可以鐘鼓傳也；風雨之變，可以音律和也。故有象可觀，不能匿其影；有形可見，不能限其跡；有聲可聞，不能藏其響；有色可察，不能滅其情。以夫天地陰陽之難明，猶可以術數揆，而耳目可知，至於人



也。心居於內，情伏於衷，非可以筭數測也。凡人之心，險於山川，難知於天。天有春夏秋冬，旦暮之期，人有厚貌深情，不可得而知之也。故有心剛而色柔，容強而質弱，貌愿而行慢，性懷而事緩，假飾於外，以明其情。喜不必愛，怒不必憎，笑不必樂，泣不必哀。其藏情隱行，未易測也。日在天之外，而心在人之內，物亦照焉。照之於外，不可而偽內者也。而偽猶生焉。心在人之內，而智又在其內，神亦照焉。內之於內，無所取徵也。而欲求其情，不亦難乎？不潔在面，人皆耻之。不潔在



心人不肯愧以面露外而心伏內故善飾其情潛姦  
隱智終身不可得而見也少正卯在魯與孔子同時  
孔子門人三盈三虛唯顏淵不去獨知聖人之德也  
夫門人去仲尼而皈少正卯非不知仲尼之聖亦不  
知少正卯之佞子貢曰少正卯魯之文人也夫子爲  
政何以先之子曰賜也非爾所及也夫少正卯心逆  
而儉行辟而堅言僞而辯詞鄙而博順非而澤有比  
五爲而亂聖人以子貢之明而不能見知人之難也  
以是觀之佞與賢相類詐與信相似辯與智相亂



與直相像，若薺芄之亂人參蛇床之似薜蘿也。俗之常情，莫不自賢而鄙物，重已而輕人，觀其意也，非苟欲以愚勝賢，以短加長，由於人心難知，非可以准衡乎？夫能虛已相推，故有以輕抑重，以短凌長，是以嫫母窺井，自謂媚勝西施，齊桓矜德，自稱賢於堯舜，若子貢始事孔子，一年自謂勝之，二年以爲同德，三年方知不及，以子貢之才，猶不識聖人之德，望風相崇，奚況世人而能推勝已耶？是以真僞結銜，賢愚雜糅，自非明哲，莫能辯也。



新論卷五

通塞第二十三

命有否泰，遇有屈伸。否與泰相翻，屈與伸殊貫。邀泰遇伸，不盡獻智；遭否會屈，不專膚蔽。何者？否泰由命，屈伸在遇也。命至於屈，才通理壅；遇及於伸，才壅跡通。通之來也，非其力所招；壅之至也，非其智所迴。勢苟就壅，則口目雙掩；遇必屬通，則聲眺俱明。故處穴犬呼聲鬱數仞，順風長叫響通百里；大井望天，不過圓蓋登峯眺目，極於煙際，向在井穴之時，聲非卒噏。



目非暴昧而聞見局者其勢壅也及其乘風蹈峰聲  
非孟賁日非離婁而聲徹眺遠者其勢通也買臣忍  
饑而行歌王章苦寒而坐泣蘇秦握錐而憤懣班超  
執筆而慷慨當彼四子勢屈之時容色黧黑神情沮  
忸言爲瓦礫行成狂狷髮露心憂影銷貌悴引嘆而  
雷轉噴氣則雲湧如騏驥之伏於鹽車元猿之束於  
籠圈非無千里之馱萬仞之犍然而不異羸鈍者無  
所肆其巧也何異處穴而望聲徹入井而欲睇博哉  
及其勢伸志得或佩錦而還鄉或聲玉於廊廟或合



縱於六國之內。或懸旌於崑崙之外。當斯之時也。睿  
彩光煥。神氣開發。言成金玉。行爲世則。乘肥衣輕。怡  
然自得。漂若輕鷗之汎長波。沛若吞舟之颶太壑。何  
異順風而縱聲。登峯而長嘯。人猶是也。而昔如彼。今  
如此者。非謂昔愚而今賢。故醜而新美。壅之與通也。  
水之性清。動壅以堤。則波紐而氣腐。決之使通。循勢  
而行。從澗而轉。雖有朽骸爛卉。不能污也。非水之性  
異。通之與壅也。人之通猶水之通也。德如寒泉。假有  
沙塵。弗能污也。以是觀之。通塞之路。與榮悴之容。相



去遠矣。

遇不遇第二十四

賢有常質。遇有常分。賢不賢性也。遇不遇命也。性見於人。故賢愚可定。命在於天。則否泰難期。命運應遇。危不必禍。遇不必窮。命運不遇。安不必福。賢不必達。故患齊而死生殊。德同而榮辱異者。遇不遇也。春日麗天而隱者不照。秋霜被地而蔽者不傷。遇不遇也。昔韓昭侯醉卧而寒。典官加之衣。覺而問之。知典官有愛於已也。以越職之故。而加誅焉。衛之驂乘。見御



者之非、從後呼車、有救危之意、不蒙其罪、加之以衣、  
恐主之寒、呼車憂君之危、忠愛之情、是同越職之愆、  
亦等、典官獲罪、呼車見德、遇不遇也、鳴墮腐鼠、非虞  
氏之慢、斲冰沃地、非射姑之穢、事出慮外、固非其罪、  
而俠客大怒、虞氏見滅、邾君大怒、而射姑獲免、遇不  
遇也、齊之華士、棲志正壑、而太公誅之、魏之干木、遁  
代幽居、而文侯敬之、太公之賢、非有滅於文侯、干木  
之德、非有逾於華士、而或榮或戮者、遇不遇也、董仲  
舒智德冠代、位僅過士田、千秋無他殊操、以一言取



相同遇明主而貴賤懸隔者遇不遇也。莊姜適衛美而無寵宿瘤適齊醜而蒙幸遇不遇命也。賢不賢性也。怨不肖者不通性也。傷不遇者不知命也。如能臨難而不懾貧賤而不憂可爲達命者矣。

命相第二十五

命者生之本也。相者助命而成者也。命則有命不形於形。相則有相而形於形。有命必有相。有相必有命。同稟於天。相須而成也。人之命相。賢愚貴賤。修短吉凶。皆氣結胎受生之時。其真妙者。或感五帝三光。或



應龍跡氣夢降及凡庶亦稟天命皆屬星辰其值吉  
宿則吉值凶宿則凶受氣之始相命既定卽鬼神不  
能移改而聖智不能迴也華胥履大人之跡而生伏  
羲女媧感瑤光貫日而生顓頊慶都與赤龍合而生  
唐堯握登見大虹而生虞舜修紀見洞流星而生夏  
禹夫都見白氣貫月而生殷湯太姒夢見長人而生  
文王顏徵感黑帝而生孔子劉媪感赤龍而生漢祖  
薄姬感蒼龍而生文帝微子感牽牛星顏淵感中台  
星張良感狐星樊噲感狼星老子感火星若此之類



皆聖賢受天瑞命而生者也。相者或見肌骨或見聲色。賢愚貴賤修短吉凶皆有表診。故五岳崔嵬有峻極之勢。四瀆皎潔有川流之形。五色鬱然有雲霞之觀。五聲鏗然有鐘磬之音。善觀察者猶風胡之別八。孫陽之相馬。覽其機妙不亦難乎。伏羲日角。黃帝龍顏。帝嚳戴肩。顓頊骭骭。堯眉八采。舜目重瞳。禹耳三漏。湯肩二肘。文王四乳。武王齟齒。孔子返宇。顏回重瞳。臯繇鳥喙。若此之類皆聖賢受天殊相而生者也。舜目重瞳。是至明之相。而項羽王莽亦目重瞳。子越



王句踐長頸烏喙。非善終之象。而夏禹亦長頸烏喙。王莽之重瞳。譬駑馬有驥之一毛。而不可謂之驥也。句踐長頸烏喙。猶蛇有龍之一鱗。而不可謂之龍也。爰及衆庶。皆有診相。故穀子豐下。叔興知其有後。衛青方纔黥。徒明其富貴。亞夫縱理。許負見其餓死。羊斟聲豺。叔姬鑒其滅族。命相吉凶。懸之於天。命當貧賤。雖富貴猶有禍患。命當富貴。雖欲殺之。猶不能害。夏孔甲畋於箕山。大風晦暝。入於人家。主人方乳。或占之曰。後來而產是子。不勝。終必有殃。孔甲取之曰。



苟以爲余子，誰敢殃之。子長析薪，斧斲其左足，遂爲大閹。孔甲曰：嗚呼有疾，命矣夫！漢文以夢而寵鄧通，相者占通當貧餓死。帝曰：能富在我，何謂貧乎？與之銅山，專得冶鑄，後假衣食，寄死人家。子文之生，妘子棄之，虎乃乳之，遂收養焉。卒爲楚相，襄離國王侍婢有娠，王欲殺之。婢曰：氣從天來，故我有娠。及子之產，捐猪圈中，猪以氣噓之。棄馬廄中，馬復噓之，故得不死。卒爲夫餘之王，故善惡之命，若從天墮，若從地出，不得以理數推，非可以智力要。今人不知命之有限。



而妄覲於分願命在於貧賤而穿鑿求富貴命在於短折而臨危求長壽皆惑之甚者也

妄瑕第二十六

大道混然無形寂然無聲視之不見聽之不聞非可以影響求不得以毀譽稱也降此以往則事不雙美名不並盛矣雖天地之大三光之明聖賢之智猶未免乎訾也故天有折之象地有裂之形日月有謫蝕之變五星有悖彗之妖堯有不慈之誹舜有囚父之謗湯有放君之稱武有殺主之譏齊桓有貪淫之目



晉文有不臣之聲、伊尹有誣君之迹、管仲有愆上之名、以夫二儀七耀之聖、不能無虧、湯武之聖、不能免於嫌謗、桓文伊管之賢、不能無纖瑕之過、由此觀之、宇宙庸流、能自免於怨謗而無悔愆耶、是以荆岫之玉、必含纖瑕、驪龍之珠、亦有微類、然馳光於千里、飛價於侯王者、以小惡不足以傷其大美也、今忌人之細短、忘人之所長、以此招賢、是畫空而尋跡、披水而見路、不可得也、定國之臣、亦有細短、人主所以不棄之者、不以小妨大也、以小掩大、非求士之謂



也。伊尹夏之庖厨，傳說殷之胥靡，百里奚虞之亡虜，  
段干木魏之大駟，此四子者，非不賢也，而其迹不免  
污也。名不兩盛，事不俱美。昔魏文侯問於李克曰：吳  
起何如人也？克對曰：起貪而好色，然其善用兵，司馬  
穰苴不能過也。乃以爲將，拔秦五城，北滅燕趙，蓋起  
之力也。魏無知薦陳平於漢王，或人讒之曰：平雖美  
丈夫，如冠玉耳，其中未必有可用也。且聞盜嫂而受  
金，王乃踈平，讓無知。無知曰：臣進策謀之士，誠足以  
利國耳，且其小過，豈妨公家之大務哉？乃擢爲護軍。



得施其策。故范增疽發死。而楚國亡。關氏開陣。而漢軍全者。平之謀也。高祖棄陳平之小讐。音慙採六奇之大謀。文侯捨吳起之小失。而取五城之功。向使二主以其小過。棄彼良材。則魏國之存亡不可知。漢楚之雄雌未可決也。而吳起必埋名於貪好。陳平陷身於賄盜矣。俗之觀士者。見其威儀屑屑。好行細潔。乃謂英彥士有大趣。不修容儀。不惜小檢。而謂之棄人。是見朱橘一子蠹。因剪樹而棄之。覩繻錦一寸點。乃全足而燔之。齊桓深知寧戚。將任之以政。群臣爭讒之。



曰甯戚衛人去齊不遠君可使人問之若果真賢用之未晚也公曰不然患其有小惡者民人知小惡忘其大美此世所以失天下之士也乃夜舉火而爵之以爲卿相九合諸侯一匡天下桓公可謂善求士矣故仲尼見人一善而忘其百非鮑叔聞人一過而終身不忘夫子如斯之宏鮑叔如斯之隘也以是觀之聖哲之量相去遠矣牛躅之糞不生魴鱖巢幕之窠不容鵠卵崇山廓澤不辭污穢佐世良材不拘細行何者量小不足以包大形器大無分小瑕也人之情



性皆有細短。若其大畧是也。雖有小過。不足以爲累。若其大畧非也。雖有衡門小操。未足與論大謀。樊噲屠販之豎。蕭曹斗筭之吏。英布刑墨之隸。周勃俳優之任。其行皆中律。其質則將才也。張景陽郢中之大淫也。而威諸侯。顏濁鄒梁父之大盜也。而爲齊勲臣。此皆有所短。然而功名不朽者。大畧得也。袁精目鮑焦立節抗行。不食非義之食。乃餓而死。不能立功拯溺者。小節不申。而大節屈也。伯夷叔齊。冰清玉潔。義以不爲孤竹之嗣。不食周粟。餓死首陽。楊朱全身養



性去脛之一毛以利天下則不爲也。若此二子。德非  
不茂。行非不高。亦能安治代。柰蹈白刃而達功名乎。  
此可以爲百代之鎔軌。不可居伊管之任也。

適才第二十七

物有美惡。施用有宜。美不常珍。惡不終棄。紫貂白狐。  
製以爲裘。鬱若慶雲。皎如荆玉。此毳衣之美也。壓菅  
蒼蒯。編以簑芒。葉微疎索。黯若朽穰。此卉服之惡也。  
裘裘雖異。被服實同。美惡雖殊。適用則均。今處繡戶  
洞房。則簑不如裘。被雪沐雨。則裘不及簑。以此觀之。



適才所施。隨時成務。各有宜也。伏臘合歡。必歌採菱。  
牽石拖舟。則歌噓喚。無非激楚之音。然而棄不用者。  
方引重抽力。不如噓喚之宜也。卞莊子之昇殷庭也。  
鳴珮趨蹌。溫色怡聲。及其搏虎。必攘袂鼓肘。瞋目震  
嘖。非不知溫顏下氣之美。然而不能及者。方格猛獸。  
不如攘袂之宜也。安陵神童通國之麗也。八音繁會。  
使以噉吹噉聲。而人悅之。則不及瞽師侏儒之美。蛇  
蚺之珠。百代之傳寶。以之彈鵝。則不如泥丸之勁也。  
棠谿之劍。天下之鉅也。川之穫穗。魯不如鈎鑣之



也。此四者美不常珍，惡不終廢。用各有宜也。昔野人棄子貢之辯而悅馬圉之辭，越王退吹簫之音而好鄙野之聲，非子貢不及馬圉，吹簫不若野聲，然而美不必合，惡而見珍者，物各有用也。水火金木土穀六府異物而皆有施，規矩權衡準繩六法殊形而各有任，故伊尹之興土功也，長脰者使之蹋鍾，強脊者使之負土，眇目者使之準繩，偃僂者使之塗地，因事施用，仍便效才，各盡其分而立功焉。商誥之士，鷄鳴之客，才各有施，不可棄也。若使甯子結客於孟嘗，財未



免追軍之至。囚繫之辱也。若使鷄鳴託於齊桓。必不能光輔於霸道。九合諸侯也。時須過關。莫若鷄鳴欲隆霸王。莫若商誥。商誥之雅而鷄鳴之鄙。雖美惡有殊。至於適理排難。其揆一也。楚之市偷。天下之大盜。而能却齊軍。雖使孫吳用兵。彼必與之拒戰。未肯有望風而退也。晉之叔魚。一國之佞邪也。而能歸季孫。雖使甘蘇聘說。彼必與之較辯。不至恐懾而逃還也。大盜讒佞。民之殫害無用之人也。苟有士術。猶能爲國興利除害。矧乃明智鍊才。其爲大益。豈可棄耶。關



睢興於鳥而爲風之首，美其褻而有別也。鹿鳴興於獸而爲雅之端，嘉其得食而相呼也。以夫鳥獸之醜，苟有一善，詩人歌詠以爲美談。奚況人之有善而可棄乎？夫檉栢之斷也，大者爲之棟梁，小者爲之椽桷，直者中繩，曲者中鈎，隨材所施，未有可棄者。是以君子善能拔士，故無棄人；良匠善能運斲，故無棄材。是以人物交泰，各盡其分而立功焉。詩云：雖有絲麻，無棄菅蒯；雖有姬姜，無棄黜悴。此之謂也。

新論卷五終



新論卷六

文武第二十八

規者所以法圓裁局則乖矩者所以象方製鏡必背  
輪者所以輾地入水則溺舟者所以涉川施陸必躐  
何者方圓殊形舟車異用也雖形殊而用異而適用  
則均者盛暑炎蒸必藉涼風寒交冰結必處溫室夏  
不御氈非憎惡之炎有餘也冬不臥簟非怨讐之涼  
自足也不以春日遲遲而改羔裘秋露漉漉而別笄  
席白羽相望霜刃競接則又不及武干戈旣韜禮樂

聿修則武不及文不可以九畿惛然而棄武四郊多  
壘而擯文士用各有時未可偏無也五行殊性俱爲  
人用文武異林並爲大益猶救火者或提盆榼或挈  
瓶孟其器方圓形體雖反名質相乖至於盛水滅火  
功亦齊焉繳者身仰釣者身俯俯仰別狀取利同焉  
織者漸進耕者漸退進退異勢成務等焉墨子救宋  
重趺而行千木在魏身不下堂行止異跡存國一焉  
文以讚治武以凌敵趨舍殊律爲績乎焉秦之季葉  
土崩瓦解漢祖躬提三尺之劍爲黔首請命跋涉山



凡蒙犯矢石出百死以續一生而爭天下之利奮武  
厲誠以決一旦之命當斯之時冠章甫衣縫掖未若  
戴金胄而擐犀甲也羸項既滅海內大定以武創業  
以文止戈徵鄒魯諸生而制禮儀修六代之樂朝萬  
國於咸陽當此之時修文者榮顯習武者慙怍一世  
之閭而文武遽爲雄雌以此言之治亂異時隨務用  
才也今代之人爲武者則非文爲文者則啞武各執  
其所長而相是非猶以宮哭角以白非黑非適才之  
情得實之論也



均任第二十九

爲有寬隘量有巨細材有大小則任其輕重所處之  
分未可乖也是以萬碩之鼎不可滿以盂水一鈞之  
鐘不可容於泉流十圍之本不可蓋以茅茨榛棘之  
枉不可負於廣廈何者小非大之量大非小之器重  
非輕之任輕非重之制也以大量小必有枉分之失  
以小容大則致傾溢之患以重處輕必有傷折之過  
以輕載重則致壓覆之害故鷗鵬一軒橫厲寥廓背  
負蒼天足蹠浮雲有六翮之資也駉驥一騫騰光萬



里絕塵掣微有迅足之勢也。今以鷺雀之羽而慕冲天之迅，犬羊之蹄而覬追日之步，勢不能及，亦可知也。故奔蜂不能化藿蠋，而螟蛉能化之；越鷄不能伏鵠卵，而魯鷄能伏之。夫藿與螟蛉俱蟲也，魯鷄與越鷄同禽也，然化與不化，伏與不伏者，藿大越小也。夫龍蛇有翻騰之質，故能乘雲依霧；賢才有政理之德，故能踐勢處位。雲霧雖密，蟻蚓不能昇者，無其質也。勢位雖高，庸敝不能治者，乏其德也。故智小不可以謀大，德狹不可以處廣。以小謀大必危，以狹處廣必



敗。子游治武城，仲尼發割雞之嘆。尹何爲邑宰，子產出製錦之諫。德小而任大，謂之濫也。德大而任小，謂之降也。而其失也，寧降無濫。是以君子量才而授任，量任而授爵。則君無虛授，臣無虛任，故無負山之累，折足之憂也。

慎言第三十

日月者，天之文也。山川者，地之文也。言語者，人之文也。天文失，則有謫蝕之變。地文失，則有崩竭之災。人文失，則有傷身之患。故口者言語之門戶，舌者門戶



之關鑰。關鑰動則門戶開。門戶開則言語出。出言之善則千里應之。出言之惡則千里違之。言失於已不可遏於人。情發於近不可止於遠。是以君子慎其關鑰以密言語。言語在口。譬含鋒刃不可動也。動鋒刃者必傷喉舌。言失之害非惟鋒刃其所傷者不惟喉舌。故天有卷舌之星。人有緘口之銘。所以警惕言防口訖也。口舌者禍患之宮。亡滅之府也。語言者性命之所屬。而形骸之所係也。言出患入。語失身亡。身亡不可復存。言出不可復追。其猶射也。懸機未發則猶



可止。矢一離絃，雖欲返之，弗可得也。易誠樞機，詩刺言玷，斯言一玷，非礪礪所磨，樞機旣發，豈駭電所追，皆前聖之至慎。後人之挺鎔，明者慎言，故無失言。闇者輕言，自致害滅。昔智伯失言於水灌，韓魏躡其肘足。魏武漏語於英雄，元德遺其七節。是以頭爲穢器，師馳徐州，地分三晉，土割岷蜀，亡敗長釁，爲天下笑，不慎言也。韓昭侯與棠谿公謀，而終夜獨寢，慮夢言露於妻妾也。孔光不對溫室之樹，恐言之泄於左右也。言者風也，無足而行，無翼而飛，不可易也。是以聖



人當言而懼，發言而憂，如蹈水火，臨危險也。禮然後動，則動如春風。人不厭其動，時然後言，則言如金石。人不厭其聲，故身無失行，口無過言也。

貴言第三十一

越劍性銳，必託槌砧以成純鉤。楚柘質勁，必資撈檠以成彗弓。人性雖敏，必藉善言以成德行。故槌砧者，夷不平也；撈檠者，矯不正也；善言者，正不善也。人目短於自見，故借鏡以觀形；髮拙於自理，必假櫛以修束；心闇於自炤，則假言以策行。面之所以形明，鏡之



力也。髮之所以理，元櫛之功也。行之所以策，善言之益也。鏡櫛理形，其惠輕也。善言成德，其惠重也。人皆悅鏡之明，已形而不慕士之明，已心。人皆欲櫛之理其髮，不願善言之理其情，是棄重德而採輕功，不亦倒乎？爲衣冠者，已手不能，則知越鄉借人以製之。至於理身而不知借言以修其行，是處其身輕而於冠重，不亦謬乎？君子重正言之惠，賢於軒璧之贈，樂聞其過，勝於德義之名。故楚莊王輕千乘之國，而重申叔一言。范獻賤萬畝之田，以貴舟人片說。季路抱五



慎之誠。趙盈佩九言之箴。以此觀之。軒壁之與田邑。豈能與善言齊價哉。夫桓侯不採越人之說。卒成骨髓之疾。吳王不聽枚乘之言。終受夷滅之禍。夫人之將疾者。必不甘魚肉之味。身之將敗。必不納忠諫之言。故臨死者。謂無良醫之藥。將敗者。謂無直諫之臣。而不聽善言。是耳聾也。非其耳之有塞。善言不入耳乎。是以明者。納規於未形。採言於患表。從善如轉圜。遣惡如讐敵。正音日聞於耳。禍害逾遠於身。昔堯設招諫之鼓。舜樹誹謗之木。湯立司過之士。武王置誠



慎之。鼓以聖哲之神鑒，窮機洞微，非有臺壘之謬也。猶設廣聽之術，開嘉言之路，豈不貽厥將來，表正言之益耶？以夫先聖，猶能採言於芻蕘，奚況布衣而不貴言乎？故臣子之於君父，則有獻可替否，諷諫之文。知交之於朋友，亦有切磋琢磨，相成之益。我君子若能聽言如響，從善如流，則身安南山，德茂松栢，聲振金石，名流千載也。

傷讒第三十二

譽者揚善之樞也，毀者宣惡之機也，揚

生於性美



宜惡出於情。妬性美以成德爲恆情。妬以傷人爲務。故譽以論善。卽辭以極善爲功。毀以舉過則言以窮惡爲巧。何者。俗人好奇不奇不用也。譽人不增其義。則聞者不快於心。毀人不益其惡。則聽者不滿於耳。代之善人少而惡人多。則舉者寂寞而讒者誼譁。是以洗垢求痕。吹毛覓瑕。揮空成有。轉白爲黑。提輕當重。引寸至尺。墨子所以悲素絲。楊朱所以泣岐路。以其變爲青黃。迴成左右也。昔人興讒言於青蠅。譬利口於刀劍者。以其點素成緇。刃勁傷物。故在四畏不

可不慎。鳥之曲喙跂距者，羽類畏之；獸之方喙鉤爪者，毛群畏之；魚之哆脣鋸齒者，鱗族畏之；人之言口，讒諂者人其畏之；讒嫉之人，必好聞人惡，惡聞人善。妬才智之在己，前暮富貴之在己上，猶喉中有壺，吞之思入，目上有翳，決之願去，吞決之情深，則萋斐之辭作。故揚娥眉者，爲醜女之所妬；行貞潔者，爲讒邪之所嫉。昔直不疑，未嘗有兄，而讒者謂之盜嫂，第五倫，三娶孤女，而世人謂答婦翁，如此者，皆聽虛而責響，視空而索影，悖情而倒理，誣罔之甚也。以二子之賢，



非身行之不潔、與人有仇也、而不免於世謗者、豈非  
獸惡其網、人惡其讒耶、故讒邪之蔽善人也、猶朝日  
洞明、霧甚則不見天、沙石至、淨流濁則不見地、雖有  
明淨之質、而不發明者、水霧蔽之也、蘭蓀欲茂、秋風  
害之、賢哲欲正、讒人敗之、故讒者知害嫉於他人、而  
不知傷所說之主、知傷所說之主、而不知還害其身、  
故無極之讒、子常蒙謗、郗費雙滅、謔之流弊、一至  
於斯、嗚呼、世之君子、可不慎諸、

慎隙第三十三

過者怨之梯也。怨者禍之府也。禍之所生，必由積怨。  
過之所始，多因忽小。小過之來，出於意表。積怨之成，  
在於慮外。故其來也，不自悔其成也。怨不可防，防怨  
不密，而禍害臻焉。故登峭坂而不跌墜者，慎於大也。  
跨阜垤而好顛壓者，輕於小也。苟兢其步，雖履嶮能  
安，輕易其足，雖夷路亦躓。智者識輕小之爲害，故慎  
微細之危患。每畏輕微，惺惺焉。若朽索之馭六馬也。  
鴻毳性輕，積之沉舟。魯縞質薄，疊之折軸。以毳縞之  
輕微，能敗舟車者，積多之所致也。故墻之崩隤，必因



其隙劒之毀折皆由于瑩尺蚓穿堤能漂一邑寸燧  
泄突致灰千室怨之始也微於隙瑩及其爲害大於  
墻劒禍之所傷甚於邑室將防其萌急於水火夏書  
曰怨豈在明不見是圖故怨不在大亦不在小熒熒  
不滅能焚崑山涓涓不絕能成江河怨之所生不可  
類推禍之所言非可情測或怨大而成小或憾輕而  
至重深讐不必危而睚眦未可易也譬如風焉披雲  
飛石捲水斃木而人血脉不爲之傷隙穴之風輕塵  
不動毛髮不搖及中肌膚以爲深疾大不爲害小而



成患者。大風散漫。小風激射也。故漢祖免貫高之逆。魏后曹操泄張繡之讐。韓信削少年之辱。安國釋田甲之慢。此皆遇英達之主。寬廓之衿。得以深怨而不爲讐也。魯酒薄而邯鄲圍。羊羹偏而宋師敗。郈孫以鬪鷄亡身。齊侯以笑嬪破國。皆以輕蔑細怨。忘樹禍端。以酒食戲笑之故。敗國滅身。爲天下笑。不慎故也。識之闇者。皆以小害易微之事。以至於大患。禍之至也。人自生之。福之來也。人自成之。禍與福同門。害與利同隣。若非至精。莫能分矣。是以智慮者。禍福之門。



戶動靜者利害之樞機不可不慎也

新論卷六終

新詩

卷六

一



新論卷七

誠盈第三十四

四時之序，節滿卽謝，五行之性，功成必退，故陽極而  
降，陰極而昇，日中則昃，月盈則虧，此天之常道也。勢  
積則損，財聚則散，年盛返衰，樂極還悲，此人之恒情  
也。昔仲尼觀欹器而革容，鑒損益而嘆息，此察象而  
識類，覩霜而知冰也。夫知進而不知退，則踐盈滿之  
危，處存而不忘危，必履太山之安。故雷在天上曰大  
壯，山在地中曰謙。謙則裒多益寡，壯則非禮勿履，處



壯而能用禮，居謙而能益寡，降高以就卑，抑強而同弱，未有謙尊而不光，驕盈而不斃者也。聖人知盛滿之難持，每居德而謙，冲雖聰明睿智而志逾下，富貴廣大而心逾降，勛蓋天下而情逾抑，不以德厚而矜物，不以身尊而驕民。故楚莊王功立而心懼，晉文公戰勝而色憂，非憎榮而惡勝，乃功大而心小，居安而念危也。夏禹一饋而七起，周公一沐而三握髮，食不遑飽，沐不及晞，非耐飢而樂勞，是能心急於接士，總處於謙光也。易曰：以貴下賤，大得民也。是以君子高



而能卑富而能儉貴而能賤智而能愚勇而能怯辯而能訥博而能淺明而能闇是謂損而不窮也

明謙第三十五

天道下濟而光明江湖善下而爲王故山在地中成謙王侯以孤寡爲損謙則榮而逾高損則顯而彌貴高必以下爲基貴則以賤爲本在貴而忘貴故能以貴下民處高而遺高故能以高就卑是以大壯往則復天地之謙也極升必降陰陽之謙也滿終則虧日月之謙也道盈體中聖人之謙也易稱謙尊而彌光



老子云不伐故有功。謙者在於降已。以高下卑。以聖從鄙。不伐在於有功。不矜在於有德。不言歸於冲退。謙挹之流也好盈。自賢矜功伐善者。俗之常情。聖人之惡也。必矜其功。雖賞之而稱勞。情猶不足。苟伐其善。雖與之賞多。必怨其少。則謙望之情生。躁競之色見。矜伐之路開。患難之釁作矣。君子則不然。在榮以挹損爲基。有功而不矜。有善而不伐。遺其功而功常存。忘其善而善自全。情常忘善。故能以善下物。情恒存善。故能以善勝人。是以情存功善。非心謙也。口虛



托謙豈非矯乎。以善勝物。心遺功善。非矜伐也。口及其善。豈非實乎。故心存功善。非心謙也。口雖不言。未免矜伐。心捨功善。口雖明言。無傷於謙。故夏禹昌言。明稱伐功。咎繇陳謨。云說我惠。豈其矜功而存惠哉。夫言善非伐。而伐善者。每稱其能。言惠非矜。而矜惠者。常存其惠。聖人知人情尚賢而好伐。故發言裁典。多由謙退。所以棄其驕嫖。競垂世則也。

大質第三十六

火之性也。大寒慘淒。凝冰裂地。而炎氣不爲之衰。大



熱煊赫。焦金爍石。而炎氣不爲之熾者。何也有自然之質。而寒暑不能移也。故丹可磨。而不可奪其色。蘭可燔。而不可滅其馨。玉可碎。而不可改其白。金可銷。而不可易其剛。各抱自然之性。非可強變者也。士有忠義之性。懷真直之操。不移之質。亦如茲者。也是以生苟背道。不以爲利。死必合義。不足爲害。故不趨利。而逃害。不忻生。而憾死。不可以威脇而變其操。不可以利誘而易其心。昔子閭之劫也。擬之白刃。而其心不傾。晏嬰之盟也。鈎以曲戟。而其志不廻。不可以利



害移其情矣。夫士有忠義之行。踐繩墨之節。其於平日。乃無異於衆人。及至處患蹈難。而志氣貞剛。然後知其殊也。譬如鍾山之玉。寒嶺之松。比璵璠梓柳。無殊也。及其燒以爐炭。三日而色潤不改。處於積冰。終歲而枝葉不凋。然後知其異於他玉衆木也。故袒褐暴虎。而後勇氣發焉。超騰絕坂。而後迅捷露焉。手提萬鈞。而後多力見焉。處難踐患。而後貞勇出焉。不用干將。奚以知其銳也。不引烏號。奚以知其勁也。勁銳之質。較然易見。猶因人獲顯。况乃志行難覩。曷得不



因事而後明庠。

辯施第三十七

夫山臯非爲鳥植林。林茂而鳥自栖之。江湖非爲魚  
鑿潭。潭深而魚自歸之。處世非爲人積財。財積而人  
自依之。非其所招勢使然也。懷璧之子未必能惠。而  
人競親者。有惠人之資也。被褐之士性能輕財。而皆  
疎之者。無惠人之資也。令富而儉。去猶見親敬。貧而  
仁施。必見疎慢。非行之失。彼情變也。策駟登山。不得  
直轡而行。泛舟入海。不得安身而坐。何者。山路迂迴。



海水淪沒行者欲直而路曲之坐者欲安而水蕩之仁者欲施而貧過之富而賑物德不爲難貧而儉嗇行非爲過天之道損有餘人之情矜不足也崑山之下以玉抵烏彭蠡之濱以魚食犬而人不愛者非性輕財所豐故也挈餅丐水執萑求火而人不恡者非性好施有餘故也口非匏瓜不得不食身非木石不得不衣食不滿腹豈得輟口而惠人衣不蔽形何得露體而施物非性儉恡不足故也飢饉之春不賑朋戚多稔之秋饗及四隣不賑朋戚人之惡惠及四隣

人之善蓋善惡之行出於性情而係於飢穰也。以此觀之太豐則恩情生，饑乏則仁惠廢也。相馬者失在於瘦，求千里之步虧也。相人者失在於貧，求恩惠之迹缺也。輕財之士世非少也，然而不見者，貧掩之也。德行未著而稱我能，猶足不能行而賣楚藥，望人信之實爲難矣。

和性第三十八

夫歐冶鑄劍，太剛則折，太柔則卷。欲劍無折必加其錫，欲劍無卷必加其金。何者？金性剛而錫質柔，剛柔



均平則爲善矣。良工塗漆，緩則難晞，急則弗牢。均其緩急，使之調和，則爲美也。人之含性，有似於茲。剛者傷於嚴猛，柔者失於軟懦。緩者悔於後機，急者敗於懷促。故鑄劍者使金不至折，錫不及卷，製器者使緩而能晞，急而能牢。理性者使剛而不猛，柔而不懦，緩而不後機，急而不懷促。故能劍器兼善，而性氣淳和也。昔徐偃王軟而國滅，齊簡公懦而身亡，此性太柔之失也。晉陽處父以純剛取害，鄭子陽以嚴猛致斃，此性太剛之過也。楚子西寬而招敗，邾莊公懷而自



禍此性褊急之災也。西門豹性急，佩韋皮以自緩。董安于性緩，帶絲絃而自急。彼各能以一物所長，攻其所短，故陰陽調，天地和，剛柔均，人事和也。陰陽不和，則水旱失節。剛柔不均，則強弱乖政。水旱失節，則歲敗。強弱乖政，則身亡。是以智者寬而慄，嚴而溫，柔而毅，猛而仁，剛而濟其柔，柔抑其強，強弱相參，緩急相弼，以斯善性，未聞誤物而有悔吝者也。

殊好第三十九

累榭洞房，珠簾玉宸人之所悅也。鳥入而憂，聳石巉



巖鞠菌糾結，後狘之所便也。人上而慄，五音六律成池簫韶，人之所樂也。獸聞而振，懸瀨碧潭，瀾波洶湧，魚龍之所安也。人入而畏，飛鼯甘煙，走貊美鐵，鴟目嗜蛇，人好芻豢，鳥獸與人受性既殊，形質亦異，所居隔絕，嗜好不同，未足怪也。人之與獸，共稟二儀之氣，俱抱五常之性，雖賢愚異情，善惡殊行，至於目見日月，耳聞雷霆，近火覺熱，履水知寒，此之粗識，未宜有殊也。聲色芳味，各有正性，善惡之分，皎然自露，不可以皂爲白，以羽爲角，以苦爲甘，以臭爲香，然而嗜好



有殊絕者，則偏其反矣。非可以類推，弗得以情測。顛倒好醜，良可怪也。賴顏玉理，盼視巧笑，衆目之所悅也。軒皇愛嫫母之醜貌，不易落英之麗容。陳侯悅敦冶之醜狀，弗賀陽文之婉姿。炮羔煎鴻，臠螭臠熊，衆口之所嫌。文王嗜菖蒲之菹，不易龍肝之味。陽春白雪，噉楚採菱，衆耳之所樂也。而漢順聽山鳥之音，云勝絲竹之響。魏文侯好槌鑿之聲，不貴金石之和。鬱金元膽，春蘭秋蕙，衆鼻之所芳也。海人悅至臯之味，不愛芬馨之氣。若斯人者，皆性有所偏也。執其所好，



而與衆相反、則倒白爲黑、變苦成甘、移角成羽、佩猶  
蒜、當薰美醜無定形、愛憎無正分也、

新論卷七終

新詩

八

八



新論卷八

兵術第四十

太古淳朴，民心無欲，淳澆則爭起而戰萌生焉。神農氏弦木爲弧，剡木爲矢，弧矢之利，以威天下，其後蚩尤強暴，好習攻戰，銷金爲刃，割革爲鉞，而兵遂興矣。黃帝戰於涿鹿，顓頊爭於不周，堯戰丹水，未詳舜征有苗，夏討有扈，殷攻葛伯，周伐崇侯，夫兵者凶器，財用之蠹，而民之殘也。五帝三王弗能弭者，所以禁暴而討亂，非欲耗財以害民也。然衆聚則財散，鋒接則民

殘勢之使然也。故兵貴伐謀。不重交刃。百戰百勝。非用兵之善也。善用兵者。不戰而勝。善之善也。王者之兵。修正道而服人。霸者之兵。奇譎變而取勝。夫將者。國之安危。民之性命。不可不重。故詔之於廟堂。授之以斧鉞。受命既已。則設明衣。鑿凶門。臨軍之日。則忘其親。援鼓之時。則忘其身。用能無天於上。無地於下。無敵於前。無顧於後。以全國爲重。以智謀爲先。故將者。必明天時。辨地勢。練人謀。明天時者。察七緯之情。洞五行之趣。聽八風之動。鑒五雲之候。辨地勢者。識



七舍之形。別九地之勢。練人謀者。抱五德之美。握二柄之要。五德者。智信仁勇嚴也。二柄者。賞罰也。智以能謀。信以約束。仁以愛人。勇以陵弱。嚴以鎮衆。賞以勸功。罰以懲過。故智者變通運奇之府也。兵者詭道而行。以制其勝也。是以萬弩齊發。孫臏之奇。千牛俱奔。田單之策。囊土壅水。韓信之權。拽柴揚塵。樂枝之譎。舒車豕突。尹子之術。雲梯煙浮。魯生之巧。用奇出於不意。少可以挫多。弱可以折強。況夫以衆擊寡。以明攻昧。兵形象水。水之行避高而就下。兵之勢避實而



擊虛。避強而攻弱。避治而取亂。避銳而擊衰。故水因地而制形。兵因敵而制勝。則兵無成勢。水無定形。觀形而運奇。隨勢而應變。反經以爲巧。無形以成妙。故風雨有形。則可以帷幕捍。寒暑無形。不可以關鑰遏。也是以善攻者。敵不知其所守。如畏雷電。擊無常處。善守者。敵不知其所攻。如尋寰中。不見其際。視吾之謀。無畏敵堅。視吾之堅。無畏敵謀。以此言之。不可不知也。夫將者。以謀爲本。以仁爲源。謀以制敵。仁以得人。故謀能制敵者。將也。力能勝敵者。卒也。將以權決。



爲本卒以齊力爲先是以列宿滿天不及  
一光不同也虎兕多力而受制於人者心不  
濟也萬人離心不如百人同力千人遞戰不  
俱至今求同心之衆必死之士在於仁恩洽  
明胥靡者臨危難而不懼履水火而如歸非輕  
樂傷仁恩驅之也將得衆心必與同患暑不張  
不御裘所以均寒暑也隘險不乘正陵必下所以  
勞逸也軍食熟然後敢食軍井通然後敢飲所以  
飢渴也三軍合戰必立矢石之下所以共安危也

醪醪注流。軍士通醉。溫詞一灑。師人挾纊。苟得衆。則人競趨死。以此衆戰。猶轉石下山。決水赴壑。孰當之矣。

閱武第四十一

司馬法曰。國家雖大。好戰則亡。天下雖安。忘戰必亡。亟戰則民凋。不習則民怠。怠非保全之術。怠非擬安之方。故兵不妄動。而習武不輟。所以養民命而修戎備也。孔子曰。不教民戰。是爲棄之。易曰。君子修戎器。以備不虞。是以春蒐夏苗。秋獮冬狩。皆於農隙以講。



年而治兵，習戰敵也。出曰治兵，治其事也。入  
旅，言整衆也。還歸而飲，至告於廟，所以昭文章。  
賤順少長，辯等列，習威儀。夫三軍浩漫，則立表  
不相聞，故爲鼓鐸以通其耳。視不相見，故制旌  
以宣其目。若民不習戰，則耳不聆鼓鐸之音，目不  
旌麾之號，進退不應令，踈數不成行。故士未戰而  
心馬未馳而流汗，非其人怯而馬弱，不習之所致。  
大王宮人教之戰陣，約之法令，迴還進退，盡中規  
蹈水火而不顧者，非其性勇而氣剛。教習之所

一。鎡鄣不爲巧者銳而爲拙者鈍。然而巧以坐勝。  
而取負者。習與不習也。闔閭習武。試其民於五湖。  
皆加肩流血不肯止。勾踐習戰。試其民於寢宮。民  
入水火。死者千餘。遽擊金而退之。豈其惡生而貪  
負罰明而教習至也。是以逢蒙善射。不能用。不調  
弓。造父善御。不能策。不服之馬。般倕善斲。不能運  
利之鉞。孫吳善將。不能戰。不習之卒。貔貅戾獸而  
帝教之戰。鷹鷂驚鳥而羅氏教之擊。夫鳥獸無知。  
性猶隨人。指授而能戰。擊者教習之功也。奚況國



之士民而不習武乎。故射御慣習，至於馳獵，則能擒獲教習之所致也。若弗先習，覆迭是懼，奚遽望獲。今以練卒與不練卒交鋒，若胡越爭遊，不競明矣。是以先王因於閑隙，大閱簡衆，教修戎器，爲國豫備也。

### 明權第四十二

循理守常曰道，臨危制變曰權。權之爲稱，譬猶權衡也。衡者測邪正之形，權者揆輕重之勢。量有輕重，則形之於衡；今加一環於衡左，則右蹶；加之於右，則左蹶。唯莫之動，則平正矣。人之於事，臨危制變，量有輕

重、平而行之，亦猶此也。古之權者，審其輕重，必當於理而後行焉。易稱巽以行權，語稱可以適道，未可與權。權者，反於經而合於道，反於義而後有善。若唐棣之華，反而更合也；孝子之事親，和顏卑體，盡孝盡敬，及其溺也，則攬髮而拯之，非敢侮慢以救死也。故溺而拯父，視則名君，勢不得已。權之所設也。慈愛者人之常情，然大義滅親，滅親益榮，由於義也。是故慈愛方義，二者相權，義重則親可滅。若虞舜之放傲弟象，周公之誅管叔，石碯之殺子厚，季友之醜叔牙，以義



權親此其類也。欺父矯君。臣子悖行。然舜娶不告。莒高矯命者。以絕祀之罪。重於不告。矯命之過。輕於滅國。權之義也。夫有道則無權。道失則權作。道之於用。猶衣冠之在身也。權之輕重。猶甲冑之衛體也。介冑禦寇而不可常服。權以度理而不可常用。自非賢哲。莫能處也。

貴速第四十三

成務雖均。機速爲上。決謀或同。遲緩爲下。何者。才能成功。以速爲貴。智能決謀。以疾爲奇也。善齊事者。若

救火拯溺明其謀者猶驥捷矢疾。今焚燹燹室則飛  
馳灌之。湍波漂人必奔游拯之。若穿井而救火則燹  
廬棟焚矣。方鑿舟而拯溺則葬江魚之腹中矣。驥所  
以見珍者以其日行千里也。滿旬而取至則與駑馬  
均矣。箭所以爲貴者以其弦直而立至也。窮日而取至  
者則與不至者同矣。智所以爲妙者以其應時而知  
也。若事過而後知則與無智者齊矣。昔吳起相楚。嘗  
族攻之。起欲討讐而挿矢王屍。陽虎在圍。魯人出之。  
虎欲報德而傷之以戈。謀不斯須而讐德兩報。其智



可謂應時而知矣。張祿之入秦，魏冉悔不先索而後行，故勢移而身逐。晁錯之穴壩垣，申屠悔不先斬而後奏，故發憤而致死。智不早決，敗而方悔，其智可謂與無智者同矣。故有智而不能施，非智也；能施而不能應速者，亦非智也。彥曰：力貴矣，智貴卒。此之謂也。

#### 觀量第四十四

夫曲思於細者，必忘其大；銳情於近者，必畧於遠。由心不並持，則事不兼通。小有所係，大必所忘也。故仰而貫針，望不見天；俯而拾虱，視不見地。天地至大而

不見者。眸掩於針虱故也。是以智者知小道之妨大務。小察之傷大明。捐棄細識。舒散情性。以斯觀之。人  
有小察細計者。知其必無遐志廣度。亦可知矣。奚以  
明之。夫觀樵僂之節。知非防風之脰。視象之牙。知其  
大於豕也。見狸之尾。知其小於豹也。故觀一可以知  
百。觀此可以明彼。是蹄窪之內。不生蛟龍。培塿之上  
不植松柏。非水土之性有所不生。乃其營宇隘也。數  
粒而炊。析薪而爨。非苟爲艱難。由性褊狹而細碎也。  
項羽不學一藝。韓信不營一食。非其心不愛藝。口不



嗜味。田其性大不綴細業也。晉文種米。魯子植羊。非性闇蠢不辯方隅。以其運大不習小務也。智伯庖人亡炙一筐而卽知之。韓魏將反而不能知。邯鄲子陽園亡一桃而卽覺之。其自亡也而不能知。斯皆銳情於小而忘大者也。夫釣者雖有籬竿纖綸。芒鉤芳餌。增以詹何之妙。不能與罾罾爭多。弋者挾繁弱之弓。貫會稽之箭。加以蒲苴之巧。不能與尉羅競獲。何者。術小故也。江河之流。爛胔漂屍。縱橫接連而人飲之者。量大故也。盆盂之水。鼠尾一曳。必嘔吐而棄之者。

量小故也。枳棘之生，數寸而抽枝；豫樟之植，百尺而  
蔭柯。其何故耶？豈非質小者而枝條旣之，而體大者  
節目疎乎？是以達者之懷，則混濛而無涯；褊人之情，  
必刻覈而煩細。自上觀之，趨舍之跡，寬隘之量，斷可  
識矣。



新論卷九

隨時第四十五

時有淳澆。俗有華戎。不可以一道治。不得以一體齊也。故無爲以化三皇之時。法術以禦七雄之世。德義以柔中國之心。政刑以威四夷之性。故易貴隨時。禮尚從俗。適時而行也。霜風慘烈。周棄不執禾。炎氣赫曦。曹明不製裘。知時不可也。賀章甫者。不造閩越。銜赤舄者。不入跣狹。知俗不宜也。故救饑者。以圓寸之珠。不如與之橡斗。貽溺者。以方尺之玉。不如與之短

綆。非橡綆之貴而珠玉之賤。然而美不敵者。各在其所急也。方於飢溺之時。珠玉寧能救生死哉。是以中河失船。一瓠千金。貴賤無常。時使然也。昔秦攻梁。惠王謂孟軻曰。先生不遠千里。辱幸敝邑。今秦攻梁。先生何以禦乎。孟軻對曰。昔太王居邠。狄人攻之。事之以玉帛。不可。太王不欲傷其民。乃去邠之岐。今王奚不去梁乎。惠王不悅。夫梁所寶者國也。今使去梁。非不能去也。非今日之所宜行也。故其言雖仁義。非惠王所須也。亦何異救餓而與之珠。拯溺而投之玉乎。



秦孝公問商鞅治秦之術，鞅對以變法峻刑，行之三年，人富兵強，國以大治，威服諸侯。以孟軻之仁義，論大王之去邠，而不合於世用，以商君之淺薄，行刻削之苛法，而反以成治，非仁義之不可行，而刻削之爲美。由於淳澆異跡，則政教宜殊，當合縱之代而仁義未可全行也。故明鏡所以照形，而盲者以之蓋卮玉，笄所以飾首，而禿嫗以之挂杙，非鏡笄之不美，無用於彼也。庖丁解牛，適俗所領，朱泚屠龍，無所用功。苟乖世務，雖有妙術，歸於無用。故老聃至西戎而効獭



言夏禹人鰥國，忻然而解裳，非欲忘禮，隨俗宜也。墨子儉嗇而非樂者，往見荆王，衣錦吹笙，非苟違性，隨時好也。魯哀公好儒服而削代君修墨而殘，徐偃公行仁而亡，燕噲爲義而滅，夫削殘亾滅暴亂之所招，而此以仁義儒墨而遇之，非仁義儒墨之不行，行非於時之所致也。

風俗第四十六

風者氣也，俗者習也。土地水泉，氣有緩急，聲有高下，謂之風焉。人居此地，習以成性，謂之俗焉。風有厚薄，



俗有淳澆。明王之化。當移風使之雅。易俗使之正。是以上之化下。亦爲之風焉。民習而行。亦爲之俗焉。楚越之風好勇。其俗赴死而不顧。鄭衛之風好淫。其俗輕蕩而忘歸。晉有唐虞之遺風。其俗節財而儉嗇。齊有景公之餘化。其俗奢侈以誇競。陳太姬無子而好巫祝。其俗事鬼神以祈福。燕丹結客。納勇士於後宮。其俗侍妻妾於賓客。斯皆上之風化。人習爲俗也。越之東有軫沐之國。其人父死。卽負其母而棄之。云是鬼妻。不可與同居。其長子生。則解肉而食其母。謂之



宜弟。楚之南有啖人之國，其親死，析其肉而埋其骨，謂之爲孝。秦之西有義渠之國，其人死，則聚柴而焚之，煙上燻天，謂之昇霞。胡之北有射姑之國，其親死，則棄屍於江中，謂之水仙。斯皆四夷之異俗，無足怪也。是以先王傷風俗之不善，故立禮教以革其弊，制禮樂以和其性，風移俗易而天下正矣。

利害第四十七

利害者，得失之本也。得失者，成敗之源也。故就利而避害，愛得而憎失，物之恒情也。人皆知就利而避害。



莫知緣害而見利。皆識愛得而憎失。莫識由失以至  
得。有知利之爲害。害之爲利。得之成失。失之成得。則  
可與談利害而語得失矣。夫內熱者之飲毒藥。非不  
害也。疽瘞用砭石。非不痛也。然而爲之者。以小痛來  
而大痛滅。則細害至巨害除也。飢而倍食。渴而大飲。  
熱而投水。寒而入火。雖暫怡性。必爲後患。菖蒲去蚤  
虱而來蚰蜒。樊石止齒齲之痛。而朽牙根。躁痛雖餌。  
必至生害。此取小利而忘大利。惟去輕害而負重害  
也。瘕疾填胸。而不敢鉞。蠱尾螫踵。而不敢斫。非好疾

而愛毒以破斫之患甚於疾螫也。酖酒盈卮。渴者弗飲。非不渴也。飲之立死。銷金在爐。盜者弗掬。非不欲也。掬而灼爛。虓虎在前。地有隋珠。雖貪如盜。蹠則手不暇拾。懸磬向心。路有西施。雖淫如景陽。則目不暇視。非不愛寶而悅色。然而不顧者。利緩而害急也。昔齊有貨美錦於市。盜於衆中而竊之。吏執而問曰。汝何盜錦於衆中。對曰。吾但見錦。不見有人。故取之耳。若斯人者。眩於利而忘於害。黃口以貪餌而忘害。故擒於羅者。異鵲以見利而忘身。且怵於莊周。是以智者見



利而思難。闇者見利而忘患。思難而難不至。忘患而患反生。以是觀之。利害之道。去就之理。亦以明矣。

### 禍福第四十八

禍福同根。妖祥共域。禍之所倚。反而爲福。福之所伏。還以成禍。妖之所見。或能爲吉。祥之所降。亦迴成凶。有知禍之爲福。福之爲禍。妖之爲吉。祥之爲凶。則可與言物類矣。吳兵大勝。以爲福也。而有姑蘇之困。越棲會稽。以爲禍也。而有五湖之霸。戎王強盛。以爲福也。而有樽下之執。陳駢出奔。以爲禍也。終有厚遇之

福禍福廻旋。難以類推。昔宋人有白犢之祥，而有失明之禍。雖有失明之禍，以至獲全之福。北叟有胡馬之利，卒有奔墜之患。雖有奔墜之患，以至保身之福。是以見不祥而修善，則妖反爲祥。見祥而不爲善，則祥還成妖矣。昔武丁之時，亳有桑穀拱生於朝。史占之曰：野草生朝，朝其亡乎？武丁恐懼，側身修德。桑穀自枯。八紘之內，重譯而來。殷道中興。帝辛之時，有雀生鳶於城之隅。史占之曰：以小生大，國家必亡。帝辛驕暴，遂亡殷國。故妖孽者所以警王侯也。怪夢者所



以警庶人也。妖孽不勝。善政則凶反成吉。怪夢不勝。善言則禍轉爲福。人有禍必懼。懼必有敬。敬則有福。福則有喜。喜則有驕。驕則有禍。是以君子祥至不深喜。逾敬慎以儉誠其身。妖見不爲惑。逾修德以爲務。故招慶於神祇。災消而福降也。

### 貪愛第四十九

小利大利之蹊。小吝大禍之津。苟貪小利。則大利必亡。不遺小吝。則大禍必至。昔蜀侯性貪。秦惠王聞而欲伐之。山澗峻險。兵路不通。乃琢石爲牛。多與金帛。



置牛後，號牛糞之金，以遺蜀侯。蜀侯貪之，乃塹山填谷，使五丁力士以迎石牛。秦人帥師隨後而至，滅國亡身，爲天下所笑。以貪小利失其大利也。楚白公勝其性貪，旣殺子西，據有荊國，積歛財寶，填之府庫，不以分衆。石乞諫曰：「今患至國，將危不顧勝敗存亡之機，固以形於胸中矣。不能散財以求人心，則不如焚之，無令彼衆還以害我。」又不能從。及葉公入，乃發大府之財以與衆，出府之寶以賜人，因而攻之，十有九日。白公身滅，財非已有而欲有之，以此小吝而大禍。



生焉寒山有獸其名曰貘其角當心俯而磨之憤心  
而死炎州有鳥其名曰梟偃伏其子百日而長羽翼  
旣成食母而飛蜀侯之貪石牛牛逾近而身轉危何  
異貘磨其角角逾利而身速亡乎白公之貪財財逾  
積而身逾滅何異梟之養子子逾長而身就害也是  
以達人睹禍福之機鑒成敗之源不以苟得自傷不  
以過吝自害老子云多藏必厚人禮云積而能散皆  
明止足之分祛貪吝之萌也

類感第五十



方以類聚，物以群分，聲以同應，氣以異乖。其類苟聚，雖遠不離其群；苟分，雖近未合。故銅山崩，蜀鍾鳴於晉；淄澠共川，色味異質，感應必類，自然之數也。是以飛行者陽之群也，蟄伏者陰之類也。故曰夏至而鹿角解，月虧而蚌蛤胎，麒麟鬪而日蝕，鯨魚死而彗星出，東風至而酒盈溢，蚕含絲而商絃絕，新穀祭而舊穀缺，龍舉一井而雲彌九天，虎嘯一谷而風扇萬里，陽燧在掌而太陽火，方珠運握而少陽水，類感之也。箕麗於月而飄風起，畢動於天而驟雨散，天將風也。



纖塵不動而鴻自鳴。且且雨也。寸雲未布而蟻蚓移  
矣。巢居知風。穴處識雨。風雨方至而鳥蟲應之。太白  
暉芒。鷄必夜鳴。火精光盛。馬必晨驚。鷄爲兕禽。金爲  
兵精。馬者離畜。火爲武神。干戈戢興。介駟將動。而禽  
獸應之。鼃鳴於野。鼃應於淵。騰蛇雄鳴於上風。雌鳴  
於下風。而化成刑。以斯至精相應。不待召而自感者。  
類之所應也。若呼之與響。形之與影。故抱薪投火。燥  
者先燃。平地注水。濕者先濡。彈角則目搖。鼓舟而波  
湧。物以類相感。神以氣相化也。豈以人情者哉。







論卷十

正賞第五十一

賞者所以辯情也。評者所以繩理也。賞而不正。則情亂於實。評而不均。則理失其真。理之失也。由於貴古而賤今。情之亂也。在乎信耳而棄目。古今雖殊。其迹實同。耳目誠異。其識則齊。識齊而賞異。不可以稱正。迹同而評殊。未得以言評。評正而賞翻。則情理並亂也。由今人之畫鬼魅者。易爲巧摹犬馬者。難爲工。何也。鬼魅質虛。而犬馬質露也。質虛者可託怪以示奇。



形露者不可誣罔以是非。難以其真而見妙也。託怪於無象。可假非而爲是。取範於真形。則雖是而疑非。昔魯哀公遙慕稷契之賢。不覺孔丘之聖。齊景公高憐管仲之謀。不知晏嬰之智。張伯松遠羨仲舒之博。近遺子雲之美。以夫子之聖。非不光於稷契。晏嬰之賢。非有減於管仲。揚子雲之才。非爲亞於董仲舒。然而弗貴者。豈非重古而輕今。珍遠而鄙近。貴耳而賤目。崇名而毀實耶。觀俗之論。非苟欲以貴彼而賤此。飾名而挫實。由於善惡混揉。真偽難分。摸法以度物。



爲情信心而定是非也。今以心察錙銖之重，則莫之能識；懸之權衡，則毫釐之重辨矣。是以聖人知是非難明，輕重難定，制爲法則，揆量物情，故權衡誠懸，不可欺以輕重；繩墨誠陳，不可誣以曲直；規矩誠設，不可罔以方圓。故摹法以測物，則真僞易辯矣。信心而度理，則是非難明矣。越人臠蚶以饗，秦客甘之以爲鯁也。旣而知其是蚶，攫喉而嘔之，此爲未知味也。趙人有曲者，託以伯牙之聲，世人競習之，後聞其非，乃束指而罷，此爲未知音也。宋人得石燕，以爲美玉，銅



匣而藏之，後知是石，因捧匣而棄之，此爲未識玉也。郢人爲賦，託以靈均，舉世而誦之，後知其非，皆緘口而捐之，此爲未知文也。故以虵爲鯉者，唯易牙不失其味；以趙曲爲雅聲者，唯鍾期不溷其音；以燕石爲美玉者，唯猗頓不謬其真；以郢賦爲麗藻者，唯相如不濫其賞。昔二人評玉，一人曰好，一人曰醜，久不能辨。客曰：爾來人吾目中，則好醜分矣。夫玉有定形，而察之不同，非好相反，瞳睛殊也。堂珠黼幌，綴以金魄，碧流光霞，耀爛眩目，而醉者眸轉，呼爲焰火，非黼幌。



狀移自改變也。鏡形如杯，以照西施，鏡縱則面長，鏡橫則面廣。非西施貌易，所照變也。海濱居者，望島如舟，望舟如鳧，而須舟者不造島，射鳧者不向舟。知是望遠，目亂心惑也。山底行者，望嶺樹如簪，視岫虎如犬，而求簪者不上，亡犬者不往呼。知是望高，目亂而心惑也。至於觀人論文，則以大爲小，以能爲鄙，而不知其目亂心惑也。與望山海不亦反乎？昔者仲尼先飯黍，侍者掩口笑。子游揚裘而諺，魯參指揮而哂，以聖賢之舉錯，非有謬也，而不免於嗤誚。奚況世人未

有名稱其容止文華能免於嗤誚者豈不難也以此觀之則正可以爲邪美可以稱惡名實顛倒可爲嘆息也今述理者貽之知音君子聰達亮於聞前明鑒出於意表不以名實眩惑不爲古今易情採其制意之本畧其文外之華不沒纖芥之善不掩螢爝之光可謂千載一選也

激通第五十二

登峭嶺者則欲望遠臨峻谷者必欲窺墟墟墓之間使情哀清廟之中使心敬此處無心而情爲之發者



地勢使之然也。故駛雪多積荒城之隈。急風好起沙  
河之上。克已類出甕牖之氓。決命必在吞氣之士。何  
者。寒荒之地。風雪之所積。慷慨之懷。忠義之所聚。是  
以梗枿鬱感以成。纏錦之瘤。蚌蛤結痂而銜。明月之  
珠。鳥激則能翔青雲之際。矢驚則能踰白雪之嶺。斯  
皆仍瘁以成明文之珍。因激以致高遠之勢。衝巖之  
激。則折水。湍波之湧。必漂石。風之體虛。水之性弱。而  
能披堅木。轉重石者。激勢之所成也。故居不隱者。思  
不遠也。身不危者。其志不廣也。蘓秦若有負郭之田。



必不佩六國之印。主父不爲親友所蔑。必不窺五鼎之食。張儀不有堂下之耻。必無入秦之志。范雎若無廁中之辱。不懷復魏之心。甯越激而修文。卒爲周威之師。班超憤而習武。終建西域之蹟。觀夫數賢皆因窘而發志。緣阨而顯名。故平原五達。易行之衢也。孤峰九折。難陟之逕也。從高趣下。驚馬之步也。騰峭登危。飛颺之足也。以險而陟。然後爲貴。以難而昇。所以爲賢古之烈士。厄而能通。屈而能伸。彼皆有才智。又遇其時。得爲世用也。



惜時第五十三

夫停燈於缸，先焰非後焰，而明者不能見藏山於海，  
今形非昨形，而智者不能知，何者？火則時時滅，山亦  
時時移矣。天迴日轉，其謝如矢，騷裊迅足，神馬弗能  
追也。人之短生，猶如石火，炯然以過，唯立德貽愛爲  
不朽也。昔之君子，欲行仁義於天下，則與時競馳，不  
吝盈尺之壁，而珍分寸之陰，故大禹之趨時，掛冠而  
不顧，南榮之訪道，踵趺而不休，仲尼栖栖，突不暇黔，  
墨翟遑遑，席不及煖，皆行其德義，拯世危溺，立功垂

梢延芳百世。今人皆不知退。臭腐榮華。剗絕嗜慾。被  
麗絃歌。取媚泉石。進不能披策樹勲。毗贊明時。空蝗  
梁黍。枉沒歲華。生爲無聞之人。歿成一棺之上。亦何  
殊草木自生自死者哉。歲之秋也。涼風鳴條。清露變  
葉。則寒蟬抱樹而長叫吟。烈悲酸瑟於落日之際。何  
也。哀其時命迫於嚴霜。而寄悲於苑柳。今日向西峯。  
遺業未就。鬱聲於窮岫之陰。無聞於休明之世。已矣  
夫。亦奚能不霑矜於將來。染意於松煙者哉。

言苑第五十四



忠孝者百行之寶歟。忠孝不修，雖有他善，則猶玉瑕  
盃匱，不可琢爲珪璋。剝絲蒲筐，不可織爲綺綬。雖多  
亦奚以爲也。信讓者百行之順也。誕伐者百行之逆  
也。信讓乖禮，廻而成悖。誕伐合義，翻而成順。直躬逢  
父，蒼梧讓兄。信讓悖也。弦高矯命，大禹昌言。誕伐順  
也。謂牧圉似桀紂，艷然而怒。比王侯於夷齊，怡然而  
喜。仁義所在，匹夫爲重。仁義所去，則尊貴爲輕。事可  
不必誠，理可以情通。睇秋月明而知孀婦思，聞林風  
響而見舟人驚。陽氣主生，物所樂也。陰氣主殺，物所

感也。故春葩含日似笑。秋葉泣露如泣。夫善交者。不以出入易意。不以生死移情。在終如始。在始如終。猶日月也。故日之出入符明。月之生死同形。天無情於生死。則不可以情而憾怨。故喧然而春。榮華者不謝。悵然而秋。凋零者不憾。榮凋有命。困遇有期。故春雖茂。假朝露而抽翠。秋葉誠危。因微風而飄零。萬物居溫則柔。入寒則剛。故春角可卷。夏條可結。秋露可凝。冬木可折。人皆愛少而惡老。重榮而輕悴。故簪小英華。而焚灰枯朽。莫識枯朽生於英華。英華歸於枯。



朽山抱玉故鑿之。江懷珠則竭之。豹佩文則剝之人。  
合智則嫉之。智能知人不能自知。神能衛人不能自  
衛。故神龜以智見灼。靈虵以神見爆。孰知不智爲智。  
不神爲神乎。妙必假物。而物非生妙。巧必因器。而器  
非成巧。是以羿無弧矢不能中微。其中微者非弧矢  
也。僮無斧鉞不能善斲。其善斲者非斧鉞也。畫以摹  
形。故先質後文。言以寫情。故先實後辯。無質而文則  
畫非形也。不實而辯則言非情也。紅黛飾容。欲以爲  
艷。而動目者稀。揮絃繁弄。欲以爲悲。而驚耳者寡。由

於質不美也質不美者雖崇飾而不華曲不和者雖  
響疾而不哀理動於心而見於色情發於裏而形於  
聲故強懽者雖笑不樂強哭者雖哀不悲耳聞所惡  
不若無聞目見所惡不如無見故雷霆必塞耳掣電  
必掩目爲仁則不利爲利則不仁故販粟者欲歲之  
飢告藥者欲人之疾物各重其所主而桀紂之狗可  
以吠堯故盜跖之徒賢於盜跖而鄙仲尼運屈而志  
天辱至而怨人是以火焚而怨燧人溺井而尤伯益  
宿不樹惠臨難而施恩本不防萌害成而修慎是以



臨渴而穿井方飢而植禾雖疾無所及也公儀嗜魚  
屈到嗜芟雖非至味人皆甘之與衆同也文王嗜膽  
曾皙嗜棗膽苦棗酸聖賢甘之與衆異也鹿形似馬  
而迅於馬豺形似犬而健於犬國有千金之馬而無  
千金之鹿家有千金之犬而無千金之豺以犬馬有  
用而豺鹿無用也

九流第五十五

儒者晏嬰子思孟軻荀卿之類也順陰陽之性明教  
化之本遊心於六藝留情於五常厚葬文服重樂有

命祖述堯舜憲章文武宗師仲尼以尊敬其道然而  
薄者流廣文繁難可窮究也道者鬻熊老聃關尹  
莊周之類也以空虛爲本清淨爲心謙挹爲德卑弱  
爲行居無爲之事行不言之教裁成宇宙不見其跡  
亭毒萬物不有其功然而薄者全棄忠孝杜絕仁義  
專任清虛欲以爲治也陰陽者子韋鄒衍桑丘南  
父之類也敬順昊天歷象日月星辰敬受民時範三  
光之度隨四時之運知五行之性通八風之氣以厚  
主民以爲政治然而薄者則拘於禁忌溺於術數也



名者宋鉞尹文惠施公孫捷之類也其道主名名  
不正則言不順故定尊卑正名分愛平尚儉禁攻寢  
兵故作華山之冠以表均平之製則寬宥之說以示  
區分然而薄者捐本就末分析明辯苟飾華辭也  
法者慎到李悝韓非商鞅之類也其術在於明罰討  
陣整法誘善懲惡俾順軌度以爲治本然而薄者削  
仁廢義專任刑法風俗刻薄嚴而少恩也 墨者尹  
佚墨翟禽滑胡非之類也儉嗇謙愛尚賢右鬼非命  
薄葬無服不怒俳闕然而薄者其道太促儉而難遵



也。縱橫者。闕子龐煖蘇秦張儀之類也。其術本於  
行仁。譯二國之情。弭戰爭之患。受命不受辭。因事而  
制權。安危扶傾。轉禍就福。然而薄者。則苟尚華詐而  
棄忠信也。雜者。孔甲尉繚尸佼淮南之類也。明陰  
陽。通道德。兼儒墨。合名法。苞縱橫。納農植。觸類取與。  
不拘一緒。然而薄者。則蕪穢蔓衍。無所係心也。農  
者。神農野老宰氏范勝之類也。其術在於務農。廣爲  
墾闢。播厥百穀。國有盈儲。家有蓄積。倉廩充實。則禮  
義生焉。然而薄者。若使王侯與庶人並耕於野。無尊



卑之別。失君臣之序也。觀此九家之學。雖有深淺。辭  
有詳畧。借僞形反。流分乖隔。然皆同其妙理。俱會治  
道跡。雖有殊歸。趣無異。猶五行相滅。亦還相生。四氣  
相反。而共成歲。淄澠殊源。同歸於海。宮商異聲。俱會  
於樂。夷惠同操。齊蹤爲賢。二子殊行。等迹爲仁。道者  
元化爲本。儒者德教爲宗。九流之中。二化爲最。夫道  
以無爲化。世儒以六藝濟俗。無爲以清虛爲心。六藝  
以禮教爲訓。若以教行於大同。則邪僞萌生。使無爲  
化於成康。則氛亂競起。何者。澆淳時異。則風化應殊。


古今乖舛。則政教宜隔。以此觀之。儒教雖非得真之  
說。然茲教可以導物。道家雖爲達情之論。而達禮復  
不可以收弊。今治世之賢。宜以禮教爲先。嘉遁之士  
應以無爲是務。則操業俱遂。而身名兩全也。



右新論十卷通考作劉子五卷晁氏云齊劉書子  
孔昭撰或以爲劉勰或以爲劉孝標未知孰是陳  
氏云書凡五十五篇播州錄事參軍袁孝政爲序  
云晝傷已不遇天下陵遲播遷江表故作此書時  
人莫知謂爲劉勰孝政之言云爾終不知晝爲何  
代人其書近出傳記無稱莫詳其始末不知何以  
知其名晝字孔昭也玉海又引北史晝著金箱璧  
言撰高才不遇傳今老隋書經籍志果載有高才  
不遇傳注後齊劉晝著而金箱璧言與新論並軼

唐志亦載劉晝高才不過傳而於劉子十卷注作  
劉勰今叢書本亦作十卷稱劉勰撰從唐志也汝  
上王謨識




























顏氏家訓序



昔我皇祖廸哲垂範立訓有典有則  
以貽子孫子孫克遵厥訓明徵定保  
至於今有成法予小子欽念哉粵我  
皇祖邁種德在齊有黃門侍郎公在  
唐有魯國常山公在宋有潭州安撫

公文章節義昭回於天壤揚耿光而  
垂休裕用大庇於我後人而黃門公  
所著家訓廸我後人德業尤切子孫  
靈承厥志曰惟我祖之德是彛是訓  
罔敢遏佚前人光茲予其永保哉自  
時厥後寢微寢昌子孫有弗若厥訓



亦弗克保厥家則訓教之不立也凡  
民性非有恒善惡罔不在厥初圖惟  
厥初莫先敎訓詩曰螟蛉有子果臝  
負之敎誨爾子式穀似之言子必用  
敎敎必用善也敎之以善猶懼弗率  
況導之以不軌不物俾惟悖淫是卽

其何善之有故子之在教也猶金之  
有鋤水之有源也鋤正則正源清則  
清弗可改也已我黃門祖恭立厥訓  
佑啟後人後人有弗獲覩厥訓以閑  
於有家若瞽之無相俛俛乎其曷所  
底止哉邦大懼祖德之克宣子孫之



弗廸也爰求家訓譙本重鉸諸梓俾  
子孫守焉是本乃宗人如環同知蘇  
州時所刻婁江王太史萬書閣所藏  
而出以示余維時余緝家譜未獲家  
訓全書竊以爲憾茲得之如獲拱璧  
厥惟我顏氏之文獻乎子孫如是乎

有徵焉罔或失墜則我顏氏忠義之  
家風與家訓俱存而不泯茲刻也維  
清熙迄用有成惟我顏氏之貞祥也  
豈曰小補之哉萬歷戊寅季冬茶陵  
平原派三十四代孫顏志邦書



顏氏家訓目錄

卷上

序致篇

教子篇

兄弟篇

後娶篇

治家篇

風操篇

慕賢篇

勉學篇

文章篇

名實篇

卷下

滌務篇

省事篇

上足篇

誠兵篇

卷下



歸心篇

書證篇

音辭篇

雜藝篇

終制篇

顏氏家訓目錄終



顏氏家訓卷上

北齊 顏之推著

宜黃余寅止校

序致篇第一

夫聖賢之書教人誠孝慎言檢迹立身揚名亦已備矣。魏晉以來所著諸子理重事複遞相模倣猶屋下架屋牀上施牀耳。吾今所以復爲此者非敢軌物範世也。業以整齊門內提撕子孫夫同言而信信其所親同命而行行其所服。禁童子之暴謔則師友之誠不如傳婢之指揮。止凡人之鬪鬪則堯舜之道不如

寡妻之誨諭。吾望此書爲汝曹之所信。猶賢於傳婢  
寡妻耳。吾家風教。素爲整密。昔在齠齔。便蒙誨誘。  
每從兩兄。曉夕溫清。規行矩步。安辭定色。鏘鏘翼翼。  
若朝嚴君焉。賜以優言。問所好尚。勵短引長。莫不懇  
篤。年始九歲。便丁荼蓼。冢徒離散。百口索然。慈兄鞠  
養。苦辛備至。有仁無威。導示不切。雖讀禮傳。微愛屬  
文。頗爲凡人之所陶染。肆欲輕言。不備邊幅。年十八  
九。少知砥礪。習若自然。卒難洗盪。二十以後。大過稀  
篤。每常心共口敵。性與情競。夜覺晄非。今悔昨失。自



無教。以至於斯。追思平昔之指。銘肌鏤骨。非徒古  
書之誡。經目過耳。故畱此二十篇。以爲汝曹後範耳。

### 教子篇第二

上智不教而成。下愚雖教無益。中庸之人。不教不知  
也。古者聖王有胎教之法。懷子三月。出居別宮。目不  
邪視。耳不妄聽。音聲滋味。以禮節之。書之玉版。藏諸  
金櫃。子生咳唌。師保固明仁智禮義。導習之矣。凡庶  
縱不能爾。當撫嬰稚。識人顏色。知人喜怒。便加教誨。  
使爲則爲。使止則止。比及數歲。可省笞罰。父母威嚴。



而有慈。則子女畏慎而生孝矣。吾見世間無教而有愛。每不能然。飲食運爲恣其所慾。宜誠翻獎。應訶反笑。至有識知。謂法當耳。驕慢已習。方復制之。捶撻至死而無威。忿怒日隆而增怨。逮于成長。終爲敗德。孔子云。少成若天性。習慣如自然。是也。俗諺曰。教婦初來。教兒嬰孩。誠哉斯語。凡人不能教子女者。亦非欲陷其罪惡。但重於訶怒。傷其顏色。不忍楚撻慘其肌膚耳。當以疾病爲諭。安得不用湯藥針艾救之哉。又宜思勤督訓者。可願苛虐於骨肉乎。誠不得已也。



王大司馬母魏夫人。性甚嚴正。王在湓城時。爲三千人將。年踰四十。少不如意。猶捶撻之。故能成其勲業。梁元帝時。有一學士。聰敏有才。爲父所寵。失於教義。一言之是。徧於行路。終年譽之。一行之非。揜藏文飾。冀其自改。年登婚宦。暴慢日滋。竟以言語不擇。爲周道所擯。勸懲鼓云。父子之嚴。不可以狎。骨肉之愛。不可以簡。簡則慈孝不接。狎則怠慢生焉。由命士以上。父子異宮。此不狎之道也。抑搔癢痛。懸衾篋枕。此不簡之教也。或問曰。陳亢喜聞君子之遠其子。何謂



也對曰。有是也。蓋君子之不親教其子也。詩有諷刺之詞。禮有嫌疑之誠。書有悖亂之事。春秋有褒僻之譏。易有備物之象。皆非父子之可通言。故不親授耳。

其意見白虎通

齊武成帝子瑯琊王太子母弟也。生而聰

慧。帝及后竝篤愛之。衣服飲食。與東宮相準。帝每面稱之曰。此黠兒也。當有所成。及太子卽位。王居別宮。禮數優僭。不與諸王等。太后猶謂不足。常以爲言。年十許歲。驕恣無節。器服玩好。必擬乘輿。常朝南殿。見御進新冰。鈎盾獻早李。還索不得。遂大怒。詢曰。至



尊已有我何意無不知分齊率皆如此。識者多有叔  
段州吁之譏。後嫌宰相遂矯詔斬之。又懼有救。乃勸  
麾下軍士防守殿門。既無反心。受勞而罷。後竟坐此  
幽薨。人之愛子。罕亦能均。自古及今。此弊多矣。賢  
俊者自可賞愛。頑魯者亦當矜憐。有偏寵者。雖欲以  
厚之。更所以禍之。共叔之死。母實爲之。趙王之戮。父  
實使之。劉表之傾宗覆族。袁紹之地裂兵亡。可爲靈  
龜明鑒也。齊朝有一士大夫。嘗謂吾曰。我有一兒。  
年已十七。頗曉書疏。教其鮮卑語及彈琵琶。稍欲通



解以此伏事公卿。無不寵愛。亦要事也。吾時俛而不  
答。異哉。此人之教子也。若由此業。自致卿相。亦不願  
汝曹爲之。

兄弟篇第三

夫有人民而後有夫婦。有夫婦而後有父子。有父子  
而後有兄弟。一家之親。此三而已矣。自茲以往。至于  
九族。皆本於三親焉。故於人倫爲重者也。不可不篤。  
兄弟者。分形連氣之人也。方其幼也。父母左提右挈。  
前襟後裾。食則同案。衣則傳服。學則連業。遊則共方。



雖有悖亂之人。不能不相愛也。及其壯也。各妻其妻。各子其子。雖有篤厚之人。不能不少衰也。婦姒之比。兄弟則踈薄矣。今使踈薄之人。而節量親厚之恩。猶方底而圓蓋。必不合矣。唯友悌深至。不爲傍人之所移者。免夫。二親旣歿。兄弟相顧。當如形之與影。聲之與響。愛先人之遺體。惜已身之分氣。非兄弟何念哉。兄弟之際。異於他人。望深則易怨。地親則易弭。譬猶居室。一穴則塞之。一隙則塗之。則無頽毀之慮。如雀鼠之不卹。風雨之不防。壁陷楹淪。無可救矣。僕妾



之爲雀鼠。妻子之爲風雨。甚哉。兄弟不睦。則子姪

不愛。子姪不愛。則羣從䟽薄。羣從䟽薄。則僮僕爲讐

敵矣。如此。則行路皆踏其面。而蹈其心。誰救之哉。人

或交天下之士。皆有歡愛。而失敬於兄者。何其能多

而不能少也。人或將數萬之師。得其死力。而失恩於

弟者。何其能踈而不能親也。娣姒者。多爭之地也。

使骨肉居之。亦不若各歸四海。感霜露而相思。佇日

月之相望也。況以行路之人。處多爭之地。能無間者

鮮矣。所以然者。以其當公務而執私情。處重責而懷



薄義也。若能恕已而行，換子而撫，則此患不生矣。人之事兄，不可同於事父。何爲愛弟不及愛子乎？是反照而不明也。沛國劉璉嘗與兄璉連棟隔壁，璉呼之數聲不應，良久方荅。璉怪問之，乃云向來未着衣帽故也。以此事兄，可以免矣。江陵王弼紹弟孝英子敏兄弟三人，特相愛友，所得甘旨新異，非共聚食，必不先嘗。孜孜色貌，相見如不足者。及西臺陷沒，弼紹以形體魁梧爲兵所圍，二弟爭共抱持，各求代死，終不得解，遂并命爾。

後娶篇第四

吉甫賢父也。伯奇孝子也。賢父御孝子。合得終於天性。而後妻間之。伯奇遂放。曾參婦死。謂其子曰。吾不及吉甫。汝不及伯奇。王駿喪妻。亦謂人曰。我不及曾參。子不如華元。竝終身不娶。此等足以爲誡。其後假繼慘虐孤遺。離間骨肉。傷心斷腸者。何可勝數。慎之哉。慎之哉。江右不諱庶孽。喪室之後。多以妾媵終家事。疥癬蚊蚋。或未訖免。限以大分。故稀鬪鬩之耻。河北鄙於側出。不預人流。是以必須重娶。至于三四



母年有少於子者。後母之弟。與前婦之兄。衣服飲食。爰及婚宦。至於士庶貴賤之隔。俗以爲常。身沒之後。辭訟盈公門。謗辱彰道路。子誣母爲妾。弟黜兄爲傭。播揚先人之辭迹。暴露祖考之長短。以求直己者。往往而有。悲夫。自古姦臣佞妾。以一言陷人者衆矣。況夫婦之義。曉夕移之。婢僕求容。助相說引。積年累月。安有孝子乎。此不可不畏。凡庸之性。後夫多寵。前夫之孤。後妻必虐。前妻之子。非唯婦人懷嫉妬之情。丈夫有沉惑之僻。亦事勢使之然也。前夫之孤。不敢



與我子爭家。提携鞠養。積習生愛。故寵之前妻之子。每居已生之上。宦學婚嫁。莫不爲防焉。故虐之異姓寵。則父母被怨。繼親虐。則兄弟爲讐。家有此者。皆門戶之禍也。思魯等從舅殷外臣。博達之士也。有子基。謀皆已成立。而再取王氏。基每拜見後母。感慕嗚咽。不能自持。家人莫忍仰視。王亦悽愴。不知所容。旬月求退。便以禮遣。此亦悔事也。後漢書曰。安帝時。汝南薛包。字孟嘗。好學。篤行。喪母。以至孝。聞及父娶後妻。而憎包。分出之。包日夜號泣。不能去。至被毆杖。



不得已廬於舍外。旦入而洒掃。父怒。又逐之。乃廬於里門。昏晨不廢。積歲餘。父母慙而還之。後行六年服。喪過乎哀。旣而弟子求分財異居。包不能止。乃中分其財。奴婢引其老者。曰。與我共事久。若不能使也。田廬取其荒頓者。曰。吾少時所理。意所戀也。器物取其朽敗者。曰。我素所服食。身口所安也。弟子數破其產。還復賑給。建光中公車特徵。至拜侍中。包性恬虛。稱疾不起。以死自乞。有詔賜告歸也。

治家篇第五



夫風化者自上而行於下者也。自先而施於後者也。是以父不慈則子不孝。兄不友則弟不恭。夫不義則婦不順矣。父慈而子逆。兄友而弟傲。夫義而婦陵。則天之凶民。乃刑戮之所攝。非訓導之所移也。笞怒廢於家。則豎子之過立見。刑罰不中。則民無所措手足。治家之寬猛。亦猶國焉。孔子曰。奢則不遜。儉則固。與其不遜也。寧固。又云。雖有周公之才之美。使驕且吝。其餘不足觀也已。然則可儉而不可吝也。儉者省約。爲禮之謂也。吝者窮急不卹之謂也。今有奢則施。儉



則吝如能施而不吝儉而不吝可矣。生民之本要  
當稼穡而食。桑麻以衣。蔬果之蓄。園塲之所產。鷄豚  
之善。埭園之所生。爰及棟宇器械。樵蘇脂燭。莫非種  
殖之物也。至能守其業者。閉門而爲生之具。以足。但  
家無鹽井耳。今北土風俗。率能躬儉節用。以贍衣食。  
江南奢侈。多不逮焉。梁孝元世。有中書舍人治家  
失度。而過嚴刻。妻妾遂共貨刺客。伺醉而殺之。世  
間名士。但務寬仁。至於飲食饗饋。僮僕減損。施惠然  
諾。妻子節量。狎侮賓客。侵耗鄉黨。此亦爲家之巨蠹。

矣。齊吏部侍郎房文烈，未嘗嗔怒，經霖雨，絕糧，遣婢糴米，因爾逃竄三四許日，方復擒之。房徐曰：舉家無食，汝何處來？竟無捶撻，嘗寄人宅，奴婢徹屋爲薪，畧盡，聞之，顰蹙卒無一言。裴子野有疎親故屬饑寒，不能自濟者，皆收養之。家素清貧，時逢水旱，二石米爲薄粥，僅得遍焉，躬自同之，常無厭色。鄴下有一領軍，貪積已甚，家童八百，誓滿一千，朝夕肴膳以十五錢爲率，遇有客旅，更無以兼，後坐事伏法，籍其家產，麻鞋一屋，弊衣數庫，其餘財寶不可勝言。南陽有



人爲生。與博性殊儉吝。冬至後女壻謁之。乃設一銅甌酒。數臠麋肉。壻恨其單率。一舉盡之。主人愕然。俛仰命益。如此者再。退而責其女曰。某郎好酒。故汝嘗貧。及其死後。諸子爭財。兄遂殺弟。婦主中饋。唯事酒食衣服之禮耳。國不可使預政。家不可使幹蠱。如有聰明才智。識達古今。正當輔佐君子。助其不足。必無牝雞晨鳴以致禍也。江東婦女。畧無交遊。其婚姻之家。或十數年間。未相識者。唯以信命贈遺致殷勤焉。鄴下風俗。專以姑持門戶。爭訟曲直。造請逢迎。

車乘填街衢。綺羅盈府寺。代子求官。爲夫訴屈。此乃  
恒代之遺風乎。南間貧素。皆事外飾。車乘衣服。必貴  
齊整。家人妻子。不免饑寒。河北人事。多由內政。綺羅  
金翠。不可廢闕。羸馬賴奴。僅充而已。唱和之禮。或爾  
汝之。河北婦人。織紉組紃之事。黼黻錦繡。綺之  
工。大優於江東也。太公曰。養女太多。一費也。陳蕃云。  
盜不過五女之門。女之爲累。亦以深矣。然天生蒸民。  
先人傳體。其如之何。世人多不舉女。賊行骨肉。豈當  
如此。而望福於天乎。吾有疏親家。饒妓媵。誕育將及。



使遣婚。堅守之。體有不安。窺窻倚戶。若生女者。輒持將去。母隨號泣。莫敢救之。使人不忍聞也。婦人之性。率寵子壻。而虐兒婦。寵壻則兄弟之怨生焉。虐婦則姊妹之讒行焉。然則女之行。畱皆得罪於其家者。母實爲之。至有諺云。落索阿姑飡。此其相報也。家之常弊。可不誠哉。婚姻素對。靖侯成規。近世嫁娶。遂有賣女納財。買婦輸絹。比量父祖。計校錙銖。責多還少。市井無異。或猥壻在門。或傲婦擅室。貪榮求利。反招羞耻。可不慎歟。借人典籍。皆須愛護。先有缺壞。



就爲補治。此亦士大夫百行之一也。濟陽江祿讀書未竟。雖有急速。必待卷束整齊。然後得起。故無損敗。人不厭其求假焉。或有狼籍几案。分散部帙。多爲童幼婢妾之所點汙。風雨犬鼠之所毀傷。實爲累德。吾每讀聖人之書。未嘗不肅敬對之。其故紙有五經詞義及賢達姓名。不敢穢用也。吾家巫覡禱請。絕於言議。符書章醮。亦無所焉。竝汝曹所見也。勿妖妄之費。



吾觀禮經聖人之教箕箒匕箸咳唾唯諾執燭沃盥  
皆有節度亦爲至矣但旣殘缺非復全書其有所不  
載及世事變改者學達君子自爲節度相承行之故  
世號士大夫風操而家門頗有不同所見互稱長短  
然其阡陌亦自可知昔在江南目能視而見之耳能  
聽而聞之蓬生麻中不勞翰墨汝曹生於戎馬之間  
視聽之所不曉故聊記錄以傳示子孫禮云見似  
目瞿聞名心瞿有所感觸惻愴心眼若在從容平常  
之地幸須申其情耳必不可避亦當忍之猶如伯叔



兄弟酷類先人可得終身腸斷與之絕耶。又臨文不諱。廟中不諱。君所無私諱。蓋知聞名須有消息。不必期於顛沛而走也。梁世謝舉。甚有聲譽。聞諱必哭。爲世所譏。又臧逢世。臧嚴之子也。篤學修行。不墜門風。孝元經牧江州。遣往建昌督事。郡縣民庶競修牋書。朝夕輻輳。几案盈積。書有稱嚴寒者。必對之流涕。不省取記。多廢公事。物情怨駭。竟以不辦而還。此竝過事也。近在楊都。有一士人諱審。而與沈氏交結周厚。沈與其書。名而不姓。此非人情也。凡避諱者。皆須得



其同訓以代換之。桓公名白。博有五皓之稱。厲王名長。琴有修短之目。不聞謂布帛爲布皓。呼腎暘爲腎修也。梁武小名阿練。子孫皆呼練爲絹。乃謂銷鍊物爲銷絹物。恐乖其義。或有諱雲者。呼紛紜爲紛烟。有諱桐者。呼梧桐樹爲白鐵樹。便似戲笑耳。周公名子曰禽。孔子名兒。曰鯉。止在其身。自可無禁。至若衛侯魏公子。楚太子。皆名蟣虱。長卿名犬子。王修名狗子。上有連及。理未爲通。古之所行。今之所笑也。北土多有名兒。爲驢駒豚子者。使其自稱。及兄弟所名。亦何

恐哉。前漢有尹翁歸，後漢有鄭翁歸，梁家亦有孔翁歸。又有顧翁寵。晉代有許思妣，孟少孤如此名字，幸當避之。今人避諱更急於古名子者，當爲孫地。吾親識中有諱襄、諱友、諱同、諱清、諱和、諱禹、交疏造次一座百犯，聞者辛苦無繆賴焉。昔司馬長卿慕蘭相如，故名相如。顧元歆慕蔡邕，故名雍。而後漢有朱張字孫卿，許暹字顏回。梁世有庾晏嬰，祖孫登連古人姓爲名字，亦鄙事也。昔劉文饒不忍罵奴爲畜產，今世愚人遂以相戲。或有指名爲豚犢者，有識傍觀猶欲



掩耳。况名之者乎。近在議曹。共平章。百官秩祿。有一  
顯貴。當世名臣。意嫌所議過厚。齊朝有一兩士族。文  
學之人。謂此貴曰。今日天下大同。須爲百代典式。豈  
得尚作關中舊意乎。明公定是陶朱公大兒耳。彼此  
歡笑。不以爲嫌。昔侯霸之子孫。稱其祖父曰家公。  
陳思王稱其父爲家父。母爲家母。潘岳稱其祖曰家  
祖。古人之所行。今人之所笑也。及南北風俗。言其祖  
及二親。無云家者。田里俚人。方有此言耳。凡與人言。  
言已世父。以次第稱之。不云家者。以尊於父。不敢家。

也。凡言姑姊妹女子子，已嫁則以夫氏稱之。在室則以次第稱之。言禮成他族，不得云家也。子孫不得稱家者，輕畧之也。蔡邕書集呼其姑姊爲家姑家姊。班固書集亦云家孫。今竝不行也。凡與人言，稱彼祖父母世父母父母及長姑，皆加尊字。自叔父已下，則加賢字。尊卑之差也。王羲之書稱彼之母與自稱已母，同不云尊字。今所非也。南人冬至歲首，不詣喪家。若不修書，則過節束帶以申慰。北人主歲之日，重行弔禮。禮無明文，則吾不取。南人賓至，不迎相見，捧手。



而不揖。送客下席而已。北人迎送並至門相見則揖。古之道也。吾善其迎揖。昔者王侯自稱孤寡不穀。自茲以降。雖孔子聖師。與門人言皆稱名也。後雖有臣僕之稱。行者蓋亦寡焉。江南輕重各有謂號。具諸書儀。北人多稱名者。乃古之遺風。吾善其稱名焉。言及先人。理當感慕。古者之所易。今人之所難。江南事不獲已。乃陳文墨。愴愴無言者。須言閼閼。必以文翰。罕有面論者。北人無何。便爾話說。及相訪問。如此之事。不可加於人也。人加諸已。則當避之。名位未高。

如爲勲貴所逼。隱忍方便。速報取了。勿取煩重。感辱  
祖父。若沒言須及者。則歛容肅坐。稱大門中世父叔  
父。則稱從兄弟。門中兄弟。則稱亡者。子某。門中各以  
其尊卑輕重爲容色之節。皆變於常。若與君言。雖變  
於色。猶云亡祖亡伯亡叔也。吾見名士。亦有呼其亡  
兄弟爲兄子弟子。門中者。亦未爲安貼也。北土都不  
行此。太山羊侃梁初入南。吾近至鄴。其兄子肅訪侃  
委曲。吾答之云。卿從門中在梁如此如此。肅曰。是我  
親第七亡叔。非從也。祖孝微在坐。先知江南風俗。乃



謂之云賢從弟門中何故不解。古人皆呼伯父叔父。而今世多單呼伯叔。從兄弟姊妹已孤。而對其前呼其母爲伯叔母。此不可避者也。兄弟之子已孤。與他人言。對孤者前呼爲兄子弟子。頗爲不忍。北土多呼爲姪。案爾雅喪服經。左傳姪名雖通男女。竝是對姑之稱。晉世已來。始呼叔姪。今呼爲姪。於理爲勝也。別易會難。古人所重。江南餞送下泣言離。有王子侯。梁武帝弟。出爲東郡。與武帝別。帝曰。我年已老。與汝分張。甚心惻愴。數行淚下。侯遂密雲赧然而出。坐此被

責飄飄舟楫。一百許日卒不得去。北間風俗。不屑此事。岐路言離。歡笑分首。然人性自有少涕淚者。腸雖欲絕。目猶爛然。如此之人。不可強責。凡親屬名稱。皆須粉墨。不可濫也。無風教者。其父已孤。呼外祖母與祖父母同。使人爲其不喜聞也。雖質於面。皆當加外以別之。父母之世叔父。皆當加其次第以別之。父母之世叔母。皆當加其姓以別之。父母之群從世叔父母及從祖父母。皆當加其爵位。若姓以別之。河北士人。皆呼外祖父母爲家公家母。江南田里間亦



言之。以家代外。非吾所識。凡宗親世數。有從父。有從祖。有族祖。江南風俗。自茲已往。高秩者通呼爲尊。同昭穆者。雖百世猶稱兄弟。若對他人稱之。皆云族人。河北士人。雖三二十世。猶呼爲從伯從叔。梁武帝嘗問一中士人曰。卿北人。何故不知有族。答云。骨肉易踈。不忍言族耳。當時雖爲斂對。於禮未通。吾嘗問周宏讓曰。父母中外姊妹。何以稱之。周曰。亦呼爲丈人。自古未見丈人之稱。施於婦人也。吾親表所行。若父屬者。爲某姓姑。母屬者。爲某姓姨。中外丈人之婦。猥



俗呼爲丈母士大夫謂之王母謝母云而陸機集有  
與長沙顧母書乃其從叔母也今所不行齊朝士子  
皆呼祖僕射爲祖公全不嫌有所涉也乃有對面以  
相戲者古者名以正體字以表德名終則諱之字  
乃可以爲孫氏孔子弟子記事者皆稱仲尼呂后微  
時嘗字高祖爲季至漢袁種字其叔父曰絲王丹與  
侯霸子語字霸爲君房江南至今不諱字也河北士  
人全不辨之名亦呼爲字字固因呼爲字尚書王元  
之兄弟皆號名人其父名雲字羅漢一皆諱之其餘



不足怪也。禮間傳云斬縗之哭。若往而不反。齊縗之哭。若往而反。大功之哭。三哭而哀。小功總麻。哀容可也。此哀之發於聲音也。孝經云。哭不哀。皆論哭有輕重質文之聲也。禮以哭有言者爲號。然則哭亦有辭也。江南喪哭。時有哀訴之言耳。山東重喪。則唯呼蒼天。暮功以下。則唯呼痛深。便是號而不哭。江南凡遭重喪。若相知者。同在城邑。三日不弔。則絕之。除喪。雖相遇。則避之。怨其不已。憫也。有故及道遙者。致書可也。無書亦如之。北俗則不爾。江南凡弔者。主人



之外。不識者不執手。識輕服而不識主人。則不於會所而弔。他日修名詣其家。陰陽說云。辰爲水墓。又爲土墓。故不得哭。王充論衡云。辰日不哭。哭則重喪。今無教者。辰日有喪。不問輕重。舉家清謐。不敢發聲。以辭弔客。道書又曰。晦歌朔哭。皆當有罪。天奪之算。喪家朔望。哀感彌深。寧當惜壽。又不哭也。亦不論。偏傍之書。死有歸煞。子孫逃竄。莫肯在家。畫瓦書符。作諸厭勝。喪出之日。門前然火。戶外烈灰。祓送家鬼。章斷注連。凡如此比。不近有情。乃儒雅之罪人。彈議。



所當加也。已孤而履歲及長至之節，無父拜母，祖  
父母世叔父母姑兄弟，則皆泣。無母拜父，外祖父母  
舅姨兄弟，亦如之。此人情也。江左朝臣子孫初釋  
服，朝見二宮，皆當泣涕。二宮爲之改容，頗有膚色充  
澤，無哀感者。梁武薄其爲人，多被抑退。裴政出服，問  
訊武帝，貶瘦枯槁，涕泗滂沱。武帝目送之，曰：裴之禮  
不死也。人二親旣歿，所居齋寢，子與婦弗忍入焉。北  
朝頓丘李構母劉氏夫人亡後，所住之堂，終身鏤閉，  
弗忍開入也。夫人宋廣州刺史纂之孫女，故構猶染



江南風教。其父獎爲楊州刺史。鎮壽春。遇害。構嘗與  
王松年。祖孝徵。數人同集談讌。孝徵善畫。遇有紙筆。  
圖寫爲人。頃之。因割鹿尾。戲截畫人。以示構。而無他  
意。構愴然動色。便起就馬而去。舉坐驚駭。莫測其情。  
祖君尋悟。方深反側。當時罕有能感此者。吳郡陸襄  
父。閑被刑。襄終身布衣蔬飯。雖薑菜有切割。皆不忍  
食。居家唯以搗摘供厨。江陵姚子篤。母以燒死。終身  
不忍噉炙。豫章熊康。父以醉而爲奴所殺。終身不復  
嘗酒。然禮緣人情。恩由義斷。親以噎死。亦當不可絕。



食。禮經父之遺書。母之杯圈。感其手口之澤。不忍  
讀用。政爲常所講習。讐校繕寫。及偏加服用。有迹可  
思者耳。若尋常墳典。爲生什物。安可悉廢之乎。旣不  
讀用。無容散逸。唯當緘保。以畱後世耳。思魯等第四  
舅母親。吳郡張建女也。有第五妹。三歲喪母。靈牀上  
屏風。平生舊物。屋漏沾濕。出曝曬之。女子一見。伏牀  
流涕。家人怪其不起。乃往抱持。薦席淹漬。精神傷恒。  
不能飲食。將以問醫。醫診脉云。腸斷矣。因爾便吐血。  
數日而亡。中外憐之。莫不悲歎。禮云。忌日不樂。正



以感慕罔極。惻愴無聊。故不接外賓。不理衆務耳。必  
能悲慘自居。何限於深藏也。世人或端坐奧室。不妨  
言笑。盛營甘美。厚供齋食。迫有急卒。密戚至交。盡無  
相見之理。蓋不知禮意乎。魏世王修。母以社日亡。來  
歲社。修感念哀甚。隣里聞之。爲之罷社。今二親喪亡。  
偶值伏臘分至之節。及月小晦後忌之外。所經此日。  
猶應感慕異於餘辰。不預飲讌。聞聲樂及行遊也。

劉縉緩綏兄弟竝爲名器。其父名昭。一生不爲照字。

唯依爾雅。火傍作召耳。然凡文與正諱相犯。當自可



避其有同音異字。不可悉然。劉字之下。卽有昭音呂  
尚之兒。如不爲上。趙壹之子。儻不作一。便是下筆卽  
妨。是書皆觸也。嘗有甲設讌席。請乙爲賓。而且於公  
庭見乙之子。問之曰。尊侯早晚顧宅。乙子稱其父已  
往。時以爲笑。如此比例。觸類慎之。不可陷於輕脫。一  
江南風俗。兒生一朞。爲製新衣。盥浴裝飾。男則用弓  
矢紙筆。女則刀尺鍼縷。竝加飲食之物及珍寶服玩。  
置之兒前。觀其發意所取。以驗貪廉愚智。名之爲試  
兒。親表聚集致讌享焉。自茲已後。二親若在。每至此



日嘗有酒食之事耳。無教之徒。雖已孤露。其日皆爲  
供頓酣暢聲樂。不知有所感傷。梁孝元年少之時。每  
八月六日載誕之辰。常設齋講。自阮修容薨歿之後。  
此事亦絕。人有憂疾。則呼天地父母。自古而然。今  
世諱避。觸途急切。而江東士庶。痛則稱禰。禰是父之  
廟號。父在無容稱廟。父歿何容輒呼。蒼頡篇有脣下  
交切字。訓詁云痛而諱也。諱人音羽罪反今北人痛  
聲也則呼之。聲類音于來反。今南人痛或呼之。此二音隨  
其鄉俗。竝可行也。梁世被繫劾者。子孫弟姪皆詣



闕三日、露跣陳謝、子孫有官、自陳解職、子則草屨粗  
衣、蓬頭垢面、周章道路、要候執事、叩頭流血、申訴冤  
枉、若配徒隸、諸子竝立草菴於所署門、不敢迎宅、動  
經旬日、官司驅遣、然後始退、江南諸憲司彈人事、事  
雖不重、而以教義見辱者、或被輕繫、而身死獄戶者、  
皆爲怨讐、子孫三世不交通矣、劉洽爲御史中丞、初  
欲彈劉孝綽、其兄漑先與劉善、苦諫不得、乃詣劉滄  
泣告別而去、兵凶戰危、非安全之道、古者天子喪  
服、以臨師、將軍鑿凶門而出、父祖伯叔若在軍陣、貶



損自居。不宜奏樂讌會及婚冠吉慶事也。若居圍城之中。憔悴容色。除去飾玩。常爲臨深履薄之狀焉。父母疾篤。醫雖賤。雖少。則涕泣而拜之。以求哀也。梁孝元在江州。嘗有不豫。世子方等親拜中兵叅軍李猷。四海之人。結爲兄弟。亦何容易。必有志均義敵。令終如始者。方可議之一爾。之後。命子拜伏。呼爲丈人。申父友之敬。身事彼親。亦宜加禮。比見北人甚輕此節。行路相逢。便定昆季。望年觀貌。不擇是非。至有結父爲兄。託子爲弟者。昔者周公一沐三握髮。一飯



三吐餐以接白屋之士。一日所見七十餘人。晉文公以沐辭豎頭須。致有圖反之誚。門不停賓。古所貴也。失教之家。閹寺無禮。或以主君寢食嗔怒拒客未通。江南深以爲耻。黃門侍郎裴之禮號善爲士大夫有如此輩。對賓杖之。其門生僮僕接於他人。折旋俯仰辭色應對莫不肅敬。與主無別也。

慕賢篇第七

古人云千載一聖。猶旦暮也。五百年一賢。猶比膊也。言聖賢之難得。䟽闊如此。儻遭不世明達君子。安可



不攀附景仰之乎。吾生於亂世，長於戎馬，流離播越，聞見已多。所值名賢，未嘗不心醉魂迷，向慕之也。人在少年，神情未定，所與款狎，熏漬陶染，言笑舉動，無心於學，潛移默化，自然似之。何況操履藝能，較明易習者也。是以與善人居，如入芝蘭之室，久而自芳也；與惡人居，如入鮑魚之肆，久而自臭也。墨翟悲於染絲，是之謂矣。君子必慎交遊焉。孔子曰：「無友不如己者。」顏閔之徒，何可世得。但優於我，便足貴之。世人多蔽貴耳賤目，重遙輕近。少長周旋，如有賢哲，每相狎



侮不加禮敬。他鄉異縣。微藉風聲。延頸企踵。甚於饑渴。校長短覈精麤。或彼不能如此矣。所以魯人謂孔子爲東家丘。昔虞國宮之司少長於君。君狎之。不納其諫。以至亡國。不可不畱心也。用其言。棄其身。古人所耻。凡有一言一行取於人者。皆顯稱之。不可竊人之美。以爲己力。雖輕雖賤者。必歸功焉。竊人之財。刑辟之所處。竊人之美。鬼神之所責。梁孝元前在荊州。有丁覬者。洪亭民耳。頗善屬文。殊工草隸。孝元書記。一皆使之。軍府輕賤。多未之重。耻令子弟以爲楷法。



時云丁君十紙不敵王褒數字。吾雅愛其手迹。常所寶持。孝元嘗遣典籤惠編。送文章示蕭祭酒。祭酒問云。君王比賜書翰及寫詩筆。殊爲佳手。姓名爲誰。那得都無聲問。編以實荅。子雲歎曰。此人後生無比。遂不爲世所稱。亦是奇事。於是聞者少復刮目。稍仕至尚書儀曹郎。末爲晉安王侍讀。隨王東下。及西臺陷歿。簡牘湮散。丁亦尋卒於楊州。前所輕者。後思一紙不可得矣。侯景初入建業。臺門雖閉。公私草擾。各不自全。太子左衛率羊侃坐東掖門。部分經畧。一宿不



辦遂得百餘日抗拒兇逆于時城內四萬許人王公  
朝士不下一百便是恃寵一人安之其相去如此古  
人云巢父許由讓於天下市道小人爭一錢之利亦  
已懸矣齊文宣帝卽位數年便沈湎縱恣畧無綱  
紀尚能委政尚書令楊遵彥內外清謐朝野晏如各  
得其所物無異議終天保之朝遵彥後爲李昭所戮  
刑政於是衰矣斛律明月齊朝折衝之臣無罪被誅  
將士解體周人始有吞齊之志關中至今譽之此人  
用兵豈止萬夫之望而已也國之存亡係其生死



張延雋之爲晉州行臺左丞。匡維主將。鎮撫疆場。儲積器用。愛活黎民。隱若敵國矣。郡小不得行志。同力遷之。旣代之後。公私擾亂。周師一舉。此鎮先平。齊亡之迹。啓於是矣。

勉學篇第八

自古明王聖帝。猶須勤學。况凡庶乎。此事遍於經史。吾亦不能鄭重。聊舉近世切要。以終寤汝耳。士大夫子弟。數歲已上。莫不被教。多者或至禮傳。少者不失詩論。及至冠婚。體性稍定。因此天機。倍須訓誘。有志



尚者。遂能磨礪。以就素業。無履立者。自茲墮慢。便爲  
凡人。人生在世。會當有業。農民則計量耕稼。商賈則  
計論貨賄。工巧則致精器用。伎藝則深思法術。武夫  
則慣習弓馬。文士則講議經書。多見士大夫耻涉農  
商。羞務工伎。射旣不能。穿扎筆則纔記姓名。飽食醉  
酒。忽忽無事。以此銷日。以此終年。或因家世餘緒。得  
一階半級。便謂爲足。安能自苦。及有吉凶大事。議論  
得失。蒙然張口。如坐雲霧。公私宴集。談古賦詩。塞默  
低頭。欠伸而已。有識倂以觀。代其入地。何惜數年勤學。



長受一生愧辱哉。梁朝全盛之時，貴遊子弟多無學術。至於諺云：上車不落，則著作；體中何如，則秘書。無不燠衣剃面，傅粉施朱，駕長簷車，跟高齒屐，坐碁子方褥，憑班絲隱囊，列器玩於左右，從容出入，望若神仙。明經求第，則顧人荅策；三九公讌，則假手賦詩。當爾之時，亦快士也。及離亂之後，朝市遷革，銓衡選舉，非復曩者之親。當路秉權，不見昔時之黨。求諸身而無所得，施之世而無所用。披褐而喪珠，失皮而露質，兀若枯木，泊若窮流。孤獨戎馬之間，轉死溝壑之際。



當爾之時。誠驚材也。有學藝者。觸地而安。自荒亂已來。諸見俘虜。雖百世小人。知讀論語孝經者。尚爲人師。雖千載冠冕。不曉書記者。莫不耕田養馬。以此觀之。安可不自勉耶。若能常保數百卷書。千載終不爲小人也。夫明六經之指。涉百家之書。縱不能增益德行。敦厲風俗。猶爲一藝。得以自資。父兄不可常依。鄉國不可常保。一旦流離。無人庇廕。當自求諸身耳。諺曰。積財千萬。不如薄伎在身。伎之易習而可貴者。無過讀書也。世人不問愚智。皆欲識人之多。見事之廣。

而不肯讀書。是猶求飽而懶營饌。欲暖而惰裁衣也。夫讀書之人。自羲農已來。宇宙之下。凡識幾人。凡見幾事。生民之成敗好惡。固不足論。天地所不能藏。鬼神所不能隱也。有客難主人曰。吾見強弩長戟。誅罪安民。以取公侯者有矣。文義習史。匡時富國。以取卿相者有矣。學備古今。才兼文武。身無祿位。妻子饑寒者。不可勝數。安足貴學乎。主人對曰。夫命之窮達。猶金玉木石也。修以學藝。猶磨瑩雕刻也。金玉之磨瑩。自美其鑛璞。木石之段塊。自醜其雕刻。安可言木石。



之雕刻。乃勝金玉之鑛璞哉。不得以有學之貧賤。比  
於無學之富貴也。且負甲爲兵。咋筆爲吏。身死名滅。  
者如牛毛。角立傑出者如芝草。握素披黃。吟道詠德。  
苦辛無益者如日蝕。逸樂名利者幾秋荼。豈得同年  
而語矣。且又聞之。生而知之者上。學而知之者次。所  
以學者。欲其多智明達耳。必有天才。拔群出類。爲將  
則闇與孫武。吳起同術。執政則懸得管仲。子產之教。  
雖未讀書。吾亦謂之學矣。今子卽不能然。不師古之  
蹤跡。猶蒙被而臥耳。人見隣里親戚有佳快者。使子



弟慕而學之。不知使學古人。何其蔽也哉。世人但知跨馬被甲。長矟強弓。便云我能爲將。不知明乎天道。辨乎地利。比量逆順。鑒達興亡之妙也。但知承上接下。積財聚穀。便云我能爲相。不知敬鬼神。移風易俗。調節陰陽。薦舉賢聖之至也。但知私財不入公事。夙辦便云我能治民。不知誠已型物。執轡如組。反風滅火。化鴟爲鳳之術也。但知抱令守律。早刑晚舍。便云我能平獄。不知同轅觀罪。分劍追財。假言而奸露。不問而情得之察也。爰及農商工賈。廝役奴隸。鈞魚



屠肉飯牛牧羊。皆有先達。可爲師表。博學求之。無不利於事也。夫所以讀書學問。本欲開心明目。利於行耳。未知養親者。欲其觀古人之先意承顏。怡聲下氣。不憚劬勞。以致甘腴。惕然慙懼。起而行之也。未知事君者。欲其觀古人之守職無侵。見危受命。不忘誠諫。以利社稷。惻然自念。思欲效之也。素驕奢者。欲其觀古人之恭儉節用。卑以自牧。禮爲教本。敬者身基。瞿然自失。歛容抑志也。素鄙恠者。欲其觀古人之貴義輕財。少私寡慾。忌盈惡滿。賔窮卹匱。赧然悔耻。積而

能散也。素暴悍者。欲其觀古人之小心黜已。齒弊舌  
存。含垢藏疾。尊賢容衆。藹然沮喪。若不勝衣也。素怯  
懦者。欲觀古人之達生委命。強毅正直。立言必信。求  
福不回。勃然奮厲。不可恐懾也。歷茲以往。百行皆然。  
縱不能淳。去泰去甚。學之所知。施無不達。世人讀書  
者。但能言之。不能行之。忠孝無聞。仁義不足。加以斷  
一條訟。不必得其理。宰千戶縣。不必理其民。問其造  
屋。不必知楣橫而枕豎也。問其爲田。不必知稷早而  
黍遲也。吟嘯談謔。諷詠辭賦。事旣優閑。材增迂誕。軍



國經綸畧無施用故爲武人俗吏所共嗤詆良由是  
乎。夫學者所以求益爾。見人讀數十卷書便自高大。  
凌忽長者。輕慢同列。人疾之如讐敵。惡之如鴟梟。如  
此以學自損。而無學也。古之學者爲己。以補不足  
也。今之學者爲人。但能說之也。古之學者爲人。行道  
以利世也。今之學者爲己。脩身以求進也。夫學者猶  
種樹也。春玩其華。秋登其實。講論文章春華也。脩身  
利行秋實也。人生小幼。精神專利。長成已後。思慮散  
逸。固須早教。勿失機也。吾七歲時。誦靈光殿賦。至于



今日十年一理。猶不遺忘。二十之外。所誦經書。一月  
廢置。便至荒蕪矣。然人有坎壈。失於盛年。猶當晚學。  
不可自棄。孔子云。五十以學易。可以無大過矣。魏武  
袁遺。老而彌篤。此皆少學而至老不倦也。曾子七十  
乃學。名聞天下。荀卿五十始來遊學。猶爲碩儒。公孫  
宏四十餘方讀春秋。以此遂登丞相。朱雲亦四十始  
學易論語。皇甫謐二十始授孝經論語。皆終成大儒。  
此並早迷而晚寤也。世人婚冠未學。便稱遲暮。因循  
面牆。亦爲愚爾。幼而學者。如日出之光。老而學者。如



秉燭夜行。猶賢乎瞋目而無見者也。學之興廢。隨世輕重。漢時賢俊。皆以一經宏聖人之道。上明天時。下該人事。用此致卿相者多矣。末俗已來。不復爾。空守章句。但誦師言。施之世務。殆無一可。故士大夫子弟。皆以博涉爲貴。不肯專儒。梁朝皇孫已下。總非之年。必先入學。觀其志尚。出身已後。便從文吏。畧無卒業者。冠冕爲此者。則有何允。劉瓛。明山賓。周捨。朱异。周宏正。賀琛。賀革。蕭子政。劉紹。等。兼通文史。不徒講說也。洛陽亦聞崔浩。張偉。劉芳。等。下又見邢子才。四儒



者雖好經術亦以才博擅名。如此諸賢故爲上品。以外率多田里間人。音辭鄙陋。風操蚩拙。相與專固。無所堪能。問一言輒酬數百。責其指歸。或無要會。鄴下諺云。博士買驢。書券三紙。未有驢字。使汝以此爲師。令人氣塞。孔子曰。學也祿在其中矣。今勤無益之事。恐非業也。夫聖人之書。所以設教。但明練經文。粗通注義。常使言行有得。亦足爲人。何必仲尼。居卽須兩紙疏義。燕寢講堂。亦復何在。以此得勝。寧有益乎。光陰可惜。譬諸逝水。當博覽機要。以濟功業。必能兼美。



吾無間焉。俗間儒士不涉羣書。經緯之外。義疏而已。  
吾初入鄴。與博陵崔文彥交遊。嘗說王粲集中難鄭  
卒尚書事。崔轉爲諸儒道之。始將發口。懸見排蹙。云  
文集止有詩賦銘誄。豈當論經書事乎。且先儒之中。  
未聞有王粲也。崔笑而退。竟不以粲集示之。魏收之  
在議曹。與諸博士議宗廟事。引據漢書。博士笑曰。未  
聞漢書得證經術。魏便忿怒。都不復言。取韋卒成傳  
擲之而起。博士一夜共披尋之。達明乃來謝曰。不謂  
卒成如此學也。夫老莊之書。其全真養性。不肯以



物累已也。故藏名柱石。終蹈流沙。匿跡漆園。卒辭楚相。此任縱之徒耳。何晏。王弼。祖述平宗。遞相誇尚。景附草靡。皆以農黃之化在乎已身。周孔之業棄之度外。而平叔以黨曹爽見誅。觸死權之網也。輔嗣以多笑人被疾。陷好勝之穽也。山巨源以蓄積取譏。背多藏厚亡之文也。夏侯平以才士被戮。無支離擁腫之鑒也。荀奉倩喪妻神傷而卒。并鼓缶之情也。王夷甫悼子悲不自勝。異東門之達也。嵇叔夜排俗取禍。豈和光同塵之流也。郭子平以傾動權勢。寧後身外已。



之風也。阮嗣宗沈酒荒迷，乖畏途相誠之譬也。謝幼  
輿賊賄黜削，違棄其餘魚之旨也。彼諸人者，並其領  
袖，乎宗所歸。其餘桎梏塵滓之中，顛仆名利之下者，  
豈可備言乎？直取其清談雅論，剖析微賔主往復，  
娛心悅耳，非濟世成俗之要也。洎于梁世，茲風復闡，  
莊老周易總謂三弔。武皇簡文躬自講論，周宏正奉  
贊大猷，化行都邑，學徒千餘，實爲盛美。元帝在江荆  
間，復所愛習，召置學生，親爲教授，廢寢忘食，以夜繼  
朝。至乃倦劇，愁憤輒以講自釋。吾時頗預末筵，親承



音旨。性既頑魯。亦所不好云。齊孝昭帝侍嬖太后。疾容色顛頽。服膳減損。徐之才爲灸兩穴。帝握拳代痛。爪入掌心。血流滿手。后既痊愈。帝尋疾崩。遺詔恨不見太后山陵之事。其天性至孝如彼。不識忌諱如此。良由無學所爲。若見古人之譏。欲母早死而悲哭之。則不發此言也。孝爲百行之首。猶須學以修飾之。況餘事乎。梁元帝嘗爲吾說。昔在會稽。年始十一。便已好學。時又患疥。手不得拳。膝不得屈。閑齋張葛幃。避蠅。獨坐銀甌。貯山陰甜酒。時復進之以自寬痛。



率意自讀史書一日二十卷。旣未師受或不識一字。或不解一語。要自重之。不知厭倦。帝子之尊。童稚之逸。尚能如此。况其庶士。冀以自達者哉。古人勤學。有握錐投斧。照雪聚螢。鋤則帶經。牧則編簡。亦爲勤篤。梁世彭城劉綺。交州刺史勃之孫。早孤。家貧。燈燭難辦。常買荻尺寸折之。燃明夜讀。孝元初。出會稽。精選寮案。綺以才華爲國常侍兼記室。殊蒙禮遇。終於金紫光祿。義陽朱詹。世居江陵。後出揚都。好學。家貧無資。累日不爨。乃時吞紙以實腹。寒無氈。被抱犬而臥。



犬亦饑虛起行盜食呼之不至哀聲動隣猶不廢業。卒成學士官至鎮南錄事叅軍爲孝元所禮此乃不可爲之事亦是勤學之一人東莞臧逢世年二十餘欲讀班固漢書苦假借不久乃就姊夫劉緩乞丐客刺書翰紙末手寫一本軍府服其志尚卒以漢書聞齊有宦者內叅田鵬鸞本蠻人也年十四五初爲閭寺便知好學懷袖握書曉夕諷誦所居卑末使役苦辛時伺閒隙周章詢請每坐文林館氣喘汗流問書之外不暇他語及覩古人節義之事未嘗不感激沈



吟久之。吾甚憐愛。倍加開獎。後被賞。遇賜名。敬宣位至侍中。開府。後主之奔青州。遣其西出。叅伺動靜。爲周軍所獲。問齊王何在。紿云已去。計當出境。疑其不信。歐捶服之。每折一支。辭色愈厲。竟斷四體而卒。蠻夷童丱。猶能以學成忠。齊之將相比敬宣之奴。不若也。鄴平之後。見徙入關。思魯嘗謂吾曰。朝無祿位。家無積財。常肆筋力以申供養。每被課篤。勤勞經史。未知爲子。可得安乎。吾命之曰。子當以養爲心。父當以學爲教。使汝棄學。徇財。豐吾衣食。食之安得甘衣。



之安得暖若務先王之道。紹家世之業。藜羹糲褐。我自欲之。書曰。好問則裕。禮云。獨學而無友。則孤陋而寡聞。蓋須切磋相起明也。見有閉門讀書。師心自是。稠人廣坐。謬誤羞慙者多矣。穀梁傳稱公子友與莒拏相搏。左右呼曰。孟勞。孟勞者。魯之寶刀名。亦見廣雅。近在齊時。有姜仲岳。謂公子左右姓孟。名勞。多力之人。爲國所寶。與吾苦諍。時清河郡守邢峙。當世碩儒。助吾證之。赧然而伏。又三輔決錄云。靈帝殿柱題曰。堂堂乎張。京兆田郎。蓋引論語。偶以四言目京



兆人田鳳也。有一才士乃言時張京兆及田郎二人皆堂堂耳。聞吾此說初大驚駭。其後尋愧悔焉。江南有一權貴讀誤本蜀都賦注解蹲鴟芋也。乃爲羊字。人饋羊肉。答書云損惠蹲鴟。舉朝驚駭。不解事義。久後尋迹方知如此。元氏之世在洛京時有一才學重臣新得史記音而頗紕繆。誤反顓頊字。顓當爲許錄反。錯作許緣反。遂一一謂言從來謬音。專旭當音專。翻耳。此人先有高名。翕然信行。期年之後更有碩儒苦相究討。方知誤焉。漢書王莽贊云紫色握聲。餘分



聞位。謂以偽亂真。爾昔吾嘗共人談書。言及王莽形  
狀。有一俊士自許史學。名價甚高。乃云王莽非直鴟  
目虎吻。亦紫色蛙聲。又禮樂志云。給太官桐馬酒。李  
奇注以馬乳爲酒也。捶桐乃成。二字竝從手。捶都好反

桐達孔反

此謂捶擣。挺桐之。今爲酪酒亦然。向學士又

以爲種桐時。太官釀馬酒乃熟。其孤陋遂至於此。太  
山羊肅亦稱學問。讀潘岳賦。周文弱枝之棗。爲杖策  
之杖。世本容成造歷。以歷爲確磨之磨。談說製文。援  
引古音。必須眼學。勿信耳受。江南閭里間士大夫。或



不學問。羞爲鄙朴道。聽塗說。強事飾辭。呼徵質爲周。  
鄭。謂霍亂爲博陸。上荊州。必稱峽西。下揚都。言去海。  
郡。言食則餽口。道錢則孔方。問移則楚王。論婚則宴。  
爾。及王則無不伸宣。語劉則無不公幹。凡有一二百。  
件。傳相祖述。尋問莫知源由。施安時復失於莊生有。  
乘時鵲起之說。故謝朓詩曰。鵲起登吳臺。吾有一親。  
表作七夕詩云。今夜吳臺鵲。亦共往填河。羅浮山記。  
云。望平地樹如薺。故戴高詩云。長安樹如薺。又鄴下。  
有一人詠樹詩云。遙望長安薺。又嘗見謂矜誕爲夸。



叱呼高年爲富有春秋。肯耳學之過也。夫文字者墳  
籍根本。世之學徒。多不曉字。讀五經者。是徐邈而非  
許慎。習賦誦者。信褚詮而忽呂忱。明史記者。專皮鄒  
而廢篆籀。學漢書者。悅應蘇而畧蒼雅。不知書音是  
其枝葉。小學乃其宗系。至見服虔張揖音義。則貴之  
得通俗廣雅而不屑。一手之中。向背如此。况異代各  
人乎。世人皆以通俗文爲服虔造。未知非服虔而輕之。猶謂是服虔而輕之。故此論從俗也。  
夫學者。貴能博聞也。郡國山川。官位姓族。衣服飲食。  
器皿制度。皆欲根尋得其原本。至於文字。忽不經懷。



已身姓名多或乖舛。縱得不誤亦未知所由。近世有  
人爲子制名。兄弟皆山。傍立字而有名。峙者。兄弟皆  
木。傍立字而有名。機者。兄弟皆水。傍立字而有名。凝  
者。名儒碩學。此例甚多。若有知吾之鐘不調。一何可  
笑。吾嘗從齊王幸并州。自井陘關入上艾縣。東數十  
里有獵閭村。後百官受馬糧。在晉陽東百餘里。亢仇  
城側。並不識二所本是何地。博求古今。皆未能曉。及  
檢字林韻集。乃知獵閭是舊獵餘聚。獵音亢仇舊是  
磈馮亭。上音武安。反下音仇。悉屬上艾。時太原王邵欲撰鄉邑



記注。因此二名聞之大喜。吾初讀莊子蠅二首。韓非  
子曰。出有蠅者。一身兩口。爭食相齧。遂相殺也。茫然  
不識此字何音。逢人輒問。了無解者。案爾雅諸書。蚕  
蛹名蠅。音貴又非二首兩口貪害之物。後見古今字譜。  
此亦古之虺字。積年凝滯。豁然霧解。嘗遊趙州。見栢  
人城北有一小水。土人亦不知名。後讀城西門徐整  
碑云。洎流東指。衆皆不識。吾案說文。此字古鳧字也。  
洎淺水貌。此水漢來本無名矣。直以淺貌目之。或當  
卽以洎爲名乎。世中書翰多稱勿勿。相承如此。不知



所由。或有妄言此忽忽之殘缺耳。案說文勿者州里  
所建之旗也。象其柄及三遊之形。所以趣民事。故忽  
遽者稱爲勿勿。吾在益州與數人同坐。初晴日明。見  
地上小光。問左右此是何物。有一蜀豎就視。荅云是  
豆逼耳。相顧憚然。不知所謂。命取將來。乃小豆也。窮  
訪蜀土。呼粒爲逼。時莫之解。吾云三蒼說文此字白  
下爲匕。皆訓粒。通俗文音方力反。衆皆歡悟。愍楚友  
壻竇如同。從河州來。得一青鳥。馴養愛翫。舉族呼之  
爲鵲。吾曰鵲出上黨。數曾見之。色竝黃黑。無駁雜也。



故陳思王鵠賦云揚乎黃之勁羽試檢說文鴉音雀

似鵠而青出羗中韻集音分此疑頓釋梁世有蔡朗

諱純既不涉學遂呼尊爲露葵面牆之徒遞相倣倣

承聖中遣一士大夫聘齊齊主客郎李恕問梁使曰

江南有露葵否荅曰露葵是蓴水鄉所出卿今食者

綠葵菜耳李亦學問但不測彼之深淺乍聞無以覆

究思魯等姨夫彭城劉靈嘗與吾坐諸子侍焉吾問

儒行敏行曰凡字與諮議名同音者其數多少能盡

識乎荅曰未之究也請導示之吾曰凡如此例不



研檢忽見不識。誤以問人。反爲無賴所欺。不容易也。因爲說之得五十許字。諸劉歆曰。不意乃爾。若遂不知。亦爲異事。校定書籍。亦何容易。自揚雄。劉向。方稱此職耳。觀天下書未徧。不得妄下雌黃。或彼以爲非。此以爲是。或本同末異。或兩文皆欠。不可偏信一隅也。

文章篇第九

夫文章者。原出五經。詔命策檄。生於書者也。序述論議。生於易者也。歌詠賦頌。生於詩者也。祭祀哀誄。生



於禮者也。書奏箴銘。生於春秋者也。朝廷憲章。軍旅  
誓誥。敷顯仁義。發明功德。牧民建國。施用多途。至於  
陶冶性靈。從容諷諫。入其滋味。亦樂事也。行有餘力  
則可習之。然而自古文人多陷輕薄。屈原露才揚已。  
顯暴君過。宋玉體貌容冶。見遇俳優。東方曼倩滑稽  
不雅。司馬長卿竊貲無操。王褒過章童約。揚雄德敗  
美新。李陵降辱夷虜。劉歆反覆莽世。傅毅黨附權門。  
班固盜竊父史。趙元叔抗竦過度。馮敬通浮華擯壓。  
馬季長佞媚獲誚。蔡伯喈同惡受誅。吳質詆訶鄉里。



曹植悖慢犯法。杜篤乞假無厭。路粹隘已。甚陳琳  
實號兇疎。繁欽性無檢格。劉楨屈強輪作。王粲率躁  
見嫌。孔融禍衡。誕傲致殞。楊修丁虞。易動取斃。阮籍  
無禮敗俗。嵇康凌物。以終傳。羊祜。關。免官。孫楚矜誇  
凌上。陸機犯順。履險。潘岳乾沒取危。顏延年負氣。摧  
黜。謝靈運空疎。亂紀。王元長凶賊。自貽。謝。羊。暉。悖慢  
見及。凡此諸人。皆其翹秀者。不能悉紀。大較如此。至  
于帝王。亦或未免。自昔天子而有才華者。唯漢。正。魏。  
太祖。文帝。明帝。宋。孝武帝。皆負世議。非懿德之君也。



自子游子夏荀况孟軻枚乘賈誼蘇武張衡左思之  
儔。有盛名而免過患者。時復聞之。但其損敗居多耳。  
每嘗思之。原其所積。文章之體。標舉興會。發引性靈。  
使人矜伐。故忽於持操。果於進取。今世文士。此患彌  
切。一事愜當。一句清巧。神厲九霄。志凌千載。自吟自  
賞。不覺更有傍人。加以砂礫所傷。慘於矛戟。諷刺之  
禍。速乎風塵。深宜防慮。以保元吉。學問有利鈍。文  
章有巧拙。鈍學累功。不妨精熟。拙文研思。終歸蚩鄙。  
但成學士。自足爲人。必乏天才。勿強操筆。吾見世人



至於無才思。自謂清華。流布醜拙。亦以衆矣。江南號

爲吟

力正反

癡符。近在并州。有一士族。好爲可笑詩賦。

詭擊邢魏諸公。衆共嘲弄。虛相讚說。便擊牛釀酒。招

延聲譽。其妻明鑒婦人也。泣而諫之。此人歎曰。才華

不爲妻子所容。何況行路。至死不覺自見之。謂明此

誠難也。

學爲文章。先謀親友。得其評論者。然後出

手。慎勿師心自任。取笑旁人也。自古執筆爲文者。何

可勝言。然至於宏麗精華。不過數十篇耳。但使不失

體裁。辭意可觀。遂稱才士。要須動俗蓋世。亦俟河之



清乎。不屈二姓。夷齊之節也。何事非君。伊箕之義也。自春秋已來。家有韓亡。國有吞滅。君臣固無常分矣。然而君子之交。絕無惡聲。一旦屈膝而事人。豈以存亡而改慮。陳孔璋居袁裁書。則呼操爲豺狼。在魏製檄。則自紹爲虵虺。在時君所命。不得自專。然亦文人之巨患也。當務從容消息之。或問揚雄曰。吾子少而好賦。雄曰。然。童子雕蟲篆刻。壯夫不爲也。余竊非之。曰。虞舜歌南風之詩。周公作鴟鴞之詠。吉甫史克雅頌之美者。未聞皆在幼年累德也。孔子曰。不學



詩無以言。自衛返魯。樂正雅頌各得其所。大明孝道。引詩證之。揚雄安敢忽之也。若論詩人之賦麗以則。辭人之賦麗以淫。但知變之而已。又未知雄自爲壯夫何如也。著劇秦美新。妄投於閣。周章怖懼。不達天命。童子之爲耳。桓譚以勝老子。葛洪以方仲尼。使人歎息此人。直以曉算術。解陰陽。故著太彖經。爲數子所惑耳。其遺言餘行。孫卿屈原之不及。安敢望大聖之清塵。且太彖今竟何用乎。不啻覆瓿而已。齊世有辛毗者。清幹之士。官至行臺尚書。嗤鄙文學。嘲



劉述云。君輩辭藻。譬若榮華。須臾之翫。非宏才也。豈  
比吾徒十丈松樹。常有風霜。不可凋悴矣。劉應之曰。  
既有寒木。又發春華。何如也。辛笑曰。可矣。凡爲文章。  
猶人乘騏驥。雖有逸氣。當以銜勒制之。勿使流亂軌。  
蠲放意填坑岸也。文章當以理致爲心。腎氣調爲筋  
骨。事義爲皮膚。華麗爲冠冕。今世相承。趨末棄本。率  
多浮艷。辭與理競。辭勝而理伏。事與才爭。事繁而才  
損。放逸者流宕而忘歸。穿鑿者補綴而不足。時俗如  
此。安能獨違。但務去泰去甚耳。必有盛才。重譽。改華



體裁者實吾所希古人之文。宏材逸氣。體度風格。去  
今實遠。但緝綴疎朴。未爲密緻耳。今世音律諧靡。章  
句偶對。諱避精詳。賢於往昔多矣。宜以古之製裁爲  
本。今之辭調爲末。並須兩存。不可偏棄也。吾家世  
文章。甚爲典正。不從流俗。梁孝元在蕃邸時。撰西府  
新文史記。無一篇見錄者。亦以不偶於世。無鄭衛之  
音故也。有詩賦銘誄書表啓疏二十卷。吾兄弟始在  
草上。並未得編次。便遭火盪盡。竟不傳於世。銜酷茹  
恨。徹於心髓。操行見於梁史。文士傳及孝元懷舊志。



沈隱侯曰。文章當從三易。易見事一也。易識字二也。易讀誦三也。邢子才常曰。沈侯文章。用事不使人覺。若胃臆語也。深以此服之。祖孝徵亦嘗謂吾曰。沈詩云。崖傾護石髓。此皆佞用事耶。邢子才魏收俱有重名。時俗準的以爲師匠。邢賞服沈約而輕任昉。魏愛慕任昉而毀沈約。每於談讌。辭色以之。鄴下紛紜。各有朋黨。祖孝徵嘗謂吾曰。任沈之是非。乃邢魏之優劣也。吳均集有破鏡賦。昔者邑號朝歌。顏淵不舍里名勝母。曾參歛襟。蓋忌夫惡名之傷實也。破鏡



乃凶逆之獸事見漢書爲文幸避此名也比世往往  
見有和人詩者題云敬同孝經云資於事父以事君  
而敬同不可輕言也梁世費昶詩云不知是耶非殷  
濞詩云颿颿雲母舟簡文曰颿旣不識其父濞又颿  
颿其母此雖悉古事不可用也世人或有文章引詩  
伐鼓淵淵者宋書已有屢遊之誚如此流比幸須避  
之北面事親別舅擣渭陽之詠堂上養老送兄賦栢  
山之悲皆大失也舉此一隅觸塗宜慎江南文制  
欲人彈射知有病累隨卽改之陳王得之於丁廙也



山東風俗不通擊難。吾初入鄴，遂嘗以此忤人。至今爲悔。汝曹必無輕議也。凡代人爲文，皆作彼語，理宜然矣。至於哀傷凶禍之辭，不可輒代。蔡邕爲胡金盈作母靈表，頌曰：悲母氏之不永，然委我而夙喪。又爲胡顯作其父銘曰：葬我考議郎君。袁三公頌曰：猗歟我祖，出自有媯。王粲爲潘文則思親詩云：躬此勞瘁，鞠予小人。庶我顯妣，克保遐年。而並載乎邕粲之集，此例甚衆。古人之所行，今世以爲諱。陳思王、武帝誄，遂深永蟄之思。潘岳悼亡賦，乃愴手澤之遺。是方



父於重匹婦於重也。蔡邕楊秉碑云。統大麓之重。潘  
尼贈盧景宣詩云。九五思飛龍。孫楚王驃騎誄云。奄  
忽登遐。陸機又誄云。億兆宅心。敦叙百揆。姊誄云。倪  
天之和。今爲此言。則朝廷之臯人也。王粲贈楊德祖  
詩云。我君餞之。其樂洩洩。不可妄施人子。况儲君乎。  
挽歌辭者。或云古者虞殯之歌。或云出自田橫之客。  
皆爲生者悼往苦哀之意。陸平原多爲外人自歎之  
言。詩格旣無此例。又乖製作本意。凡詩人之作。刺  
箴美頌。各有源流。未嘗混雜善惡同篇也。陸機爲齊



謳篇前叙山川物產風教之盛。後章忽郢山川之情  
疎失厥體。其爲吳趨行。何不陳子光夫差乎。京洛行  
祠。不述赧王靈帝乎。自古宏才博學。用事誤者有  
矣。百家雜說。或有不同。書儻湮滅。後人不見。故未敢  
輕議之。今指知決紕繆者。畧舉一兩端以爲誠。詩云  
有鷺雉鳴。又曰雉鳴求其牡。毛傳亦曰鷺雉雌聲。又  
云雉之朝鳴。尚求其雌。鄭予注月令亦云雉雄雉鳴。  
潘岳賦曰。雉鷺鷺以朝雉。是則混雜其雄雌矣。詩云  
孔懷兄弟。孔甚也。懷思也。言甚可思也。陸機與長



顧母書述從祖弟士璜死。乃言痛心拔腦。有如孔懷。心旣痛矣。卽爲甚思。何故言有如也。觀其此意。當謂親兄弟爲孔懷。詩云。父母孔邇。而呼二親爲孔邇。於義通乎。異物志云。擁劍狀如蟹。但一螯偏大爾。何遜詩云。躍魚如擁劍。是不分魚蟹也。漢書御史府中列栢樹。常有野鳥數千棲宿其上。晨去暮來。號朝夕鳥。而文士往往誤作鳥鳶用之。抱朴子說項曼都詐稱得仙。自云。仙人以流霞一杯與我飲之。輒不饑渴。而簡文詩云。霞流抱朴枕。亦猶郭象以惠施之辨爲莊



周言也。後漢書因司徒崔烈以銀鐺鑲。

上音狼下音當

銀鐺

大鑲也。世間多誤作金銀字。崔烈太子亦是數千卷學士嘗作詩云。銀鑲三公脚。刀撞僕射頭。爲俗所誤。文章地理必須愜當。梁簡文鴈門太守行。乃云驚軍攻日逐。燕騎蕩康居。大宛歸善馬。小月送降書。蕭子暉隴頭水云。天寒隴水急。散漫俱分瀉。北注徂黃龍。東流會白馬。此亦明珠之類。美玉之瑕。宜慎之。王

籍入若耶溪。詩云。蟬噪林逾靜。鳥鳴山更幽。江南以爲文外斷絕。物無異議。簡文吟詠不能忘之。孝元諷



咏以爲不可復得。至懷舊志。載於籍傳。范陽盧詢。鄴  
下才俊。乃言此不成語。何事於能。魏收亦然。其論詩  
云。蕭蕭馬鳴。悠悠旆旌。毛傳曰。言不誼譁也。吾每歎  
此解有情致。籍詩生於此意耳。蘭陵蕭慤。梁室上  
黃侯之子。工於篇什。嘗有秋詩云。芙蓉露下落。楊柳  
月中疎。時人未之賞也。吾愛其蕭散。宛然在目。潁川  
荀仲舉。瑯琊諸葛漢。亦以爲爾。而盧思道之徒。雅所  
不愜。何遜詩實爲清巧。多形似之言。楊都論者。恨  
其每病苦辛。饒貧寒氣。不及劉孝綽之雍容也。雖然。



劉甚忌之。平生誦何詩云：「遽居響北闕，慍慍乎麥不反。」

道車又撰詩苑，止取何兩篇。時人譏其不廣。劉孝綽當時既有重名，無所與讓。唯服謝朓，常以謝詩置几案間。動靜輒諷味。簡文愛陶淵明文，亦復如此。江南語曰：「梁有三何。子朗最多。」三何者，遜及思澄、子朗也。子朗信饒清巧，思澄遊廬山，每有佳篇，並爲冠絕。

名實篇第十

名之與實，猶形之與影也。德藝周厚，則名必善焉。容色姝麗，則影必美焉。今不修身而求令名於世者，猶



貌甚惡而只妍影於鏡也。上士忘名。中士立名。下士  
竊名。忘名者。體道合德。享鬼神之福祐。非所以求名  
也。立名者。修身慎行。懽榮觀之不顯。非所以讓名也。  
竊名者。厚貌深姦。干浮華之虛稱。非所以得名也。  
人足所履。不過數寸。然而咫尺之途。必顛蹙於崖岸。  
拱抱之梁。每沈溺於川谷者。何哉。爲其傍無餘地。故  
也。君子之立已。抑亦如之。至誠之言。人未能信。至  
之行。物或致疑。皆由言行聲名無餘地也。吾每爲人  
所毀。常以此自責。若能開方軌之路。廣造舟之航。則



仲由之言信。重於登壇之盟。趙喜之降城。賢於折衝之將矣。吾見世人。清名登而金貝入。信譽顯而然諾虧。不知後之矛戟。毀前之干櫓也。宓子賤云。誠於此者。形於彼。人之虛實真偽。在乎心。無不見乎迹。但察之未熟耳。一爲察之所鑒。巧僞不如拙誠。承之以羞大矣。伯石讓卿。王莽辭政。當于爾時。自以巧密。後人書之。留傳萬代。可爲骨寒毛豎也。近有大貴孝悌著聲。前後居喪。哀毀踰制。亦足以高於人矣。而嘗以苦塊之中。以巴豆塗臉。遂使成瘡。表哭泣之過。左右



童豎不能掩之。益使外人謂其居處飲食皆爲不信。以一僞喪百誠者。乃貪名不已故也。有一士族讀書。不過二三百卷。天才鈍拙而家世殷厚。雅自矜持。多以酒犢珍玩交諸名士。甘其餌者遞相吹噓。朝廷以爲文華。亦嘗出境聘東萊王。韓晉明篤好文學。疑彼製作多非機杼。遂設讌言面相討試。竟日歡諧辭人滿席。屬音賦韻。命筆爲詩。彼造次卽成了。非向韻衆客各自沈吟。遂無覺者。韓退歎曰。果如所量。韓又嘗問曰。王琨杼上終葵首。嘗作何形。乃答云。琨頭曲。



勢如葵葉耳。韓既有學。忍筭爲吾說之。治黠子弟

文章以爲聲價。大弊事也。一則不可常繼。終露其情。

二則學者有憑益。不精勵。鄴下有一少年出爲襄國

令。頗自勉篤。公事經懷。每加撫卹。以求聲譽。凡遣兵

役。握手送離。或齎黎棗餅餌。人人贈別云。上命相煩。

情所不忍。道路饑渴。以此見思。民庶稱之。不容於口。

及遷爲泗洲別駕。此費日廣。不可常周。一有僞情。觸

塗難繼。功績遂敗損矣。或問曰。夫神滅形消。遺聲

餘價。亦猶蟬殼。蛇皮。獸迹。鳥迹耳。何預於死者。而聖



人以爲教乎。對曰：勸也。勸其立名，則獲其實；且勸一伯夷而千萬人立清風矣。勸一季札而千萬人立仁風矣。勸一柳下惠而千萬人立真風矣。勸一史魚而千萬人立直風矣。故聖人欲其魚鱗鳳翼，雜沓參差，不絕於世，豈不宏哉！四海悠悠，皆慕名者，蓋因其情而致其善耳。抑又論之，祖考之嘉名美譽，亦子孫之冕服墻宇也。自古及今，獲其庇廕者衆矣。夫修善立名者，亦猶築室樹果。生則獲其利，死則遺其澤。世人汲汲者，不達此意。若其與菟爽俱昇，松栢偕茂，惑矣。





顏氏家訓卷下

涉務篇第十一

夫君子之處世。貴能有益於物耳。不徒高談虛論。左  
琴右書。以費人君祿位也。國之用材。大較不過六事。  
一則朝廷之臣。取其鑒達治體。經綸博雅。二則文史  
之臣。取其著述憲章。不忘前古。三則軍旅之臣。取其  
斷決有謀。強幹習事。四則藩屏之臣。取其明練風俗。  
清白愛民。五則使命之臣。取其識變從宜。不辱君命。  
六則興造之臣。取其程功節費。開畧有術。此則皆勤



學守行者所能辨也。人性有長短。豈責其美於六塗哉。但當皆曉指趣。能守一職。便無媿耳。吾見世中文學之士。品藻古今。若指諸掌。及有試用。多無所堪。若承平之世。不知有喪亂之禍。處廟堂之下。不知有戰陣之急。保俸祿之資。不知有耕稼之苦。肆吏民之上。不知有勞役之勤。故難可以應世經務也。晉朝南渡。優惜士族。故江南冠帶有才幹者。擢爲令僕以下。尚書郎中書舍人。已上典掌機要。其餘文義之士。多迂誕浮華。不涉世務。纖微過失。又惜行捶楚。所以處



於清名益護其短也。至於臺閣令史主書監帥諸王  
籤省並曉習吏用濟辨時須縱有小人之態皆可鞭  
杖肅督故多見委使蓋用其長也。人每不自量舉世  
怨梁武帝父子愛小人而疏士大夫此亦眼不能見  
其睫耳。梁世士大夫皆尚褻衣博帶大冠高履出  
則車輿入則扶持郊郭之內無乘馬者。周宏正爲宣  
城王所愛給一車下馬常服御之舉朝以爲放達。至  
乃尚書郎乘馬則糾劾之。及侯景之亂膚脆骨柔不  
堪行步。體羸氣弱不耐寒暑坐死倉猝者。往往而然。



古人欲知稼穡之艱難。斯蓋貴穀務本之道也。夫食  
爲民天。民非食不生矣。三日不粒。父子不能相存。耕  
種之。耨鉏之。刈穫之。載積之。打拂之。簸揚之。凡幾涉  
手而入倉廩。安可輕農事而貴末業哉。江南朝士。因  
晉中興。南渡江。卒爲羈旅。至今八九世。未有力田。悉  
資俸祿而食耳。假令有者。皆信僮僕爲之。未嘗自觀。  
起一撥土。耘一株苗。不知幾月當下。幾月當收。安識  
世間餘務乎。故治官則不了。營家則不辦。皆優閑之  
過也。



省事篇第十二

銘金人云無多言。多言多敗。無多事。多事多患。至哉  
斯戒也。能走者奪其翼。善飛者減其指。有角者無上  
齒。豐後者無前足。蓋天道不使物有兼焉也。古人云  
多爲少善。不如執一。鼯鼠五能。不成伎術。近世有兩  
人朗悟士也。性多營綜。畧無成名。經不足以待問。史  
不足以討論。文章無可傳於集錄。書迹未堪以留愛  
翫。卜筮射六得三。醫藥治十差五。音樂在數十人下。  
弓矢在千百人中。天文畫繪。基博鮮卑語。煎胡堯油。

鍊錫爲銀。如此之類。畧得梗槩。皆不通熟。惜乎以彼  
神明若省其異端。當精妙也。上書陳事。起自戰國。  
逮於兩漢。風流彌廣。原其體度。攻人主之長短。諫諍  
之徒也。訐羣臣之得失。訟訴之類也。陳國家之利害。  
對策之伍也。帶私情之與奪。遊說之儔也。總此四塗。  
賈誠以求位。鬻言以干祿。或無絲毫之益。而有不省  
之困。幸而感悟人主。爲時所納。初獲不貲之賞。終陷  
不測之誅。則嚴助、朱買臣、吾丘壽王、主父偃之類。甚  
衆。良史所書。蓋取其狂狷一介。論政得失耳。非士君



子守法度者所爲也。今世所覩懷瑾瑜而握蘭桂者。悉耻爲之。守門詣闕獻書言計。率多空薄。高自矜夸。無經畧之大體。咸糠粃之微事。十條之中。一不足採。縱合時務。已漏先覺。非謂不知。但患知而不行耳。或被發姦私。面相酬證。事途迴冗。飜懼憊尤。人主外護。聲教脫加含養。此乃僥倖之徒。不足與比肩也。諫諍之徒。以正人君之失爾。必在得言之地。當盡匡贊之規。不容苟免偷安。垂頭塞耳。至於就養有方。思不出位。干非其任。斯則罪人。故表記云。事君遠而諫。則



諂也。近而不諫則尸利也。論語曰。木信而諫人。以爲  
謗已也。君子當守道崇德。蓄價待時。爵祿不登。信  
由天命。須求趨競。不顧羞慙。比較材能。斟量功伐。厲  
色揚聲。東怨西怒。或有刼持宰相瑕疵。而獲酬謝。或  
有諂聒時人。視聽求見。發遣以此得官。謂爲才力。何  
異盜食致飽。竊衣取溫哉。世見躁競得官者。便爲弗  
索何獲。不知時運之來。不索亦至也。見靜退未遇者。  
便爲弗爲。胡成。不知風雲不與。徒求無益也。凡不求  
而自得。求而不得者。焉可勝算乎。齊之季世。多以



財貨託附外家。誼動女謁。拜守宰者。印組光華。車馬  
輝赫。榮兼九族。取貴一時。而爲執政所患。隨而伺察。  
旣以得利。必以利治。微染風塵。便乖肅正。坑阱殊深。  
瘡痍未復。縱得免死。莫不破家。然後噬臍。亦復何及。  
吾自南及北。未嘗一言與時人論身分也。不能通達。  
亦無尤焉。王子晉云。佐饗得嘗。佐鬪得傷。此言爲  
善。則預爲惡。則去。不欲黨人。非義之事也。凡損於物。  
皆無與焉。然而窮鳥入懷。仁人所憫。况死士歸我。當  
棄之乎。伍員之託漁舟。季布之入廣柳。孔融之藏張。



儉。孫高之。匿趙岐。前代之所貴。而吾之所行也。以此得臯。甘心瞑目。至如郭解之代人報讐。灌夫之橫怒求地。游俠之徒。非君子之所爲也。如有逆亂之行。得臯於君親者。又不足卹焉。親友之迫危難也。家財已力。當無所吝。若橫生圖計。無理請謁。非吾教也。墨翟之徒。世謂熱腹。楊朱之侶。世謂冷腸。腸不可冷。腹不可熱。當以仁義爲節文爾。前在修文令曹。有山東學士與關中太史競歷。凡十餘人。紛紜累歲。內史牒付議官平之。吾執論曰。大抵諸儒所爭。四分并臧分。



兩家爾。歷象之要。可以晷景測之。今驗其分至薄蝕。則四分䟽而減分密。䟽者則稱政令有寬猛。運行致盈縮。非算之失也。密者則云日月有遲速。以術求之。預知其度。無災祥也。用䟽則藏奸而不信。用密則任數而違經。且議官所知。不能精於訟者。以淺裁深。安有肯服。旣非格令所司。幸勿當也。舉曹貴賤。咸以爲然。有一禮官耻爲此議。苦欲留連。強加考覈。機杼旣薄。無以測量。還復採訪。訟人窺望長短。朝夕聚議。寒暑煩勞。背春涉冬。竟無與奪。怨誚滋生。赧然而退。終



爲內史所迫。此好名好事之辱也。

止足篇第十三

禮云欲不可縱。志不可滿。宇宙可臻其極。情性不知其窮。唯在少欲。知正爲立涯限爾。先祖靖侯戒子姪曰。汝家書生門戶。世無富貴。自今仕宦不可過二千石。婚姻勿貪勢家。吾終身服膺以爲名言也。天地鬼神之道。皆惡滿盈。謙虛冲損。可以免害。人生衣取以覆寒露。食取以充饑乏爾。形骸之內。尚不得奢靡。已身之外。而欲窮驕泰耶。周穆王。秦始皇。漢武帝。富



有四海貴爲天子。不知紀極。猶自敗累。況士庶乎。常以爲二十口家。奴婢盛多。不可出二十人。良田十頃。堂室纔蔽風雨。車馬僅代杖策。蓄財數萬。以擬吉凶。急速。不啻此者。以義散之。不至此者。勿非道求之。仕宦稱泰。不過處在中品。前望五十人。後顧五十人。足以免耻辱。無傾危也。高此者。便當罷謝。偃仰私庭。吾近爲黃門郎。已可收退。當時羈旅。懼懼謗譏。思爲此計。僅未暇爾。自喪亂已來。見因託風雲。徼倖富貴。旦執機權。夜捐坑谷。朔歡卓鄭。晦泣顏原者。非十人。



五人也。慎之哉，慎之哉。

誠兵篇第十四

顏氏之先，本乎鄒魯。或分入齊，世以儒雅爲業。徧在書記，仲尼門徒升堂者七十有二，顏氏居八人焉。秦漢魏晉，下逮齊梁，未有用兵以取達者。春秋之世，顏高、顏鳴、顏羽之徒，皆一聞夫爾。齊有顏涿聚，趙有顏最，或作聚漢末有顏良，宋有顏延之，並處將軍之任，竟

以顛覆。漢郎顏驄自稱好耆，更無事迹。顏忠以黨楚王受誅。顏俊以據忤威見殺。得姓以來，無清操者，唯



此二人皆罹禍敗。頃世亂離。衣冠之士。雖無身手。或聚徒衆。違棄素業。微倖戰功。吾旣羸薄。仰惟前代。故寘心於此。子孫誌之。孔子力翹門關。不以力聞。此聖證也。吾見今世士大夫。纔有氣幹。便倚賴之。不能被甲執兵。以衛社稷。但微行險服。逞弄拳腕。大則陷危。亾小則貽耻辱。遂無免者。國之興亾。兵之勝敗。博學所至。幸討論之。入帷幄之中。參廟堂之上。不能爲主。畫規以謀社稷。君子所耻也。然而每見文士。頗讀兵書。微有經畧。若承平之世。睥睨宮闈。幸災樂禍。晉爲



逆亂註誤善良。如在兵革之時。構扇反覆。縱橫說誘。不識存亡。強相扶戴。此皆陷身滅族之本也。誠之哉。誠之哉。習五兵。便乘騎。上可稱丈夫。爾今世士大夫。但不讀書。卽稱丈夫兒。乃飯囊酒甕也。

養生篇第十五

神仙之事。未可全誣。但性命在天。或難種植。人生居世。觸途牽繫。幼少之日。既有供養之勤。成立之年。便增妻孥之累。衣食資須。公私勞役。而望遁跡山林。超然塵滓。千萬不過一爾。加以金玉之費。鑪器所須。蓋



非貧士所辦。學如牛毛。成如麟角。華山之下。白骨如  
莽。何有可遂之理。考之內教。縱使得仙。終當有死。不  
能出世。不願汝曹專精於此。若其愛養神明。調護氣  
息。慎節起居。均適寒暄。禁忌食飲。將餌藥物。遂其所  
稟。不爲夭折者。吾無間然。諸藥餌法。不廢世務也。庾  
肩吾常服槐實。年七十餘。目看細字。鬚髮猶黑。鄴中  
朝士有單服杏仁。枸杞黃精。木車前得益者甚多。不  
能一一說爾。吾嘗患齒搖動欲落。飲食熱冷皆苦。爽  
痛見抱朴子牢齒之法。早朝叩齒三百下爲良。行之



數日卽平愈。今恒持之。此輩小術。無損於事。亦可修也。凡欲餌藥。陶隱居太清方中。總錄甚備。但須精審。不可輕服。近有王愛州。在鄴學服松脂。不得節度。腸塞而死。爲藥所誤者甚多。夫養生先須慮禍。全身保性。有此生然後養之。勿徒養其無生也。單豹養於內而喪外。張毅養於外而喪內。前賢所戒也。稽康著養生之論。而以傲物受刑。石崇冀服餌之徵。而以貪溺取禍。徃世之所迷也。夫生不可不惜。不可苟惜。涉險畏之途。干禍難之事。貪欲以傷生。讒慝而致死。



此君子之所惜哉。行誠孝而見賊，履仁義而得罪，喪身以全家，泯軀而濟國，君子不咎也。自亂離已來，吾見名臣賢士，臨難求生，終爲不救，徒取窘辱，令人憤懣。侯景之亂，王公將相多被戮辱，妃主姬妾畧無全者。唯吳郡太守張嶮，建義不撓，爲賊所害，辭色不撓，及鄱陽王世子謝夫人登屋詬怒，見射而斃。夫人謝遵女也。何賢智操行若此之難，婢妾引決若此之易。悲夫。

歸心篇第十六



三世之事。信而有徵。家業歸心。勿輕慢也。其間妙音。具諸經論。不復於此。少能讚述。但懼汝曹猶未牢固。畧重勸誘爾。原夫四塵五塵。剖析形有。六舟三駕。運載群生。萬行歸空。千門入善。辯才智惠。豈徒七經百氏之博哉。明非堯舜周孔所及也。內外兩教。本爲一體。漸極爲異。深淺不同。內典初門。設五種禁。外典仁義禮智信。皆與之符。仁者不殺之禁也。義者不盜之禁也。禮者不邪之禁也。智者不淫之禁也。信者不妄之禁也。至如畋狩軍旅燕享刑罰。固民之性。不可卒



除就爲之節使不淫濫爾歸周孔而背釋宗何其迷也。俗之謗者大抵有五。其一以世界外事及神化無方爲迂誕也。其二以吉凶禍福或未報應爲欺誑也。其三以僧尼行業多不精純爲姦惡也。其四以糜費金寶減耗課役爲損國也。其五以縱有因緣如報善惡安能辛苦今日之甲利後世之乙乎。爲異人也。今並釋之于下云。釋一曰。夫遙大之物寧可度量。今人所知莫若天地。天爲積氣。地爲積塊。日爲陽精。月爲陰精。星爲萬物之精。儒家所安也。星有墜落乃爲



石矣。精若是石，不得有光。性又質重，何所繫屬？一星之徑，大者百里，一宿首尾相去數萬百里之物，數萬相連，闊狹從斜，常不盈縮。又星與日月形色同，爾但以大小爲其等差。然而日月又當石也。石既牢密，烏兔焉容？石在氣中，豈能獨運？日月星辰若皆是氣，氣體輕浮，當與天合，往來環轉，不得錯違。其間遲疾理宜一等。何故？日月五星二十八宿各有度數，移動不均。寧當氣墜，忽變爲石？地既滓濁，法應沉厚，鑿土得泉，乃浮水上。積水之下，復何有物？江河百谷，從何處



生東流到海何爲不溢歸墟尾閭溥何所到沃焦之  
石何氣所然潮汐去還誰所節度天漢懸指卬不散  
落水性就下何故上騰天地初開便有星宿九州未  
劃列國未分翦疆區野若爲躔次封建已來誰所制  
割國有增減星無進退災祥禍福就中不差乾象之  
大列星之夥何爲分野止繫中國昴爲旄頭匈奴之  
次西胡東越彫題交趾獨棄之乎以此而求迄無了  
者豈得以人事尋常抑必宇宙外也凡人之信唯耳  
與目耳目之外咸致疑焉儒家說天自有數義或渾



或蓋乍宣乍安斗極所周管維所屬若所親見不容  
不同若所測量寧足依據何故信凡人之臆哉迷大  
聖之妙旨而欲必無恒沙世界微塵數劫也而鄒衍  
亦有九州之談山中人不信有魚大如木海上人不  
信有木大如魚漢棗不信苴膠魏文不信火布胡人  
見錦不信有虫食樹吐絲所成昔在江南不信有千  
人羶帳及來河北不信有二萬斛船皆實驗也世有  
祝師及諸幻術猶能履火蹈刃種瓜移井倏忽之間  
十變五化人力所爲尚能如此何況神通感應不可



思量千里寶幢百由旬座化成淨土踊出妙塔乎  
釋二曰夫信謗之徵有如影響耳聞眼見其事已多  
或乃精誠不深業緣未感時儻差闕終當獲報耳善  
惡之行禍福所歸九流百氏皆同此論豈獨釋典爲  
虛妄乎項橐顏回之短折原憲伯夷之凍餒盜跖莊  
蹻之福壽齊景桓魋之富強若引之先業冀以後生  
更爲通耳如以行善而偶鍾禍報爲惡而儻值福徵  
便可怨尤卽爲欺詭則亦堯舜之云虛周孔之不實  
也又欲安所依信而立身乎  
釋三曰開闢已來不



善人多而善人少何由悉責其精潔乎見有名僧高  
行棄而不說若覩凡僧流俗便生非毀且學者之不  
勤豈教者之爲過俗僧之學經律何異士人之學詩  
禮以詩禮之教格朝廷之人畧無全行者以經律之  
禁格出家之輩而獨責無犯哉且闕行之臣猶求祿  
位毀禁之侶何慙供養乎其於戒行自當有犯一披  
法服已墮僧數歲中所計齋講誦持比諸白衣猶不  
常山海也釋四曰內教多途出家自是其一法耳  
若能誠孝在心仁惠爲本須達流水不必剝落鬚髮



豈令罄井田而起塔廟窮編戶以爲僧尼也。皆由爲政不能節之。遂使非法之寺妨民稼穡。無業之僧空國賦算。非大覺之本旨也。抑又論之。求道者身計也。惜費者國謀也。身計國謀不可兩遂。誠臣徇主而棄親孝子安家而忘國。各有行也。儒有不屈王侯高尚其事。隱有讓王辭相避世山林。安可計其賦役以爲罪人。若能偕化黔首。悉入道場。如妙樂之世。穰佉之國。則有自然稻米無盡寶藏。安求田蚕之利乎。釋五曰。形體雖死。精神猶存。人生在世。望於後身。似不



相屬及其歿後則與前身似猶老少朝夕耳世有冤  
神示現夢想或降童妾或感妻孥取索飲食徵須福  
祐亦爲不少矣今人貧賤疾苦莫不怨尤前世不修  
功業以此而論安可不爲之作地乎夫有子孫自是  
天地間一蒼生耳何預身事而乃愛護遺其基址况  
於已之神爽頓欲棄之哉凡夫蒙蔽不見未來故言  
彼生與今非一體耳若有天眼鑒其念念隨滅生生  
不斷豈可不怖畏耶又君子處世貴能克已復禮濟  
時益物治家者欲一家之慶治國者欲一國之良僕



妾臣民與身竟何親也。而爲勤苦修德乎。亦是弄舜  
周孔虛失愉樂耳。一人修道濟度幾許蒼生。免脫幾  
身罪累。幸熟思之。汝曹若觀俗計。樹立門戶。不棄妻  
子。未能出家。但當兼修戒行。留心誦讀。以爲來世津  
梁。人身難得。勿虛過也。儒家君子尚離庖廚。見其生  
不忍其死。聞其聲不食其肉。高柴折像。未知內教。皆  
能不殺此。乃仁者自然用心。含生之徒。莫不愛命。去  
殺之事。必勉行之。好殺之人。臨死報驗。子孫殃禍。其  
數甚多。不能悉錄耳。且示數條於末。梁世有人常以



鷄卵白和沐云使髮光每沐輒破二三十枚臨歿髮中但聞啾啾數千雞雛聲江陵劉氏以賣鰾羹爲業後生一兒頭是鰾自頸以下方爲人耳王克爲永嘉郡守有人餉羊集賓欲讌而羊繩解來投一客先跪兩拜便入衣中此客竟不言之固無救請湏臾宰羊爲炙先行至客一臠入口便下皮肉周行遍體痛楚號叫方復說之遂作羊鳴而死梁孝元在江州時有人爲望蔡縣令經劉敬躬亂縣廨被焚寄寺而住民將牛酒作禮縣令以牛繫剝柱身除形像鋪



設牀坐於堂上接賓未殺之頃牛解徑來至階而拜  
縣令大笑命左右宰之飲噉醉飽便卧簷下稍醒而  
覺體痒爬搔隱疹因爾成癩十許年死 楊思達爲  
西陽郡守值侯景亂時復旱饑饑民盜田中麥思達  
遣一部曲守視所得盜者輒截手腕凡幾十餘人部  
曲後生一男自然無手 齊有一奉朝請家甚豪侈  
非手殺牛噉之不美年三十許病篤大兒牛來舉體  
如被刀刺叫呼而終 江陵高偉隨吾入齊凡數年  
向幽州淀中捕魚後病每見羣魚齧之而死 世有



癡人不識仁義、不知富貴、並由天命。爲子娶婦、恨其生資不足、倚作舅姑之尊、虵虺其性、毒口加誣、不識忌諱、罵辱婦之父母、却云教以婦道、不孝已身、不顧他恨、怛怛已之子女、不愛已之兒婦、如此之人、陰紀其過、鬼奪其算、慎不可與爲鄰、仍不可與爲援、宜遠之哉。

書證篇第十七

詩云：「參差荇菜。」爾雅云：「荇，荇菜也。」字或爲「荇」。先儒解荇菜云：「水草，圓葉，細莖，隨水淺深。」今是水悉有之。黃



花似蓴江南俗亦呼爲猪蓴或呼爲苳菜劉芳具有  
注釋而河北俗人多不識之博士皆以參差者是苳  
菜呼人覓爲人苳亦可笑之甚詩云誰謂荼苦爾  
雅毛傳並以荼苦菜也又禮云苦菜秀案易統通卦  
驗予圖曰苦菜生於寒秋更冬歷春得夏乃成今中  
原苦菜則如此也一名游冬葉似苦苳而細摘斷有  
白汁花黃似菊江南別有苦菜葉似酸漿其花或紫  
或白子大如珠熟時或赤或黑此菜可以釋勞案郭  
璞注爾雅此乃識黃蔕也今河北謂之龍葵梁世講



禮者以此當苦菜，既無宿根，至春子方生耳，亦大誤也。又高誘注呂氏春秋曰：榮而不實曰英，苦菜當言英，益知非龍葵也。詩云有杕之杜，江南本並木傍施太傳曰：杕，獨兒也。徐仙民音徒計反，說文曰：杕，樹兒也。在木部，韻集音次第之第，而河北本皆爲夷狄之狄，讀亦如字，此大誤也。詩云駟駒牡馬，江南書皆作牝牡之牡，河北本悉爲放牧之牧，鄴下博士見難云：駟，頌既美，僖公牧于坰野之事，何限驕隲乎？余答曰：案毛詩云：駟駒，良馬，腹幹肥張也。其下又云：諸



侯六閑四種有良馬戎馬田馬駑馬若作放牧之意  
通於牝牡則不容限在良馬獨得駟駟之稱良馬天  
子以駕玉輅諸侯以充朝聘郊祀必無駢也周禮圉  
人職良馬匹一人駑馬麗一人圉人所養亦非駢也  
一人舉其強駿者言之於義爲得也易云良馬逐左  
傳云以其良馬二亦精駿之稱非通語也今以詩傳  
良馬通於牧駢恐失毛生之意且不見劉芳義證乎  
禮月令云荔挺出鄭注云荔挺馬薤也說文云  
荔似蒲而小根可爲刷廣雅云馬薤荔也通俗文亦

云馬蘭，易統通卦驗，予喆云：荔挺不出，則國多火災。  
蔡邕月令章句云：荔似挺，高誘注：呂氏春秋云：荔草  
挺出也。然則月令注荔挺爲草名，誤矣。河北平澤率  
生之，江東頗有此物。人或種於階庭，但呼爲早蒲，故  
不識馬薺。講禮者乃以爲馬薺堪食，亦名豚耳。俗曰  
馬齒。江陵嘗有一僧，面形上廣下狹，劉緩幼子民譽  
年始數歲，俊悟善體物，見此僧云：面似馬薺。其伯父  
劉緇因呼爲荔挺法師。緇親講禮名儒，尚誤如此。  
詩云：將其來施施。毛傳云：施施，難進之意。鄭箋云：施



施舒行兒也。韓詩亦重爲施施。河北毛詩皆云施施。江南舊本悉單爲施。俗遂是之。恐有少誤。詩云有  
渰萋萋。興雲祁祁。毛傳云。渰陰雲。兒萋萋雲行兒。祁  
祁徐兒也。箋云。古者陰陽和風雨時。其來祁祁。然不  
暴疾也。案渰已。是陰雲何勞復云。興雲祁祁耶。雲當  
爲雨。俗寫誤耳。班固靈臺詩云。三光宣精。五行布序。  
習習祥風。祁祁甘雨。此其證也。禮云。定猶豫。決嫌  
疑。離騷曰。心猶豫而狐疑。先儒未有釋書。案尸子曰。  
五尺犬爲猶。說文云。隴西謂犬子爲猶。吾以爲人將



犬行犬好豫在人前待人不得又來迎候如此往還  
至于終日斯乃豫之所以爲未定也故稱猶豫或以  
爾雅曰猶如麕善登木猶獸名也既聞人聲乃豫緣  
木如此上下故稱猶豫狐之爲獸又多猜疑故聽河  
冰無流水聲然後渡今俗云狐疑虎卜則其義也  
左傳曰齊侯疹遂疢說文云疹一日一發之瘡疢有  
熱虐也案齊侯之病本是問日一發漸加重乎故爲  
諸侯憂也今北方猶呼疹虐音皆在世間傳本多以  
疹爲疥杜征南亦無解釋徐仙民音介俗儒就爲通



云病疥令人惡寒變而成瘡此臆說也疥癰小疾何足可論寧有患疥轉作瘡乎尚書曰惟影響周禮云土圭測影影朝影夕孟子曰圖影失形莊子云罔兩問影如此等字皆當爲光景之景凡陰景者因光而生故卽謂爲景淮南子呼爲景柱廣雅云畧柱掛景並是也至晉世葛洪字旻音旻傍始加夕音旻於景反而世間輒改治尚書周禮莊孟從葛洪字甚爲失矣太公六韜有天陳地陳人陳雲鳥之陳論語曰衛靈公問陳於孔子左傳爲魚麗之陳俗本多作阜傍



車乘之車按諸陳字並作陳鄭之陳夫行陳之義取於陳列耳此六書爲假借也蒼雅及近世字書皆無別字唯王羲之小學章獨阜傍作車縱復俗行不宜追改六韜論語左傳也詩云黃鳥于飛集於灌木傳云灌木叢木也此乃爾雅之文故李巡注曰木叢生曰灌爾雅末章又云木族生爲灌族亦叢聚也所以江南詩古本皆爲藁聚之藁而古叢字似藁字近世儒生因改爲藁解云木之最高長者案衆家爾雅及解詩無言此者唯周續之毛詩注音爲徂會反劉昌



宗詩注音爲在公反又祖會反皆爲穿鑿失爾雅訓也也是語已及助句之辭文籍備有之矣河北經傳悉畧此字其間字有不可得無者至如伯也執爰於旅也語同也屢空風風也教也及詩傳云不戢戢也不儼儼也不多多也如斯之類儻創此文頗成廢閑詩言青青子衿傳曰青衿青領也學子之服按古者斜領下連於衿故謂領爲衿孫炎郭璞注爾雅曹大家注烈女傳並云衿交領也鄴下詩本旣無也字群儒因謬說云青衿青領是衣兩處之名皆以青爲

飾用釋青青二字其失大矣又有俗學聞經傳中時  
須也字輒以意加之每不得所益誠可笑易有蜀  
才注江南學士遂不知是何人王儉四部目錄不言  
姓名題云王弼後人謝吳夏侯該並讀數千卷書皆  
疑是譙周而李蜀書一名漢之書云姓范名長生自  
稱蜀才南方以晉渡江後北間傳記皆名爲僞書不  
貴省讀故不見也禮王制云羸股肱鄭注云謂擗

衣出其臂脰今書皆作擗甲之擗國子博士平該云  
擗當作擗音宣擗是穿著之名非出臂之義案字林



蕭讀是徐爰音患非也 漢書田肯賀上江南本皆

作省字沛國劉顯博覽經籍偏精班漢梁代謂之漢  
聖顯子臻不墜家業讀班史呼爲田肯梁元帝嘗問  
之荅曰此無義可求但臣家舊本以雌黃改省字爲  
肯元帝無以難之吾至江北見本爲肯 漢書王莽  
贊云紫色蛙聲餘分閏位蓋謂非乎黃之色不中律  
呂之音也近有學士名問甚高遂云王莽非直鳶鵠  
虎視復紫色蛙聲亦爲誤矣 簡策字竹下施束  
反末代隸書似杞宋之宋亦有竹下遂爲夾者猶如



刺字之傍應爲束今亦作夾徐仙民春秋禮音遂以  
策爲正字以策爲音殊爲顛倒史記又作悉字誤而  
爲述作姤字誤而爲姤徐鄒皆以悉字音述以姤  
字音姤旣爾亦可以亥爲豕字音以帝爲虎字音乎  
張揖云宓今伏羲氏也孟康漢書古文注亦云宓  
今伏而皇甫謐云伏羲或謂之宓羲按諸經史緯候  
遂無宓羲之號虛字從虎音呼宓字從冥音綿下俱爲宓  
末世傳寫遂誤以虛爲宓而帝王世紀因誤更立名  
耳何以驗之孔子弟子處子賤爲單父宰卽處羲之



後俗字亦爲宓或復加山今兗州永昌郡城舊置  
地也東門有子賤碑漢世所立乃云濟南伏生卽子  
賤之後是知處之與伏古來通字誤以爲宓較可知  
矣太史公記曰寧爲鷄口無爲牛後此是刪戰國  
策耳按延篤戰國策音義曰尸雞中之主從牛子然  
則口當爲尸後當爲從俗寫誤也應劭風俗通云  
太史公記高漸離變名易姓爲人庸保匿作於宋子  
久之作苦聞其家堂上有客擊筑伎癢不能無出言  
案伎癢者懷其伎而腹癢也是以潘岳射雉賦亦云



從心煩而伎癢。今史記並作徘徊。或作徬徨。不能無  
出言。是爲俗傳寫誤爾。太史公論英布曰。禍之興  
自愛姬。生於妬媚。以至滅國。又漢書外戚傳亦云。成  
結寵妾妬媚之誅。此二媚並當作娟。娟亦妬也。義見  
禮記三蒼。且五宗世家亦云。常山憲王后妬娟。王充  
論衡云。妬夫妬婦。生則忿怒鬭訟。益知娟是妬之別  
名。原英布之誅。爲意責赫耳。不得言娟。史記始皇  
本紀二十八年。丞相隗林。丞相王綰等議於海上。諸  
本皆作山林之林。開皇二年五月。長安民掘得秦詩。



鐵稱權旁有銅塗鐫銘二所其一所曰廿六年皇帝  
盡并兼天下諸侯黔首大安立號爲皇帝乃詔丞相  
狀縮法度量剗不賣歉疑者皆賣明之凡四十字其  
一所曰元年制詔丞相斯去疾法度量盡始皇帝爲  
之皆刻辭焉今襲號而刻辭不稱始皇帝其於久遠  
也如後嗣爲之者不稱成功盛德刻此詔於左使毋  
疑凡五十八字一字磨滅見有五十七字了了分明  
其書兼爲古隸余被勅寫讀之與內史令李德林對  
見此稱權今在官庫其丞相狀字乃爲狀貌之狀



旁作犬則知俗作隗林非也當爲隗狀耳 漢書云

中外禊福字當從示禊安也音匙七之匙義見蒼雅

方言河北學士皆云如此而江南書本多誤從手屬

文者對耦並爲提挈之意恐爲誤 或問漢書注爲

元后父名禁改禁中爲省中何故以省代禁荅曰案

周禮宮正掌王宮之戒令糾禁鄭注云糾猶割也祭

也李登云省祭也張揖云省今省省也然則小井所

領二反並得訓察其處旣常有禁衛省察故以省代

禁省古察字也 漢明帝紀爲臣姓小侯立學校桓



帝加元服又賜四姓及梁鄧小侯帛是知皆外戚也  
明帝時外戚有樊氏郭氏陰氏馬氏爲四姓謂之小  
侯者或以年小獲封故湏立學耳或以侍祠狼朝侯  
非列侯故曰小侯禮云庶方小侯則其義也後漢

書云鵜雀銜三鰓音善魚多假借爲鰓鮪之鰓俗之學

士因謂之爲鰓魚案魏武四時食制鰓魚大如五斗  
匱長一丈郭璞注爾雅鰓長二丈安有鵜雀能勝一  
者况三頭乎鰓又純灰色無文章也鰓魚長者不過  
三尺大者不過三指黃地黑文故都講云蛇鰓卿大

夫服之象也。續漢書及搜神記小說此事皆作鰾字。孫卿云魚鰾鰾鰾。及韓非說苑皆曰鰾似蛇。蚕似蠋。並作鰾字。假鰾爲鰾。其來久矣。後漢書酷吏樊曄爲天水郡守。涼州爲之歌曰。寧見乳虎穴。不入犂城寺。而江南書本穴皆誤作六。學士因循迷而不寐。夫虎豹穴居。事之較者。所以班超云。不探虎穴。安得虎子。寧當論其六七乎。後漢書楊由傳云。風吹削腕。此是削札牘之柿耳。古者書誤則削之。故左傳云。削而拔之是也。或卽謂札爲削。王褒童約曰。書削代牘。



蕪竟書云昔以靡。研編削之才皆其證也。詩云伐木  
泔泔。毛詩云泔泔柿貌也。史家假借爲肝肺字。俗本  
悉作脯腊之脯。或爲反哺之哺。學士因解云削哺是  
屏障之名。旣無證據。亦爲妄矣。此是風角占候耳。風  
角書曰庶人風者。拂地揚塵轉削。若是屏障。何由可  
轉也。三輔決錄云。前隊大夫范仲公。鹽豉蒜果共  
一甯果。當作魏顥之顥。北士通呼物一由改爲一顆。  
蒜顥是俗間常語耳。故陳思王鷄雀賦曰。頭如果蒜。  
目似花椒。又道經云。合口誦經聲。瓊瓊眼中淚出珠。



子碑其字雖異其音與義頗同。江南但呼爲蒜符。不知謂爲顗。學士相承讀爲裹結之裹。言鹽與蒜共苞。一裹內箇中耳。正史削繁音義又音蒜。顗爲苦戈反。皆失也。有人訪吾曰。魏志蔣濟上書云。弊効之民。

何字也。余應之曰。意爲効卽是敝倦之敝耳。

要用字苑云敝

音九僞反字見廣雅及陳思王集也

張揖呂忱並云支傍作刀劍之刀。

亦是刮字。不知蔣氏自造支傍作筋力之力。或借刮。

字終當音九僞反。

晉中興書太山羊曼常頽縱任。

俠飲酒誕節。兖州號爲豁伯。此字更無音訓。梁孝元。



帝嘗謂吾曰、由來不識、唯張簡憲見教、呼爲嬰美之  
謎、自爾便遵承之、亦不知所出、簡憲是湘州刺史、張  
贊謚也、江南號爲碩學、案法盛世代殊、近當是耆老  
爲俗間、又有蹢蹢語、蓋無所不施、無所不容之意  
也、顧野王玉篇誤爲黑傍、耆、顧雖博物、猶出簡憲、孝  
元之下、而二人皆云重邊、吾所見數本並無作黑者、  
重耆是多饒積厚之意、從黑更無義、耆、古樂府歌  
詞、先述三子、次及三婦、婦是對舅姑之稱、其末章云  
丈人且安坐、調絃未遽央、古者子婦供事舅姑、旦夕



在側與兒女無異故有此言。丈人亦長老之目。今世俗猶呼其祖考爲先亡丈人。又疑丈當作大。北間風俗婦呼舅爲大人公。丈之與大易爲誤耳。近代文士頗作三婦詩。乃爲匹嫡並耦已之羣妻之意。又加鄭衛之辭。大雅君子何其謬乎。古樂府歌百里奚詞曰。百里奚。五羊皮。憶別時。烹伏雌。吹扃扃。今日富貴。忘我爲吹。當作炊。煮之炊。案蔡邕月令章句曰。鍵關。鍵也。所。止扉。或謂之剡移。然則當時貧困。并以門。通俗文世。



題云河南服虔字子慎造、虔既是漢人、其叔乃引蘇林張揖、蘓張皆是魏人、且鄭玄以前、全不解反語、通俗反音、甚爲近俗、阮孝緒又云、李虔所造、河北此書、家藏一本、遂無作李虔者、晉中經簿及七志並無其目、竟不得知誰制、然其文義允愜、實是高才、殷仲堪常用字訓、亦引服虔俗說、今復無此書、未知卽是通俗文爲當有異、近代或更有服虔乎、不能明也、或問山海經、夏禹及益所記、而有長沙零陵、桂陽諸暨、如此郡縣不少、以爲何也、荅曰、史之闕文、爲日久矣、



加復秦人滅學董卓焚書典籍錯亂非止於此譬猶  
本草神農所述而有豫章朱崖趙國常山奉高真定  
臨淄馬翊等郡縣名出諸藥物爾雅周公所作而云  
張仲孝友仲尼脩春秋而經書孔丘卒世本左丘明  
所書此說出皇甫謐帝王世紀而有燕王喜漢高祖汲冢璣語乃  
載秦望碑蒼頡篇李斯所造而云漢兼天下海內并  
側豨黥韓覆畔討滅殘列仙傳劉向所造而贊云七  
十四人出佛經列女傳亦向所造其子歆又作頌終  
于趙悍后而傳有更始韓夫人明德馬后及梁夫人



嬖皆由後人所羈非本又也。或問曰東宮舊事何以呼鴟尾爲祠尾荅曰張敞者吳人不堪稱古隨宜記注遂鄉俗訛謬造作書字耳吳人呼祠祀爲鴟祀故以祠代鴟呼紺爲禁故以系旁作禁代紺字呼盞爲竹簡反故以木傍作展以代盞字呼鑊字爲霍字故以金傍作霍代鑊字又金傍作患爲鑲字木傍作鬼爲槐字火傍作庶爲炙字旣下作毛爲髻字金花則金傍作華窓扇則木傍作扇諸如此類專輒不以又問東宮舊事六色罽纈是何等物當作何音荅曰



按說文云菰牛藻也讀若威音隱塢瑰反卽陸機所謂聚藻葉如蓬者也郭璞注三蒼亦云蘊藻之類也細葉蓬茸生然今水中有此物一節長數寸細茸如絲圓繞可愛長者二三十節猶呼爲菰又寸斷五色絲橫著線股間繩之以象菰草用以飭物卽名爲菰于時當紺六色罽作此菰以飾緹帶張敞因造絲旁畏耳宜作隈栢人城東北有一孤山古書無載者唯闕駟十三州志以爲舜納于大麓卽謂此山其上今猶有堯祠焉世俗或呼爲宜務山或呼爲虛無山



莫知所出趙郡士族有李穆叔季節兄弟李普濟亦  
爲學問、並不能定鄉邑、此山余嘗爲趙州佐、其太原  
王邵讀栢人城西門內碑、碑是漢桓帝時栢人縣民、  
爲縣令徐整所立、銘云、土有囓務山、王喬所仙、方知  
此囓務山也、囓字遂無所出、務字依諸子書、卽旄正  
之旄也、旄字字林一音亡付反、今依附俗名當音權  
務耳、入鄴爲魏收說之、收大嘉歎、值其爲趙州莊嚴  
寺碑、銘曰權務之精、卽用此也、或問一夜何故五  
更、更何所訓、荅曰、漢魏以來、謂爲甲夜乙夜丙夜丁



夜戌夜又云鼓一鼓二鼓三鼓四鼓五鼓亦云一更  
二更三更四更五更皆以五爲節西都賦亦云衛以  
嚴更之署所以爾者假令正月建寅斗柄夕則指寅  
曉則指午矣自寅至午凡歷五辰冬夏之月雖復長  
短參差然辰間遼闊盈不至六縮不至四進退常在  
五者之間更歷也經也故曰五更爾爾雅云朮山  
薊也郭璞注云今朮似薊而生山中案朮葉其體似  
薊近世文士遂讀薊爲筋肉之筋以耦地骨用之恐  
失其義或問俗名傀儡子爲郭禿有故實乎荅曰



風俗通云諸郭皆諱禿當是前代人有姓郭而病禿者滑稽戲調故後人爲其象呼爲郭禿猶文康象庾亮耳。或問曰何故名治獄叅軍爲長流乎答曰帝

王世紀云帝少昊崩其神降于長流之山

此事本出山海經流

作於祀主秋

此說本於月令

按周禮秋官司寇主刑罰長流

之職漢魏諸賊掾耳晉宋以來始爲叅軍上屬司寇

故取秋帝所居爲嘉名焉

客有難主人曰今之經

典子皆謂非說文所言子皆云是然則許慎勝孔子乎士人撫掌大笑應之曰今之經典皆孔子手迹耶



客曰、今之說文、皆許慎手迹乎、荅曰、許慎檢以六文、貫以部分、使不得誤、誤則覺之、孔子存其義而不論其文也、先儒尚得臨文從意、何況書寫流傳、耶必如左傳止戈爲武、反正爲乏、皿蟲爲蠱、亥有二首六身之類、後人自不得輒改也、安敢以說文校其是非哉、且余亦不專以說文爲是也、其有援引經傳與今乖者、未之敢從、又相如封禪書曰、導一莖六穗於庖、犧雙觥共抵之獸、此導訓、擇光武詔云、非徒有豫養導擇之勞是也、而說文云、導是禾名、引封禪書爲證、



無妨自當有禾名導非相如所用也禾一莖六穗於  
庖豈成文乎縱使相如天才鄙拙強爲此語則下句  
當云麟雙觝共抵之獸不得云犧也吾嘗笑許純儻  
不達文章之體如此之流不足憑信大抵服其爲書  
彙括有條例剖析窮根源鄭氏注書往往引其爲證  
若不信其說則冥冥不知一點一畫有何意焉世間  
小學者不通古今必依小篆是正書記凡爾雅三蒼  
說文豈能悉得蒼頡本指哉亦是隨代損益各有同  
異西晉已往字書何可全非但令體例成就不爲專



輒耳。考校是非，特須消息。至如仲尼居三字之中，兩字非體。三蒼尼旁益丂，說文居下施几，如此之類，何由可從？古無二字，又多假借，以中爲仲，以說爲悅，以召爲邵，以間爲閑，如此之徒，亦不勞改，自有訛謬。過成鄙俗，亂旁爲舌，揖右無口，鼃鼃從龜，奮奪從藿，音席中加帶，惡上安西，鼓外設皮，鑿頭生毀，離則配馬，壑乃施豁，巫混經旁，臯分澤片，獺化爲獾，音葛獸名出山海經

寵變成寵

寵音郎動反凡也故從穴

業左益

靈底著器，率字自

有律音，強改爲別，單字自有善音，輒析成異，如此之



類不可不治。吾昔初看說文，雖薄世字，從正則懼，人不識。隨俗則意嫌其非，畧是不得下筆也。所見漸廣，更知通變，救前之執，將欲半焉。若文章著述，猶擇微相影響者行之。官曹文書，世間尺牘，幸不違俗也。案彌亘字從二間舟，詩云亘之秬秠是也。今之隸書，轉舟爲日，而何法盛中興書，乃以舟在二間爲舟航字，謬也。春秋說以人十四心爲德，詩說以二在天下爲西。漢書以貨泉爲白水，真人新論以金昆爲銀。國志以天上有口爲吳，晉書以黃頭小人爲恭，宋書以召



力爲劬。叅同契以人負告爲造。如此之例。蓋數術謬語假借依附。雜以戲笑耳。如猶轉貢字爲項。以叱爲七。安可用此定文字音讀乎。潘陸諸子。離合詩賦。棧卜破字經。及鮑昭謚字。皆取會流俗。不足以形聲論之也。河間邢芳語吾云。賈誼傳云。日中必焚。注。焚暴也。曾見人解云。此是暴疾之意。正言日中不須火。卒然便易耳。此釋爲當乎。吾謂邢曰。此語本出太公六韜。案字書古者暴曬字與暴疾字相似。唯下少異。後人專輒加傍日耳。言日中時必須暴曬。不爾者失。



其時也。管灼已有詳釋，芳笑服而退。

### 音辭篇第十八

夫九州之人言語不同，生民已來，固常然矣。自春秋標齊言之，傳離騷目楚詞之經，此蓋其較明之初也。後有揚雄著方言，其書大備，然皆考名物之同異，不顯聲讀之是非也。逮鄭元注六經，高誘解呂覽淮南，許慎造說文，劉熹製釋名，始有譬况假借以證音字耳。而古語與今殊別，其間輕重清濁猶未可曉。加以外言內言，急言徐言，讀若之類，益使人疑。孫叔言創



爾雅音義是漢求人獨知反語。至於魏世，此事大行。高貴鄉公不解反語，以爲怪異。自茲厥後，音韻鋒出，各有土風，遞相非笑。指馬之論，未知孰是。其以帝王都邑，叅校方俗，考覈古今，爲之折衷權而量之，獨金陵與洛下耳。南方水土和柔，其音清舉而切詣。失在浮淺，其辭多鄙俗。北方山川深厚，其音沉濁而鉅鈍。得其質直，其辭多古語。然冠冕君子，南方爲優，閭里小人，北方爲愈。易服而與之談，南方士庶數言可辯，隔垣而聽其語，北方朝野終日難分。而南染吳越，北



雜夷虜。皆有深弊。不可具論。其謬失輕微者。則南人以錢爲涎。以石爲射。以賤爲美。以是爲砥。北人以廢爲戍。以如爲儒。以紫爲姊。以洽爲狎。如此之例。兩失甚多。至鄴已來。唯見崔子約。崔瞻叔姪。李祖仁。李蔚兄弟。頗事言詞。少爲切正。李季節著音韻決疑。時有錯失。陽休之造切韻。殊爲疎野。吾見兒女。雖在孩稚。便漸督正之。一言訛替。以爲已罪矣。云爲品物。未可書記者。不敢輒名。汝曹所知也。古今言語。時俗不同。著述之人。楚夏各異。蒼頡訓詁。反脾爲逋。賣反。娃爲



於乖戰國策音刎爲免穆天子傳音諫爲間說文音  
戛爲棘讀皿爲猛字林音看爲口甘反音伸爲辛韻  
集以成仍宏登合成兩韻爲奇益石分作四章李登  
聲類以系音羿劉昌宗周官音讀乘若承此例甚廣  
必須考校前世反語又多不切徐仙民毛詩音反驟  
爲在遘左傳音切椽爲徒緣不可依信亦爲衆矣今  
之學士語亦不正古獨何人必應隨其訛僻乎通俗  
文曰人室求日搜反爲兄侯然則兄當音所榮反今  
北俗通行此音亦古語之不可用者與璠魯之寶玉



富音餘煩江南皆音藩屏之藩岐山當音爲奇江南  
皆呼爲神祇之祇江陵陷沒此音被於關中不知二  
者何所承案以吾淺學未之前聞也北人之音多以  
舉莒爲矩唯李季節云齊桓公與管仲於臺上謀伐  
莒東郭牙望桓公口開而不閉故知所言者莒也然  
則莒矩必不同呼此爲知音矣夫物體自有精麤精  
麤謂之好惡人心有所去取去取謂之好惡上呼號下鳥故  
反此音見於葛洪徐邈而河北學士讀尚書云好呼號  
反生惡殺於谷反是爲一論物體一就人情殊不通矣



甫者，男子之美稱。古書多假借爲父字。北人遂無一

人呼爲甫者，亦所未喻。唯管仲、范增之號，須依字讀

耳。

管仲號仲父，范增號亞父。

案諸字書，焉字鳥名，或云語詞，皆

音於愆反。自葛洪要用字苑，分焉字音訓。若訓何訓

安，當音於愆反。於焉逍遙於焉嘉客，焉用佞焉得仁，

之類是也。若送句及助詞，當音矣。愆反，故稱龍焉，故

稱血焉，有民人焉，有社稷焉，託始焉爾。晉鄭焉依之，

類是也。江南至今行此分別，昭然易曉。而河北混同

一音，雖依古讀，不可行於今也。邪者音耶未定之詞，左



傳曰不知天之棄魯邪。抑魯君有罪於鬼神邪。莊子云天邪地邪。漢書云是邪非邪。之類是也。而北人卽呼爲也字。亦爲誤矣。難者曰繫辭云乾坤易之門戶邪。此又未爲定辭乎。荅曰何爲不爾。上先標問。下方刻德以折之耳。江南學士讀左傳口相傳述。自爲凡例。軍自敗曰敗。打破人軍曰敗。補敗反諸記傳未見補敗反。徐仙民讀左傳唯一處有此音。又不言自敗敗人之別。此爲穿鑿耳。古人云膏梁難整。以其爲驕奢自足。不能尅勵也。吾見王侯外戚。語多不正。亦由



內染賤保傳外無賢師友故耳。梁世有一侯。當對元  
帝飲。謔自陳癡鈍。乃成颺段。元帝荅之云。颺異涼風  
段非干木。謂郢州爲永州。元帝啓報簡文。簡文云。庚  
辰吳入。遂成同隸。如此之類。舉口皆然。元帝手教諸  
子侍讀。以此爲誠。河北切攻字爲古琮。與工公功三  
字不同。殊爲僻也。北世有人名邁。自稱爲織。名琨。自  
稱爲亥。名洸。自稱爲汪。名勣。音藥自稱爲鴉。音煉非唯音  
韻舛錯。亦使其兒孫避諱紛紜矣。



真草書迹微須留意江南諺云尺牘書疏千里面目也承晉宋餘俗相與事之故無頓狼狽者吾幼承門業加性愛重所見法書亦多而翫習功夫頗至遂不能佳者良由無分故也然而此藝不須過精夫巧者勞而智者憂常爲人所役使更覺爲累韋仲將遺戒深有以也王逸少風流才士蕭散名人舉世唯知其書翻以能自蔽也蕭子雲每歎曰吾著齊書勒成一典文章宏義自謂可觀唯以筆迹得名亦異事也王褒地胄清華才學優敏後雖入關亦被禮遇猶以



書工崎嶇碑碣之間。辛苦筆硯之役。嘗悔恨曰。假使  
吾不知書。可不至今日邪。以此觀之。慎勿以書自命。  
雖然。厮猥之人。以能書拔擢者多矣。故道不同。不相  
爲謀也。梁氏秘閣散逸以來。吾見二王真草多矣。家  
中嘗得十卷。方知陶隱居。阮交州。蕭祭酒。諸書莫不  
得羲之之體。故是書之源淵。蕭晚節所變。乃是右軍  
年少時法也。晉宋以來。多能書者。故其時俗遞相染  
尚。所有部帙。楷正可觀。不無俗字。非爲大損。至梁天  
監之間。斯風未變。大同之末。訛替滋生。蕭子雲改易



字體邵陵王頗行僞字。前上爲草，能傍作長之類是也。朝野翕然以爲楷式，畫虎不成，多所傷敗。至爲二字，唯見數點。或妄斟酌，遂便轉移。爾後墳籍畧不可看。北朝喪亂之餘，書迹鄙陋，加以專輒造字，猥拙甚於江南。乃以百念爲憂，言反爲變，不用爲罷，追來爲歸，更生爲蘇。先人爲老，如此非一。徧滿經傳，唯有姚元標工於楷隸，留心小學。後生師之者衆，洎于齊末，祕書繕寫，賢於往日多矣。江南閭里間有畫書賦，此乃陶隱居弟子杜道士所爲，其人未甚識字，輕爲就



則托名貴師、世俗傳信、後生頗爲所誤也。一畫繪之工、亦爲妙矣。自古名士多或能之。吾家常有梁元帝手書、蟬雀白團扇及馬圖、亦難及也。武烈太子偏能寫真、坐上賓客隨宜點染、卽成數人。以問童孺、皆知姓名矣。蕭賁、劉孝先、劉靈並文學已外、復佳此法。翫閱古今、特可寶愛。若官未通顯、每被公私使人、亦爲猥役。吳郡顧士端、出身湘東國侍郎、後爲鎮南府刑獄叅軍、有子曰庭、西朝中書舍人、父子並有琴書之藝、尤妙丹青、常被元帝所使、每懷羞恨。彭城劉岳、索



之子也。仕爲驃騎府管記平氏縣令。才學快士而書  
絕倫。後隨武陵王入蜀。下半之收。遂爲陸護軍畫支  
江寺壁。與諸工巧雜處。向使三賢都不曉畫。直運素  
業。豈見此耻乎。弧矢之利。以威天下。先王所以觀  
德擇賢。亦濟身之急務也。江南爲世之常射。以爲兵  
射。冠冕儒生。多不習此。別有博射。弱弓長箭。施於準  
的。揖讓升降。以行禮焉。防禦寇難。了無所益。亂離之  
後。此術遂亡。河北文士。率曉兵射。非直葛洪一箭已  
解。追兵三九譏集。常縻榮賜。雖然。要輕禽。截狡獸。不



願汝輩爲之。

卜筮者聖人之業也。但近世無復佳

師多不能中。古者卜以決疑。今人生疑於卜。何者守

道信謀。欲行一事。卜得惡卦。反令忒忒。

音救。惕也。

此之謂

乎。且十中六七以爲上手。粗知大意。又不委曲。凡射

奇偶自然。半收何足賴也。世傳云。解陰陽者爲鬼所

嫉。坎壈貧窮。多不通泰。吾觀近古以來。尤精妙者。唯

京房。管輅。郭璞耳。皆無官位。多或罹災。此言令人益

信。儻值世網嚴密。強負此名。便有註誤。亦禍源也。及

星文風氣。率不勞爲之。吾嘗學六壬式。亦值世間好



聚得龍首金匱玉燹玉歷十許種書討求無驗尋  
亦悔罷。凡陰陽之術與天地俱生其吉凶德刑不可  
不信。但去聖既遠世傳術書皆出流俗言辭鄙淺驗  
必妄多。至如反支不行竟以遇害歸忌寄宿不免凶  
終拘而多忌亦無益也。算術亦是六藝要事自古  
儒士論天道定律歷者皆學通之。然可以兼明不可  
以專業。江南此學殊少唯范陽祖暅精之位至南康  
太守河北多曉此術。暅音豆醫方之事取妙極難不  
勸汝曹以自命也。微解藥性小小和合居家得以救



急亦爲勝事。皇甫謐殷仲堪則其人也。禮曰君子無故不徹琴瑟。古來名士多所愛好。洎於梁初衣冠子孫不知琴者。號有所闕。大同以來斯風頓盡。然而此樂情情雅致。有深味哉。今世曲解雖變於古。猶足以暢神情也。唯不可令有稱譽。見役勲貴處之下坐。以取殘杯冷炙之辱。戴安道猶遭之。况爾曹乎。家語曰君子不博爲其兼行惡道故也。論語云不有博奕者乎。爲之猶賢乎已。然則聖人不用博奕爲教。但以學者不可常精。時有疲倦。則儻爲之。猶勝飽食昏



矐兀然端坐耳。至如吳太子以爲無益。命韋昭論之。  
王肅、葛洪、陶侃之徒。不許目觀。手執此並勤篤之志。  
也能爾爲佳。古爲大博則六著。小博則二炁。今無曉  
者。比世所行一炁十二碁。數術淺短。不足可翫。圍碁  
有手談坐隱之目。頗爲雅戲。但令人耽憤廢喪實多。  
不可常也。投壺之禮。近世愈精。古者實以小豆爲  
其矢之躍也。今則唯欲其驍。益多益喜。乃有倚竿帶  
劍。狼壺豹尾。龍首之名。其尤妙者。有蓮花驍。汝南周  
璜、宏正之子。會稽賀徽、賀革之子。並能一箭四十餘



驍賀又嘗爲小障置壺其外。隔障投之。無所失也。至鄴以來。亦見廣寧蘭陵諸王。有此校具。舉國遂無投得一驍者。彈碁亦近世雅戲。消愁釋憤。時可爲之。

終制篇第二十

死者人之常分。不可免也。吾年十九。值梁家喪亂。其間與白刃爲伍者。亦常數輩。幸承餘福。得至於今。古人云。五十不爲夭。吾已六十餘。故心坦然。不以殘年爲念。先有風氣之疾。常疑奄然。聊書素懷。以爲汝誠。先君先夫人皆未還建鄴舊山。旅葬江陵東郭。承聖



啓求揚都欲營遷厝蒙詔賜銀百兩已於揚州小  
郊北地燒磚使值本朝淪沒流離如此數十年間絕  
於還望今雖混一家道罄窮何由辦此奉營資費且  
揚都汙無復孑遺還被下濕未爲得計自咎自責  
貫心刻髓計吾兄弟不當仕進但以門衰骨肉單弱  
五服之內傍無一人播越他鄉無復資蔭使汝等沉  
淪廝役以爲先世之耻故覲冒人間不敢墜失兼以  
北方政教嚴切全無隱退者故也今年老疾侵儻然  
奄忽豈求備禮乎一日放臂沐浴而已不勞復鳧殮



以常衣。先夫人棄背之時。屬世荒饑。家塗空迫。兄弟  
幼弱。棺器率薄。藏內無磚。吾當松棺二寸。衣帽已外。  
一不得自隨。床上唯施七星板。至如蠟髹牙玉豚錫  
人之屬。並須停省。糧器明器。故不得營。碑誌旒旌。彌  
在言外。載以鰲甲車。襯土而下。平地無墳。若懼拜掃。  
不知兆域。當築一堵。低墻於左右前後。隨爲私記。靈  
筵勿設枕几。朔望祥禪。唯下白粥清水乾棗。不得有  
酒肉餅果之祭。親友來餽。酌者一皆拒之。汝曹若違。  
吾心有加。先妣則陷父不孝。在汝安平其內典功德。



隨力所至。勿剗竭生資使凍餒也。四時祭祀周孔所  
教。欲人勿死其親。不忘孝道也。求諸內典則無益焉。  
殺生爲之。翻增罪累。若報罔極之德。霜露之悲。有時  
齋供及盡忠信。不辱其親。所望於汝也。孔子之葬親  
也。云古者墓而不墳。正東西南北之人也。不可以弗  
識也。於是封之崇四尺。然則君子應世行道。亦有不  
守墳墓之時。況爲事際所逼也。吾今羈旅身若浮雲。  
竟未知何鄉是吾墓地。唯當氣絕便埋之耳。汝曹宜  
以傳業揚名爲務。不可顧戀朽壤。以取湮沒也。






右顏氏家訓上下二卷隋志文獻通考俱作七卷  
晁氏云北齊顏之推撰之推本梁人著此二十篇  
述立身治家之法辨正時俗之訛以訓子弟陳氏  
云古今家訓以此爲祖然其書頗崇尙釋氏所云  
崇尙釋氏者蓋指其中歸心篇而言又終制篇有  
內典功德及齋供等語皆此志也而隋志及通考  
皆人儒家以今觀之蓋通儒墨爲一道亦諸子家  
也叢書原本編人載籍似爲失之今訂正汝上王

謨識

[illegible]





























72  
2411  
113  
467  
叅同契序

夫道一而已矣而言道者大宗三曰  
羲文曰黃曰老易言天契人老言人  
契天陰符言天人之契合自仲尼繫  
生生存存而易未嘗非元自莊周寓  
南溟北溟而元未嘗不易易元之交



符在焉古未有演其宗以一故伯陽  
真人紹十翼七篇而契作其文著明  
八卦三才密藏發機陰陽相勝食時  
合符之自然微而喻詳而妙契一符  
也同兩合也叅三易化也於經三宗  
於造化三極於身三物三寶化得合



合得符符乃一得一道畢故謂易有  
太極契行而其後方術之家奉于禘  
祖大宗師然而多不得其解以支傍  
流遁何道爲天下裂也夫道一而已  
而易之宗傳牽于理筮人執于數符  
之宗詭於兵淫於房老之宗假於術

引於法衍於符籙何者聖人以道之  
不可言往往因象傳理迹事章化寄  
名宏法故莊曰弔詭曰寓言曰絜其  
知者旦暮遇之不知者無蝕吾道已  
矣而後人緣不知以希神泥事象以  
証真執名以習道不大鑿乎嗚呼安



在於名非名有畫而無字乎故自周  
易道德以下皆寓也筏筌也假以入  
而非其所以入又況執其入而岐之  
魚將終不得河將終不渡沉一生於  
情波慾海沒不出爾矣而瞽然命曰  
是道是契是易將眩之安息而市之

海夢之化城果且真乎哉非耶夫曰  
周易參同契同契易也易自宓義後  
有三連山歸藏周易寅統人用其交  
止作始丑統地用其合歸育元子統  
天用其復周環而化三義承循三才  
運周周而易備矣上古之人樸用先



天無爲中古之人澆用後天有以合  
無爲入無爲周于天之元而生於人  
之復生生不息則叅符以契人何一  
息不在易中哉故人天地之德陰陽  
之交函一麗兩苞內落外而方士左  
道動援契入彼家又岐外事至命曰

煉已煉彼煉外曰叅同嗚呼賊先聖  
之道此說也裊天下萬世之爲道此  
說也彼索其牝牡汞鉛交構烹煉而  
不得則假而物於象然則易之男女  
老之母子將皆物與長春入道二十  
年始讀契厭其有象求之無已証無



而知有象一無象也然後知契出于  
符而參于易後世言道亦用易十二  
卦止爾攢歲月日時用有而脩之不  
知四象應四正八卦從八風六陰六  
陽消長爲一月先後天交錯爲十二  
令中而星紀之爲二十四氣通八卦

之變而爲三百六十日二陸三道登  
沒繩鉤時而周符自然也乃易未嘗  
不契人有人不契耳故曰動靜休息  
常與人俱立天之道以定人予十四  
年辟穀十二年絕房十年與天通則  
按易定關按至分候節晦朔弦望晝



夜晨夕時符功行以語人無有信聞  
爲發願欲著道演一合易老符契之  
旨而各通爲一解爲証入歲異未敢  
下今從直指鄭寰樞公談道山中點  
校是編以就正鄭君喜之因索序付  
梓云九洞天符道人朱長春撰

神靈之靈天引與人走領春陽

神靈之靈天引與人走領春陽

神靈之靈天引與人走領春陽

神靈之靈天引與人走領春陽

神靈之靈天引與人走領春陽

神靈之靈天引與人走領春陽



乾坤設位章

日月懸象章

聖人上觀章

君臣御政章

煉已立基章

明知兩竅章

明辨邪正章

龍虎兩弦章

真

目録

金返歸性章

二土全功章

同類合體章

三聖前識章

金丹刀圭章

水火性情章

陽神精氣章

子居室章

晦朔合符章



爻象功用章

養性立命章

二氣感化章

關捷三寶章

傍門無功章

流珠金華章

如審遭逢章

姤女黃芽章

男女相胥章



四者混沌章

卯酉刑德章

君子好述章

聖賢伏煉章

法象成功章

鼎器妙用章

補塞遺脫章

自做啟後章

目錄終



參同契

漢 魏伯陽著 一宜黃羅以豐校

乾坤者易之門戶衆卦之父母坎離匡廓運轂正幅  
牝牡四卦以爲橐籥覆育陰陽之道猶工御者準繩  
墨執術轡正規矩隨軌轍處中以制外數在律歷紀  
月節有五六經緯奉日使兼并爲六十剛柔爲表  
朔旦屯直事至暮蒙當受晝夜各一卦用之依次序  
旣未至晦爽終則復更始日辰爲期度動靜有早晚  
春夏據內體從子到辰巳秋冬當外用自午訖戌亥

賞罰應春秋昏明順寒暑爻辭有仁義隨時發喜怒  
如是應四時五行得其理

乾坤設位章第一

天地設位而易行乎中矣。天地者乾坤之象也。故位  
者列陰陽配合之位也。易謂坎離。坎離者乾坤二用  
二用無爻位。周流行六虛。往來既不定。上下亦無常。  
幽潛淪匿。變化于中。包囊萬物。爲道紀綱。以無制有。  
器用者空。故推消息。坎離沒亡。言不苟造。論不虛生。  
引驗見效。按度神明。推類結字。原理爲證。坎戊月精。



離已日光日月爲易剛柔相當土旺四季羅絡始終  
青赤黑白各居一方皆稟中宮戊巳之功

日月懸象章第二

易者象也懸象著明莫大乎日月窮神以知化陽往  
則陰來輻輳而輪轉出入更卷舒易有三百八十四  
爻據爻摘符符謂六十四卦晦至朔旦震來受符當  
斯之際天地媾其精日月相揮持雄陽播元施雌陰  
化黃包混沌相交接權輿樹根基經營養鄴鄂凝神  
以成軀衆夫蹈以出蠕動莫不由



聖人上觀章第三

於是仲尼讚鴻濛。乾坤德洞虛。稽古當元皇。關雎建  
始初。冠婚氣相紐。元年乃芽滋。聖人不虛生。上觀顯  
天符。天符有進退。訕伸以應時。故易統天心。復卦建  
始蒙。長子繼父體。因母立兆基。消息應鍾律。升降據  
斗樞。三日出爲爽。震庚受西方。八日兌受下。上弦平  
如繩。十五乾體就。盛滿甲東方。別本作蟾蜍與兔魄  
日月氣雙明。蟾蜍視卦節。兔者吐生光。七八道已訖。  
屈折低下降。十六轉受統。巽辛見平明。艮直于丙南。



下弦二十三。坤乙三十日。東北喪其朋。節盡相輝與。  
繼體復生龍。壬癸配甲乙。乾坤括始終。七八數十五。  
九六亦相應。四者合三十。陽氣索滅藏。八卦布列曜。  
運移不失中。元精眇難視。推度效符証。居則觀其象。  
唯擬其形容。立表以爲範。占候定吉凶。發號順時令。  
勿失爻動時。上察河圖文。下序地形流。中稽於人心。  
叅和考三才。動則循卦節。靜則因彖辭。乾坤周施行。  
天地然後治。

君臣御政章第四

御政之首鼎新革故。

他本缺此句

管括微密。開舒布寶。要

道魁柄。統化綱紐。爰象內動。吉凶外起。五緯錯順。應

時感動。四七乖戾。謠離俯仰。文昌統錄。詰責台輔。百

官有司。各典所部。日合五行精。月受六律紀。五六三

十度。度竟復更始。原始要終。存亡之緒。或君驕佚。亢

滿違道。或臣邪佞。行不順軌。玆望盈縮。乖變凶咎。執

法刺譏。詰過貽主。辰極受正。優游任下。明堂布政。國

無害道。

煉已立基章第五



內以養已。安靜虛無。原本隱明。內照形軀。閉塞其兌。  
築固靈株。三光陸沉。溫養子珠。視之不見。近而易求。  
黃中漸通理。潤澤達肌膚。初正則終脩。幹立末可持。  
一者以掩蔽。世人莫知之。

明知兩竅章第六

上德無爲。不以察求。下德爲之。其用不休。上閉則稱  
有。下閉則稱無。無者以奉上。上有神德居。此兩孔穴  
法。金氣亦相胥。知白守黑。神明自來。白者金精。黑者  
水基。水者道樞。其數名一。陰陽之始。元含黃芽。五金

之王。北方河車。故鉛外黑。內懷金華。被褐懷玉。外爲  
狂夫。金爲水母。母隱子胎。水爲金子。子藏母胞。真人  
至妙。若有若無。髣髴太淵。乍沈乍浮。退而分布。各守  
境隅。採之類白。造之則朱。煉爲表衛。白裏貞居。方圓  
徑寸。混而相居。先天地生。巍巍尊高。旁有垣闕。狀似  
蓬壺。環匝關閉。四通踟躕。守禦密固。闕絕奸邪。曲閣  
相通。以戒不虞。可以無思。難以愁勞。神氣滿室。莫之  
能留。守之者昌。失之者亡。動靜休息。常與人俱。

明辨邪正章第七



是非歷臟法。內觀有所思。履行步斗宿。六甲以日辰。  
陰道厭九。一濁亂弄元胞。食氣鳴腸胃。吐正吸外邪。  
晝夜不寤寐。晦朔未嘗休。身體日疲倦。恍惚狀若癡。  
百脉鼎沸馳。不得清澄居。累土立壇宇。朝暮敬祭祀。  
鬼物見形象。夢寐感慨之。心歡意悅喜。自謂必延期。  
遽以天命死。腐露其形骸。舉錯輒有違。悖逆失樞機。  
諸術甚衆多。千條有萬餘。前却違黃老。曲折異九都。  
明者省厥旨。曠然知所由。勤而行之。夙夜不休。伏食  
三載。作腹輕舉遠遊。跨火不焦。入水不濡。能存能亡。



長樂無憂道成德就。潛伏俟時。太乙乃召。移居中洲。  
功滿上昇。膺籙受圖。

龍虎兩弦章第八

火記不虛作。演易以明之。偃月法鼎爐。白虎爲焚樞。  
汞日爲流珠。青龍與之俱。舉東以合西。魂魄自相拘。  
上弦兌數八。下弦艮亦八。兩弦合其精。乾坤體乃成。  
二八應一斤。易道正不傾。

金返歸性章第九

金入於猛火。色不奪精光。自開闢以來。日月不虧明。



金不失其重。日月形如常。金本從月生。朔旦日受符。  
金返復其母。月晦日相包。隱藏其匡廓。沈淪於洞虛。  
金復其故性。威光鼎乃燿。

二土全功章第十

子午數合三。戊己號稱五。三五既和諧。八石正綱紀。  
呼吸相含育。佇思爲夫婦。黃土金之父。流珠木之子。

作孝  
字非

水以土爲鬼。土鎮水不起。朱雀爲火精。執平調。

勝負水盛火消滅。俱死歸厚土。三性既合會。本性共  
宗祖。巨勝尚延年。還丹可入口。金性不敗朽。故爲萬



物實術士伏食之。

伏作服非

壽命得長久。土游於四季守

界定規矩。金沙入五內。霧散若風雨。薰蒸達四肢。顏色悅懌好。髮白皆變黑。齒落生舊所。老翁復丁壯。老嫗成姍女。改形免世厄。號之曰真人。

同類合體章第十一

胡粉投火中。色壞還爲鉛。冰雪得溫湯。解釋成太虛。金以砂爲主。稟和於水銀。變化出其真。始終自相因。欲作伏食仙。宜以同類者。植禾當以穀。覆雞用其卵。以類輔自然。物成易陶冶。魚目豈爲珠。蓬蒿不成檀。



類同者相從。事乖不成寶。燕雀不生鳳。狐兔不乳馬。  
水流不炎上。火動不潤下。世間名學士。高妙負良材。  
邂逅不遭遇。耗火亡資財。據按依文說。妄以意爲之。  
端緒無因緣。度量失操持。搗治韶石膽。雲母及礬磁。  
硫黃燒豫章。泥汞相煉治。鼓下五石銅。以之爲輔樞。  
雜性不同類。安肯合體居。千舉必萬敗。欲黠反成癡。  
僥倖訖不遇。至人獨知之。稚年至白首。中道生狐疑。  
背道守迷路。出正入邪蹊。管窺不廣見。難以揆方來。

三聖前識章第十二



若夫至聖。不過伏羲。始畫八卦。效法天地。文王帝之。  
宗。結體演爻辭。夫子庶聖。雄十翼以輔之。三君天所。  
挺。迭興更御時。優劣有步驟。功德不相殊。制作有所。  
踵。推度審分銖。有形易忖量。無兆難慮謀。作事令可。  
法。爲世定時書。素無前識資。因師覺悟之。皓若褰帷。  
帳。瞑目登高堂。火記六百篇。所趣等不殊。作不文字

迷非

鄭重說。世人不熟思。尋度其源流。幽明本共居。竊爲。  
賢者談。曷敢輕爲書。若遂結舌瘖。絕道獲罪誅。寫情。  
著竹帛。又恐泄天符。猶豫增嘆息。俛仰綴斯思。陶治。



有法度。未可悉陳敷。略述其綱紀。枝葉見扶疎。

金丹刀圭章第十三

以金爲隄。防水入。乃優游。金計有十五。水數亦如之。臨爐定銖兩。五分水有餘。二者以爲真。金重如本初。其三遂不入。火二與之俱。三物相合受。變化壯若神。下有太陽氣。伏蒸須臾間。先液而後凝。號曰黃輿焉。歲月將欲訖。毀性傷壽年。形體爲灰土。狀若明窻塵。擣治昇合之。持入赤色門。固塞其際會。務令致完堅。炎火張於下。晝夜聲正勤。始文使可修。終竟武乃陳。



候視加謹慎。審察調寒溫。周旋十二節。節盡更須親。  
氣索命將絕。休死亡魄魂。色轉更爲紫。赫然稱還丹。  
粉提以一丸。乃圭最爲神。

水火情性章第十四

推演五行數。較約而不繁。舉水以激火。奄然滅光明。

日月相薄蝕。常在晦朔間。

一云  
朔望

水盛坎侵陽。火衰獨

晝昏陰陽相飲食。交感道自然。名者以定情。字者以  
性言。金來歸性初。乃得稱還丹。吾不敢虛說。倣倣聖  
人文。古記題龍虎。黃帝美金華。淮南煉秋石。玉陽加



黃芽賢者能持行不肖毋與俱古今道猶一對談吐  
所謀學者加勉力畱念深思惟至要言甚露昭昭不  
我欺

陰陽精氣章第十五

乾剛坤柔配合相包陽稟陰受雄雌相須須以造化  
精氣乃舒坎離冠首光耀垂敷元冥難測不可盡圖  
聖人揆度參序元基四者混沌徑入虛無六十卦周  
張布爲輿龍馬就駕明君御時和則隨從路平不邪  
邪道險阻傾危國家

君子居室章第十六

君子居其室。出其言善。則千里之外應之。謂萬乘之主。處九重之室。發號出令。順陰陽節。藏器俟時。勿違卦月。屯以子申。蒙用寅戌。餘六十卦。各自有日。聊陳兩象。未能究悉。立義設刑。當仁施德。逆之者凶。順之者吉。按歷法令。至誠專密。謹候日辰。審察消息。纖芥不正。悔吝爲賊。二至改度。乖錯委曲。隆冬大暑。盛夏霜雪。二分縱橫。不應漏刻。水旱相代。風雨不節。蝗虫湧沸。羣異旁出。天見其殃。山崩地裂。孝子用心。感動



皇極近出已口。速流殊域。或以招禍。或以致福。或興  
太平。或造兵革。四者之來。由于胸臆。動靜有常。奉其  
繩墨。四時順宜。與氣相得。剛柔斷矣。不相涉入。五行  
守界。不妄盈縮。易行周流。屈伸反復。

晦朔合符章第十七

晦朔之間。合符行中。混沌鴻濛。牝牡相從。滋液潤澤。  
施化流通。天地神明。不可度量。利用安身。隱形而藏。  
始於東北。箕斗之鄉。旋而右轉。嘔輪吐明。潛潭見象。  
發散清光。昂畢之上。震出爲徵。陽氣造端。初九潛龍。

陽以三立。陰以八道。三日震動。八日兌行。九二見龍。  
和平有明。三五德就。乾體乃成。九三惕厲。折神符。  
盛衰漸革。終運其初。巽繼其統。固濟操持。九四或躍。  
進退道危。艮主止進。不得踰時。二十三日典守弦期。  
九五飛龍。天位加喜。六五坤承。結括終始。韞養衆子。  
世爲類母。上九亢龍。戰德於野。用九翩翩。爲道規矩。  
陽數已訖。訖則復起。推情合性。轉而相與。循環璇璣。  
升降上下。周流六爻。難可察覩。故無常位。爲易宗祖。



朔旦爲復。陽氣始通。出入無疾。立表微剛。黃鍾建子。  
兆乃滋彰。播施柔暖。黎烝得常。臨爐施條。開路正光。  
光耀漸進。日以益長。丑之大呂。結正低昂。仰以成泰。  
剛柔竝隆。陰陽交接。小往大來。輻輳于寅。運而趨時。  
漸歷大壯。俠列卯門。榆莢墮落。還歸本根。刑德相負。  
晝夜始分。夾陰以退。陽升而前。洗濯羽翮。振索宿塵。  
乾健盛明。廣被四鄰。陽終於巳。中而相于。姤始紀序。  
履霜最先。井底寒泉。午爲蕤賓。賓服於陰。陰爲主人。  
遯去世位。收斂其精。懷德俟時。棲遲昧冥。否塞不通。



萌者不生。陰伸陽屈。沒陽

一作嬰傷

姓名。觀其權量。察仲

秋情。任蓄微稚。老枯復榮。薺麥芽蘖。因冒以生。剝爛

肢體。消滅其形。化氣既竭。亡失至神。道窮則反。歸乎

坤元。恒順地理。承天布宣。元幽遠眖。隔閼相連。應度

育種。陰陽之元。寥廓恍惚。莫知其端。先迷失軌。後爲

主君。無平不陂。道之自然。變易更盛。消息相因。終坤

復始。如循環。帝王承御。千載常存。

養性立命章第十九

將欲養性。延命却期。審思後末。當慮其先。人所稟軀。



體本一無。元精雲布。因氣託初。陰陽爲度。覓鬼所居。  
陽神日覓。陰神月覓。鬼之與鬼。互爲室宅。性主處內。  
立置鄴鄂。情主營外。築垣城郭。城郭完全。人物乃安。  
爰斯之時。情合乾坤。乾動而直。氣布精流。坤靜而翕。  
爲道舍廬。剛施而退。柔化以滋。九還七返。八歸六居。  
男白女赤。金火相拘。則水定火。五行之初。上善若水。  
清而無瑕。道之形象。真一難圖。變而分布。各自獨居。  
類如雞子。白黑相符。縱廣一寸。以爲始初。四肢五臟。  
筋骨乃俱。彌歷十月。脫出其胞。骨弱可卷。肉滑若鉛。

二氣感化章第二十

陽燧以取火非日不生光方諸非星月安能得水漿  
二氣元且遠感化尚相通何況近存身切在於心胸  
陰陽配日月水火爲效徵

關鍵三寶章第二十一

耳目口三寶閉塞勿發通真人潛深淵浮游守規中  
旋曲以視聽開闔皆合同爲已之樞轄動靜不竭窮  
離氣內營衛坎乃不用聰兌合不以談希言順鴻濛  
三者旣關鍵緩體處空房委志歸虛無無念以爲常



證驗以推移。心專不縱橫。寢寐神相抱。覺寤候存亡。  
顏色浸以潤。骨節益堅強。排却衆陰邪。然後立正陽。  
修之不輟休。庶氣雲雨行。淫淫若春澤。液液象解水。  
從頭流達足。究竟復上昇。往來洞無極。沸沸彼谷中。  
反者道之驗。弱者德之柄。耕耘宿污穢。細微得調暢。  
濁者清之路。昏久則昭明。

傍門無功章第二十二

世人好小術。不審道淺深。棄正從邪徑。欲速闕不通。  
猶盲不任杖。聾者聽商宮。沒水捕雉兔。登山索魚龍。



植麥欲獲黍。運規以求方。竭力勞精神。終年無見功。  
欲知伏食法。事約而不繁。

流珠金華章第二十三

太陽流珠。常欲去人。卒得金華。轉而相因。化爲白液。  
凝而至堅。金華先唱。有頃之間。解化爲水。馬齒闌干。  
陽乃往和。情性自然。迫促時陰。拘畜禁門。慈母育養。  
孝子報恩。嚴父施令。教勅子孫。五行錯王。相據以生。  
火性銷金。金伐木榮。三五與一。天地至精。可以口訣。  
難以書傳。子當右轉。午乃東旋。卯酉界隔。主各二名。



龍呼於虎。虎吸龍精。兩相飲食。俱相貪便。遂相啗嚙。  
咀嚼相吞。熒惑守西。太白經天。殺氣所臨。何有不傾。  
狸犬守鼠。鳥雀畏鷗。各得其功。何敢有聲。不得其理。  
難以妄言。竭殫家產。妻子饑貧。自古及今。好者億人。  
訖不諧遇。希有能成。廣求名藥。與道乖殊。

如審遭逢章第二十四

如審遭逢。觀其端緒。以類相況。揆物終始。五行相克。  
更爲父母。母含滋液。父主稟與。凝精流形。金石不朽。  
審專不泄。得爲成道。立竿見影。呼谷傳響。豈不靈哉。

天地至象。若以野葛一寸。巴豆一兩。入喉輒僵。不得  
俛仰。當此之時。周文操箸。孔子占象。扁鵲操鍼。巫咸  
扣鼓。安能令甦。復起馳走。

姤女黃芽章第二十五

河上姤女。靈而最神。得火則飛。不見埃塵。鬼隱龍匿。  
莫知所存。將欲制之。黃芽爲根。物無陰陽。違天背元。  
牝雞自卵。其雛不全。夫何故乎。配合來連。三五不交。  
剛柔離分。施化之精。天地自然。火動炎上。水流潤下。  
非有師道。使其然也。資始統正。不可復改。觀夫雌雄。



交媾之時。剛柔相結而不可解。得其節。聚非有工巧。以制御之。男生而伏。女偃其軀。稟乎胞胎。受氣元初。非徒生時著而見之。及其死也。亦復效之。此非父母教令其然。本在交媾定置始先。

男女相胥章第二十六

坎男爲月。離女爲日。日以耀德。月以智光。月受日化。體不虧傷。陽失其契。陰侵其明。晦朔薄蝕。掩冒相傾。陽消其形。陰陵。火生。男女相胥。含吐以滋。雌雄錯雜。以類相求。金化爲水。水性周章。火化爲土。水不得行。

男動外施。女靜內藏。溢度過節。爲女所拘。慮以鈴鼈。不得淫奢。不寒不暑。進退合時。各得其和。俱吐証符。

四者混沌章第二十七

丹砂木精得金乃并。金水合處。木火爲侶。四者混沌。則爲龍虎。龍陽數奇。虎陰數偶。肝青爲父。肺白爲母。腎黑爲子。離赤爲女。脾黃爲祖。子五行始三物。一家都歸戊巳。

卯酉刑德章第二十八

剛柔迭具。更歷分部。龍西虎東。建緯卯酉。刑德並會。



相見歡。喜刑主伏殺。德主生起。二月榆落。懸臨於野。  
八月麥生。天罡據酉。子南午北。五爲綱紀。一九之數。  
終而復始。含元虛危。播精於子。

君子好逑章第二十九

關關雎鳩。在河之洲。窈窕淑女。君子好逑。雄不獨處。  
雌不孤居。元武龜蛇。蟠糾相扶。以明牝牡意。當相須。  
偃使二女共室。顏色甚姝。蘇秦通言。張儀合媒。發辯。  
利舌。膏舒美辭。推心調諧。合爲夫妻。弊髮腐齒。終不。  
相知。若藥物非種。名類不同。分劑參差。失其綱紀。雖。

黃帝臨爐。太乙執火。八公大煉。淮南調合。立宇崇壇。  
玉爲階陛。麟脯鳳脂。把籙長跪。禱祝神祇。請哀諸鬼。  
沐浴齋戒。冀有所望。亦猶和膠補金。以洎塗瘡。去冷  
加水。除熱用湯。飛龜舞蛇。愈見乖張。

聖賢伏煉章第三十

惟昔聖賢。懷元抱真。伏煉九鼎。化迹隱淪。含精養神。  
通德三光。津液腠理。筋骨緻堅。衆邪辟除。正氣長存。  
累積長久。變形而仙。憂憫後生。好道之倫。隨傍風采。  
指畫古人。著爲圖籍。開示後昆。露見枝條。隱藏本根。



託號諸名覆謬衆文。學者得之蘊匱終身。子繼父業  
孫紹祖先。傳世迷惑。竟無見聞。遂使宦者不仕。農夫  
失耜。商人棄貨。志士家貧。吾甚傷之。定錄此文。字約  
易思。事省不繁。披列其條。核實可觀。分兩有數。因而  
相循。故爲亂辭。孔竅其門。智者審思。用意參焉。

法象成功章第三十一

法象莫大乎天地兮。元溝數萬里。河鼓臨星紀兮。人  
民皆驚駭。晷影妄前却兮。九年被凶咎。皇上覽視之  
兮。王者退自改。

一作後

關鍵有低昂兮。雲氣遂奔走江

淮之枯竭兮。水流注於海。天地之雌雄兮。徘徊于與

午寅申。陰陽祖兮。出入復終始。循斗而招搖兮。執衡

定元紀。化

一作升

熬于甌山兮。炎火張設下。白虎導唱

前兮。蒼液

一作龍

和于後。朱雀翱翔戲兮。飛揚色五彩

遭遇羅網施兮。壓之

一作止

不得舉。嗷嗷聲甚悲兮。嬰

兒之慕母。顛倒就湯鏹兮。摧折傷毛羽。漏刻未過半

兮。魚鱗狎鬣起。五色象炫耀兮。變化無常主。滴滴鼎

沸馳兮。暴涌不休止。接連重疊累兮。犬牙相錯距。形

如仲冬外兮。闌于吐鍾乳。崔嵬而雜厠兮。交積相支



柱。陰陽得其配兮。淡薄而一作相守。青龍處房六兮。

春。華震東卯。白虎在昴七兮。秋。芒兌西酉。朱雀在張

二兮。正陽離南午。三者俱來朝兮。家屬爲親侶。本之

但二物兮。末而爲三五。三五并與一一作危兮。都集歸

一所。治之如上科兮。日數亦取亦作甫。先白而後黃

兮。赤黑逢表裏。名曰第一等一作第一鼎兮。食如大黍米

自然之所爲兮。非有邪僞道。山澤氣相一作若蒸兮。

興雲而爲雨。沉竭遂成塵兮。火滅化爲土。若蘖染爲

黃兮。似藍成綠組。皮革煮成膠兮。麴蘖化爲酒。同類



易施工兮。非種難爲巧。惟斯之妙術兮。審諦不誑語。  
傳於億世後兮。昭然白可考。煥若星經漢兮。曷如水。  
宗海思之務令熟兮。反復視上下。千周燦彬彬兮。萬  
遍將可覩。神明或告人兮。心靈本自悟。探端索其緒  
兮。必得其門戶。天道無適莫兮。常傳於賢者。

鼎器妙用章第三十二

圓三五寸一分。口四八。兩寸唇。長尺二。厚薄均。腹齊。

三。  
正作

坐垂溫。陰在上。陽下奔。首尾武。中間文。始七。

十。終三句。二百六。善調勻。陰火白。黃芽銀。  
鉛一作兩七。



竅

一作聚

輔翼人。瞻理腦。定昇元。子處中。得安存。來去

遊。不出門。漸成大。情性純。却歸一。還本元。善愛敬。如君臣。至一周。甚辛勤。密防護。莫迷昏。途路遠。復幽元。若逢此。會乾坤。刀圭露。淨鬼魂。得長生。居仙村。樂道者。尋其根。審五行。定銖分。諦思之。不須論。深藏守。莫傳文。御白鶴。駕龍鱗。遊太虛。謁仙君。錄天圖。號真人。

補塞遺脫章第三十三

叅同契者。敷陳梗槩。不能純一。泛濫而說。纖微未備。闕略髣髴。今更撰錄。補塞遺脫。潤色幽深。鈎援相逮。



旨意等齊。所趨不悖。故復作此。命三相類。則大易之情自此盡矣。太易情性各如其度。黃老用究較而可御。爐火之事真有所據。三道由一俱出。逕路枝莖花葉。果實垂布。正在根株。不失其素誠心所言。審而不悞。象彼仲冬節。竹木皆摧傷。左陽詰賈旅。人君深自藏。象時順節令。閉口不用談。天道甚浩廣。太元無形容。虛寂不可覩。匡廓以消亡。謬誤失事緒。言還自敗傷。別序斯四象。以曉後生盲。

自做啟後章第三十四



會稽鄙夫。幽谷朽生。挾懷樸素。不樂權榮。栖遲僻陋。  
忽略利名。執守恬淡。希時安寧。晏然閒居。乃撰斯文。  
歌敘大易。三聖遺言。察其旨趣。一統共倫。務在順理。  
宣耀精神。神化流通。四海和平。表以爲歷。萬世可循。  
序以御政。行之不煩。引內養性。黃老自然。含德之厚。  
歸根返元。近在我心。不離已身。抱一母含。可以長存。  
配以伏食。雌雄設陳。挺除武都。八石棄捐。蜜類成物。  
世俗所珍。羅列三條。枝莖相連。同出異名。皆由一門。  
非徒累句。諧偶斯文。殆有其真。礫硤可觀。使予敷僞。

却被贅愆。命參同契。微覽其端。辭寡意大。後嗣宜遵。  
委時去害。依托邱山。循遊寥廓。與鬼爲鄰。化形而仙。  
淪寂無聲。百世一下。遨遊人間。陳敷羽翮。東西南傾。  
湯遭厄際。水旱隔并。柯葉萎黃。失其華榮。吉人相乘。  
負安穩可長生。

參同契終



右參同契三十四章通考本作周易參同契三卷  
晁氏云漢魏伯陽撰伯陽會稽上虞人約周易作  
此書以授同郡淳于叔通因行於世隋唐書皆不  
載按唐陸德明解易字云虞翻注參同契言易字  
從日下月今此書有日月爲易之文其爲古書明  
矣朱子以其詞韻皆古奧難通讀者淺聞妄輒更  
改比它書尤多舛誤乃合諸本更加讎正爲之考  
異又謂參同契爲艱深之詞使人難曉而其中有  
千周萬遍之說欲令熟讀以得之也鄱陽晁氏以

此爲道家煉養之術謂歐陽文忠公嘗刪正黃庭  
朱文公嘗稱參同契二公大儒攘斥異端不遺餘  
力獨不以其說爲非山林獨善之士以此養生全  
年因未嘗得罪於名教也朱長春真人序此書又  
以爲出於陰符而參於易皆爲道家大宗而謂之  
參同契者言同契於易也故朱氏經義考以附周  
易今仍叢書原本列入諸子且以次陰符經後云  
汝上王謨識



陰符經序

所謂命者性也性能命通故聖人尊之以天命愚其  
人而智其聖故曰天機張而不死地機弛而不生觀  
乎陰符造化在乎手生死在乎人故聖人藏之於心  
所以陶甄天地聚散天下而不見其跡者天機也故  
黃帝得之以登天下湯武得之以王天下五霸得之  
以統諸侯夫臣易而主難不可以輕用太公九十非  
不遇蓋審其主焉若使哲士執而用之立石爲主刻  
木爲君亦可以享天下夫臣盡其心而主反怖有之

不亦難乎嗚呼无賢君則義士自死而不仕莫若歎  
志巖石以養其命待生於泰階世人以夫子爲不遇  
以秦儀爲得時不然志在立宇宙安能馳心下走哉  
丈夫所耻嗚呼後世英哲審而用之范蠡重而長文  
種輕而亡豈不爲泄天機天機泄者沉三劫宜然故  
聖人藏諸名山傳之同好隱之金匱恐小人竊而弄  
之



行經

漢 張良注 進賢馮來儀校

上篇

視天之道。執天之行。盡矣。故天有五賊。見之者昌。  
太公曰。其一賊命。其次賊物。其次賊時。其次賊功。  
其次賊神。賊命以一消。天下用之以味。賊物以一  
急。天下用之以利。賊時以一信。天下用之以反。賊  
功以一恩。天下用之以怨。賊神以一驗。天下用之  
以小。大鬼谷子曰。天之五賊。莫若賊神。此大而彼



小以小而取。夫天地莫之能神。而況于人乎。堯曰。黃帝得賊命之機。白日上昇。殷周得賊神之驗。以小滅大。管仲得賊時之信。九合諸侯。范蠡得賊物之急。而霸南越。張良得賊功之恩。而敗強楚。五賊在心。施行於天。宇宙在乎手。萬化生乎身。

太公曰。聖人謂之五賊。天下謂之五德。人食五味而生。食五味而死。无有怨而棄之者也。心之所味也亦然。鬼谷子曰。賊命可以長生不死。黃帝以少女精炁感之。時物亦然。且經冬之草。覆之而死。



露之卽見傷。草木植在。而得其時。則生。失其時。則死。其機則少女以時廣。延壽曰。以重責。三笑五毒。五毒卽五味。五味盡。可以長生也。然曰。人因五味而生。五味而死。五味各有所主。順之則相生。逆之則相勝。久之則積炁薰蒸。人腐。五臟殆至滅亡。後人所以不能終其天年者。以其生生之厚矣。是以至道淡然。胎息无味。神仙之術百數。其要在抱一守中。少女之術百數。其要在還精採炁。金丹之術百數。其要在神水華池。治國之術百數。其要在清淨。



自化用兵之術百數。其要在奇正權謀。此五事者。  
卷之藏于心。隱于神。施之彌于天。給于地。宇宙遐  
息。可在人之手。萬物榮枯。可生人之身。黃帝得之。  
先固三宮。後治萬國。鼎成而馭龍。上昇於天也。  
天性人也。人心機也。立天之道以定人也。  
亮曰。以爲立天定人。其在于五賊。

天發殺機。龍蛇起陸。人發殺機。天地反覆。

范曰。昔伊尹佐殷。發天殺之機。克夏之命。聖而寧  
應之。故有東征西夷。怨南征北狄。怨太公曰。不



三年大旱不鑿十年地壞殺人過萬大風暴起亮  
曰按楚殺漢兵數萬大風杳冥晝晦有若天地反  
覆。

天人合發萬變定基

良曰從此一信而萬信生故爲萬變定基矣。筌曰  
大荒大亂兵水旱蝗是天殺機也。虞舜陶甄夏禹  
拯骸殷繫夏臺厲囚羑里漢祖亭長魏武乞丐俱  
非王者之咎。乘天殺之機也。起陸而帝。君子在野  
小人在位。權臣擅威。百姓思亂。人殺機也。成湯放



桀周武伐紂。項籍斬嬴嬰。魏廢劉協。是乘人殺之  
機也。覆貴爲賤。反賤爲貴。有若天地反覆。天人之  
機。合發成敗之理。宜然。萬變千化。聖人因之而定  
基業也。

性有巧拙。可以伏藏。

良曰。聖人見其巧拙。彼此不利者。其計在心。彼此  
利者。聖哲英雄道焉。况用兵之務哉。筌曰。中慾不  
出。謂之啓。外邪不入。謂之閉。內啓是其機也。難知  
如陰。不動如山。巧拙之性。使人無間而得窺也。



九竅之邪在乎三要可以動靜。

太公曰。三要者耳目口也。耳可鑿而塞。目可穿而眩。口可利而訥。與師動衆。萬夫莫議。其奇在三者。或可動。或可靜之。筌曰。兩葉掩目。不見泰山。雙豆塞耳。不聞雷霆。一椒掠舌。不能立言。九竅皆邪。不足以察機變。其在一者神心志也。機動未朕。神以隨之。機兆將成。心以圖之。機發事行。志以斷之。其機動也。與陽同其波。五嶽不能鎮其隅。四瀆不能界其維。其機靜也。與陰同其德。智士不能運其榮。

深聞不能窺其謀。天地不能奪其時。而況于人乎。  
火生于木。禍發必尅。奸生于國。時動必潰。知之修鍊。  
謂之聖人。

筌曰。火生于木。火發而木焚。奸生于國。奸成而國  
滅。木中藏火。火始于无形。國中藏奸。奸始于无象。  
非至聖不能修身鍊行。使奸火之不發。夫國有无  
軍之兵。无災之禍矣。以箕子逃而縛裘牧。商容囚  
而蹇叔哭。



天生天殺道之理也。

良曰。機出乎心。如天之生。如天之殺。則生者自謂得其生。死者自謂得其死。

天地萬物之盜萬物。人之盜人。萬物之盜三盜。既宜三才既安。

鬼谷子曰。三盜者。彼此不覺知。但謂之神明。此三者。况車馬金帛。棄之可以傾河填海。移山覆地。非命而動。然後應之。筌曰。天地與萬物生成。盜萬物以衰老。萬物與人之服御。盜人以驕奢。人與萬物



之上器。盜萬物以毀敗。皆自然而往。三盜各得其宜。三才遞安其任。

故曰。食其時。百骸理。動其機。萬化安。

鬼谷子曰。不欲令後代人君。廣歛珍寶。委積金帛。若能棄之。雖傾河填海。未足難也。食者所以治百骸。失其時而生百骸。動者所以安萬物。失其機而傷萬物。故曰。時之至間。不容瞬息。先之則太過。後之則不及。是以賢者守時。不肖者守命也。人知其神之神。不知不神之所以神也。



筌曰。人皆有聖人。不貴聖人之愚。既覩其聖。又  
其愚。復覩其聖。故書曰。專用聰明。則事不成。專用  
晦昧。則事皆悖。一明一晦。衆之所載。伊尹。酒保。太  
公。屠牛。管仲。作革。百里奚。賣粥。當衰亂之時。人皆  
謂之不神。及乎逢成湯。遭文王。遇齊桓。值秦穆。道  
濟生靈。功格宇宙。人皆謂之至神。

日月有數。大小有定。聖功生焉。神明出焉。

鬼谷子曰。後代伏思之。則明。天地不足貴。而況於  
人乎。筌曰。一歲三百六十五日。日之有數。月次十



二。以積閏大小餘分有定。皆稟精炁自有。不爲聖  
功神明而生。聖功神明亦稟精炁自有。不爲日月  
而生。是故成不貴乎天地。敗不怨乎陰陽。

其盜機也。天下莫能見。莫能知。君子得之固躬。小人  
得之輕命。

諸葛亮曰。夫子太公。豈不賢於孫吳韓白。所以若  
子小人異之。四子之勇。至于殺身。固不得其主而  
見殺矣。筌曰。季主凌夷。天下莫見凌夷之機。而莫  
能知凌夷之源。霸王開國之機。而莫能知開國之



機而莫能知開國之源君子得其機應天順人乃  
固其躬小人得其機煩兵黷武乃輕其命易曰君  
子見機而作不俟終日又曰知機其神乎機者易  
見而難知見近知遠

下篇

瞽者善聽聾者善視絕利一源用師十億三反晝夜  
用師萬倍

尹曰思之精所以盡其微良曰後代伏思之耳目  
之利絕其本源筌曰人之耳目皆分于心而竟于

神心分則機不精。神竟則機不微。是以師曠薰目而聰耳。離朱漆耳而明目。任一源之利而反用師於心。舉事發機。十全成也。退思三反。經畫歷夜思而後行。舉事發機。萬全成也。太公曰。目動而心應之。見可則行。見否則止。

心生于物。死于物。機在於目。

筌曰。爲天下機者。莫近乎心。目。心能發目。目能見機。秦始皇東遊會稽。項羽目見其機。心生于物。謂項王曰。彼可取而伐之。晉師畢至於淮淝。苻堅目



見其機心死于物。謂苻融曰。彼勅敵也。胡爲少耶。則知生死之心在乎物。成敗之機見于目焉。

天之无恩而大恩生。迅雷烈風莫不蠢然。

良曰。熙熙哉。太公曰。誠懼致福。筌曰。天心无恩。萬物有心。歸恩于天。老子曰。天地不仁。以萬物爲芻狗。聖人不仁。以百姓爲芻狗。是以施而不求其報。生而不有其功。及至迅雷烈風。威遠而懼邇。萬物蠢然而懷懼。天无威而懼萬物。萬物有懼而歸威于天。聖人行賞也。无恩于有。功行伐也。無威于有。

罪故賞罰自立于上威恩自行于下也

至樂性餘至靜性廉

良曰夫機在于是也筌曰樂則奢餘靜則貞廉性  
餘則神濁性廉則神清神者智之泉神清則智明  
智者心之府智公則心平人其鑒于流水而鑒于  
澄水以其清且平神清意平乃能形物之情夫聖  
人者不淫于至樂不安于至靜能棲神靜樂之間  
謂之守中如此施利不能誘聲色不能蕩辯士不  
能說智者不能動勇者不能懼見禍于重閉之外



慮患于杳冥之內。天且不違。而況于兵之詭道者哉。

天之至私。用之至公。

尹曰。治極微。良曰。其機善。雖不令天下而行之。天下所不能知。天下所不能違。至曰。天道曲成萬物而不遺。椿菌鵬鷃。巨細修短。各得其所。至私也。雲行雨施。雷電霜霓。生殺之均。至公也。聖人則天法地。養萬民。察勞苦。至私也。行正令。施法象。至公也。孫武曰。視卒如愛子。可以俱死。視卒如嬰兒。可與

之赴深溪。愛而不能令。譬若驕子。是故令之以文。  
齊之以武。

禽之制在炁

太公曰。豈以小大而相制哉。尹曰。炁者天之機。筌  
曰。元龜食螭。鷁隼擊鵠。黃腰啖虎。飛鼠斷猿。蜃蛭  
齧魚。狼狽啣鶴。餘甘柔金。河車服之。無窮化玉。雄  
黃變鐵。有不灰之木。浮水之石。夫禽獸木石得其  
炁。尚能以小制大。況英雄得其炁。而不能淨寰海  
而御宇宙也。



生者死之根死者生之根恩生于害害生于恩

太公曰損已者物愛之厚已者物薄之筌曰謀生者必先死而後生習死者必先生而後死驪冠子曰不死不生不斷不成孫武曰投之死地而後生致之亡地而後存吳起曰兵戰之場立屍之地必死則生幸生則死恩者害之源害者恩之源吳樹恩于越而害生周立害于殷而恩生死之與生也恩之與害相反糾纏也

愚人以天地文理聖我以時物文理哲



太公曰。觀鳥獸之時。察萬物之變。筮曰。景星見黃  
龍下。翔鳳至。醴泉出。嘉穀生。河不滿溢。海不揚波。  
日月薄蝕。五星失行。四時相錯。晝冥宵光。山崩川  
涸。冬雷夏霜。愚人以此天地文理爲理亂之機。文  
思安安。光被四表。克明俊德。以親九族。六府三事。  
無相奪倫。百穀用成。兆民用康。昏主邪臣。法令不  
一。重賦苛政。上下相蒙。懿戚貴臣。驕奢淫縱。酣酒  
嗜音。峻宇雕牆。百姓流亡。思亂怨上。我以此時物  
文理爲理亂之機也。



人以愚虞聖。我以不愚虞聖。人以奇期聖。我以不奇期聖。

筌曰。賢哲之心。深妙難測。由巢之跡。人或窺之。至于應變無方。自機轉而不窮之智。人豈虞之。以跡度心。乃爲愚者也。

故曰。沉水入火。自取滅亡。

良曰。理人自死。理軍亡兵。無死則無不死。無生則無不生。故知乎死生。國家安寧。

自然之道。靜故天地萬物生。

尹曰。靜之至。不知所以生。

天地之道。浸故陰陽勝。

良曰。天地之道。浸微而推勝之。

陰陽相推而變化順矣。

良曰。陰陽相推激。至于變化在于且。

是故聖人知自然之道不可違。因而制之。

良曰。大人見之爲自然。英哲見之爲制。愚者見之

爲化。尹曰。知自然之道。萬物不能違。故利而行之。

至靜之道。律歷所不能契。



凡曰觀鳥獸之時察萬物之變鳥獸至淨律歷所不能契從而機之

爰有奇器是生萬象八卦甲子神機鬼藏

良曰六癸爲天藏可以伏藏也

陰陽相勝之術昭昭乎進乎象矣

亮曰奇器者聖智也。天垂象聖人則之。推甲子畫八卦考著龜稽律歷則鬼神之情陰陽之理昭著乎象無不盡矣。亮曰八卦之象中而用之六十甲子轉而用之神出鬼入萬明一矣。良曰萬生萬象

者心也。合藏陰陽之術。日月之數。昭昭乎在人心  
矣。廣成子曰。甲子合陽九之數也。卦象出師衆之  
法。出師以律動合鬼神。順天應時。而用鬼神之道  
也。

陰符經終



右陰符經三篇自漢書藝文志道家兵書俱不載  
隋志始載有太公陰符鈐錄一卷周書陰符九卷  
而不言經唐志乃有集注陰符經一卷爲太公范  
蠡鬼谷子張良諸葛亮李淳風李筌李治李鑒李  
銳陽晟十一家注又有驪山母傳陰符元義一卷  
注云筌於嵩山虎口巖石壁得黃帝陰符本題云  
魏道士寇謙之傳諸名山筌至驪山老母傳其說  
黃山谷云陰符出於李筌熟讀其文知非黃帝書  
也蓋雜以兵家語又妄說太公范蠡鬼谷張良諸

葛亮訓注尤可笑惜不經柳子厚一掊擊也謨按  
史記蘇秦得周書陰符伏而讀之索隱引戰國策  
謂得太公陰符之謀則陰符是太公兵法以爲黃  
帝書固繆但如山谷謂出李筌恐亦未然此書宗  
旨與大易老子同歸而易言龍戰于野其血元黃  
老言聖人不死大盜不止亦奇陰語安得以書中  
天殛殺機龍蛇起陸天地萬物之盜等語遂目爲  
詭誕不經乎先秦古書類多後人依托安得一一  
舉而掊擊之乎通考道家兵書亦復削而不載固



矣哉汝上王謨識

昌黎先生集

卷之五

三



風后握奇經

漢 公孫宏解 臨川戈 成校

宋高似孫曰馬隆本作握機敘云風后軒轅臣也幄者帳也大將所居言其事不可妄示人故云握機人稱諸子總有三本其一本三百六十字一本三百八十字蓋呂尚增字以發明之其一行簡有公孫宏等語或云武帝令霍光等習之於平樂館以輔少主備天下之不虞今本衍

四  
字

經曰入陣四爲正四爲奇。舊注奇讀如字後人說天地風雲爲四正龍虎爲蛇

爲四奇公孫宏曰世有入卦陣法其說不用奇正似非風后所傳未可參用餘奇爲握奇。舊注奇讀如奇耦之奇解云說奇正者多矣而握奇云者四爲正四爲奇餘奇爲握奇陣數有九中心奇



風后握奇經

零者大將握之以應赴八陣之急處。或總稱之。先出遊軍定兩端。天有

衝。圓地有軸。前後有衝。一作有風雲風附於天。雲附於地。

衝有重列。各四隊。前後之衝各三隊。風居四維。故以

圓軸單列。各三隊。前後之衝各三隊。風居四角。故以

方天居兩端。地居中間。總爲八陣。陣訖。遊軍從後躡

敵。或驚其左。或驚其右。驚一作警聽音望麾。以出四奇。

天地之前衝爲虎翼。風爲蛇蟠。圍繞之義也。虎居於

中。張翼以進。蛇居兩端。向敵而蟠。以應之。天地之後

衝爲飛龍。雲爲鳥翔。突擊之義也。龍居其中。張翼以



進鳥掖兩端向敵而翔以應之虛實二壘。一作三軍皆逐

天文氣候向背山川利害隨時而行以正合以奇勝。

天地以下八重以列。或曰握機望敵即引其後以掎

角前列不動而前列先進以次之。公孫宏曰傳頌氏陣法依此今按而

前列等八字舊文在依此或合而為一因離而為八。注下誤也故遷次以成之

各隨師之多少觸類而長。

天或圓而不動。一作天或圓而不布前為左後為右天地四望

之屬是也。一本下有風象二字天居兩端其次風其次雲。一作其次

天衝其次地衝其次風衝其次雲衝左右相向是也。地方布風雲各在



後衝之前。天居兩端。其次地居中間。一作其次地兩

地為此是也。公孫宏曰此為地為從天陣變為地陣

為動也一本自公孫宏曰縱布天一。一作兩天一無

動靜二義皆雜出經文中有雲象龍一句。天二次之。天二一縱布地四次於天

後。一作縱布四地四地縱布四風挾天地之左右。無一

地字一無二句一無天天地前衝居其右。後衝居其左。地字一無居其右

後衝。五字雲居兩端。虛實二壘。則此是也。一本下有比為

虛實已下公孫宏曰人多傳韓信注釋天或圓布已

十與此微有差異而范蠡樂毅之說相雜今亦錯綜於其中其部隊或三五或三十或五十變通之理奇

之明哲不復備載近古以來其文不滿尺多慙口缺



以相傳授予今於難解之處增字發明之耳一本其部隊下上五十五云陣圖如此變通由人以爲經文誤也按公孫氏稱與其異者天或圓布次遊軍定兩端下以爲正經而以天有衝止觸類而長列于續圖雲爲翔鳥之下今馬本尙如此

握奇經續圖

角音二

初警衆

末收衆

革音五

一持兵

二結陣

三行

四趨走

五急鬪

金音五

屈后掛青經

一緩關

二止關

三退

四背

五急背

背一本作趨

麾法五

一玄

二黃

三白

四青

一作赤

五赤

一作青

旗法八

一天玄

二地黃

三風赤

四雲白

五天前上玄下赤

六天後上玄下白

七地前上玄下青

一作赤

八地後上黃下赤

一作青



陣勢八

天

地

風

雲

飛龍

翔鳥

虎翼

蛇蟠

二革二金爲天

三革三金爲地

二革三金爲風

三革二金爲雲

四革三金爲龍

三革四金爲虎

匹革五金爲鳥

五革四金爲蛇

舊注此八陣名

用金鼓之制

其金革之間加一角音者。在天爲兼風。在地爲兼雲。

在龍爲兼鳥。在虎爲兼蛇。加二角音者。全師進東。加

三角音者全師進南。一作西

加四角音者全師進西。一作

南加五角音者全師進北。執音不止者。行伍不整。金

革既息而角音不止者。師並旋。

三十二隊天衝

十六隊風

八隊天前衝

十二隊地前衝

十二隊地軸

合作二  
十四隊

八隊天後衝

十二軸地後衝

十六隊雲

以天地前衝為虎翼。天地後衝為飛龍。風為蛇蟠。

雲為翔鳥。



八陣總述

晉平 護軍西平太守封奉高侯加授東羌校尉

馬隆述

治兵以信。求聖以奇。信不可易。戰無常規。可握則握。可施則施。千變萬化。敵莫能知。

匹陳讚

動則爲奇。靜則爲陳。陳者陳列。戰則不盡。分苦均勞。佚輪輒定。有兵前守。後隊勿進。

天陳讚

天陳十六。內方外圓。四面風衝。其形象天。爲陳之主。爲兵之先。潛用三軍。其形不偏。

地陳讚

地陳十二。其形正方。雲生四角。衝軸相當。其體莫測。動用無疆。獨立不可配之於陽。

風陳讚

風無正形。附之於天。變而爲蛇。其意漸元。風能鼓動。萬物驚焉。蛇能圍繞。三軍懼焉。

雲陳讚

自太公范蠡以來。風雲無正形。所以附天地下。



雲附於地則知無形。變爲翔鳥其狀乃成。鳥能突擊。雲能晦冥。千變萬化。金革之聲。

飛龍

天地後衝。龍變其中。有手有足。有背有胸。潛則不測。動則無窮。陳形亦然。象名其龍。

翔鳥

驚鳥擊搏。必先翺翔。勢浚霄漢。飛禽伏藏。審而下之。下必有傷。一夫突擊。三軍莫當。

蛇蟠

風后推奇經

風爲蛇蟠。蛇吞天真。勢欲圍繞。性能屈伸。四至之中。與虎爲鄰。後變常山。首尾相因。

虎翼

天地前衝。變爲虎翼。伏虎將搏。盛其威力。淮陰用之。變化無極。垓下之會。魯公莫測。

奇兵讚

古之奇兵。兵在陳內。今人奇兵。兵在陳外。兵體無形。形露必潰。審而爲之。百戰不昧。

合而爲一。離而爲八。



合而爲一。平川如城。散而爲八。逐地之形。混沌沌。  
如環無窮。紛紛紜紜。莫知所終。合則天。居兩端。地居  
其中。散則一。陰一陽兩兩相衝。勿爲事先。動而輒從。  
遊軍

### 金革

金有五。革有五。退則聽金。進則聽鼓。鼓以增氣。金以  
抑怒。握其機關。戰不失度。

靴鼓

紅塵戰深。白刃相臨。勝負未決。人懷懼心。乍犇乍背。或縱或擒。行伍交錯。整在靴音。

麾角

麾法有五。光目條流。角音有五。初驚末收。麾者指揮。角者驚覺。臨機變化。慎勿交錯。

光目一作光自

兵體

上兵伐謀。其下用師。棄本逐末。聖人不為。利物禁暴。隨時禁衰。蓋不得已。聖人用之。英雄為將。夕惕乾乾。



四字

其形不偏。樂與身後。勞與身先。小人偏勝。君子

兩全。爭者逆德。不有破軍。必有亡國。握機爲陳。動則

爲賊。後賢審之。勿以爲惑。夫樂殺人者。不得志於天

下。聖人之言。以戒來者。

一作天下

似孫曰。風后握奇經。三百八十四字。其妙本乎奇正

相生。變化不測。蓋潛乎伏羲氏之畫。所謂天地風雲

龍鳥蛇虎。則其爲八卦之象明矣。蓋注奇讀如奇耦

之奇。則尤可與易準。諸儒多稱諸葛武侯八陣。唐李

衛公六花。皆出乎此。唐裴緒之論。又以爲六十四卦



之變其出也無窮若此則所謂八陣者特八卦之統  
爾焦氏易學卦變至乎四千七十有六奇正相錯變  
化無窮是可以名數該之乎然觀太公武韜且言牧  
野之師有天陣有地陣此固出於握奇而又有入陣  
焉此又出於天地陣之外者非八陣六花所能盡也  
獨孤及作風后八陣圖記有曰黃帝順煞氣以作兵  
法文昌以命將風后握機制勝作爲陣圖故八其陣  
所以定位衡抗於外軸布於內風雲負其四維所以  
備物也虎張翼以進蛇向敵而蟠飛龍翔鳥上下其



勢。所以致用也。至若疑兵以固其餘地。遊軍以案其  
後列。門具將發。然後合戰。弛張則二廣迭舉。犄角則  
四奇皆出。圖成罇俎。帝用經畧。北逐獯鬻。南平蚩尤。  
遺風冥冥。神機未昧。項籍得之。霸西楚。黥布得之。奄  
九江。孝武得之。攘匈奴。唐天寶中。客有得其遺制。於  
黃帝書之外篇。裂素而圖之。按魚復之圖。全本於握  
機。得其妙。窮其神者。武侯而已。獨孤乃以爲項黥武  
帝得之。未之思歟。





右風后握奇經一卷按漢書藝文志陰陽家有風  
后十三篇圖一卷班固云黃帝臣依託也又五行  
家有風后孤虛二十卷此握奇經當在十三篇中  
而隋唐志並無風后諸篇目通考兵書門始載此  
經陳氏云永嘉薛士龍季宣校定自晉馬隆三百  
八十四字續圖三百十五字合標題七百字又有  
馬隆讚述多所發明并寫陳圖於後馬隆本奇作  
機此以爲公孫宏解蓋本高氏子略說見本篇茲  
故不錄謨竊謂風后經文固屬依託卽公孫氏解





素書目錄

原始章

正道章

求人之志章

本德宗道章

遵義章

安禮章

魏志

本朝宗族

宋人之志

五世

恩威

人壽



系書

漢 黃石公著 南豐趙秉裕校

原始章第一

夫道德仁義禮五者一體也。

離而用之則有五。合而渾之則爲一。一所以貫五。五所以衍一。

道者人之所蹈。使萬物不知其所由。

道之衣被萬物。廣矣大矣。一動息。一語默。一出處。一飲食。大而八紘之表。小而芒芥之內。何適而非。

道也。仁不足以名。故仁者見之謂之仁。智不足以盡。故智者見之謂之智。百姓不足以見。故日用而不知也。

德者人之所得。使萬物各得其所欲。

有求之謂欲。欲而不得。非德之至也。求於規矩者。得方圓而已矣。求於權衡者。得輕重而已矣。求於德者。無所欲而不得。君臣父子。得之以爲君臣父子。昆蟲草木。得之以爲昆蟲草木。大得以成大。小得以成小。邇之一身。遠之萬物。蓋無所欲而不得。



也

仁者人之所親。有慈慧惻隱之心。以遂其生成。

仁之爲體如天。天無不覆。如海。海無不容。如雨。露雨露無不潤。慈慧惻隱。所以用仁者也。非親於天下。而天下自親之。無一夫不獲其生。書曰。鳥獸魚鼈咸若。詩曰。敦彼行葦。牛羊勿踐履。其仁之至也夫。

義者人之所宜。賞善罰惡。以立功立事。

理之所在。謂之義。順理而決斷。所以行義。賞善罰



惡。義之理也。立功立事。義之斷也。

禮者人之所履。夙興夜寐。以成人倫之序。

禮履也。朝夕之所履踐而不失其序者。皆禮也。言動視聽。造次必於是。放僻邪侈。從何而生乎。

夫欲爲人之本。不可無一焉。

老子曰。失道而後德。失德而後仁。失仁而後義。失義而後禮。失者散也。道散而爲德。德散而爲仁。仁散而爲義。義散而爲禮。五者未嘗不相爲用。而要其不散者。道妙而已。老子言其體。故曰。禮者忠信。



之薄而亂之首。黃石公言其用故曰不可無一焉。  
人君子明於盛衰之道通乎成敗之數審于治亂  
之勢達乎去就之理

盛衰有道。成敗有數。治亂有勢。去就有理。

以潛居抱道以待其時。

道猶舟也。時猶水也。有舟楫之利。而無江河以行  
之。亦莫見其利涉也。

若時至而行則能極人臣之位。得機而動則能成絕  
代之功。如其不遇沒身而已。

蓋謂養之有素及時而動。機不容髮。豈容擬議者哉。

是以其道足高。而名重於後代。

道高則名隨於後而重矣。

右第一章言道不可以無始。

正道章第二

德足以懷遠。

懷者中心悅而誠服之謂也。

信足以一異。義足以得衆。



有行有爲而衆人宜之則得乎衆人矣。

才足以鑒古明足以照下此人之俊也。

行足以爲儀表智足以決嫌疑。

嫌疑之際非智不決。

信可以使守約可以使分財此人之豪也。

守職而不廢。

孔子爲委吏乘田之職是也。

處義而不回。

迫於利害之際而確然守義者此不回也。



見嫌而不苟免。

周公不嫌於居攝。召公則有所嫌也。孔子不嫌於見南子。子路則有所嫌也。居嫌而不苟免。其惟至明乎。

見利而不苟得。此人之傑也。

俊者峻於人。豪者高於人。傑者桀於人。有德有信。有義有才。有明者。俊之事也。有行有智。有信有廉者。豪之事也。至於傑則才行足以名之矣。然傑勝於豪。豪勝於俊也。



右第二章言道不可以非正。

求人之志章第三

絕嗜禁欲。所以除累。

人性清靜。本無係累。嗜欲所牽。捨已逐物。

抑非損惡。所以讓過。

讓猶推讓而去之也。非至於無抑。惡至於無損。過可以無讓爾。

貶酒闕色。所以無汚。

色敗精。精耗則害神。酒敗神。神傷則害精。

避嫌遠疑。所以不悞。

於迹無嫌。於心無疑。事乃不悞爾。

博學切問。所以廣知。

有聖賢之質。而不廣之以學問。弗勉故也。

高行微言。所以修身。

行欲高而不屈。言欲微而不彰。

恭儉謙約。所以自守。深計遠慮。所以不窮。

管仲之計。可謂能九合諸侯矣。而窮於王道。商鞅之計。可謂能強國矣。而窮於仁義。宏羊之計。可謂



能聚財矣。而窮於養民。凡有窮者。俱非計也。

親仁友直。所以扶顛。

聞譽而喜者。不可以得友直。

近恕篤行。所以接人。

極高明而道中庸。聖賢之所以接人也。高明者聖

人之所獨。中庸者衆人之所同也。

任材使能。所以濟物。

一應變之謂不可用之謂能。材者任之而不可使。能者使之而不可任。此用人之術也。

癉惡斥讒所以止亂。

讒言惡行亂之根也。

推古驗今所以不惑。

因古人之迹推古人之心以驗方今之事豈有惑哉。

先揆後度所以應卒。

執一尺之度而天下之長短盡在是矣。倉卒事物之來而應之無窮者揆度有數也。

設變致權所以解結。



有正有變。有權有經。方其正有所不能行。則變而歸之於正也。方其經有所不能用。則權而歸之於經也。

括囊順會。所以無咎。

君子語默以時。出處以道。括囊而不見其美。順會而不發其機。所以免咎。

櫛櫛梗梗。所以立功。孜孜淑淑。所以保終。

櫛櫛者有所恃而不可搖。梗梗者有所立而不可撓。孜孜者勤之又勤。淑淑者善之又善。立功莫如

有守。保終莫如無過也。

右第三章言志不可以妄求。

本德宗道章第四

夫志心篤行之術。長莫長於博謀。

謀之欲博。

安莫安於忍辱。

至道曠夷。何辱之有。

先莫先於修德。

外以成物。內以成己。修德也。



樂莫樂於好善神莫神於至誠

無所不通之謂神。人之神與天地參而不能神於天地者。以其不至誠也。

明莫明於體物。

記云。清明在躬。志氣如神。如是則萬物之來其能

逃吾之照乎。

吉莫吉於知足。

知足之吉。吉之又吉。

苦莫苦於多願。



聖人之道泊然無欲。其於物也來則應之。去則無  
係。未嘗有願也。古之多願者。莫如秦皇漢武。國則  
願富。兵則願強。功則願高。名則願貴。宮室則願華  
麗。姬嬪則願美艷。四夷則願服。神仙則願致。然而  
國愈貧。兵愈弱。功愈卑。名愈鈍。卒至於所求不獲  
而遺恨狼狽者。多願之所苦也。夫治國者固可不  
多願。至於賢人養身之方。所守其可以不約乎。

悲莫悲於精散。

道之所生之謂一。純一之謂精。精之所發之謂神。



其潛於無也。則無生無死。無先無後。無陰無陽。無動無靜。其舍於形也。則爲明爲哲。爲智爲識。血氣之品。無不稟受。正用之則聚而不散。邪用之則散而不聚。目淫於色。則精散於色矣。耳淫於聲。則精散於聲矣。口淫於味。則精散於味矣。鼻淫於臭。則精散於臭矣。散之不已。其能久乎。

病莫病於無常。

天地所以能長久者。以其有常也。人而無常。不其病乎。



短莫短於苟得。

以不義得之。必以不義失之。未有苟得而能長也。

幽莫幽於貪鄙。

以身徇物。闇莫甚焉。

孤莫孤於自恃。

桀紂自恃其才智。伯自恃其強。項羽自恃其勇。王

莽自恃其智。元載盧杞自恃其狡。自恃則氣驕於

外。而善不入耳。不聞善。則孤而無助。及其敗天下

爭從而亡之。



危莫危於任疑。

漢疑韓信而任之。而信幾叛。唐疑李懷光而任之。而懷光遂逆。

敗莫敗於多私。

賞不以功。罰不以罪。喜佞惡直。黨親遠疎。小則結匹夫之怨。大則激天下之怒。此私之所敗也。

右第四章言本宗不可以離道德。

遵義章第五

以明示下者闇。

聖賢之道。內明外晦。惟不足於明者。以明示下。乃其所以闇也。

有過不知者蔽。

聖人無過而知。賢人之過。造形而悟。有過不知其

愚蔽甚矣。

迷而不返者惑。

迷於酒者。不知其伐吾性也。迷於色者。不知其伐吾命也。迷於利者。不知其伐吾志也。人本無迷惑。者自迷之矣。



以言取怨者禍。

行而言之。則機在我。而禍在人。言而不行。則機在

人。而禍在我。

令與心乖者廢。

心以出令。令以心行。

後令繆前者毀。

號令不一。心無信而事毀棄矣。

怒而無威者犯。

文王不大聲以色。四國畏之。故孔子曰。不怒而威。

於鈇鉞。

好衆辱人者殃。

已欲沽直名。而置人於有過之地。取殃之道也。

戮辱所任者危。

人之云亡。危亦隨之。

慢其所敬者凶。

以長幼而言。則齒也。以朝廷而言。則爵也。以賢愚而言。則德也。三者皆可能。而外敬則齒也。爵也。內敬則德也。



貌合心離者孤。親讒遠忠者亡。

讒者善揣摩人主之意而中之。忠者推逆人主之過而諫之。合意者多悅。逆意者多怒。此子胥殺而吳亡。屈原放而楚亡是也。

近色遠賢者昏。女謁公行者亂。

如太平公主韋庶人之禍是也。

私人以官者浮。

淺浮者不足以勝名器。如牛仙客爲宰相之類是也。

凌下取勝者侵。名不勝實者耗。

陸贄曰。名近於虛。於教爲重。利近於實。於義爲輕。然則實者所以致名。名者所以符實。名實相資。則不耗匱矣。

畧已而責人者不治。自厚而薄人者棄廢。

聖人常善救人而無棄人。常善救物而無棄物。自厚者自滿也。非仲尼所謂躬自厚之厚也。自厚而薄人。則人才將棄廢矣。

以過棄功者損。羣下外異者淪。



措置失宜。群情隔息。阿諛竝進。私狃竝行。人人異心。求不淪亡。不可得也。

既用不任者。跡。

用賢不任。則失士心。此管仲所謂害霸也。

行賞悒色者。沮。

色有靳悒。有功者沮。項羽之刳印是也。

多許少與者。怨。

失其本望。

既迎而拒者。乖。

劉璋迎劉備而反拒之是也。

薄施厚望者不報。

天地不仁。以萬物爲芻狗。聖人不仁。以百姓爲芻狗。覆之載之。含之育之。豈責其報也。

貴而忘賤者不久。

道足於已者。貴賤不足以爲榮辱。貴亦固有。賤亦固有。唯小人驟而處貴。則忘其賤。此所以不久也。念舊而棄新功者凶。

切齒於睚眦之怨。眷眷於一飯之恩者。匹夫之量。



有志於天下者。雖仇必用。以其才也。雖怨必錄。以其功也。漢高祖。侯雍。齒錄功也。唐太宗。和魏。鄭公。用才也。

用人不得正者。殆彊用人者不畜。

曹操彊用關羽。而終歸劉備。此不畜也。

爲人擇官者。亂失其所。彊者弱。

有以德彊者。有以人彊者。有以勢彊者。有以兵彊者。堯舜有德而彊。桀紂無德而弱。湯武得人而彊。幽厲失人而弱。周得諸侯之勢而彊。失諸侯之勢。

而弱。唐得府兵而彊。失府兵而弱。其於人也。善爲  
彊。惡爲弱。其於身也。性爲彊。情爲弱。  
決策於不仁者險。

不仁之人。幸患樂禍。

陰計外泄者敗。厚歛薄施者凋。

凋。削也。文中子曰。多歛之國。其財必削。

戰士貧。游士富者衰。

游士鼓其頰舌。惟幸煙塵之會。戰士奮其死力。專  
捍疆場之虞。富彼貧此。兵勢衰矣。



貨賂公行者昧。

私昧公曲昧直也。

聞善忽畧記過不忘者暴。

暴而生怨。

所任不可信所信不可任者濁。

濁。濁也。

牧人以德者集。繩人以刑者散。

刑者原於道德之意。而怨在其中。是以先王以刑  
輔德。而非專用刑者也。故曰牧之以德則集。繩之

以刑則散也

小功不賞則大功不立。小怨不赦則大怨必生。賞不

服人。罰不甘心者。叛。

人心不服則叛也。

賞及無功。罰及無罪者。酷。

非所宜加者。酷也。

聽讒而美。聞諫而仇者。亡。能有其有者。安。貪人之有者。殘。

有無之有。則心逸而身安。



右第五章言遵而行之者義也。

安體章第六

怨在不捨小過。患在不預定謀。福在積善。禍在積惡。善積則致於福。惡積則致於禍。無善無惡則亦無禍無福矣。

飢在賤農。寒在墮織。安在得人。危在失事。富在迎來。唐堯之節儉。李惲之盡地利。越王勾踐之十年生聚。漢之平準。皆所以迎來之術也。

貧在棄時。上無常操。下多疑心。

躁靜無常。喜怒不節。羣情猜疑。莫能自安。

輕上生罪。侮下無親。

輕上無禮。侮下無恩。

近臣不重。遠臣輕之。

淮南王言去平津侯如發蒙耳。

自疑不信人。

暗也。

自信不疑人。

明也。



枉士無正友

李逢吉之友則八關十六子之徒是也

曲上無直下

元帝之臣則宏恭石顯是也

危國無賢人亂政無善人

非無賢人善人不能用故也

愛人深者求賢急樂得賢者養人厚

人不能自愛待賢而愛之人不能自養待賢而養之

國將霸者士皆歸。

趙殺鳴犢。故夫子臨河而返。

邦將亡者賢先避。

微子去商。仲尼去魯。是也。

地薄者大物不產。水淺者大魚不遊。樹禿者大禽不棲。林疎者大獸不居。

此四者以明人之淺則無道德。國之淺則無忠賢也。

山峭者崩。澤滿者溢。



此二者明過高過滿之戒也

棄玉取石者盲

有目與無目同

羊質虎皮者柔

有表無裏與無表同

衣不舉領者倒

當上而下

走不視地者顛

當下而上

柱弱者屋壞。輔弱者國傾。

才不勝任。謂之弱。

足寒傷心。人怨傷國。

夫冲和之氣。生於足。而流於四肢。而心爲之君。氣和則天君樂。氣乖則天君傷矣。

山將崩者。下先隳。國將衰者。人先弊。

自古及今。生齒富庶。人民康樂。而國衰者。未之有也。

根枯枝朽。人困國殘。



長城之役興而秦國殘矣。汴渠之役興而隋國  
矣。

與覆車同軌者傾。與亡國同事者滅。

漢武欲爲秦皇之事。幾至於傾。而能有終者。末金  
哀痛自悔也。桀紂以女色亡。而幽王之褒姒同之。  
漢以閹官亡。而唐之中尉同之。

見已生者慎。將生惡其跡者須避之。

已生者見而去之也。將生者慎而消之也。惡其跡  
者急履而惡踣。不若廢履而無行妄動而惡知不



若絀動而無爲。

畏危者安。畏亡者存。夫人之所行。有道則吉。無道則凶。吉者百福所歸。凶者百禍所攻。非其神聖自然所鍾。

有道者非已求福而福自歸之。無道者畏禍愈甚而禍愈攻之。豈其有神聖爲之主宰。乃自然之理也。

務善策者無惡事。無遠慮者有近憂。同志相得。舜有八元。八凱。湯則伊尹。孔子則顏回。是也。



桓憂

入王之閔散微子之父師少師周旦之召公管仲  
之鮑叔也。

阿惡相黨。

商紂之臣億萬盜蹠之徒九千是也。

同愛相求。

愛利則聚利之臣求之。愛武則談兵之士求之。愛  
勇則樂傷之士求之。愛仙則方術之士求之。愛符  
瑞則矯誣之士求之。凡有愛者皆情之偏性之蔽。

素書

也。

同美相妬。

女則武后韋庶人蕭良娣是也。男則趙高李斯是也。

同智相謀。

劉備曹操崔讓李密是也。

同貴相害。

勢相軋也。

同利相忌。



害相刑也。

同聲相應。同氣相感。

五行五氣五聲散於萬物。自然相感應也。

同類相依。同義相親。同難相濟。

六國合從而拒秦。諸葛通吳以敵魏。非有仁義存焉。時同難爾。

同道相成。

漢承秦後。海內凋弊。蕭何以清靜涵養之。何將亡。念諸將俱喜功好動。不足以知治道。時曹參在齊。

嘗治盍公黃老之術。不務生事。故引參以代相。

同藝相規。

李醯之賊扁鵲。逢蒙之惡后羿。是也。規者非之也。同巧相勝。

公輸子九攻墨子九拒。是也。

此乃數之所得。不可與理違。

自志同下。皆所行所可預知。智者知其如此。順理則行之。逆理則違之。

釋已而教人者。逆正已而化人者。順。



教者以言。化者以道。老子曰。法令滋彰。盜賊多有。  
教之逆者也。我無爲而民自化。我無欲而民自朴。  
化之順者也。

逆者難從。順者易行。難從則亂。易行則理。

天地之道。簡易而已。聖人之道。簡易而已。順日月  
而晝夜之順。陰陽而生殺之順。山川而高下之。此  
天地之簡易也。順夷狄而外之。順中國而內之。順  
君子而爵之。順小人而役之。順善惡而賞罰之。順  
九土之宜而賦歛之。順人倫而序之。此聖人之簡

易也。夫烏獲非不力也。執牛之尾而使之卻行。則終日不能步。尋丈及以環桑之枝貫其鼻。三尺之絢繫其頸。童子服之。風於大澤。無所不至者。蓋其勢順也。

如此理身理家理國可也。

小大不同其理則一。

右第六章言安而居以之之謂禮。

素書終



右黃石公素書一卷自隋唐志及通考俱載黃石公三略而無素書晁氏謂此卽圯上老人以一編書授張良者其書論用兵機權之妙可以死易生可以存易亡真西山亦謂其言治國養民法度與儒者指意不悖而歛藏退守不爲物先之意則黃老遺言也今考素書第一章所論仁義道德雖本儒家言而卽雜以黃老宗旨亦未見有用兵機權之妙抑不知是書卽三略與否玉海則以三略素書分爲二書而皆以爲圯上老人所授通志藝文

略亦以二書並載又皆有呂惠卿注疑祇一書稱  
名各異耳今本不詳何人所注然多引唐事如武  
后韋庶人太平公主李懷光牛仙客李逢吉之類  
是當爲惠卿注無疑玉海又引崇文書目云素書  
一卷九章恐依託說已見陰符經故不辨汝上王  
謨識



心書總目

兵機

逐惡

知人

將才

將器

將弊

將志

將善

將剛

將驕

將彊

出師

擇材

智用

不陣

將誠

戒備



習練

軍蠹

腹心

謹侯

機形

重刑

蠹將

審因

天勢

勝敗

假權

哀死

三賓

沒應

使利

應機

揣能

輕戰



地勢

情勢

擊勢

整師

勵士

自勉

戰道

和人

察情

將情

威令

目錄終



心書

漢 諸葛亮著

臨川雷體剛校

兵機第一

夫兵權者是三軍之司命。主將之威勢。將能執兵之  
權。操兵之勢。而臨羣下。譬如猛虎加之羽翼。而翱翔  
四海。隨所遇而施之。若將失權。不操其勢。亦如魚龍  
脫於江湖。欲求游洋之勢。奔濤戲浪。何可得也。

逐惡第二

夫軍國之弊有五害焉。一曰結黨相連。毀譖賢良。二



心書  
曰侈其衣服異其冠帶三曰虛誇妖術詭言神道四  
曰專察是非私以動衆五曰伺候得失陰結敵人此  
所謂奸僞悖德之人可遠而不可親也

### 知人性第三

夫知人之性莫難察焉美惡旣殊情貌不一有溫良  
而爲詐者有外恭而內欺者有外勇而內怯者有盡  
力而不忠者然知人之道有七焉一曰間之以是非  
而觀其志二曰窮之以詞辨而觀其變三曰咨之以  
計謀而觀其識四曰告之以禍難而觀其勇五曰醉



之以酒而觀其性。六曰歸之以利而觀其廉。七曰期之以事而觀其信。

### 將才第四

道之以德。齊之以禮。知其飢寒。察其勞苦。此謂之仁。將事無苟免。不爲利撓。有死之榮。無生之辱。此謂之義。將貴而不驕。勝而不恃。賢而能下。剛而能忍。此謂之禮。將奇變莫測。動應多端。轉禍爲福。臨危制勝。此謂之智。將進有厚賞。退有嚴刑。賞不逾時。刑不擇貴。此謂之信。將足輕戎馬。氣蓋千夫。善固疆場。長於劍。



戟此謂之步將。陵高歷險。馳射若飛。進則先行。退則  
後殿。此謂之騎將。氣凌三軍。志輕強虜。怯於小戰。勇  
於大敵。此謂之猛將。見賢如不及。從諫若順流。寬而  
能剛。勇而多計。此謂之大將。

將器第五

將之器。其用大小不同。若乃察其奸。伺其禍。爲衆所  
服。此十夫之將。夙興夜寐。言詞密察。此百夫之將。直  
而有慮。勇而能鬪。此千夫之將。外貌桓桓。中情烈烈。  
知人勤勞。惜人飢寒。此萬人之將。近賢進能。日慎一



曰誠信寬大閑於理亂此十萬人之將仁愛洽於下  
信義服隣國上曉天文中察人事下識地理四海之  
內視如家室此天下之將

### 將弊第六

夫爲將之道有八弊焉一曰貪而無厭二曰妬賢嫉  
能三曰信讒奸佞四曰料彼不自料五曰猶豫不自  
決六曰荒淫於酒色七曰奸詐而自怯八曰狡之而  
不以禮

### 將志第七

兵者凶器將者危任是以器剛則缺任重則危故善將者不恃強不怙勢寵之而不喜辱之而不驚見利不貪見美不淫以身殉國一意而已

將善第八

將有五善四欲五善者所謂善知敵之形勢善知進退之道善知國之虛實善知天時人事善知山川險阻四欲者所謂戰欲奇謀欲密衆欲靜心欲一

將剛第九

善將者其剛不可折其柔不可卷故以弱制強以柔



制剛純柔純弱其勢必削純剛純強其勢必亾不柔  
不剛合道之常

將驕第十

將不可驕驕則失禮失禮則人離人離則衆叛將不  
可恡恡則賞不行賞不行則士不致命不致命則無  
功軍無功則國虛國虛則寇實矣子曰如有周公之  
才之美使驕且吝其餘不足觀也已

將強第十一

將有五強八惡高節可以勵俗孝悌可以揚名信義



心書  
可以交友沉慮可以容衆力行可以建功此將之五  
強也謀不能料是非禮不能任賢良政不能正刑法  
富不能濟窮厄知不能備未形慮不能防微密達不  
能舉所知敗不能無怨誘此謂之八惡也

出師第十二

古者國有危難君簡賢能而任之齋三日入太廟南  
面而立將北面太師進鉞於君君持鉞柄以授將曰  
從此至軍將軍其裁之復命曰見其虛則進見其實  
則退勿以身貴而賤人勿以獨見而違衆勿恃功能



勿失忠信。士未坐勿坐。士未食勿食。同寒暑等勞逸。齊甘苦均危患。如此則士必盡死。敵必可亡。將授詞。鑿凶門。引軍而出。君送之。跪而推轂曰。進退惟時。軍中事不由君命。皆由將出。若此則無天於上。無近於下。無敵於前。無主於後。是以智者爲之慮。勇者爲之鬥。故能戰勝於外。功成於內。揚名於後世。福流於子孫矣。

擇材第十三

夫師之行也。有好鬪樂戰。獨取強敵者。聚爲一徒。名



曰報國之士。有氣冠三軍。才力勇捷者。聚爲一徒。名曰突陣之士。有輕足善步。走如奔馬者。聚爲一徒。名曰舉旗之士。有騎射若飛。發無不中者。聚爲一徒。名曰爭鋒之士。有射必中。中必死者。聚爲一徒。名曰飛馳之士。有善發強弩。遠而必中者。聚爲一徒。名曰摧鋒之士。此六軍之善士。各因其能而用之。

智用第十四

夫爲將之道。必順天。因時。依人。以立勝也。故天作時。不作。而人作。是謂逆時。時作。天不作。而人作。是謂逆時。



天天作時作而人不作。是謂逆人。智者不逆天。亦不逆時。亦不逆人也。

### 不陣第十五

古之善理者不師。善師者不陣。善陣者不戰。善戰者不敗。善敗者不亾。昔者聖人之致理也。安其居。樂其業。人至老不相攻伐。可謂善理者不師。舜修典刑。臯陶作士師。人不干令行。無可施。可謂善師者不陣。若禹伐有苗。舜舞干羽。而苗民格。可謂善陣者不戰。齊桓南服強楚。北伐山戎。可謂善戰者不敗。楚昭遭禍。



奔秦請救卒能返國。可謂善敗者不亾矣。

將誠第十六

書曰。狎侮君子。罔以盡人心。狎侮小人。罔以盡人力。故用兵之要。務攬英雄之心。嚴賞罰之科。總文武之道。操剛柔之術。說禮樂而散詩書。先仁義而後智勇。靜若魚潛。動若奔獮。散其所連。而折其所強。耀以旌旗。戒以金鼓。退若山移。進如風雨。擊崩若摧。合戰如虎。迫而容之。利而誘之。亂而取之。卑而驕之。親而離之。強而弱之。有危者安之。有懼者悅之。有叛者懷之。



有冤者伸之。有強者抑之。有弱者扶之。有謀者親之。  
有讒者覆之。獲財者與之。不倍兵以攻弱。不恃衆以  
輕敵。不傲才以驕人。不以寵而作威。先計而後動。知  
勝而始戰。得其財帛不自寶。得其子女不自使。將能  
若此。嚴號申令。而人願鬪。則兵和刃接。而人樂死矣。

### 戒備第十七

國之大務。莫先於戒備。若乃失之毫釐。則差若千里。  
覆軍殺將。勢不踰息。可不懼哉。故有患難。君臣肝食  
而謀之。擇賢而任之。若乃安居而不思危。寇至而不



知拒。此謂燕巢於幕。魚遊於鼎。亾不俟夕。傳曰不備不虞。不可以師。又曰預備而虞。古之善政。又曰蚤蠱尚有毒。而況國乎。無備雖衆。不可恃也。故曰有備無患。故三軍之行。不可無備。

### 習練第十八

夫軍不習練。百不當一。習而用之。一可當百。故仲尼曰。以不教民戰。是謂棄之。又曰善人教民七年。亦可以卽戎矣。然則卽戎之士。不可不教。教之以禮義。誨之以忠信。戒之以典刑。威之以賞罰。故人知勸。然後



習之。或陣而分之。坐而起之。行而止之。走而卻之。別而合之。散而聚之。一人可教十人。十人可教百人。百人可教千人。千人可教萬人。萬人可教三軍。然後教練而敵可勝矣。

### 軍蠹第十九

夫三軍之行。有探候不審。烽火失度。後期犯令。不應時機。阻亂師徒。乍前乍後。不合金鼓。上不恤下。歛削無度。營私徇己。不恤饑寒。非言妖詞。妄陳禍福。如事喧雜。驚惑將吏。勇不受制。專而凌上。輕竭府庫。擅給



其財。此九者三軍之蠹。有之必敗也。

腹心第二十

夫爲將者。必有腹心耳目爪牙。無腹心者。如人夜行。無所措手足。無耳目者。如冥然而居。不知運動。無爪牙者。如飢人食毒物。無不死矣。故善將者。必有博聞多智者爲腹心。沉審謹密者爲耳目。勇捍善敵者爲爪牙。

謹候第二十一

夫敗軍喪師。未有不因輕敵而致禍者。故師出以律。失律則凶。律有十五焉。一曰慮。間諜明也。二曰詰。諛



候謹也三曰勇敢衆不撓也四曰廉見利思義也五  
曰平賞罰均也六曰忍善含耻也七曰寬能容衆也  
八曰信重然諾也九曰敬禮賢能也十曰明不納讒  
也十一曰謹不違理也十二曰仁善養士卒也十三  
曰忠以身殉國也十四曰分知止足也十五曰謀自  
料知他也

### 機形第二十二

夫以愚克智命也以智克愚順也以智克智機也其  
道有三一曰事二曰勢三曰情事機作而不能應非



智也勢機動而不能制非賢也情機發而不能行非  
勇也善將者必因機而立勝

### 重刑第二十三

吳起曰鼓輦金鐸所以威耳旌幟所以威目禁令刑  
罰所以威心耳威以聲不可不清目威以容不可不  
明心威以刑不可不嚴三者不立士可怠也故曰將  
之所麾莫不心移將之所指莫不前死矣

### 蠹將第二十四

古之善將者有四示之以進退故人知禁誘之以仁



義故人知禮重之以是非故人知勸決之以賞罰故  
人知信禁禮勸信師之大經也未有綱直而目不舒  
也故能戰必勝攻必取庸將不然退則不能止進則  
不能禁故與軍同亡無誠勸則賞罰失度人不知信  
故賢良退伏頑諂登用是以戰必敗散

審因第二十五

夫因人之勢以伐惡則黃帝不能與爭威矣因人之  
力以決勝則湯武不能與爭功矣若能審因而加之  
威勝則萬夫之雄將可圖四海之英豪受制矣



天勢第二十六

夫行兵之勢有三焉一曰天二曰地三曰人天勢者  
日月清明五星合度孛彗不殃風氣調和地勢者城  
峻重崖洪波千里石門幽動羊腸曲沃人勢者主聖  
將賢三軍由禮士卒用命糧甲堅備善將者因天之  
時就地之勢依人之利則所向者無敵所擊者萬全  
矣

勝敗第二十七

賢才居上不肖居下三軍悅樂士卒畏懼相議以勇



聞相望以威武。相勸以刑賞。此必勝之徵也。三軍數驚。士卒惰慢。下無禮信。人不畏法。相恐以敵。相語以利。相囑以禍福。相惑以妖言。此必敗之徵也。

假權第二十八

夫將者人命之所懸也。成敗之所繫也。禍福之所倚也。而上不假之以賞罰。亦猶束猿獠之手而責之以騰捷。膠離婁之目而使之辯青黃。不可得也。若賞移在權臣。罰不由主將。人苟自利。誰懷鬪心。雖伊呂之謀。韓白之功。而不能自衛也。故孫武曰。將之出君命。



有所不受。周亞夫曰：軍中聞將軍之命，不聞有天子之詔。

哀死第二十九

古之善將者，養人如養己子。有難則以身先之，有功則以身後之。死者哀而葬之，傷者泣而撫之，飢者捨食而食之，寒者解衣而衣之。智者禮而祿之，勇者賞而勸之。將能若此，所向必捷矣。

三賓第三十

三軍之行也，必有賓客。群議得失，以資將用，有詞若



懸流奇謀不測。博聞廣見。多藝多才。此萬夫之望。可引爲上賓。有猛如熊虎。捷若騰猿。剛如鐵石。利若龍泉。此一時之雄。可引爲中賓。有多言或中。薄技小才。此常人之能。可引爲下賓。

沒應第三十一

若乃圖難於易。爲大於細。先動後用。刑於無刑。此用兵之智也。師徒已列。戎馬交馳。強弩纔臨。短兵又接。乘威布信。敵人告急。此用兵之能也。身衝矢石。爭勝一時。成敗永分。我傷彼死。此乃用兵之下也。



使利第三十二

夫草木叢集。利以遊逸。重塞山林。利以不意。前林無  
隱。利以潛伏。以少擊衆。利以日暮。以衆擊寡。利以清  
晨。強弩長兵。利以捷次。踰淵隔水。風火暗昧。利以搏  
前擒後。

應機第三十三

夫必勝之術。合變之形。在於機也。非智者孰能見機  
而作。見機之道。莫先於不意。故猛獸失險。童子持戟  
以追之。蜂蠆發毒。壯士徬徨而失色。以其禍出不圖。



變速非慮。

揣能第三十四

古之善用兵者。揣其能而料其勝負。主孰聖也。將孰賢也。吏孰能也。糧餉孰豐也。士卒孰練也。軍容孰整也。戎馬孰逸也。形勢孰險也。賓客孰智也。隣國孰懼也。財貨孰多也。百姓孰安也。由此觀之。強弱之形。可以決矣。

輕戰第三十五

螫蟲之觸。負其毒也。戰士能勇。倚其備也。是以鋒銳

甲堅則人輕戰。故甲不堅密與肉袒同。射不能中與無矢同。衆不能入與無鏃同。探候不謹與無目同。將帥不勇與無將同。

地勢第三十六

夫地勢者兵之助也。不知戰地而求勝者未之有也。山林土陵邱阜大川。此步兵之地。土高山狹蔓衍相屬。此車騎之地。依山附澗高林深谷。此弓弩之地。草淺土平可前可後。此長戟之地。蘆葦相叅竹樹交映。此鎗矛之地也。



情勢第三十七

夫將有勇而輕死者。有急而心速者。有貪而喜利者。有仁而不忍者。有智而心怯者。有謀而情緩者。是故勇而輕死者。可暴也。急而心速者。可久也。貪而喜利者。可遺也。仁而不忍者。可勞也。智而心怯者。可窘也。謀而情緩者。可襲也。

擊勢第三十八

古之善鬪者。必先揣敵情而後圖之。凡師老糧絕。百姓愁怨。軍令不習。器械不修。計不先設。外救不至。將

吏刻剝。賞罰輕懈。營陣失次。戰勝而驕。可以攻之。若用賢授能。糧食羨餘。甲兵堅利。四隣和睦。大國應援。敵有此者。計而避之。

### 整師第三十九

夫出師行軍。以整爲勝。若賞罰不明。法令不信。金之不止。鼓之不進。雖有百萬之師。無益於用。所謂整師者。居則有禮。動則有威。進不可當。退不可逼。前後應接。左右應旄。與之安而不與之危。其衆可合而不可離。可用而不可疲矣。



勵士第四十

夫用兵之道。尊之以爵。贍之以財。則士無不至矣。接之以禮。勵之以信。則士無不死矣。蓄恩不倦。法若畫一。則士無不服矣。先之以身。後之以人。則士無不勇矣。小善必錄。小功必賞。則士無不勸矣。

自勉第四十一

聖人則天。賢者法地。智者則古。驕者招毀。妄者稔禍。多語者寡信。自奉者少恩。賞於無功者離。罰加無罪者怨。喜怒不當者滅。



戰道第四十二

夫林戰之道。晝廣旌旗。夜多金鼓。利用短兵。巧在設伏。或攻於前。或發於後。叢戰之道。利用劍楯。將欲圖之。先度其路。十里一場。五里一應。偃戢旌旗。特嚴金鼓。令賊人無措手足。谷戰之道。巧於設伏。利以勇鬪。輕足之士。凌其高。必死之士。殿其後。列強弩而衝之。持短兵而繼之。彼不得前。我不得往。水戰之道。利在舟楫。練習士卒。以乘之。多張旗幟。以惑之。嚴弓弩以中之。持短兵以捍之。設堅柵以衛之。順其流而擊之。



夜戰之道。利在機密。或潛師以衝之。以出其不意。或多火鼓以亂耳目而攻之。可以勝矣。

### 和人第四十三

夫用兵之道。在於人和。和則不勸而自戰矣。若將吏相猜。士卒不服。忠謀不用。羣下謗議。讒慝互生。雖有湯武之智。而不取勝於匹夫。況衆人乎。

### 察情第四十四

夫兵起而靜者。恃其險也。迫而挑戰者。欲人之進也。衆樹動者。車來也。塵土卑而廣者。徒來也。辭強而進。



驅者退也。半進而半退者誘也。杖而行者饑也。見利而不進者勞也。鳥集者虛也。夜呼者恐也。軍擾者將不重也。旌旗動者亂也。吏怒者倦也。數賞者窘也。屢罰者困也。來委謝者休息也。幣重而言甘者誘也。

將情第四十五


夫爲將之道。軍井未汲。將不言渴。軍食未熟。將不言飢。軍火未燃。將不言寒。軍幕未施。將不言困。夏不操扇。冬不服裘。雨不張蓋。與衆同也。

威令第四十六



夫一人之身。百萬之衆。束肩歛息。踵足俯聽。莫敢卽視。法制使然也。若乃上無刑罰。下無禮義。雖貴有天下。富有四海。而不能自免者。桀紂之類也。夫以匹夫之刑。令之以賞罰。而人不能逆其命者。孫武穰苴之類也。故令不可輕。勢不可逆。

心書終



居通鑑不以物類小節


而全志以爲經而合於世道其


言皆與世道相合而後入於

其書而後錄之其書之與世


道相合者其書之與世道相




























右諸葛亮心書一卷按蜀志陳壽上諸葛氏集目

錄二十四篇無此書目隋唐志兵書類亦有

此書通志藝文略始載有諸葛武侯十六策一卷

又將苑一卷通考引晁氏說十六事一治國二君

臣三視聽四納言五察疑六治民七舉措人考黜

九治軍十賞罰十一喜怒十二治亂十三教令十

四斬斷十五思慮十六陰察與此書篇目不同故

陳氏亦以爲依托玉海引中興書目將苑一卷凡

五十篇又引崇文目有武侯兵機法五卷而其書

皆不傳此書其卽在將苑兵法之間乎今叢書本  
名心書雖不知何據要不得謂非武侯遺書也陳  
氏謂應變將略非其所長豈其然哉汝上王謨識



古今注總目

卷上

輿服

都邑

卷中

音樂

鳥獸

魚蟲

卷下

草木

雜註

問答釋義

目錄終



古今注卷上

晉崔豹著

南昌黃中模校

輿服第一

大駕指南車起黃帝與蚩尤戰於涿鹿之野蚩尤作大霧兵士皆迷於是作指南車以示四方遂擒蚩尤而卽帝位故後常建焉舊說周公所作也周公治致太平越裳氏重譯來貢白雉一黑雉二象牙一使者迷其歸路周公錫以文錦二疋輶車五乘皆爲司南之制使越裳氏載之以南緣扶南林邑海際朞年而



至其國、使大夫宴將送至國而還、亦乘司南而背其  
所指、亦暮年而還、至始制車轄、轄皆以鐵、還至鐵亦  
銷、盡以屬巾車氏收而載之、常爲先導、示服遠人而  
正四方、車灋具在尚方故事、漢末喪亂、其灋中絕、馬  
先生紹而作焉、今指南車、馬先生之遺灋也、馬鈞曹魏時人  
大章車、所以識道里也、起於西京、亦曰記里車、車上  
爲二層、皆有木人、行一里、下層擊鼓、行十里、上層擊  
鐃、尚方故事有作車灋、

辟惡車、秦制也、桃弓、鞞矢、所以祓除不祥也、



豹尾車周制也。所以象君子豹變。尾言謙也。古軍正建之。今唯乘輿得建焉。

金斧黃鉞也。鐵斧元鉞也。三代通用之以斷斬。今以金斧黃鉞爲乘輿之飾。元鉞諸王公得建之。武王以黃鉞斬紂。故王者以爲戒。太公以元鉞斬妲己。故婦人以爲戒。漢制諸公亦建元鉞。以大公秉之助武王斷斬。故爲諸公之飾焉。大將軍出征。特加黃鉞者。以銅爲之。黃金塗刃及柄。不得純金也。得賜黃鉞。則斬持節將也。



鎡秦改鐵鉞作鎡。始皇制也。一本云鎡秦制也。今乘輿諸公王妃主通建之也。

麾所以指麾。武王右執白旄以麾是也。乘輿以黃。諸公以朱。刺史二千石以纁。

五輅衡上金爵者朱雀也。口銜鈴。鈴謂鑾。所謂和鑾

也。禮記云行前朱鳥。鸞也。前有鸞鳥。故謂之鸞。鸞口

銜鈴。故謂之鑾鈴。今或爲鑾。或爲鸞。事一而義異也。

車輻棒也。漢朝執金吾。金吾亦棒也。以銅爲之。黃金塗兩末。謂爲金吾。御史大夫司隸校尉亦得執焉。御



史校尉郡守都尉縣長之類皆以木爲吾焉用以夾車故謂之車輻一曰形似輻故謂之車輻也

祭戟父之遺象也詩所謂伯也執殳爲王前驅殳前驅之器也以木爲之後世滋僞無復典刑以赤油韜之亦謂之油戟亦謂之祭戟公王以下通用之以前驅信幡古之徽號也所以題表官號以爲符信故謂爲信幡也乘輿則畫爲白虎取其義而有威信之德也魏朝有青龍幡朱鳥幡元武幡白虎幡黃龍幡五而以詔四方東方郡國以青龍幡南方郡國以朱鳥



幡，西方郡國以白虎幡，北方郡國以元武幡，朝廷畿  
內以黃龍幡，亦以騏驎幡，高貴鄉公討晉文王，自乘  
黃龍幡以麾是也。今晉朝唯用白虎幡，信幡用鳥書，  
取其飛騰輕疾也。一曰以鴻鴈燕鳬者，去來之信也。  
重耳古重較也，文官青耳，武官赤耳，或曰重較在軍  
車藩上，重起如牛角，故云重較耳。  
穰衣，廝役之服也，取其便於用耳。乘輿進食者服穰  
衣，前漢董偃綠幘青鞵，加穰衣以見武帝，厨人之服  
也。



伍伯一伍之伯也。五人曰伍。五長爲伯。故稱伍伯。一曰戶伯。漢制兵吏五人一戶。竈置一伯。故戶伯亦曰火伯。以爲一竈之主也。漢諸公行。則戶伯率其伍以導引也。古兵士服韋弁。今戶伯服赤幘。纁衣素韎。弁之遺法也。

唱上。所以促行徒也。上鼓而行節也。

警蹕。所以戒行徒也。周禮蹕而不警。秦制出警入蹕。謂出軍者皆警戒。入國者皆蹕止也。故云出警入蹕也。至漢朝梁孝王王出稱警。入稱蹕。降天子一等焉。



一曰蹕路也，謂行者皆警於塗路也。

華蓋，黃帝所作也，與蚩尤戰於涿鹿之野，常有五色雲氣，金枝玉葉，止於帝上，有花葩之象，故因而作華蓋也。

曲蓋，太公所作也，武王伐紂，大風折蓋，太公因折蓋之形而制曲蓋焉。戰國常以賜將帥，自漢朝乘輿用四，謂爲轎輓，蓋有軍號者賜其一也。

伺風鳥，夏禹所作也。

雉尾扇，起於殷世，高宗時有雉雉之祥，服章多用翟



羽周制以爲王后夫人之車服輿車有翼卽緝雉羽爲扇翼以障翳風塵也漢朝乘輿服之後以賜梁孝王魏晉以求無常惟諸王皆得用之

障扇長扇也漢世多豪俠象雉尾扇而制長扇也

金根車秦制也秦并天下閱三代之輿服謂殷得瑞山車一曰金根車故因作金根之車秦乃增飾而乘御焉漢因而不改

漢舊制乘輿黃赤綬四采黃赤縹紺淳黃爲圭長二丈九尺九寸五百首諸侯王赤綬四采赤黃縹紺淳



赤圭長二丈一尺三百首太皇太后皇太后皇后皆與乘輿同長公主天子貴人與諸侯王同綬者所加也諸國貴人相國皆綬綬三采綠紫紺淳綠圭長二丈一尺二百四十首公侯將軍紫綬二采紫白淳紫圭長一丈七尺百八十首公主封君服紫綬九卿中二千石二千石青綬三采青白紅淳青圭長一丈七尺百二十首自青綬以上綬皆長三尺二寸與綬同采而首半之

綬者古佩璲也佩綬相迎授故曰綬紫綬以上綬綬



之間得施玉環止玉璫云千石六百石黑綬三采青  
亦紺純青圭長一丈六尺八十首四百石三百石長  
同四百石三百石二百石黃綬一采淳黃圭長一丈  
五尺六十首自黑綬以下繼皆長三尺與綬同采而  
首半之百石青紺綬一采婉轉繆織織長一丈二尺  
凡先合單紡爲一系四系爲一扶五扶爲一首五首  
成一文文采淳爲一圭首多者系細首少者系麤皆  
廣一尺六寸也漢末喪亂玉佩之法絕而不傳魏侍  
中王粲識古佩法始更制焉



帙，魏武帝所制，初以章申服之，輕便，又作五色帙以表方面也。

白筆，古珥筆，示君子有文武之備焉。

兩漢京兆河南尹及執金吾、司隸校尉皆使人導引，傳呼使行者止，坐者起，四人皆持角弓，違者則射之。有乘高窺闕者，亦射之。魏晉設角弩而不用也。

青囊，所以盛印也。奏劾者，則以青布囊盛印於前，示奉王法而行也。非奏劾日，則以青繒爲囊盛印於後。謂奏劾尚質直，故用布；非奏劾日尚文明，故用繒也。



自晉朝以來，劾奏之官專以印居前，非奏劾之官專以印居後也。

文官冠進賢冠，古委貌之遺象也。武官冠惠文冠，古緇布冠之遺象。緇布冠，上古之法。武人尚質，故取法焉。

舄，以木置履下，乾腊不畏泥濕也。天子赤舄，凡舄色皆象於裳。

履者，屨之不帶者也。

不借者，草履也，以其輕賤易得，故人人自有，不假借。



於人故名不借也。又漢文帝屢不借視朝。

五明扇，舜所作也。既受堯禪，廣開視聽，求賢人以自輔，故作五明扇焉。秦漢公卿士大夫皆得用之。魏晉非乘輿不得用。

貂蟬，胡服也。貂者，取其有文采而不炳煥。外柔易而內剛勁也。蟬取其清虛識變也。在位者有文而不自耀，有武而不示人，清虛自牧，識時而動也。

劍，漢世傳高祖斬白蛇劍，長七尺。漢高祖爲泗水亭長，送徒驪山，所提劍理應三尺耳。後富貴則得七尺。



寶劍捨舊劍而服之。後漢之世唯聞高祖以所佩之劍斬白蛇。而高祖常佩此劍。便謂此劍卽斬蛇之劍也。

吳大皇帝有寶刀三。寶劍六。一曰白虹。二曰紫電。三曰辟邪。四曰流星。五曰青冥。六曰百里。刀一曰百鍊。二曰青犢。三曰漏景。

孫文臺獲青玉馬鞍。其光照衢。

## 都邑第二

封疆畫界者。封土爲臺。以表識疆境也。畫界者。於二

封之間又爲壇埒以畫分界域也

闐市垣也闐市門也

肆所以陳貨鬻之物也店所以置貨鬻之物也肆陳也店置也

梟愚屏之遺象也塾門外之舍也臣來朝君至門外當就舍更詳熟所應對之事也塾之言熟也行至門內屏外復應思惟梟愚復思也漢西京梟愚合板爲之亦築土爲之每門闕殿舍前皆有焉千今郡國廳前亦樹之



城門皆築土爲之累土曰臺故亦謂之臺門也  
長安御溝謂之楊溝謂植高楊於其上也一曰羊溝  
謂羊喜抵觸垣牆故爲溝以隔之故曰羊溝也  
闕觀也古每門樹兩觀於其前所以標表宮門也其  
上可居登之則可遠觀故謂之觀人臣將至此則思  
其所闕故謂之闕其上皆丹堊其下皆畫雲氣仙靈  
奇禽怪獸以昭示四方焉

蒼龍闕畫蒼龍白虎闕畫白虎元武闕畫元武朱雀  
闕上有朱雀二枚



城者盛也。所以盛受大物也。

廟者貌也。所以髣髴先人之靈貌也。

隍者城池之無水者也。

紫塞。秦築長城。土色皆紫。漢塞亦然。故稱紫塞焉。

丹徼。南方徼色赤。故稱丹徼。爲南方之極也。塞者塞也。所以擁塞戎狄也。徼者繞也。所以繞遮蠻夷。使不得侵中國也。

拘攔。漢成帝顧成廟。有三玉鼎。二真金鑪。槐樹悉爲扶老拘攔。畫飛雲龍角於其上也。

卷上終



古今注卷中

音樂第三

雉朝飛者，牧犢子所作也。齊處士潁宣時人，年五十無妻，出薪於野，見雉雄雌相隨而飛，意動心悲，乃作朝飛之操，將以自傷焉。其聲中絕。魏武帝宮人有盧女者，故冠軍將軍陰叔之妹，年七歲入漢宮，學鼓琴，琴特鳴異於諸妓，善爲新聲，能傳此曲。盧女至明帝崩後，放出嫁爲尹更生之妻。別鶴操，商陵牧子所作也。娶妻五年而無子，父兄將爲之改娶，妻聞之，中夜



起倚戶而悲嘯。牧子聞之，愴然而悲。乃歌曰：將乖此翼，隔天端。山川悠遠，路漫漫。攬衣不寢，食忘餐。後人因爲樂章焉。

走馬引樗里牧恭所作也。爲父報冤，殺人而亡，藏於山谷之下。有天馬夜降，圍其室而鳴。夜覺，聞其聲，以爲吏追，乃犇而亡去。明視之，馬跡也。乃惕然大悟曰：豈吾所居之處將危乎？遂荷衣糧而去。入于沂澤，援琴鼓之，爲天馬之聲，號曰走馬引馬。

淮南王淮南小山之所作也。淮南服食求仙，遍禮方



士遂與八公相携俱去，莫知所在。小山之徒思戀不已，乃作淮南王之曲焉。

武溪深，乃馬援南征之所作也。援門生爰寄生，善吹笛，援作歌以和之，名曰武溪深。其曲曰：滔滔武溪一何深。鳥飛不度，獸不能臨，嗟哉武溪多毒淫。吳趨曲，吳人以歌其地也。

箜篌引，朝鮮津卒霍里子高妻麗玉所作也。子高晨起刺船而濯，有一白首狂夫，被髮提壺，亂流而渡。其妻隨呼止之，不及，遂墮河水死。於是援箜篌而鼓之。



作公無渡河之歌聲甚悽愴曲終自投河而死霍里  
子高還以其聲語妻麗玉玉傷之乃引箜篌而寫其  
聲聞者莫不墮淚飲泣焉麗玉以其聲傳鄰女麗容  
名曰箜篌引焉

平陵東翟義門人所作也王莽殺義義門人作歌以  
怨之

薤露蒿里並喪歌也出田橫門人橫自殺門人傷之  
爲之悲歌言人命如薤上之露易晞滅也亦謂人死  
魂魄歸于蒿里故有二章一章曰薤上朝露何易晞



露瞻明朝還復滋人死一去何時歸其二曰蒿里誰  
家地聚歛魂魄無賢愚鬼伯一何相催促人命不得  
少踟躕至孝武時李延年乃分爲二曲薤露送王公  
貴人蒿里送士大夫庶人使挽柩者歌之世呼爲挽  
歌

長歌短歌言人生壽命長短定分不可妄求也

陌上桑出秦氏女子秦氏邯鄲人有女名羅敷爲邑  
人千乘王仁妻王仁後爲越王家令羅敷出採桑於  
陌上趙主登臺見而悅之因飲酒欲奪焉羅敷乃彈



箏乃作陌上歌以自明焉

杞梁妻杞植妻妹明月之所作也杞植戰死妻歎曰上則無父中則無夫下則無子生人之苦至矣乃抗聲長哭杞都城感之而頽遂投水而死其妹悲其姊之貞操乃爲作歌名曰杞梁妻焉梁植字也

釣竿伯常子妻所作也伯常子避仇河濱爲漁父其妻思之每至河側作釣竿之歌後司馬相如作釣竿之詩今傳爲古曲也

董逃歌後漢游童所作也後有董卓作亂卒以逃亡



後人習之以爲歌章。樂府奏之以爲炯戒。

短簫撓歌。軍樂也。黃帝使岐伯所作也。所以建武揚德。風勸戰士也。周禮所謂王大捷。則令凱樂。軍大獻。則令凱歌者也。漢樂有黃門鼓吹。天子所以宴樂羣臣。短簫撓歌。鼓吹之一章耳。亦以賜有功諸侯。上留田地名也。其地人有父母死。兄不字其孤弟者。鄰人爲其弟作悲歌。以諷其兄。故曰上留田。

日重光。月重輪。羣臣爲漢明帝所作也。明帝爲太子。樂人作歌詩四章。以贊太子之德。其一曰日重光。其



二曰月重輪，其三曰星重輝，其四曰海重潤。漢末喪亂後，其二章亡。舊說云：天子之德，光明如日，規輪如月，衆輝如星，霑潤如海，太子皆比德焉，故云重耳。橫吹，胡樂也。張博望入西域，傳其法於西京，唯得摩訶兜勒二曲。李延年因胡曲更造新聲二十八解，乘輿以爲武樂。後漢以給邊將軍，和帝時萬人將軍得用之。魏晉以來，二十八解不復具存。世用者黃鶴隴頭、出關、入關、出塞、入塞、折楊柳、黃華子、赤之陽、望行人等十曲。



後漢蔡邕益琴爲九絃，後還用七絃。

鳥獸第四

楊白，鷹也，似鷹，尾上白。

扶老，禿秋也，狀如鶴而大，大者頭高八尺，善與人鬪，好啖蛇。

鴈，自河北渡江南，瘦瘠能高飛，不畏繒繳，江南沃饒，每至還河北，體肥不能高飛，恐爲虞人所獲，嘗銜蘆，長數寸，以防繒繳焉。

鳬，鴈在江邊沙上食沙石，悉皆銷爛，唯食海蛤不消。

隨其糞出，用以爲藥，倍勝餘者。

鶴千歲則變蒼，又二千歲則變黑，所謂元鶴也。

猿五百歲化爲獾。

鷦鷯出南方，鳴常自呼，常向日而飛，畏霜露，早晚希出。有時夜飛，夜飛則以樹葉覆其背上。

吐綬鳥，一名功曹。

驢爲牡，馬爲牝，生騾。騾爲牝，馬爲牡，生驢。

秦始皇有七名馬：追風、白兔、躡景、奔電、飛翾、銅爵、神鳧。



鴛鴦水鳥鳬類也雌雄未嘗相離人得其一則一思而至死故曰匹鳥

兔口有缺尻有九孔

麋有牙而不能噬鹿有角而不能觸麋一名麋青州人謂麋爲麋

雀一名嘉賓言常棲集人家如賓客也

鷺一名天女又名鷺鳥

鵲一名神女

鴈一名鴈鳩

鳥一名孝鳥一名元鳥

鷄一名燭夜

狗一名黃耳

猿一名叅軍

羊一名髯鬚主簿

魚蟲第五

螢火一名耀夜一名景天一名熠燿一名丹良一名

燐一名丹鳥一名夜光一作燈腐草爲之食

蚊蚋



螻蛄一名天螻一名穀胡切一名碩鼠有五能而不

成伎術一飛不能過屋二緣不能窮木三沒不能窮

谷四掘不能覆身五走不能絕人

蟋蟀一名吟蛩一名蛩秋初生得寒則鳴一云濟南

呼爲懶婦

蝙蝠一名仙鼠一名飛鼠五百歲則色白腦重集則

頭垂故謂之倒折食之神仙

螯蟻小蟹生海邊泥中食土一名長啣其一有螯偏

大者名擁劍一名執火其螯赤故謂之執火云



長蚊蠓蛸也身小足長故謂長蚊

蠅虎蠅狐也形似蜘蛛而色灰白善捕蠅一名蠅蝗

一名蠅豹一本作豹子

莎雞一名促織一名絡緯一名蟋蟀促織謂鳴聲如

急織絡緯謂其鳴聲如紡績也促織一曰促機一名

紡績

蚯蚓一名蜿蟺一名曲蟺善長吟於地中江東謂之

歌女或謂之鳴砌

飛蛾善拂燈一名火花一名慕光



蠃蜒一名龍子。一曰守宮。善上樹捕蟬食之。其長細  
五色者。名爲蜥蜴。短大者名蠨蛸。一曰蛇醫。大者長  
三尺。其色元紺者。善螫人。一名元螭。一曰綠螭也。  
蜻蛉。一名青亭。一名胡蝶。色青而大者是也。小而黃  
者曰胡梨。一曰胡離。小而赤者曰赤卒。一名絳騶。一  
名赤衣使者。好集水上。亦名赤弁丈人。  
蛺蝶。一名野蛾。一名風蝶。江東呼爲撻末。色白背青  
者是也。其大如蝙蝠者。或黑色。或青斑。名爲鳳子。一

名鳳車。名龜車。生江南柑橘園中。



紺蝶一名蜻蛉似蜻蛉而色元紺遼東人呼爲紺幡亦曰童幡亦曰天雞好以七月羣飛暗天海邊夷貊食之謂海中青蝦化爲之也

魚子曰鮓亦曰鯢亦曰鮓言如散稻米也

鯉之大者曰鱣鱣之大者曰鮓

蜣螂能以土苞糞推轉成丸圓正無斜角莊周曰蜣

蜣之智在於轉丸一曰蜣蜣一曰轉丸一曰弄丸

蝸牛陵螺也形如蜣螂殼如小螺熱則自懸於葉下

野人結圓舍如蝸牛之殼故曰蝸舍亦曰蝸牛之舍



也。蝸殼宛轉有文章，絞轉爲結，似螺殼文，名曰螺縛。童子結髮，亦爲螺髻，亦謂其形似螺殼。

白魚赤尾者曰魮。音紅一曰魴，或云雌者曰白魚，雄者

曰魮魚。子好羣泳水上者，名曰白萍。

蝦蟇子曰蝌蚪。一曰元針，一曰元魚，形圓而尾大，尾

脫卽脚生。

烏賊魚，一名河伯，度事小吏。本草作虫，事小史。

兗州人呼赤鯉爲赤驥，謂青鯉爲青馬，黑鯉爲元駒。

白鯉爲白騏，黃鯉爲黃雄。



鯨魚者海魚也大者長千里小者數十丈一生數萬子常以五月六月就岸邊生子至七八月導從其子還大海中鼓浪成雷噴沫成雨水族驚畏皆逃匿莫敢當者其雌曰鯢大者亦長千里眼爲明月珠

水君狀如人乘馬衆魚皆導從之一名魚伯大水乃有之漢末有人於河際見之

人馬有鱗甲如大鯉魚但手足耳目鼻與人不異爾見人良久乃入水中

龜名元衣督郵鼈名河伯從事



江東呼青衣魚爲婢鱗呼童子魚爲土父呼鼃爲河伯使者

結草蟲一名結葦好於草末折屈草葉以爲巢窟處有之

古今注卷中終

古今注

卷中

七



古今注卷下

草木第六

甘實形如石榴者謂之壺甘。

六駿山中有木葉似豫章皮多癬駁。

白楊葉圓青楊葉長柳葉亦長細。

移楊圓葉弱蒂微風大搖一名高飛一名獨搖。

蒲柳生水邊葉似青楊一曰蒲楊。

移楊亦曰移柳亦曰蒲移。

水楊蒲楊也枝勁韌任大用又有赤楊霜降則葉赤。

材理亦赤也。

合歡樹似梧桐，枝葉繁，互相交結，每風來輒身相解，了不相牽綴。樹之階庭，使人不忿。嵇康種之舍前。

杜仲，皮中有絲，折之則見。

木蜜生南方，合體皆甜，嫩枝及葉皆可生噉，味如蜜。解悶止渴，其老枝及根幹堅不可食。細破煮之，煎以爲蜜，味倍甜濃糯。棗葉如柳，實似柿而小，味亦甘美。蘇枋木出扶南林邑外國，取細破煮之以染色。

翳或作鑿翳，木出交州，色黑而有文，亦謂之烏文木。



也

紫梅木出扶南，色紫，亦謂之紫檀。

荳一名治荳，葉似葛而實，長尺餘，可蒸食。一名荳菽。

狸豆一名狸沙，一名獵沙，葉似葛而實，大如李核，可啗食也。

虎豆一名虎沙，似狸豆而大，實如小兒拳，亦可食。

馬豆一名馬沙，似虎豆而小，實大如指，亦可食也。

荊葵一名戎葵，一名芘芣，華似木槿，而光色奪目，有



紅有紫有青有白有赤莖葉不殊但花色異耳一曰蜀葵

芙蓉一名荷華生池澤中實曰蓮花之最秀異者一名水芝一名水花色有赤白紅紫青黃紅白二色老多花大者至百葉

茨雞頭也一名鴈頭一名芰葉似荷而大葉上蹙皺如沸實有芒刺其中如米可以度饑也

葦連葉如鳥翅一名鳥羽一名鳳翼花大者其色多紅綠紅者紫點綠者紺點俗呼爲仙人花一名連額



花

酒杯藤出西域，藤大如臂，葉似葛花，實如梧桐實，花堅，皆可以酌酒，自有文章，映徹可愛，實大如指，味如荳蔻，香美消酒。土人提酒來，至藤下摘花酌酒，仍以實銷醒，國人寶之，不傳中土。張騫出大宛得之，事出張騫出關志。

烏孫國有青田核，莫測其樹實之形，至中國者，但得其核耳，得清水，則有酒味出，如醇美好酒，核大如六升瓠，空之以盛水，俄而成酒。劉章得兩核，集賓客設



之常供二十人之飲，一核盡，一核所盛以復飲，飲盡隨更注水，隨盡隨盛，不可久置，久置則苦不可飲，名曰青田酒。

枳椇子，一名樹蜜，一名木錫，實形拳曲，花在實外，味甜美如飴蜜，一名白石，一名白實，一名木石，一名木實，一名枳椇。

棘實爲棗，杼實爲豫，桑實爲椹，楮實爲任。

匏，瓠也，壺蘆，瓠之無柄者也，瓠有柄者，懸瓠可以爲笙，曲沃者尤善，秋乃可用之，則漌其裏，瓢亦瓠也，瓠



其總瓢其別也

羊躑躅，花黃，羊食之則死，羊見之則躑躅分散，故名羊躑躅。

漆樹以剛斧斫其皮，開以竹管承之，汁滴管中，卽成漆也。

稻之黏者爲黍，亦謂稌爲黍，禾之黏者爲黍，亦謂之稌，亦曰黃黍。九穀，黍稷稻粱三豆二麥。

荼蓼也，紫色者荼也，青色者蓼也，其味辛且苦，食明

目或謂紫葉者爲香茶，青者爲青茶，亦謂紫色者爲紫蓼。青色者爲青蓼，其長大不苦者爲高蓼。高或作馬蒜卵蒜也，俗人謂之小蒜。胡國有蒜，十許子共爲一株，籜幕裹之名爲胡蒜，尤辛於小蒜，俗人亦呼之爲大蒜。

揚州人謂蒻爲斑杖，不知食之。

荆楊人謂蒻爲蒻。

蒻荷似蒻苴而白，蒻苴色紫，花生根中，花未散時可食，久置則銷爛，不爲實矣。葉似薑，宜陰翳地種之，常



依陰而生。

燕支葉似薊，花似蒲公。出西方，土人以染，名爲燕支。中國人謂之紅藍，以染粉爲面色，謂爲燕支粉。今人以重絳爲燕支花所染也。燕支花非燕支所染，自爲紅藍爾。舊謂赤白之間爲紅，卽今所謂紅藍也。

苦葇，一名苦藏，子有裏，形如皮弁，始生青，熟則赤，裏有實，正圓如珠，亦隨裏青赤。長安兒童謂爲洛神珠。一曰王母珠，一曰皮弁草。

沈釀者，漢鄭宏爲靈文鄉嗇夫行官，京洛未至，宿一

埭，埭名沈釀，於埭逢故舊友人，四顧荒郊，村落絕遠，酤酒無處，情抱不伸，乃以錢投水中，依口而飲，飲盡酣暢，皆得大醉，因更爲沈釀川，明旦乃分首而去。

雜注第七

孫亮作流離屏風，鏤作瑞應圖，凡一百二十種。

魏武帝以馬瑙石爲馬勒，碑礫爲酒垆。

莫難珠，一名木難，色黃，出東夷。

陽燧，以銅爲之，形如鏡，向日則火生，以艾承之，則得火也。



長安婦人好爲盤桓髻。到于今其法不絕。墮馬髻。今無復作者。倭墮髻。一云墮馬之餘形也。

盤龍釵。梁冀婦所制。

梁冀改驚翠眉爲愁眉。

魏宮人好畫長眉。今多作翠眉。警鶴髻。

孫權時名舸爲赤馬。言如馬之走陸也。又以舟名馳馬。

驚帆。曹真有駛馬名爲驚帆。言其馳驟如烈風之舉帆疾也。



魏文帝宮人絕所愛者有莫瓊樹薛夜來田尚衣段巧笑四人。日夕在側。瓊樹乃制蟬鬢，縹眇如蟬，故曰蟬鬢。巧笑始以錦衣絲履作紫粉拂面，尚衣能歌舞，夜來善爲衣裳，一時冠絕。

問答釋義第八

程雅問董仲舒曰：自古何謂稱三皇五帝？對曰：三皇三才也，五帝五常也，三王三明也，五霸五嶽也。

牛亨問曰：將離別，相贈以芍藥者何？答曰：芍藥一名可離，故將別以贈之，亦猶相招召贈之以文無，文無



亦名當歸也。欲忘人之憂，則贈以丹棘。丹棘一名忘憂草。使人忘其憂也。欲蠲人之忿，則贈之青堂。青堂一名合懽。合懽則忘忿。

程雅問拾樗木一名無患者。昔有神巫名曰寶。

一本作寶

旣能符効百鬼，得鬼則以此爲棒殺之。世人相傳以此木爲衆鬼所畏，競取爲器用，以却厭邪鬼，故號曰無患也。

牛亨問曰：自古有書契已來，便應有筆。世稱蒙恬造筆，何也？答曰：蒙恬始造，卽秦筆耳。以枯木爲管，鹿毛



古今通纂卷之十一  
爲杜羊毛爲被，所謂蒼毫，非兔毫竹管也。又問彤管何也？答曰：彤者赤漆耳。史官載事，故以彤管。用赤心記事也。

孫興公問曰：世稱黃帝鍊丹於鑿硯山，乃得仙，乘龍上天，羣臣援龍鬚，鬚墜而生草，曰龍鬚，有之乎？答曰：無也。有龍鬚草，一名縉雲草，故世人爲之妄傳。至如今有虎鬚草，江東亦織以爲席，號曰西王母席，可復是西王母乘虎而墮其鬚也。

牛亨問曰：冕旒以繁露何也？答曰：綴珠垂下，重如繁



露也

程雅問曰堯設誹謗之木何也答曰今之華表木也以橫木交柱頭狀若花也形似桔槔大路交衢悉施焉或謂之表木以表王者納諫也亦以表識衢路也秦乃除之漢始復修焉今西京謂之交午也

牛亨問曰籍者何也答曰籍者尺二竹牒記人之年名字物色縣之宮門案省相應乃得入焉

程雅問曰凡傳者何也答曰凡傳皆以木爲之長五寸書符信於上又以一板封之皆封以御史印章所



以爲信也。如今之過所也。

牛亨問曰：草木生類乎？答曰：生類也。又曰：有識乎？答曰：無識也。又曰：無識寧得爲少類也？答曰：物有生而有識者，有生而無識者，有不生而有識者，有不生而無識者。夫生而有識者，蟲類也。生而無識者，草木也。不生而無識者，水土也。不生而有識者，鬼神也。

牛亨問曰：蟻各元駒者，何也？答曰：河內人並河而見人馬數千萬，皆如黍米，遊動往來，從旦至暮，家人以火燒之，人皆是蚊蚋，馬皆是大蟻。故今人呼蚊蚋曰



蟬曰元駒也

齊問曰蟬名齊女者何答曰齊王后忿而死尸變  
爲蟬登庭樹嘒嘒而鳴王悔恨故世名蟬曰齊女也

古今注卷下終

...

...



右崔豹古今注三卷見隋志子部其經部論語集義八卷下注晉尚書左中兵郎崔豹撰亦不詳何人今考豹字正熊燕國人惠帝時官至太傅丞見世說新語注及經典釋文敘錄而敘錄載豹官爵又同隋志然則豹亦能爲經學者也唐志又有伏侯古今注三卷乃漢順帝侍中伏無忌所撰詳見本傳後漢書天文五行志下所引古今注皆伏侯注也在崔豹前唐志以次豹後失考至後唐太常博士馬縞又推廣豹書爲中華古今注亦三卷其

門類則詳矣而不免重複通考錄馬書而遺崔注  
不知其於義何居汝上王謨識

古今注卷三  
同治志  
世  
人  
志  
中  
吳  
衣  
不  
特  
計



博物志叙

史稱張華讀書三十車作博物志四  
百武帝以爲繁存十卷今讀其書雖  
多竒聞異事而簡略不成大觀豈書  
傳旣久殘闕處多耶抑或繁非能博  
博不在繁耶辨龍鮓識劍氣定有一

段不經人見之學問附于書以傳一  
讀再讀令人悔武帝之芟除而思有  
以覩其全也

錢塘唐琳玉林父識



博物志目錄

卷一

地理略自魏氏甘巳前夏禹治四方而制之

卷二

山

水

山水總論

五方人氏

卷三

物產

卷二

外國

異人

異俗

異產

卷三

異獸

異鳥

異蟲



異魚

異草木

卷四

物性

物理

物類

藥物

藥論

食忌

藥術

戲術

卷五

方士

服食

辯方士

卷六

人名攷

文籍攷



地理攷

典禮攷

樂攷

服飾攷

器名攷

物名攷

卷七

卷八

卷八

史補

卷九

雜說上

卷十

雜說下

目錄終



博物志卷一

晉 張華著

南昌楊之湘校

余視山海經及禹貢爾雅說文地志雖曰悉備各有所不載者作略說出所不見麤言遠方陳山川位象吉凶有徵諸國境界犬牙相入春秋之後並相侵伐其土地不可具詳其山川地澤略而言之正國十二博物之士一覽而鑒焉

地理略自魏氏日已前夏禹治四方而制之

河圖括地象曰地南北三億三萬五千五百里地部



之位起形高大者有崑崙山廣萬里高萬一千里神物之所生聖人仙人之所集也出五色雲氣五色流水其泉南流入中國名曰河也其山中應於天最居中八十城布繞之中國東南隅居其一分是奸城也中國之城左濱海右通流沙方而言之萬五千里東至蓬萊西至隴右右跨京北前及衡岳堯舜土萬里時七千里亦無常隨德劣優也

堯別九州舜爲十二

秦前有藍田之鎮後有胡宛之塞左崤函右隴蜀西



通流沙險阻之國也。

蜀漢之士與秦同城。南跨邛笮。北阻褒斜。西卽隈礙。隔以劍閣。窮險極峻。獨守之國也。

周在中樞。西阻嶠谷。東望荆川。南面少室。北有太嶽。三河之分。雷風所起。四險之國也。

魏前枕黃河。背漳水。瞻王屋。望梁山。有藍田之寶。浮池之淵。

趙東臨九州。西瞻恒嶽。有沃淶之流。飛壺井陘之險。至於潁陽涿鹿之野。



燕却背沙漠。進臨易水。西至君都。東至於遼。長蛇帶塞。險陸相乘也。

齊南有長城。巨防陽關之險。北有河濟。足以爲固。越海而東。通於九夷。西界岱嶽。配林之險。坂固之國也。魯前有淮水。後有岱嶽。蒙羽之向。洙泗之流。大野廣土。曲阜尼丘。

宋北有泗水。南迄睢澗。有孟諸之澤。碭山之塞也。楚後背方城。前及衡嶽。左則彭蠡。右則九嶷。有江漢之流。實險阻之國也。



南越之國。與楚爲鄰。五嶺已前。至于南海。負海之邦。  
交趾之土。謂之南裔。  
吳左洞庭。右彭蠡。後瀆長江。南至豫章。水戒險阻之  
國也。

東越通海。處南北尾閭之間。三江流入南海。通東治  
嵩海。深險絕之國也。

衛南跨於河北。得洪水南過漢上。左通魯澤。右指黎  
山。

贊曰



地理廣大四海八方。遐遠別域。略以難詳。侯王設險。守固保疆。遠遮川塞。近備城隍。司察奸非。禁禦不良。勿恃危阨。恣其淫荒。無德則敗。有德則昌。安屋猶懼。乃可不怠。進用忠直。社稷永康。教民以孝。舜化以彰。地。

天地初不足。故女媧氏練五色石以補其闕。斷鼇足以立四極。其後共工氏與顓頊爭帝而怒。觸不周之山。折天柱。絕地維。故天後傾西北。日月星辰就焉。地不滿東南。故百川水注焉。



崑崙山北地轉下三千六百里有八元幽都方二十萬里地下有四柱四柱廣十萬里地有三千六百軸犬牙相奉

泰山一曰天孫言爲天帝孫也主召人魂魄東方萬物始成知人生命之長短

考靈耀曰地有四遊冬至地上北而西三萬里夏至地下南而東三萬里春秋二分其中矣地常動不止譬如人在舟而坐舟行而人不覺七戎六蠻九夷八狄形類不同而總謂之四海言皆近海海之言晦昏無

所覩也

地以名山爲輔佐。石爲之骨。川爲之脉。草木爲之毛。土爲之肉。三尺以上爲糞。三尺以下爲地。

山

五嶽華岱恒衡嵩

按北太行山而北去不知山所限極處亦如東海不知所窮盡也

石者金之根。甲石流精以生水。水生木。木含火。

水



漢北廣遠，中國人尠有至北海者。漢使驃騎將軍霍

去病北伐單于，至瀚海而還，有北海明矣。

周日用曰：余聞北海。

言蘇武牧羊之所。去年德甚邇，祇一池號北海。蘇武牧羊常在於是耳。此地見有蘇武湖，非北溟之海。

漢使張騫渡西海，至大秦，西海之濱有小崑崙，高萬仞，方八百里，東海廣漫，未聞有渡者。

南海短狹，未及西南夷以窮斷。今渡南海至交趾者，不絕也。

史記封禪書云：威宣燕昭遣人乘舟入海，有蓬萊方丈瀛州三神山，神人所集，欲採仙藥，蓋言先有至之。



者其鳥獸皆白，金銀爲宮闕，悉在渤海中，去人不遠。  
四瀆，河出崑崙墟，江出岷山，濟出王屋，淮出桐柏。

八流亦出名山，渭出鳥鼠，漢出嶓冢，洛出熊耳，涇出  
少室，汝出燕泉，泗出涪尾，沔出月台，沃出太山，水有  
五色，有濁有清，汝南有黃水，華山有黑水，汧水淵或  
生明珠而岸不枯。山澤通氣，以興雷雲，氣觸石，膚寸  
而合，不崇朝以雨。

江河水赤，名曰泣血，道路涉骸於河以處也。

山水總論



五嶽視三公。四瀆視諸侯。諸侯賞封內名山者通靈。助化位相亞也。故地動臣叛。名山崩。王道訖。川竭神去。國隨已亡。海投九仞之魚。流水涸。國之大誠也。澤浮舟。川水溢。臣盛君衰。百川沸騰。山冢卒崩。高岸爲谷。深谷爲陵。小人握命。君子陵遲。白黑不別。大亂之徵也。

援神契曰。五嶽之神聖。四瀆之精仁。河者水之伯。上應天漢。太山天帝孫也。主召人魂。東方萬物始成。故知人生命之長短。



五方人民

東方少陽日月所出山谷清其人佼好

西方少陰日月所入其土窈冥其人高鼻深目多毛

南方太陽土下水淺其人大口多傲

北方太陰土平廣深其人廣面縮頸

中央四析風雨交山谷峻其人端正

東南之人食水產西北之人食陸畜食水產者龜蛤

螺蚌以爲珍味不覺其腥臊也食陸畜者狸兔鼠雀

以爲珍味不覺其膾也



有山者採有水者漁山氣多男澤氣多女平衍氣仁  
高陵氣犯叢林氣戾故擇其所居居在高中之平下  
中之高則產好人

居無近絕溪羣冢狐蟲之所近此則死氣陰匿之處  
也

山居之民多癭腫疾由於飲泉之不流者今荆南諸  
山郡東多此疾瘰癧由踐土之無鹵者今江外諸山縣  
偏多此病也盧氏曰不然也在山南人有之北人及  
吳楚無此病蓋南出黑水水土然也如  
是不流泉井界  
尤無此病也

物產

地性含水土山泉者引地氣也。山有沙者生金。有穀者生玉。名山生神芝不死之草。上芝爲車馬。中芝爲人形。下芝爲六畜。土山多雲。鐵山多石。五土所宜。黃白宜種禾。黑墳宜麥黍。蒼赤宜菽芋。下泉宜稻。得其宜則利百倍。

和氣相感則生朱草。山出象車。澤出神馬。陵出黑丹。阜出土怪。江南大貝。海出明珠。仁主壽昌。民延壽命。天下太平。



名山大川孔穴相內和氣所出則生石脂玉膏食之不死神龍靈龜行於穴中矣

神宮在高石沼中有神人多麒麟琪芝神草有英泉飲之服三百歲乃覺不死去瑯琊四萬五千里

三珠樹生赤水之上

員丘山上有不死樹食之乃壽有赤泉飲之不老多大蛇爲人害不得居也

博物志卷一終



博物志卷二

外國

夷海內西北有軒轅國，在窮山之際，其不壽者八百歲，渚沃之野，鸞自舞，民食鳳卵，飲甘露。

白民國有乘黃，狀如狐，背上有角，乘之壽三千歲。

君子國，人衣冠帶劍，使兩虎，民衣野絲，好禮讓，不爭土千里，多薰華之草，民多疾風氣，故人不蕃息，好讓故爲君子國。

三苗國，昔唐堯以天下讓於虞，三苗之民非之，帝殺



有苗之民叛浮入南海爲三苗國

驩兜國其民盡似仙人帝堯司徒驩兜民常捕海島中人面鳥口去南國萬六千里盡似仙人也

大人國其人孕三十六年生白頭其兒則長大能乘雲而不能走蓋龍類去會稽四萬六千里

厭光國民光出口中形盡似猿猴黑色

結胃國有滅蒙鳥奇肱民善爲拭扛以殺百禽能爲

飛車從風遠行湯時西風至吹其車至豫州湯破其車不以視民十年東風至乃復作車遣返而其國去



玉門關四萬里。

羽民國，民有翼，飛不遠，多鸞鳥，民食其卵，去九疑四萬三千里。

穿胷國，昔禹平天下，會諸侯會稽之野，防風氏後到，殺之。夏德之盛，二龍降之，禹使范成光御之行域外，既周而還，至南海，經防風，防風氏之二臣以塗山之戮，見禹使怒而射之，迅風雷雨，二龍昇去，二臣恐，以刃自貫其心而死，禹哀之，乃拔其刃，療以不死之草，是爲穿胷民。



交趾民在穿胷東

孟舒國民人首鳥身其先主爲霄氏訓百官夏后之  
世始食卵孟舒去之鳳凰隨焉

異人

河圖玉版云龍伯國人長三十丈生萬八千歲而死  
大秦國人長十丈中秦國人長一丈臨洮人長三丈  
五尺

禹致宰臣於會稽防風氏後至戮而殺之其骨專車  
長狄喬如身橫九畝長五丈四尺或長十丈



秦始皇二十六年，有大人十二，見於臨洮，長五丈，足迹六尺，東海之外，大荒之中，有大人國，僬僥氏，長三丈，時含神霧。

日東北極人，長九丈。

東方有蟾蜍沃焦，防風氏，長三丈，短人處九寸，遠夷之名，雕題，黑齒穿胸，儋耳，大竺，歧首。

子利國人，一手二足，拳反曲。

無脊民，居穴食土，無男女，死埋之，其心不朽，百年還化爲人，細民，其肝不朽，百年而化爲人，皆穴居處，二



國同類也。

蒙雙民昔高陽氏有同產而爲夫婦帝放之此野相抱而死神鳥以不死草覆之七年男女皆活同頸二頭四手是蒙雙民

有一國亦在海中純女無男又說得一布衣從海浮出其身如中國人衣兩袖長二丈又得一破船隨波出在海岸邊有一人項中復有面生得與語不相通不食而死其地皆在沃沮東大海中南海外有鮫人水居如魚不廢織績其眼能泣珠



嘔絲之野有女子方跪據樹而嘔絲北海外也  
江陵有猛人能化爲虎俗又曰虎化爲人好著紫葛  
人足無踵

日南有野女羣行見丈夫狀鵠目裸袒無衣襦

### 異俗

越之東有駭沐之國其長子生則解而食之謂之宜  
弟之死則負其母而棄之言鬼妻不可與同居周日用日  
既其母爲鬼妻則其子爲鬼子亦合棄之矣

楚之南有炎人之國其親戚死朽之肉而棄之然後



埋其骨，乃爲孝也。

秦之西有義渠國，其親戚死，聚柴積而焚之，熏之卽

煙上，謂之登遐，然後爲孝。此上以爲政，下以爲俗，中

國未足爲非也。此事見墨子。

周日用曰：此事庶幾佛國之法，且如是乎中國。

之徒亦如此也。

荊州極西南界至蜀，諸民曰獠子。婦人妊娠七月而產，臨水生兒，便置水中。浮則取養之，沈便棄之。然千百多浮，旣長，皆拔去上齒牙各一，以爲身飾。

母正儉，遣王頎追高句麗王宮，盡沃沮東界，問其耆



老言國人常乘船捕魚，遭風吹數十日，東得一島上。有人言語不相曉，其俗常以七夕取童女沈海。

交州夷名曰俚子，俚子弓長數尺，箭長尺餘，以焦銅爲鏑，塗毒藥於鏑鋒，中人卽死。不時斂藏，卽彫服沸爛，須臾焦煎都盡，唯骨耳。其俗誓不以此藥治語人。治之，飲婦人月水及糞汁，時有差者，唯射猪犬者無他，以其食糞故也。焦銅者，故燒器，其長老唯別焦銅聲，以物杵之，徐聽其聲，得焦毒者，偏鑿取以爲箭鏑。景初中，蒼梧吏到京，云廣州西南，按交州數郡，桂林



晉興寧浦間，人有病將死，便有飛蟲，大如小麥，或云有甲，在舍上，人氣絕，來食亡者，雖復撲殺，有斗斛而來者，如風雨前後相尋續，不可斷截，肌肉都盡，唯餘骨在，更去盡，貧家無相纏者，或殯殮不時，皆受此弊，有佛力者，則以衣服布帛五六重裹亡者，此蟲惡梓木氣，卽以板鄣防左右，并以作器，此蟲便不敢近也，入交界更無轉近，郡亦有，但微少耳。

### 異產

漢武帝時，弱水西國有人乘毛車以渡弱水，來獻香。



者帝謂是常香，非中國之所乏，不禮其使，留久之。帝幸上林苑，西使干乘輿間，并奏其香。帝取之，看大如燕卵，三枚與棗相似。帝不悅，以付外庫。後長安中大疫，宮中皆疫病，帝不舉樂。西使乞見，請燒所貢香一枚，以辟疫氣。帝不得已，聽之。宮中病者，登日並差。長安中百里咸聞香氣，芳積九月餘日，香猶不歇。帝乃厚禮發遣，餞送。

一說漢制獻香不滿斤。西使臨去，乃發香氣如大豆者，拭著宮門，香氣聞長安數十里，經數日乃歇。



漢武帝時，西海國有獻膠五兩者，帝以付外庫。餘膠半兩，西使佩以自隨。後從武帝射於甘泉宮，帝弓弦斷，從者欲更張弦。西使乃進，乞以所送餘香膠續之。座上左右莫不怪。西使乃以口濡膠，爲以住斷弦。兩頭相連，注弦遂相著。帝乃使力士各引其一頭，終不相離。西使曰：「可以射終日不斷。」帝大怪，左右稱奇，因名曰續弦膠。

周書曰：西域獻火浣布。昆吾氏獻切玉刀。火浣布，汗則燒之，則潔。刀切玉如臍。布，漢世有獻者，刀則未聞。



魏文帝黃初三年，武都西都尉王褒獻石膽二十斤，四年獻三斤。

臨邛火井一所，從廣五尺，深二三丈，井在縣南百里。昔時人以竹木投以取火，諸葛丞相往視之，後火轉盛熱，盆蓋井上，煮鹽得鹽，入以家火，卽滅，訖今不復燃也。酒泉延壽縣南山名火泉，火出如炬。

徐公曰：西域使王暢說石流黃出足彌山，去高昌八百里，有石流黃數十丈，從廣五六十畝，有取流黃晝視孔中，上狀如煙，而高數尺，夜視皆如燈光明，高尺

餘暢所親見之也言時氣不和皆往保此山



博物志卷三

異獸

漢武帝時大宛之北胡人有獻一物大如狗然聲能  
驚人雞犬聞之皆走名曰猛獸帝見之怪其細小及  
出苑中欲使虎狼食之虎見此獸卽低頭著地帝爲  
反觀見虎如此謂欲下頭作勢起搏殺之而此獸見  
虎甚喜舐唇搖尾徑往虎頭上立因搗虎面虎乃閉  
目低頭匍匐不敢動搗鼻下去下去之後虎尾下頭  
去此獸顧之虎輒閉目



後魏武帝伐冒頓經白狼山逢師子使人格之殺傷  
甚衆王乃自率常從軍數百擊之師子哮吼奮起左  
右咸驚王忽見一物從林中出如狸起上王車輓師  
子將至此獸便跳起在師子頭上卽伏不敢起於是  
遂殺之得師子一還來至洛陽三千里雞犬皆伏無  
鳴吠

九真有神牛乃生谿上黑出時其鬪卽海沸黃或出  
鬪岸上家牛皆怖人或遮則霹靂號曰神牛

昔日南貢四象各有雌雄其一雄死於九真乃至南



海百有餘日其雌塗土著身不飲食空草長史問其所以聞之輒流涕

越雋國有牛稍割取肉牛不死經日肉生如故

大宛國有汗血馬天馬種漢魏西域時有獻者

文馬赤鬣身白似若黃金名吉黃之乘復薊之露犬也能飛食虎豹

蜀山南高山上有物如獼猴長七尺能人行健走名曰猴猱一名化或曰猱猱同行道婦女有好者輒盜之以去人不得知行者或每遇其旁皆以長繩相引



然故不免此得男女氣自死故取男也取去爲室家  
其年少者終身不得還十年之後形皆類之意亦迷  
惑不復思歸有子者輒俱送還其家產子皆如人有  
不食養者其母輒死故無不敢養也及長與人無異  
皆以楊爲姓故今蜀中西界多謂楊率皆獼猴化之  
子孫時時相有獼爪者也

小山有獸其形好鼓一足如螽澤有委蛇狀如轂長  
如轂見之者霸

猩猩若黃狗人面能言



異鳥

崇正山有鳥一足二翼二目相得而飛名曰蜚見則吉良乘之壽千歲

北翼鳥一青一赤在參嵎山

有鳥如鳥文首白喙赤足曰精衛故精衛常取西山之木石以填東海

越地深山有鳥如鳩青色名曰治鳥穿大樹作巢如升器其戶口徑數寸周飾以土堊赤白相次狀如射侯伐木見此樹卽避之去或夜冥人不見鳥鳥亦知

人不見已也。鳴曰咄咄去。明日便宜急上樹去。咄咄  
下去。明日便宜急下。若使去。但言笑而不已者。可止  
伐也。若有穢惡及犯其止者。則虎通夕來守。人不  
知者。卽害人。此鳥白日見其形。爲也。夜聽其鳴。人  
也。時觀樂。便作人悲喜形。長三尺。澗中取石蟹。就  
人火。聞炙之。不可犯也。越人謂此鳥爲越祝之祖。

### 異蟲

南方有落頭蟲。其頭能飛。其種人常有所祭祀。號曰  
蟲落。故因取之焉。以其飛因服。便去以耳爲翼。將曉



還復著體吳時往往得此人也

江南山谿中水射工蟲甲類也長一二寸口中有弩

形氣射人影隨所著處發瘡不治則殺人今鸚鵡蟲

溺人影亦隨所著處生瘡

盧氏日以雞腸草搗塗經日即愈周日用日萬物皆

有所相感愚聞以霹靂木擊鳥影其鳥應時落地雖未嘗試以是類知必有之

蝮蛇秋月毒盛無所蜇螫草木以泄其氣草木即

死人樵採設爲草木所傷刺者亦殺人毒治於蝮齧

謂之蛇迹也

華山有蛇名肥遺六足四翼見則天下大旱

常山之蛇名率然有兩頭觸其一頭頭至觸其中則  
兩頭俱至孫武以喻善用兵者

異魚

南海有鰐魚狀似鼉斬其頭而乾之去齒而更生如  
此者三乃止

東海有半體魚其形狀如牛剝其皮懸之潮水至則  
毛起潮去則毛伏

東海蛟錯魚生子子驚還入母腸尋復出

吳王江行食鱸有餘棄於中流化爲魚今魚中有名



吳王鱮餘者長數寸大者如箸猶有鱮形

廣陵陳登食鱮作病華佗下之膾頭皆成蟲尾猶是鱮

東海有物狀如凝血從廣數尺方員名曰鮓魚無頭目處所內無藏衆蝦附之隨其東西人煮食之

### 異草木

太原晉陽以此生屏風草

海上有草焉名篩

篩音師

其實食之如大麥七月稔熟

名曰自然谷或曰禹餘糧

堯時有屈佚草生於庭，佞人入朝，則屈而指之，一名  
指佞草。

右詹山帝女，化爲詹草，其葉鬱茂，其華黃實如豆，服  
者媚於人。

止些山多竹，長千仞，鳳食其實，去九疑萬八千里。

江南諸山郡中，大樹斷倒者，經春夏生菌，謂之樵食  
之，有味而忽毒殺人，云此物往往自有毒者，或云蛇  
所著之，楓樹生者，啖之令人笑不得止，治之飲上漿  
卽愈。



博物志卷四

物性

九竅者胎化。八竅者卵生。龜鼈皆此類。或卵生影伏。  
白鵠雄雌相視則孕。或曰雄鳴上風則雌孕。

兔舐毫望月而孕。口中吐子。舊有此說。余自所見也。  
大腰無雄。龜鼈類也。無雄與蛇通氣則孕。細腰無雌。  
蜂類也。

取桑蠶則阜螽子。呪而成子。詩云螟蛉之子。蜾蠃負  
之是也。



蠶三化先孕而後交不交者亦產子子後爲蠶皆無  
眉目易傷收採亦薄

鳥雌雄不可別翼右掩左雄左掩右雌二足而翼謂  
之禽四足而毛謂之獸

鵲巢門戶背太歲得非才智也

鵲雉長尾雨雪惜其尾栖高樹杪不敢下食往往餓  
死魏景初中天下所說

鵲水鳥也伏卵時卵冷則不沸取礬石周繞卵以時  
助燥氣故方術家以鵲中礬石



山雞有美毛，自愛其色，終日映水，目眩則溺死。  
龜三千歲，遊於蓮葉，巢於卷耳之上。

屠龜解其肌肉，唯腸連其頭，而經日不死，猶能齧物。  
鳥往食之，則爲所得。漁者或以張鳥，神蛇復續。

蟾蜍以背行，快於足。

周官云：貉不渡汶水，鸛不渡濟水。魯國無鸛，鵠來巢。  
記異也。

橘渡江北，化爲枳。今之江東，甚有枳橘。  
百足一名馬蛇，中斷成兩段，各行而去。

物理

凡月暈隨灰畫之隨所畫而闕

淮南子云未詳其法

麒麟闕而日蝕鯨魚死則彗星出嬰兒號婦乳出

莊子曰地三年種蜀黍其後七年多蛇

積艾草三年後燒津液下流成鉛錫已試有驗

煎麻油水氣盡無煙不復沸則還冷可內手攪之得

水則焰起散卒不滅此亦試之有驗

庭州灑水以金銀鐵器盛之皆漏唯瓠葉不漏

龍肉以醢漬之則文章生



積油滿萬石。則自然生火。武帝泰始中。武庫火。積油所致。

物類

燒鉛錫成胡粉。猶類也。

燒丹朱成水銀。則不類。物同類異用者。

魏文帝所記諸物相似亂者。

武夫怪石似美玉。蛇床亂藤蕪。薺芄亂人參。

杜衡亂細辛。雄黃似石流黃。鰕魚相亂。以有

大小相異。敵休亂門冬。百部似門冬。房葵

博物志  
似狼毒。鉤吻草與苕華相似。拔楔與萆薢相  
似。一名狗脊。

藥物

烏頭天雄附子一物。春秋冬夏採各異也。

遠志苗曰小草。根曰遠志。

芎藭苗曰江蘼。根曰芎藭。

菊有二種。苗花如一。唯味小異。苦者不中食。

野葛食之殺人。家葛種之三年不收。後旅生亦不可

食。



神仙傳云松柏脂入地千年化爲茯苓。茯苓化爲琥珀。琥珀一名江珠。今泰山出茯苓而無琥珀。益州永昌出琥珀而無茯苓。或云燒蜂巢所作。未詳此二說。地黃藍首斷心分根菜種皆生。女蘿寄生兔絲。兔絲寄生木上。生根不著地。

堇花朝生夕死。

### 藥論

神農經曰。上藥養命。爲五石之練形。六芝之延年也。中藥養性。合歡蠲忿。萱草忘憂。下藥治病。謂大黃除

實當歸止痛。夫命之所以延。性之所以利。痛之所以止。當其藥應以痛也。違其藥。失其應。卽怨天尤人。設鬼神矣。

神農經曰。藥物有大毒。不可入口鼻耳目者。卽殺人。

一曰鉤吻。盧氏曰。陰也。黃精不相連根。苗獨生者是也。二曰鴟狀如雌雞。生中山。三日陰命赤

色著木。懸其子。山海中。四曰內童狀如鵞。亦生海中。五曰鳩羽如雀。黑頭赤喙。亦曰螭。螭生海中。雄曰螭。

雌曰螭。蛭也。

神農經曰。藥種有五物。一曰狼毒。占斯解之。二曰巴

豆。藿汁解之。三曰人參湯解之。四曰天雄烏頭。大豆



解之五日班茅戎鹽解之毒采害小兒乳汁解先食

飲二升

食忌

人啖豆三年則身重行止難

啖榆則眠不欲覺

啖麥稼令人力健行

飲真茶令人少眠

人常食小豆令人肥肌癯燥

食驚麥令人骨節斷解

人食鸞肉不可食水爲蛟龍所吞

人食冬葵爲狗所齧瘡不差或致死

馬食穀則足重不能行

雁食粟則翼重不能飛

藥術

胡粉白石灰等以水和之塗鬚鬚不白塗訖著油  
裏令溫煖候欲燥未燥間洗之湯則不得著晚則多  
折用暖湯洗訖澤塗之欲染當熱洗鬚鬚有膩不著  
藥臨染時亦當拭鬚燥溫之



陳蔡子微火炒令爆，咤散著熟地，遍踢之，朝種暮生，遠不過經宿耳。

陳蔡子秋種，覆蓋令經冬不死，春有子也。

周日用日，愚聞熟地。

植生菜蘭，擣石流黃篩於其上，以盆覆之，卽時可待。又以變白牡丹爲五色，皆以沃其根，以紫草汁則變之紫，紅花汁則變紅，並未試於理可焉。此出爾雅。

燒馬蹄羊角成灰，春夏散著濕地，生羅勒。

蟹漆相合，成爲神仙藥，服食方云。

### 戲術

削木令圓，舉以向日，以艾於後承其影，則得火。



取火法如用珠取火多有說者此未試

神農本草云雞卵可作琥珀其法取伏卵段黃白渾  
雜者煮及尚軟隨意刻作物以苦酒漬數宿既堅內  
著粉中佳者乃亂真矣此世所恒用作無不成者  
燒白石作白灰既訖積著地經日俱冷遇雨及水澆  
即便燃煙焰起

五月五日埋蜻蜓頭於西向戶下埋至三日不食則  
化成青真珠又云埋於正中門

蜥蜴或名蜥蜴以器養之以朱砂體盡赤所食滿七



斤治擣萬杵黥女人支體終年不滅唯房室事則滅  
故號守宮傳云東方朔漢武帝試之有驗  
取鼈挫令如碁子大擣赤莧汁和合厚以茅苞五六  
日中作投地中經旬鬱鬱盡成鼈也

博物志卷四終

博物志

卷四

十



博物志卷五

方士

魏武帝好養性法，亦解方藥，招引四方之術士，如左  
元放、華佗之徒，無不畢至。周日用曰：曹雖好奇而心  
道異，如何招引方術之人  
乎？如左元放而兼見殺者，若非變化已至滅身故  
有道者，不合親之矣。既要試術，即可乎。

魏王所集方士名

上黨王真 隴西封君達 甘陵甘始 魯女生

譙國華佗字元化 東郭延年 冷壽光 唐霄

河南卜式 張貂 汝南費長房 薊子訓 鮮奴

辛 魏國軍吏河南趙聖卿 陽城郅儉字孟節

廬江左慈字元放

右十六人，魏文帝東阿王、仲長統所說，皆能斷穀不食，分形隱沒，出入不由門戶。左慈能變形，幻人視聽，厭刻鬼魅，皆此類也。周禮所謂怪民，王制稱挾左道者也。

魏時方士甘陵甘始

廬江有左慈，陽城有郅儉，始能行氣導引。慈曉房中之術，善辟穀不食，悉號二百歲人。凡如此之徒，武帝



皆集之於魏，不使遊散。廿始老而少容。曹子建密問其所行，始言本師姓韓，字世雄，嘗與師於南海作金投數萬斤於海，又取鯉魚一隻，鯉遊行沈浮，有若處淵，其無藥者已熟而食，言此藥去此踰遠萬里，已不可行，不能得也。

皇甫隆遇青牛道士，姓封名君達，其餘養性法即可放用。大略云：體欲常少，勞無過虛，食去肥濃，節酸鹹，減思慮，損喜怒，除馳逐，慎房室，施瀉，秋冬閉藏，別篇武帝行之有效。



文帝典論曰、陳思王曹植、辯道論云、世有吾王、悉招至之、甘陵有甘始、廬江有左慈、陽城有郗儉、始能行氣、儉善辟穀、悉號三百歲人、自王與太子及余之兄弟、咸以爲調笑、不全信之、然嘗試郗儉、辟穀百日、猶與寢處、行步起居自若也、夫人不食七日則死、而儉乃能如是、左慈修房中之術、可以終命、然非有至情、莫能行也、甘始老而少容、自諸術士咸共歸之、王使郗孟節主領諸人、

近魏明帝時、河東有焦生者、裸而不衣、處火不焦、入



冰不凍杜恕爲太守親所呼見皆有實事

周日用曰焦孝然居

河東一菴大雪菴倒人已爲死而視之蒸氣於雪略無變色時或折薪惠人而已故魏書云目義皇以來

一人而已

潁川陳元方韓元長時之通才者所以並信有仙者其父時所傳聞河南密縣有成公其人出行不知所至復來還語其家云我得仙因與家人辭訣而去其步漸高良久乃沒而不見至今密縣傳其仙去二君以信有仙蓋由此也

周日用曰豈惟二子乎

桓譚新論說方士有董仲君罪繫獄佯死臭自陷出



既而復生

黃帝問天老曰天地所生豈有食之令人不死者乎

天老曰太陽之草名曰黃精餌而食之可以長生太

陰之草名曰鉤吻不可食入口立死人信鉤吻之殺

人不信黃精之益壽不亦惑乎周日用日草既殺人仍無益壽者也若殺

人無驗則益

壽不可信矣

### 服食

左元放荒年法擇大豆麤細調勻必生熟按之令有光煙氣徹豆心內先不食一日以冷水頓服訖其魚



肉菜果不得復經口渴卽飲水慎不可煖飲初小困  
十數日後體力壯健不復思食

鮫法服三升爲劑亦當隨食先食多少增損之盛豐  
欲還者煮葵子及脂蘇服肉羹漸漸飲之須豆下乃

可食豆未盡而以實物腸塞則殺人矣此未試或以

爲然

周日用曰一說臙塗黏餅炙餅今熱卽塗之以  
意量多少卽食之如常渴卽飲冷水忌熱茶耳

孔子家語曰食水者乃耐寒而苦浮食土者無心不  
息食木者多而不治食石者肥澤而不老食草者善  
走而愚食桑者有緒而蛾食肉者勇而悍食氣者神



明而壽、食穀者智慧而天不食者不死而神仙傳曰  
維食者百病妖邪之所鍾焉。

西域有蒲萄酒。積年不敗。彼俗云可十年飲之。醉彌  
月乃解。

所食逾少、心開逾益、所食逾多、心逾塞、年逾損焉。

辨方士

漢淮南王謀反被誅、亦云得道輕舉。

周日用曰漢書云淮南自刑應

不然乎。得道輕舉非虛事也。至今維陽境內馬迹猶  
存。且口與成公同處。皆上品真人耳。旣談道德肯圖  
叛逆之事。况恒行陰旨好書鼓不善弋獵。淮南內書  
言神仙黃白之術去反事遠矣。夫古今書傳多黜仙



道者處帝王公侯廢萬幾而慕其道故隱而不書唯  
老聃不可掩而云二百歲後西遊流沙不知所之唐  
書云蜀有女道士謝自然白日  
上昇此外歷代史籍未嘗言也

鉤弋夫人被殺於雲陽而言尸解柩空

周日用日史云夫人被大

風拔樹揚沙揭石亦不云尸解柩空

文典論云議郎李覃學郊儉辟穀食茯苓飲水中不  
寒洩痢殆至殞命軍祭酒宏農董芬學甘始鵠視狼  
頭呼吸吐納爲之過差氣閉不通良久乃蘇寺人嚴  
峻就左慈學補導之術闇豎真無事於斯而逐聲若  
此



又云王仲統云甘始左元放東郭延年行容成御婦人法並爲丞相所錄間行其術亦得其驗降就道士劉景受雲母九子元方年三百歲莫知所在武帝恒御此藥亦云有驗劉德治淮南王獄得枕中鴻寶秘書及子向咸而奇之信黃白之術可成謂神仙之道可致卒亦無驗乃以罹罪也

周日用曰神仙之道學之匪一朝一夕而可得

黃白者也仍須有分昇騰者應須有骨安可偶然而得效也

劉根不覺饑渴或謂能忍盈虛王仲都當盛夏之月十鑪火炙之不熱當嚴冬之時裸之而不寒恒君山



以爲性耐寒暑君山以無仙道好奇者爲之前者已  
述焉

司馬遷云無堯以天下讓許由事揚雄亦云誇大者  
爲之揚雄又云無仙道桓譚亦同

博物志

卷五



博物志卷六

人名攷

昔彼高陽，是生伯翳。布土取帝之息壤，以填洪水。

殷三仁：微子、箕子、比干。

文王四友：南宮括、散宜生、闕天、太顛。仲尼四友：顏淵、

子貢、子路、子張。

曹參字伯敬。

蔡伯喈母，袁公妹。曜卿姑也。

古之善射者，甘蠅。蠅之弟子曰飛衛。



平原管輅善卜筮解鳥語

蔡邕有書萬卷漢末年載數車與王粲粲亡後相國  
掾魏諷謀反粲子與焉既被誅邕所與粲書悉入粲  
族子葉字長緒卽正宗父正宗卽輔嗣兄也初粲與  
族兄凱避地荊州依劉表表有女表愛粲才欲以妻  
之嫌其形陋周率乃謂曰君才過人而體貌躁非女  
聳才凱有風貌乃妻凱生葉卽女所生

太正長陳寔寔子鴻臚卿紀紀子司空羣羣子泰四  
世於漢魏二朝有重名而其德漸小減故時人爲其



語曰公慙卿卿慙長

文籍攷

聖人制作曰經賢者著述曰傳。鄭元注毛詩曰箋。不解此意。或云毛公嘗爲北海郡守。元是此郡人。故以爲敬。

何休注公羊傳云何氏學。又不能解者。或答云休謙詞受學於師。乃宜此義。不出於已。此言爲允。

太古書今見存有神農經。山海經。或云禹所作周易。蔡邕云禮記月令。周公作。

周日用日禮記疏云第一是呂不韋春秋明呂氏所

制蔡邕云周公未之詳也

謚法司馬法周公所作

余友下邳陳德龍謂余言曰靈光殿賦南郡宜城王子山所作子山嘗之泰山從鮑子真學算過魯國都殿而賦之還歸本州溺死湘水時年二十餘也

地理攷

周自后稷至於文武皆都關中號爲宗周秦爲阿房殿在長安西南二十里殿東西千步南北三百步上可以坐萬人庭中受十萬人二世爲趙高所殺於宜



春宮在杜城南三里，葬於旁。

周時德澤盛，高大以爲宮柱，名曰蒿宮。

姜原祠祠在河城，長安西南三十里。

盜跖冢在大陂縣西。

趙鞅冢在臨水縣界。

始皇陵在驪山之北，高數十丈，周迴六七里，今在陰

盤縣界北，陵雖高大，不足以銷六丈，冰背陵郭，使東

西流，又此山名運，取大石於渭北渚，故歌曰：運石甘

泉口，渭水爲不流，千人唱，萬人鈞，金陵餘石大如壠。



土屋其銷功力皆如此類。盧氏曰秦氏奢侈自知葬

麓從難發也高則難上固則難攻項

羽爭衡之時發其陵未詳其至棺否

舊洛陽字作水邊各火行也忌水故去水而加佳又  
魏於行次爲土水得土而流土得水而柔故復佳加  
水變雒爲洛焉

洞庭君山帝之二女居之曰湘夫人又荊州圖經曰  
湘君所遊故曰君山

南荆賦江陵有臺甚大而有柱衆木皆拱之

典禮攷



三讓。一曰讓禮，二曰固讓，三曰終讓。

漢承秦羣臣上書皆曰昧死言。

王莽盜位慕古，去昧死曰稽首。光武因而不改。

肉刑明王之制，荀卿每論之。至漢文帝感太倉公女之言而廢之。班固著論宜復，迄漢末魏初陳紀又論宜申古制。孔融云不可復，欲申之。鍾繇王朗不同，遂寢。夏侯元、李勝、曹羲、丁謐建私議各有彼此，多云時未可復，故遂道焉。

上公備物九錫，一大輅各一元牡，二駟，二裘冕之服。



亦舄副之三軒懸之樂六佾之舞四朱戶以居五綳  
陛以登六虎賁之士三百人七鈇鉞各一八彤弓一  
彤矢百茲弓十茲矢千九秬鬯一卣珪瓚副之

樂攷

漢末喪亂無金石之樂。魏武帝至漢中得杜夔舊法  
始後設軒懸鐘磬。至於今用之於夔也。

服飾攷

漢末喪亂絕無玉佩始復作之。今之玉佩受於王粲  
古者男子皆絲衣有故乃素服。又有冠無幘故雖



事皆著冠也

漢中興士人皆冠葛巾，建安中

魏武帝造白帟，於是遂廢。唯二學書生猶著也。

器名攷

寶劍名鈍鉤湛盧豪曹魚腸巨闕五劍皆歐冶子所作。龍泉太阿上市三劍皆楚王者。

風胡子因吳請干將，歐冶子作干將，陽龍文，莫邪陰漫

理。此二劍，吳王使干將作莫邪，干將妻也。

夫妻甚真作劍也

亦刀，周之寶器也。

物名攷

古駿馬有飛兔腰裏。

周穆王八駿。

赤驥

飛黃

白驤

華驪

騄耳

騊駼

渠黃

盜驪

唐公有驪驪。

項羽有騅。

周日用曰曹公有流影而呂有赤兔皆後來有良駿也

周穆王有犬名耗毛白。

晉靈公有畜狗名獒。

韓國有黑犬名盧。



宋有駿犬曰讎。

犬四尺爲獒。

張騫使西域還乃得胡桃種。

徐州人謂塵土爲蓬塊。吳人謂跋跌。

博物志卷六終

博物志

卷六

六

人南風土之氣熱與人相類

人南風土之氣熱與人相類

人南風土之氣熱與人相類

人南風土之氣熱與人相類



博物志卷七

異聞

昔夏禹觀河見長人魚身出曰吾河精豈河伯也  
馮夷華陰潼鄉人也得仙道化爲河伯豈道同哉仙  
夷乘龍虎水神乘魚龍其行恍惚萬里如室

夏桀之時爲長夜宮於深谷之中男女雜處十旬不  
出聽政天乃大風揚沙一夕填此宮谷又曰石室瑤  
臺關龍逢諫桀言曰吾之有民如天之有日日亡我  
則亡以爲龍逢妖言而殺之其後山復於谷下及在



上耆老相與諫，桀又以爲妖言而殺之。

夏桀之時，費昌之河上見二日，在東者爛爛將起，在西者沉沉將滅，若疾雷之聲。昌問於馮夷曰：「何者爲殷？何者爲夏？」馮夷曰：「西夏東殷，於是費昌徙族歸殷。」武王伐紂，至盟津，渡河，大風波，武王操戈秉麾麾之，風波立霽。

魯陽公與韓戰，酣而日暮，援戈麾之，日日反三舍。

太公爲灌壇令，武王夢婦人當道夜哭，問之曰：「吾是東海神女，嫁於西海神童，今灌壇令當道廢我行，我



行必有大風雨而太公有德吾不敢以暴風雨過是  
毀君德武王至明日召太公三日三夜果有疾風暴  
雨從太公邑外過

晉文公出大蛇當道如拱文公反修德使吏守蛇吏  
夢天殺蛇曰何故當聖君道覺而視蛇則自死也

齊景公伐宋過泰山夢二人怒公謂太公之神晏子  
謂宋祖湯與伊尹也爲言其狀湯皙容多髮伊尹黑  
而短卽所夢也景公進軍不聽軍鼓毀公怒散軍伐  
宋



徐偃王志云、徐君宮人娠而生卵、以爲不祥、棄之水濱、獨孤母有犬、名鵠蒼、獵於水濱、得所棄卵、銜以東歸、獨孤母以爲異、覆煖之、遂跽成兒、生時正偃、故以爲名、徐君宮中聞之、乃更錄取、長而仁智、襲君徐國、後鵠蒼臨死、生角而九尾、實黃龍也、偃王又葬之徐界中、今見狗襲、偃王旣其國、仁義著聞、欲舟行上國、乃通溝陳蔡之間、得朱弓矢、以已得天瑞、遂因名、偃王自稱徐偃王、江淮諸侯皆伏從、伏從者三十六國、周王聞、遣使乘駟、一日至楚、使伐之、偃王仁、不忍。



其民爲楚所敗，逃走彭城武原縣東山下，百姓隨之者以萬數。後遂名其山爲徐山，山上立石室，有神靈，民人祈禱，今皆見存。

海水西，夸父與日相逐，走渴，飲水河，謂不足，北飲大澤，未至，渴而死，棄其策杖，化爲鄧林。

澹臺子羽渡河，齎千金之璧於河，河伯欲之。至陽侯波起，兩蛟挾船，子羽左搯璧，右操劍，擊蛟，皆死。旣渡，三投璧於河，伯躍而歸之。子羽毀而去。

荊軻，字次非，渡鮫夾，船次非不奏，斷其頭，而風波靜。



除周日用曰余嘗行經荊將軍墓墓與羊霸哀冢鄰  
若安伯施云爲荊將軍所伐乃在此也其地在苑  
陵之源求見其墓碑將  
軍名乃作次非字也

東阿王勇士有蕃正訢過神淵使飲馬馬沉訢朝服  
拔劍二日一夜殺二蛟一龍而出雷隨擊之七日夜  
眇其左目

漢滕公薨求葬東都門外公卿送喪駟馬不行踞地  
悲鳴跑蹄下地得石有銘曰佳城鬱鬱三千年見白  
日吁嗟滕公居此室遂葬焉

衛靈公葬得石槨銘曰不逢箕子靈公奪我里



漢西都時，南宮寢殿內有醇儒王史威長，死葬銘曰：明明哲士，知存知亡。崇隴原壘，非寧非康。不封不樹，作靈乘光。厥銘何依？王史威長。

元始元年中，謁者沛郡史岑上書訟王宏奪董賢璽綬之功。靈帝和光元年，遼西太守黃翻上言：海邊有流屍，露冠絳衣，體貌完全，使翻感夢云：我伯夷之弟孤竹君也。海水壞吾棺槨，求見掩藏。民有襁褓視皆無辜而卒。

漢孝關中大亂，有發前漢時冢者，人猶活。既出平復。



如舊。魏郭后愛念之，錄著宮內，常置左右，問漢時宮  
中事，說之了了，皆有次序。后崩，哭泣過禮，遂死。爰  
漢末，發范友明冢，奴猶活。友明霍光女，聲說光家事，  
廢立之際，多與漢書相似。此奴常遊走於民間，無止  
住處，今不知所在。或云尚存，余聞之於人，可信而目  
不可見也。

大司馬曹休所統中郎謝琇部曲義兵奚儂恩女年  
四歲，病沒故，埋葬。五日復生。太和三年，詔令休使父  
母歸。恩女來視，其年四月三日病死，四日埋葬。至



八日同墟入採桑聞兒生活今能飲食如常

京兆都張潛客居遼東還後爲駙馬都尉關內侯表  
言故爲諸生太學時聞故太尉常山張顥爲梁相天  
新雨後有鳥如山鵲飛翔近地市人擲之稍下墮民  
爭取之卽爲一員石言縣府顥令槌破之得一金印  
文曰忠孝侯印顥表上之藏於官庫後議郎汝南樊  
行夷按書東觀表上言堯舜之時舊有此官今天降  
印宜可復置

孝武建元四年天雨粟孝元景寧元年南陽郡內雨

穀小者如黍粟而青黑味苦大者如大豆赤黃味如  
麥下三日生根葉狀如大豆初生時也

代城始築立板幹一旦亡西南四五十板於澤中自  
立結草爲外門因就營築焉故其城直周三十七里  
爲九門故城處爲束城



博物志卷八

史補

黃帝登仙，其臣左徹者，削木象黃帝，帥諸侯以朝之。七年不還，左徹乃立顓頊。左徹亦仙去也。

堯之二女，舜之二妃，曰湘夫人。舜崩，二妃啼，以涕揮竹，竹盡斑。

處士東里塊，責禹亂天下事，禹退作三章，強者攻，弱者守，敵戰城郭，蓋禹始也。

大妣夢見商之庭產棘，乃小子發取，周庭梓樹，樹之。



于闕聞梓化爲松栢械柞，覺驚以告文王。文王曰：「慎勿言，冬日之陽，夏日之餘，不召而萬物自來，天道尚左，日月西移，地道尚右，水潦東流，天不享於殷，自發之未，生於今十年，禹羊在牧，水潦東流，天下飛鴻滿野，日之出地，無移照乎。」

武王伐殷，舍於幾逢，大雨焉，率輿三百乘，甲三千一百，一夜行三百里，以戰於牧野。

成王冠，周公使祝雍曰：「辭達而勿多也。」祝雍曰：「近於民，遠於侯，近於義，嗇於時，惠於財，任賢使能，陛下攜。」



顯先帝光耀以奉皇天之嘉祿。欽順仲壹之言曰。遵  
並大道。郊域康阜。萬國之休靈始明元服。推遠童稚  
之幼志。宏積文武之就德。肅懃高祖之清廟。六合之  
內。靡不蒙德。歲歲與天無極。右孝昭用成王冠辭。  
止雨祝曰。天生五穀以養人民。今天雨不止。用傷五  
穀。如何如何。靈而不幸。殺牲以賽神靈。雨則不止。鳴  
鼓攻之。朱綠繩繫而脅之。青三。八。州。然。雨。止。日。  
請雨曰。皇皇上天。照臨下土。集地之靈。神降甘雨。庶  
物羣生。咸得其所。



禮記曰孔子少孤不知其父墓母亡問於鄒曼父之  
母乃合葬於防防墓又崩門人後至孔子問來何遲  
門人實對孔子不應如是者三乃潛然流涕而止曰  
古不修墓蔣濟何晏夏侯元王肅皆云無此事注記  
者謬時賢咸從之周日用曰四士言無者後有何理而述之在愚所見實未之無矣且  
徵在與梁紇野合而生事多隱之况我正生而父已死既隱何以知之非問曼父之母安得合葬於防也  
孔子東遊見二小兒辯鬪問其故一小兒曰我以日  
始出時去人近而日中時遠也一小兒曰以日出而  
遠而日中時近一小兒曰日初出時大如車蓋及日



中時如盤盂。此不爲遠者。小而大者近乎。一小兒曰。日初出。滄滄涼涼。及其中而探湯。此不爲近者。熱而遠者。涼乎。孔子不能決。謂兩小兒曰。孰謂汝多知乎。亦出列子。周日用口且當午向熱者炎氣直下也。譬猶火氣直上而與旁暑其炎涼可悉耳。是明初出近而當中遠矣。豈聖人肯對乎。

子路與子貢過鄭神社。社樹有鳥神。牽孿子路子貢說之乃止。

春秋哀公十四年春。西狩獲麟。公羊傳曰。有以告者。孔子曰。孰爲來哉。孰爲來哉。盧曰。以其時非應故。孔子泣而感之。麟曰。生三



策蓋天使

報聖人

左傳曰叔孫氏之車子鉏商獲麟以爲不祥

焚太子丹質於秦秦王遇之無禮不得意思欲歸請  
於秦王王不聽謬言曰令烏頭白馬生角乃可丹仰  
而歎烏卽頭白俯而嗟馬生角秦王不得已而遣之  
爲機法之橋欲陷丹丹驅馳過之而橋不發遁到關  
關門不開丹爲雞鳴於是衆雞悉鳴遂歸  
詹何以獨繭絲爲綸芒針爲鉤荆篠爲竿割粒爲餌  
引盈車之魚於百仞之淵汨流之中綸不絕鉤不申



竿不撓

薛譚學謳於秦青，未窮青之旨，於一日遂辭歸。秦青乃餞於郊衢，撫節悲歌，聲震林木，響遏行雲。薛譚乃謝求返，終身不敢言歸。秦青顧謂其友曰：昔韓娥東之齊，遺糧過雍門，鬻歌假食而去，餘響遶梁三日，不絕左右，以其人弗去。過逆旅，凡人辱之。韓娥因曼聲哀哭，一里老幼喜歡，抃舞弗能自禁，乃厚賂而遺之。故雍門人至今善歌哭，效娥之遺聲也。

趙襄子率徒十萬，狩於中山，藉芳燔林，扇赫百里，有



人從石壁中出，隨煙上下，若無所之。經涉者，裹子以爲物，徐察之，乃人也。問其奚道而處石，奚道而入火，其人曰：「奚物爲火？其人若不知也。」魏文侯聞之，問於子夏曰：「彼何人哉？」子夏曰：「以商所聞於夫子，和者同於物，物無得而傷，閑者游金石之間，及蹈於水火，皆可也。」文侯曰：「吾子奚不爲之？」子夏曰：「刳心知智，商未能也。」雖試語之，而卽服矣。文侯曰：「夫子奚不爲之？」子夏曰：「夫子能而不爲，文侯不悅。」

更羸謂魏王曰：「臣能射。」

盧發而下鳥，王曰：「然可於。」



此乎曰聞有鳥從東來羸虛發而下之也

澹臺子羽子溺水死欲葬之滅明曰此命也與螻蟻何親與魚鼈何讎遂使勿葬

列傳云聶政刺韓相白虹爲之貫日要離刺慶忌聶星襲月專諸刺吳王僚鷹擊殿上

齊桓公出因與管仲故道自燉煌西涉流沙往外國沙石千餘里中無水時則有沃流處人莫能知皆乘駱駝駱駝知水脉遇其處輒停不肯行以足蹋地人於其蹋處掘之輒得水

楚熊渠子夜行射窮石以爲伏虎矢爲沒羽

漢武帝好仙道祭祀名山大澤以求神仙之道時西王母遣使乘白鹿告帝當來乃供帳九華殿以待之七月七日夜漏七刻王母乘紫雲車而至於殿西南面東向頭上戴七種青氣鬱鬱如雲有三青鳥如鳥大使侍母旁時設九微燈帝東面西向王母索七桃大如彈丸以五枚與帝母食二枚帝食桃輒以核著膝前母曰取此核將何爲帝曰此桃甘美欲種之母笑曰此桃三千年一生實唯帝與母對坐其從者皆



不得進時東方朔竊從殿南廂朱鳥牖中窺母母顧之謂帝曰此窺牖小兒嘗三來盜吾此桃帝乃大怪之由此世人謂方朔神仙也

君山有道與吳包山潛通上有美酒數斗得飲者不死漢武帝齋七日遣男女數十人至君山得酒欲飲之東方朔曰臣識此酒請視之因一飲致盡帝欲殺之朔乃曰殺朔若死此爲不驗以其有驗殺亦不死乃赦之

博物志卷八終





博物志卷九

雜說上

老子云，萬民皆付西王母，唯王聖人真人，仙人，道人之命，上屬九天君耳。

黃帝治天下，百年而死，民畏其神，百年用其教，百年故曰黃帝三百年。上古男三十而妻，女二十而嫁，曾子曰：弟子不學古，知之矣。貧者不勝其憂，富者不勝其樂。

昔西夏仁而去兵，城廓不修，武士無位，唐伐之，西夏

亡昔者元都賢鬼神道廢人事其謀臣不用龜策是  
從忠臣無祿神巫用國

榆罔氏之君孤而無使曲沃進伐之以亡

昔有巢氏有臣而貴任之專國主斷已而奪之臣怒  
而生變有巢以亡昔者清陽強力貴美女不治國而  
亡

昔有洛氏宮室無常囿池廣大人民困匱商伐之有  
洛以亡

神仙傳曰說上據辰尾爲宿歲星降爲東方朔傳說



死後有此宿。東方生無歲星。

曾子曰：「好我者知吾美矣，惡我者知吾惡矣。」

思士不妻而感，思女不夫而孕。后稷生乎巨跡，伊尹生乎空桑。

箕子居朝鮮，其後伐燕之朝鮮，亡入海，爲鮮國師。兩妻墨色，珥兩青蛇，蓋勾芒也。

漢興多瑞應，至武帝之世特甚，麟鳳數百，王莽時郡國多稱瑞應，歲歲相尋，皆由順時之欲，承旨求媚，多無實應，乃使人猜疑。



子胥伐楚，燔其府庫，破其九龍之鍾。

蓍一千歲而三百夢，其本以老，故知吉凶。蓍末大於本，爲上吉。莖必沐浴，齋潔，食香，每日望浴，蓍必五浴之。浴龜亦然。明夷曰：昔夏后夢乘飛龍而登於天，而牧占四華。臯陶曰吉。昔夏啓夢徙九鼎，啓果徙之。

昔舜莖登天，爲神。牧占有黃龍，神曰不吉。武王伐殷，而牧占蓍老，蓍老曰吉。桀夢伐唐，而牧占熒惑，曰不吉。昔鯀夢注洪水，而牧占大明，曰不吉。有初無後，蓍末大於本，爲卜吉。次蒿，次荆，皆如是。龜蓍皆月望。



浴之

水石之怪爲龍罔象、木之怪爲夔罔兩、土之怪爲蜺、羊火之怪爲朱無忌、

鬪戰死亡之處、其人馬血積年化爲燐、燐著地及草木如露、略不可見、行人或有觸者、著人體、便有光、拂拭便分散無數、愈甚有細咤聲、如炒豆、唯靜處良久乃滅、後其人忽忽如失魂、經日乃差、今人梳頭脫著衣時有隨梳解結、有光者、亦有咤聲、

風山之首方高三百里、風穴如電、穴深三十里、春風



博物志 卷九  
自此而出也。何以知還風也？假令東風雲反從西來，  
洗洗而疾，此不旋踵立西風矣。所以然者，諸風皆從  
上下，或薄於雲，雲行疾下，雖有微風不能勝上。上風  
來則反矣。

春秋書鼯鼠食郊牛，牛死。鼠之類最小者，食物當時  
不覺痛。世傳云亦食人項，肥厚皮處亦不覺。或名甘  
鼠，俗人諱此，所嚙衰病之徵。

鼠食巴豆三年，重三十斤。

博物志卷九終



博物志卷十

雜說下

婦人妊娠，未滿三月，著墻衣冠，平旦左遶井三匝，映

詳影而去，勿反顧，勿令人知，見必生男。

周日月日知女則可依法

或先是男如何余聞有定法定母年月日與受胎時日算之遇奇則爲男遇偶則爲女知爲女後即可依法

婦人妊娠，不欲令見醜惡物，異類鳥獸，食當避其異常味，不欲令見熊羆虎豹，御及鳥射，雉食牛心，白犬肉，鯉魚頭，席不正不坐，割不正不食，聽誦詩書諷



詠之音不聽淫聲不視邪色以此產子必賢明端正

壽考所謂父母胎教之法盧氏日子之得清味滋液則生仁聖謂錯亂之年則

生食淫子因之氣也故古者婦人妊娠必慎所感感於善則善

惡則惡矣妊娠者不可啖兔肉又不可見兔令兒唇

缺又不可啖生薑令兒多指

異說云瞽叟夫婦兇頑而生舜叔梁紇淫夫也徵在

失行也加又野合而生仲尼焉其在有胎教也盧氏曰夫

甲及寅申生者聖以年在歲德在甲寅壬申生者則然矣亦由先天也亦由父母氣也古者元氣清故多

聖今者俗淫陰濁故無聖人也



豫章郡衣冠人有數婦暴面於道尋道爭分鉢以給其夫與馬衣資及舉孝廉更取富者一切皆給先者雖有數年之動婦子滿堂室猶放黜以避後人

諸遠方山郡幽僻處出蜜臍人往往以桶聚蜂每年一取

遠方諸山蜜臍處以木爲器中開小孔以蜜臍塗器內外令遍春月蜂將生育時捕取三兩頭著器中蜂飛去尋將伴來經日漸益遂持器歸

人藉帶眠者則夢蛇

鳥銜人之髮夢飛

王爾張衡馬均昔冒重霧行一人無恙一人病一人死問其故無恙人曰我飲酒病者食死者空腹人以泠二水自漬至膝可頓啖數十枚瓜漬至腰啖轉多至頸可啖百餘枚所漬水皆作瓜氣味此事未試人中酒不解治之以湯自漬卽愈湯亦作酒氣味也

昔劉元石於中山酒家酤酒酒家與千日酒忘言其節度歸至家當醉而家人不知以爲死也權葬之酒



不計千日滿乃憶元石前來酤酒醉向醒耳往視之  
云元石亡來三年已葬於是開棺醉始醒俗云元石  
飲酒一醉千日

舊說云天河與海通近世有人居海渚者年年八月  
有浮槎去來不失期人有奇志立飛閣於槎上多齋  
糧乘槎而去十餘日中猶觀星月日辰自後芒芒忽  
忽亦不覺晝夜去十餘日奄至一處有城郭狀屋舍  
甚嚴遙望宮中多織婦見一丈夫牽牛渚次飲之牽  
牛人乃驚問曰何由至此此人具說來意并問此是



何處答曰君還至蜀郡訪嚴君平則知之竟不上岸  
因還如期後至蜀問君平曰某年月日有客星犯牽  
牛宿計年月正是此人到天河時也

人有山行墮深澗者無出路饑餓欲死左右見龜蛇  
甚多朝暮引頸向東方人因伏地學之遂不饑體殊  
輕便能登巖岸經數年後疎身舉臂遂超山澗上卽  
得還家顏色悅懌頗更黠慧勝故還食穀啖滋味百  
餘日中復本質

天門郡有幽山峻谷而其土人有從下經過者忽然



踊出林表狀如飛仙遂絕迹年中如此甚數遂名此  
處爲仙谷有樂道好事者入此谷中洗沐以求飛仙  
往往得去有長意思人疑必以妖怪乃以大石自墜  
牽一犬入谷中犬復飛去其人還告鄉里募數十人  
執杖攜山草伐木至山頂觀之遙見一物長數十丈  
其高隱人耳如簸箕格射刺殺之所吞人骨積此左  
右有成封嶙開口廣丈餘前後失人皆此嶙氣所噏  
上於是諸地遂安穩無患

博物志卷十終

荆楚志卷十終

士族世高祖志終荆楚志

荆楚志卷十終

荆楚志卷十終

荆楚志卷十終

荆楚志卷十終

荆楚志卷十終

荆楚志卷十終

荆楚志卷十終




右張華博物志十卷晉書本傳及隋唐志所載並  
同按王子年拾遺記載張華造博物志四百卷奏  
於武帝帝詔詰問卿才綜萬代博識無倫遠冠羲  
皇近次夫子然記事采言亦多浮妄宜更刪翦無  
以冗長成文昔仲尼刪詩尙不及鬼神幽昧之事  
以言怪力亂神今卿博物志驚所未聞異所未見  
將恐惑亂於後生繁蕪於耳目更芟截浮疑分爲  
十卷遂卽於御前賜青鐵硯麟角筆側理紙而以  
博物志十卷置於函中暇日覽焉是則此十卷卽

武帝所刪定也。自後行世，惟此十卷。其軼猶時時散見他書。而後漢書郡國志注所引博物記，遂至有四十六條之多。由張氏鑒省禹貢山海經地志而作是志，故於地理特詳。旣以地理略冠卷首矣，第六卷又有地理攷如郡國志注所引，殆卽本卷所刪。又裴駟史記集解於公冶長望諸君趙奢武涉墓所亦引張華說。今第六卷猶載有趙鞅盜跖冢，不知當日又何以不刪。其他如裴松之三國志注、酈道元水經注、李善文選注以及唐宋人類書



中所引爲今志所不載者尤多哀而輯之尙可數  
卷此則王嘉所說未爲虛也汝上王謨識































文心雕龍序



序曰齊梁以上立言之士無慮數千  
家珠聯綺合玉振金聲彬彬焉鏘鏘  
焉於文雅之場矣夫世代所趨巧拙  
所指作者殊科擇源涇渭則澄濁易  
淆按轡路岐而康徑未顯自非子野

安能雅俗並陳乎故知宏覽尚於體  
裁銓品存乎明鏡文心雕龍之所以  
作也文作於梁通事舍人劉勰氏勰  
東莞人嘗夜夢執丹漆之禮器隨仲  
尼而南行寤而喜曰大哉聖人之難  
見也小子之垂夢與乃始論文以戒



此籍雖宏經之志未竟庶乎聖典之  
英粦矣史稱勰博雅君子醞釀篇章  
今讀其文網羅古今彌綸載籍邈文  
體之自始要辭流之所終析其義於  
毫芒精其法於聾聵誠文章之奧區  
聲音之律呂也至其銓衡往哲品論



羣言彰美指瑕曲極情狀昭昭乎化  
工之肖形九原可作懲其月旦矣典  
論之制徒擬夫七臣文賦之摘未窮  
乎九變方斯何如哉今天下文教隆  
盛海內操觚之士翕然同風人繫麟  
鳳家寶隨和享弊帚於千金者亦寡



矣顧擬迹前脩存乎體要筌求是本  
不異司南苦印傳之不廣博古者致  
憾於斯予偶搜諸壁間如見良玉又  
惡夫已而不人者也遂校梓布焉文  
凡四十九篇合篇終序志一篇五十  
篇釐爲十卷古歛余誨序

蘇武與李陵書

武與李陵書

蘇武與李陵書

蘇武與李陵書

蘇武與李陵書

蘇武與李陵書



文心雕龍目錄

卷一

原道

徵聖

宗經

正緯

辨騷

卷二

明詩

樂府

詮賦

頌讚

祝盟

卷三

銘箴

誄碑

哀弔

雜文



諧譚

卷四

史傳

諸子

論說

詔策

檄移

卷五

封禪

章表

奏啓

議對

書記

卷六

神思

體性

風骨

通變



定勢

卷七

情采

鎔裁

聲律

章句

麗辭

卷八

比興

夸飾

事類

練字

隱秀

卷九

指瑕

養氣

附會

總術



時序

卷十

物色

才略

知音

程器

序志

目錄終





文心雕龍卷一

梁 東莞劉勰著 奉新彭瑞麟校

原道第一

文之爲德也大矣。與天地並生者何哉。夫元黃色雜。方圓體分。日月疊璧。以垂麗天之象。山川煥綺。以鋪理地之形。此蓋道之文也。仰觀吐曜。俯察含章。高卑定位。故兩儀旣生矣。惟人參之。性靈所鍾。是謂三才。爲五行之秀。人實天地之心。生。心生而言立。言立而文明。自然之道也。傍及萬品。動植皆文。龍鳳以藻繪。



呈瑞。虎豹以炳蔚凝姿。雲霞雕色。有踰畫工之妙。草木賁華。無待錦匠之奇。夫豈外飾。蓋自然耳。至於林籟結響。調如竽瑟。泉石激韻。和若球鏗。故形立則章成矣。聲發則文生矣。夫以無識之物。鬱然有彩。有心之器。其無文歟。人文之元。肇自太極。幽讚神明。易象惟先。庖犧畫其始。仲尼翼其終。而乾坤兩位。獨制文。言。言之文也。天地之心哉。若廼河圖孕乎八卦。洛書韞乎九疇。玉版金鏤之寶。丹文綠牒之華。誰其尸之。亦神理而已。自鳥迹代繩。文字始炳。炎皞遺事。紀在



三墳而年世渺邈，聲采靡追。唐虞文章，則煥乎始盛。  
元首載歌，旣發吟詠之志。益稷陳謨，亦垂敷奏之風。  
夏后氏興業，峻鴻績，九序惟歌。勲德彌綯，逮及商周。  
文勝其質，雅頌所被。英華日新，文王患憂。辭辭炳曜，  
符采複隱。精義堅深，重以公旦多材，振其微烈。副詩  
緝頌，斧藻羣言。至夫子繼聖，獨秀前哲。鏘鈞六經，必  
金聲而玉振。雕琢情性，組織辭令。木鐸啓而千里應，  
席珍流而萬世響。寫天地之輝光，曉生民之耳目矣。  
爰自風姓，暨于孔氏。元聖創典，素王述訓。莫不原道



心裁文章。研神理而設教。取象乎河洛。問數乎蓍龜。  
觀天文以極變。察人文以成化。然後能經緯區宇。彌  
綸彞憲。發輝事業。彪炳辭義。故知道沿聖以垂文。聖  
因文而明道。旁通而無涯。日用而不匱。易曰。鼓天下  
之動。存乎辭。辭之所以能鼓天下者。廼道之文也。

贊曰

道心惟微。神理設教。光采元聖。炳耀仁孝。龍圖獻體。  
龜書呈貌。天文斯觀。民胥以儆。

徵聖第二



夫作者曰聖，述者曰明。陶鑄性情，功在上哲。夫子文章可得而聞，則聖人之情見乎文辭矣。先王聖化，布在方冊。夫子風采，溢于格言。是以遠稱唐世，則煥乎爲盛；近褒周代，則郁哉可從。此政化貴文之徵也。鄭伯入陳，以立辭爲功；宋置折俎，以多方舉禮。此事蹟貴文之徵也。褒美子產，則云言以足志；文以足言，泛論君子，則云情欲信，辭欲巧。此修身貴文之徵也。然則志足而言文，情信而辭巧，廼含章之玉牒，秉文之金科矣。夫鑒周日月，妙極機神，文成規矩，思合符契。



或簡言以達旨。或博文以該情。或明理以立體。或隱義以藏用。故春秋一字以褒貶。喪服舉輕以包重。此簡言以達旨也。邠詩聯章以積句。儒行縟說以繁辭。此博文以該情也。書契斷決以象夬。文章昭晰以象離。此明理以立體也。四象精義以曲隱。五例微辭以婉晦。此隱義以藏用也。故知繁畧殊形。隱顯異術。抑引隨時。變通會適。徵之周孔。則文有師矣。是以子政論文。必徵於聖。稚圭勸學。必宗於經。易稱辨物正言。斷辭則備。書云辭尚體要。弗惟好異。故知正言所以



立辯體要所以成辭辭成無好異之尤辯立有斷辭  
之義雖精義曲隱無傷其正言微辭婉晦不害其體  
要體要與微辭偕通正言共精義並用聖人之文章  
亦可見也。顏闔以爲仲尼飾羽而畫徒事華辭雖欲  
此言此言二字聖弗可得已然則聖文之雅麗固銜  
華而佩實者也。天道難聞猶或鑽仰文章可見胡寧  
勿思若徵聖立言則文其庶矣。

贊曰

妙極生知。睿哲惟宰。精理爲文。秀氣成采。鑒懸日月。



辭富山海百齡影徂千載心在

宗經第三

三極彙訓其書言經經也者恒久之至道不刊之  
教也故象天地效鬼神參物序制人紀洞性靈之  
區極文章之骨髓者也皇世三墳帝代五典重以八  
索申以九丘歲歷綿暖條流紛糅自夫子刪述而大  
寶咸耀於是易張十翼書標七觀詩列四始禮正五  
經春秋五例義既極乎性情辭亦匠於文理故能開  
學養正昭明有融然而道心惟微聖謀卓絕墻宇



峻而吐納自深。譬萬鈞之洪鐘，無錚錚之細響矣。易  
惟談天人神致用，故繫稱占遠辭，文言中事隱，韋編  
三絕，固哲人之驪淵也。書實記言，而訓詁茫昧，通乎  
爾雅，則文意曉然。故子夏歎書昭昭若日月之明，離  
離如星辰之行，言昭灼也。詩主言志，訓詁同書，摛風  
裁興，藻辭譎喻，溫柔在誦，故最附深衷矣。禮記立體  
宏用，據事制範，章條纖曲，執而後顯，採掇生言，莫非  
寶也。春秋辨理一字見義，五石六鷁以詳畧成文，雉  
門兩觀以先後顯旨，其婉章志晦，諒以邃矣。尚書則



覓文如詭而尋理卽暢。春秋則觀辭立曉而訪義方。隱此聖人之殊致。表裏之異體者也。至根柢槃深。枝葉峻茂。辭約而旨豐。事近而喻遠。是以往者雖舊。餘味日新。後進追取而非晚。前修文用而未先。可謂太山徧雨。河潤千里者也。故論說辭序。則易統其首。詔策章奏。則書發其源。賦頌譔讚。則詩立其本。銘誄箴祝。則禮總其端。紀傳銘檄。則春秋爲根。並窮高以樹表。極遠以啓疆。所以百家騰躍。終入環內者也。若稟經以製式。酌雅以富言。是仰山而鑄銅。煮海而爲鹽。



也。故文能宗經，體有六義：一則情深而不詭，二則風清而不雜，三則事信而不誕，四則義直而不回，五則體約而不蕪，六則文麗而不淫。楊子比雕玉以作器，謂五經之含文也。夫文以行立，行以文傳，四教所先，符采相濟，勵鑒樹聲，莫不師聖而建言修辭。鮮克宗經，是以楚艷漢侈，流弊不還，正末歸本，不其懿歟。

贊曰

三極彛道，明深稽古，致化歸一，分教斯五，性靈鑒近，文章與府，淵哉鑠乎，羣言之祖。



正緯第四

夫神道闡幽天命微顯馬龍出而大易興神龜見而  
洪範耀故繫辭稱河出圖洛出書聖人則之斯之聖  
也但世覓文隱好生矯誕真雖存矣僞亦憑焉夫大  
經彰炳正緯侯不疊孝論昭晷而鉤譏蔑黷按經吟  
緯其僞言四蓋緯之成經其猶織綜絲麻不雜布  
乃成今經正緯奇倍擿千里其僞一矣經顯聖訓也  
緯隱神教也聖訓宜廣神教宜約而今緯多於經  
理更繁其僞二矣有命自天迺稱符讖而八十一



皆託於孔子，則是堯造綠圖，昌制丹書，其僞三矣。商周以前，圖籙頻見，春秋之末，羣經方備，先緯後經，體乖織綜，其僞四矣。僞既倍擿，則義異自明，經足訓矣，緯何豫焉。原夫圖籙之見，廼昊天休命，事以瑞聖，義非配經，故河不出圖，夫子有歎，如或可造，無勞喟然。昔康王河圖，陳於東序，故知前世符命，歷代寶傳，仲尼所撰，序錄而已。於是伎數之士，附以詭術，或說陰陽，或序災異，若鳥鳴似語，蟲葉成字，篇條滋蔓，必假孔氏，通儒討覈，謂起哀平，東序祕寶，朱紫亂矣。至於



光武之世，篤信斯術，風化所靡，學者比肩。沛獻集緯，以通經；曹褒撰識，以定禮；垂道謬典，亦已甚矣。是以桓譚疾其虛僞，尹敏戲其深瑕；張衡發其僻謬，荀悅明其詭誕。四賢博練，論之精矣。若乃羲農軒皞之源，山瀆鍾律之要，白魚赤鳥之符，黃金紫玉之瑞，事豐竒偉，辭富膏腴，無益經典，而有助文章，是以後來辭人，採摭英華，平子恐其迷學，奏令禁絕；仲豫惜其雜真，未許煨燔。前代配經，故詳論焉。

贊曰



滎河溫洛，是孕圖緯，神寶藏川。理隱文貴，世歷二漢。朱紫騰沸，芟夷譎詭，糝其雕蔚。

辯騷第五

自風雅寢聲，莫或抽緒，奇文鬱起，其離騷哉。固已軒翥詩人之後，奮飛辭家之前，豈去聖之未遠，而楚人之多才乎。昔漢武愛騷，而淮南作傳，以爲國風好色而不淫，小雅怨誹而不亂，若離騷者可謂兼之蟬蛻穢濁之中，浮游塵埃之外，皜然涅而不緇，雖與日月爭光可也。班固以爲露才揚已，忿懟沉江，弄澆二姚。



與左氏不合。崑崙懸圃，非經義所載，然其文辭麗雅，爲詞賦之宗。雖非明哲，可謂妙才。王逸以爲詩人提耳。屈原婉順，離騷之文，依經立義，騶虬乘翳，則時乘六龍，崑崙流沙，則禹貢敷土，名儒辭賦，莫不擬其儀表。所謂金相玉質，百世無匹者也。及漢宣嗟歎，以爲皆合經術。揚雄諷味，亦言體同詩雅。四家舉以方經，而孟堅謂不合傳，褒貶任聲，抑揚過實，可謂鑒而弗精。翫而未覈者也。將覈其論，必徵言焉。故其陳堯舜之耿介，稱湯武之祗敬，典誥之體也。譏桀紂之猖披。



傷羿澆之顛隤。規諷之旨也。虬龍以喻君子。雲蜺以  
譬讒邪。比興之義也。每一顧而淹涕。歎君門之九重。  
忠怨之辭也。觀茲四事。同于風雅者也。至於託雲龍。  
說迂怪。豐隆求宓妃。鳩鳥媒娥女。詭異之辭也。康回  
傾地。夷羿彈日。木夫九首。土伯三目。譎怪之談也。依  
彭咸之遺則。從子胥以自適。狷狹之志也。士女雜座。  
亂而不分。指以爲樂。娛酒不廢。沉湎日夜。舉以爲懼。  
荒淫之意也。摘此四事。異乎經典者也。故論其典誥則  
如彼。語其夸誕則如此。固知楚辭者。體慢於三代而



風雅於戰國。乃雅頌之博徒。而詞賦之英傑也。觀其  
骨鯁所樹。肌膚所附。雖取鎔經意。亦自鑄偉辭。故騷  
經九章。朗麗以哀。志九歌。九辯。綺靡以傷情。遠遊天  
問。環詭而惠巧。招魂招隱。耀艷而深華。卜居標放言  
之志。漁父寄獨往之才。故能氣往轢古。辭來切今。驚  
采絕艷。難與並能矣。自九懷以下。遽躡其跡。而屈宋  
逸步。莫之能追。故其叙情怨。則鬱伊而易感。述離居  
則愴快而難懷。論山水則循聲而得貌。言節候則披  
文而見時。是以枚賈追風。以入麗馬。揚汾波而得奇。



其衣被詞人。非一代也。故才高者。苑其鴻裁。中巧者。獵其艷辭。吟諷者。銜其山川。童蒙者。拾其香草。若能憑軾以倚雅頌。懸轡以馭楚篇。酌奇而不失其真。翫華而不墜其實。則顧盼可以驅辭力。欬唾可以窮文致。亦不復乞靈於長卿。假寵於子淵矣。

贊曰

不有屈原。豈見離騷。驚才風逸。壯志煙高。山川無極。情理實勞。金相玉式。艷溢鎔毫。

...

...

...


...

...

...

...

...





文心雕龍卷二

明詩第六

大舜云詩言志、歌咏言、聖謀所析義已明矣。是以在心爲志、發言爲詩、舒文載實、其在茲乎。詩者持也。持人情性、三百之蔽、義歸無邪、持之爲訓、有符焉爾。人稟七情、應物斯感、感物吟志、莫非自然。昔葛天氏樂辭云、元鳥在曲、黃帝雲門、理不空絃、至堯有大唐之歌、舜造南風之詩、觀其二文、辭達而已。及大禹成功、九序惟歌、太康敗德、五子咸怨、順美匡惡、其來久矣。



自商暨周雅頌圓備四始彪炳六義環深子夏監絢  
素之章子貢悟琢磨之句故商賜二子可與言詩自  
王澤殄竭風人輟采春秋觀志諷誦舊章酬酢以爲  
賓榮吐納而成身文逮楚國諷怨則離騷爲刺秦皇  
滅典亦造仙詩漢初四言韋孟首唱匡諫之義繼軌  
周文孝武愛文栢梁列韻嚴馬之徒屬辭無方至成  
帝品錄三百餘篇朝章國采亦云周備而辭人遺翰  
莫見五言所以李陵班婕妤見疑於後代也按召南  
行露始肇半章孺子滄浪亦有全曲暇豫優歌遠見



春秋邪徑童謠。近在成世。閱時取證。則五言久矣。又古詩佳麗。或稱枚叔。其孤竹一篇。則傳毅之詞。比采而推。兩漢之作。乎觀其結體散文。直而不野。婉轉附物。怊悵切情。實五言之冠冕也。至於張衡怨篇。清曲可味。仙詩緩歌。雅有新聲。暨建安之初。五言騰踴。文帝陳思。縱轡以騁節。王徐應劉。望路而爭驅。竝憐風月。狎池苑。述恩榮。叙酣宴。慷慨以任氣。磊落以使才。造懷指事。不求纖密之巧。驅辭逐貌。唯取昭晰之能。此其所同也。乃正始明道。詩雜仙心。何晏之徒。率多浮



淺唯嵇志清峻。阮旨遙深。故能標焉。若乃應璩百一。  
獨立不懼。辭譎義貞。亦魏之遺直也。晉世羣才。稍入。  
輕綺。張潘左陸。比肩詩衢。采縛於正始。力柔於建安。  
或析文以爲妙。或流靡以自妍。此其大畧也。江左篇。  
製溺乎元風。嗤笑徇務之志。崇盛亡機之談。袁孫已。  
下。雖各有雕采。而辭趣一揆。莫與爭雄。所以景純仙。  
篇。挺拔而爲俊矣。宋初文詠。體有因革。莊老告退。而。  
山水方滋。儷采百字之偶。爭價一句之奇。情必極貌。  
辭必窮力。而追新。此近世之所競也。故鋪觀。



列代而情變之數可監。撮舉同異而綱領之要可明矣。若夫四言正體。雅潤爲本。五言流調。清麗居宗。華實異用。唯才所安。故平子得其雅。叔度含其潤。茂先凝其清。景陽振其麗。兼善則子建仲宣。偏美則太冲公幹。然詩有恒裁。思無定位。隨性適分。鮮能通圓。若妙識所難。其易也將至。忽之爲易。其難也方來。至於三六雜言。則出自篇什。離合之發。則明於圖讖。回文所興。則道原爲始。聯句共韻。則栢梁餘製。巨細或殊。情理同致。總歸詩圃。故不繁云。



贊曰

民生而志詠歌所舍。興發皇世。風流二南。神理共契。政序相參。英華彌縟。萬代永耽。

樂府第七

樂府者。聲依咏。律和聲也。鈞天九奏。既其上帝。葛天八闕。爰乃皇時。自咸英以降。亦無得而論矣。至於塗山歌於候人。始爲南音。有娥謠乎飛燕。始爲北聲。夏甲歎於東陽。東音以發。殷整思於西河。西音以興。音聲推移。亦不一槩矣。匹夫庶婦。謳吟土風。詩官採言。



不盲被律志感絲篴。氣變金石。是以師曠覘風於盛  
表。季札鑒微於興廢。精之至也。夫樂本心術。故響浹  
肌髓。先王慎焉。務塞淫濫。敷訓胄子。必歌九德。故能  
情感七始。化動八風。自雅聲浸微。溺音騰沸。秦燔樂  
經。漢初紹復。制氏紀其鏗鏘。叔孫定其容與。於是武  
德興乎高祖。四時廣於孝文。雖摹韶夏而頗襲秦舊。  
中和之響。聞其不還。暨武帝崇禮。始立樂府。總趙代  
之音。撮齊楚之氣。延年以曼聲協律。朱馬以騷體製  
歌。桂華雜曲。麗而不經。赤鴈羣篇。靡而非典。河間薦



雅而罕御。故汲黯致譏於天馬也。至宣帝雅頌詩效  
鹿鳴。邇及元成。稍廣淫樂。正音乖俗。其難也如此。暨  
後郊廟。惟雜雅章辭。雖典文而律非夔曠。至於魏之  
三祖。氣爽才麗。宰割辭調。音靡節平。觀其北上。衆引  
秋風列篇。或述酣宴。或傷羈戍。志不出於淫蕩。辭不  
離於哀思。雖三調之正聲。實韶夏之鄭曲也。逮於晉  
世。則傅元曉音。創足雅歌。以詠祖宗。張華新篇。亦克  
庭萬。然杜夔調律。音奏舒雅。苟勗收懸。聲節哀急。故  
阮咸譏其離聲。後人驗其銅尺。和樂精妙。固表裏而



相資矣。故知詩爲樂心。聲爲樂體。樂體在聲。瞽師務調其器。樂心在詩。君子宜正其文。好樂無荒。晉風所以稱遠。伊其相謔。鄭國所以云亡。故知季札觀辭。不直聽聲而已。若夫豔歌婉變。怨志誅絕。淫辭在曲。正響焉生。然俗聽飛馳。職競新異。雅詠溫恭。必欠伸魚睨。奇辭切至。則拊髀雀躍。詩聲俱鄭。自此階矣。凡樂辭曰詩。詩聲曰歌。聲來被辭。辭繁難節。故陳思稱李延年閑於增損古辭。多者則宜減之。明貴約也。觀高祖之詠大風。孝武之歎來遲。歌童被聲。莫敢不協。子



建士衡咸有佳篇竝無詔伶人故事謝絲管俗稱乖調蓋未思也。至於斬伎鼓吹漢世饒挽雖戎喪殊事而竝總入樂府繆襲所致亦有可算焉。葢于政品文詩與歌別故畧具樂篇以標區界。

贊曰

八音摘文樹辭爲體謳吟垌野金石雲陛韶響難追鄭聲易啓豈惟觀樂於焉識禮。

詮賦第八

詩有六義其二曰賦賦者鋪也。鋪采摛文體物寫志。



也。昔邵公稱公卿獻詩，師箴賦，傳云登高能賦，可爲大夫。詩序則同義，傳說則異體。總其歸塗，實相枝幹。劉向云：明不歌而頌，班固稱古詩之流也。至如鄭莊之賦大隧，士蔦之賦狐裘，結言短韻，詞自已作，雖合賦體，明而未融。及靈均唱騷，始廣聲貌，然賦也者，受命於詩人，括字於楚辭也。於是荀況禮智，宋玉風鈞，爰錫名號，與詩畫境。六義附庸，蔚成大國。遂客至以首引，極聲貌以窮文，斯蓋別詩之原始，命賦之厥初也。秦世不文，頗有雜賦。漢初詞人，順流而作，陸賈扣



其端賈誼振其緒枚馬同其風王楊騁其勢臯朔已  
下品物畢圖繁積於宣時校閱於成世進御之賦千  
有餘首計其源流信興楚而盛漢矣夫京殿苑獵述  
行序志竝體國經野義尚光大旣履端於唱序亦歸  
餘於總亂序以建言首引情本亂以理篇迭致文契  
按那之卒章閔馬稱亂故知殷人輯頌楚人理賦斯  
竝鴻裁之寰域雅文之樞轄也至於草區禽族庶品  
雜類則觸興致情因變取會擬諸形容則言務纖密  
象其物宜則理貴側附斯又小制之區畛奇巧之機



要也。觀夫荀結隱語。事數自環。宋發巧談。實始淫麗。  
枚乘菟園舉要。以會新。相如上林。繁類以成艷。賈誼  
鵬鳥。致辨於情理。子淵洞簫。窮變於聲貌。孟堅兩都。  
明綯以雅贍。張衡二京。迅發以宏富。子雲甘泉。構深  
瑋之風。延壽靈光。含飛動之勢。凡此十家。竝辭賦之  
流也。及仲宣靡密。發端必道。偉長博通。時逢壯采。太  
冲安仁。策勛於鴻規。士衡子安。底績於流制。景純綺  
巧。縟理有餘。彥伯梗槩。情韻不匱。亦魏晉之賦首也。  
原夫登高之旨。蓋覩物興情。情以物興。故義必明雅。



物以情觀，故辭必巧麗。麗辭雅義，符采相勝，如組織之品，朱紫畫繪之著。元黃文雖新而有質，色雖粦而有本。此立賦之大體也。然逐末之儔，蔑棄其本，雖讀千賦，愈惑體要，遂使繁華損枝，膏腴害骨，無貴風軌，莫益勸戒。此揚子所以追悔於雕蟲，貽誚於霧縠者也。

贊曰

賦自詩出，分岐異派。寫物圖貌，蔚似雕畫。枿滯必揚，言庸無隘。風歸麗則，辭翦美和。

頌讚第九



四始之至，頌居其極。頌者容也。所以美盛德而述形容也。昔帝嚳之世，咸墨爲頌，以歌九韶。自商以下，文理允備，夫化偃一國，謂之風。風正四方，謂之雅。容告神明，謂之頌。風雅序人事，兼變正。頌主告神，義必純美。魯國以公旦次編，商人以前王追錄，斯乃宗廟之正歌，非燕饗之常詠也。時邁一篇，周公所製，哲人之頌，規式存焉。夫民各有心，勿壅惟口。晉輿之稱原田，魯民之刺裘鞞，直言不詠，短辭以諷。正明子高竝謀爲誦，斯則野誦之變體，浸被乎人事矣。及三閭橘頌，



情采芬芳比類寓意。又覃及細物矣。至於秦政刻文  
爰頌其德。漢之惠景。亦有述容。沿世竝作。相繼於時  
矣。若夫子雲之表克國。孟堅之序戴侯。仲武之美顯  
宗。史岑之述熹后。或擬清廟。或範駟那。雖深淺不同。  
詳畧各異。其褒德顯容。典章一也。至於班傳之北征  
西巡。變爲序引。豈不褒過而謬體哉。馬融之廣成上  
林雅而似賦。何弄文而失質乎。又崔瑗文學。蔡邕樊  
渠竝致美於序。而簡約乎篇。摯虞品藻。頗爲精覈。至  
云雜以風雅。而不變旨趣。徒張虛論。有似黃白之僞。



說矣。及魏晉辨頌，鮮有出轍。陳思所綴，以皇子爲標。  
陸機積篇，惟功臣最顯，其褒貶雜居。固末代之訛體。  
也。原夫頌惟典雅，辭必清鏗，敷寫似賦，而不入華侈。  
之區，敬慎如銘，而異乎規戒之域。掄揚以發藻，汪洋  
以樹義，唯纖曲巧致，與情而變。其大體所底，如斯而  
已。讚者明也，助也。昔虞舜之祀，樂正重讚，蓋唱發之辭也。  
及益讚於禹，伊陟贊於巫咸，竝颺言以明事，嗟歎以  
助辭也。故漢置鴻臚，以唱拜爲讚，卽古之遺語也。至  
相如屬筆，始讚荊軻，及遷史固書，託贊褒貶，約文以



總錄。頌體以論辭。又紀傳後評。亦同其名。而仲治流  
別。謬稱爲述。失之遠矣。及景純注雅。動植讚之。義兼  
美惡。亦猶頌之變耳。然其爲義事生獎歎。所以古來  
篇體。促而不曠。必結言於四字之句。盤桓乎數韻之  
辭。約舉以盡情。昭灼以述文。此其體也。發源雖遠。而  
致用蓋寡。大抵所歸。其頌家之細條乎。

贊曰

容體底頌。勲業垂讚。鏤影摘文。聲理有爛。年積逾遠。  
音微如旦。降及品物。炫辭作翫。



祝盟第十

天地定位、祀徧羣神、六宗既禋、三望咸秩、甘雨和風、  
是生黍稷、兆民所仰、美報興焉、犧盛惟馨、本於明德、  
祝史陳信、資乎文辭、昔伊耆始蜡、以祭八神、其辭云、  
土反其宅、水歸其壑、昆蟲無作、草木歸其澤、則上皇  
祝文、爰在茲矣、舜之祠田云、荷此長耜、耜彼南畝、四  
海俱有、利民之志、頗形於言矣、至於商履聖敬、日躋  
元牡、告天以萬方罪已、卽郊禋之詞也、素車禱旱、以  
六事責躬、則雩禱之文也、及周之大祝、掌六祝之辭、



是以庶物咸生。陳於天地之郊。旁作穆穆。唱於迎日之拜。夙興夜處。言於附廟之祝。多福無疆。布於少牢之饋。宜社類禡。莫不有文。所以寅虔於神祇。嚴恭於宗廟也。春秋已下。黷祀諂祭。祝幣史辭。靡神不至。至於張老成室。致善於歌哭之禱。蒯瞶臨戰。獲佑於觴骨之請。雖造次顛沛。必於祝矣。若夫楚辭招魂。可謂祝辭之組纚也。漢之羣祀。肅其旨禮。旣總碩儒之儀。亦參方士之術。所以祕祝移過。異於成湯之心。偃子毆疫。同乎越巫之祝。禮失之漸也。至如黃帝有祝邪。



之文東方朔有罵鬼之書。於是後之譴咒。務於善罵。唯陳思誥咎。裁以正義。天若乃禮之祭祀。事止告饗。而中代祭文。兼讚言行。祭而兼讚。蓋引神而作也。又漢代山陵哀策。流文周喪盛姬。內史執策。然則策本書贈因哀而爲文也。是以義同於誄。而文實告神。誄首而哀末。頌體而祝儀。太史所作之讚。因周之祝文也。凡羣言發華而降神。務實修辭立誠。在於無媿。祈禱之式。必誠以敬。祭奠之楷。宜恭且哀。此其大較也。班固之祀濛山。祈禱之誠敬也。潘岳之祭庾婦。奠祭



之恭哀也。舉彙而求昭然可鑒矣。盟者明也。駢毛白馬、珠盤玉敦、陳辭乎方明之下、祝告於神明者也。在昔三王、詛盟不及、時有要誓、結言而退。周衰屢盟、以及要契、始之以曹沫、終之以毛遂。及秦昭盟夷、設黃龍之詛、漢祖建侯、定山河之誓、然義存則克終、道廢則渝。始崇替在人、咒何預焉。若夫臧洪、軟辭氣絕、雲蜺。劉琨、鐵誓精貫霏霜。而無補於晉漢、反爲仇讐。故知信不由衷、盟無益也。夫盟之大體、必序危機、獎忠孝、共存亡、戮心力、祈幽靈、以取鑒、指九天以爲正感。



激以立誠切至以敷辭此其所同也然非辭之難處  
辭爲難後之君子宜在殷鑒忠信可矣無恃神焉

贊曰

茲祀欽明祝史惟談立誠在肅修辭必甘季代彌飾  
絢言朱藍神之來格所貴無慚

文心雕龍卷二終

文心周音

卷二

三



文心雕龍卷三

銘箴第十一

昔帝軒刻輿几以弼違，大禹勒筍簋而招諫。成湯盤  
孟著日新之規，武王戶席題必戒之訓。周公慎言於  
金人，仲尼革容於欹器，則先聖鑒戒其來久矣。故銘  
者銘也，觀器必也正名，審用貴乎盛德，蓋臧武仲之  
論銘也。曰：天子令德，諸侯計功，大夫稱伐，夏鑄九牧  
之金鼎。周勒肅慎之楷矢。令德之事也。呂望銘功於  
昆吾，仲山鏤績於庸器。計功之義也。魏顆紀勲於景



鐘。孔惺表勤於衛鼎。稱伐之類也。若乃飛廉有石郭之錫。靈公有蒿里之謚。銘發幽石。吁可怪矣。趙靈勒跡於番吾。秦昭刻傳於華山。夸誕示後。吁可笑也。詳觀衆例。銘義見矣。至於始皇勒岳。政暴而文澤。亦有踈通之美焉。若班固燕然之勒。張昶華陰之碣。序亦盛矣。蔡邕銘思。獨冠古今。橋公之銘。吐納典謨。朱穆之鼎。全成碑文。溺所長也。至如敬通雜器。準矱戒銘。而事非其物。繁畧違中。崔駰品物。讚多戒少。李尤積篇義儉辭碎。著龜神物。而居博奕之中。衡斛嘉量。而



在曰杵之末。曾容器之未暇。何事理之能。九寶器利辭鈍。唯張載劒閣其才清采。迅足駸駸後發前至。勒銘岷漢得其宜矣。箴者所以攻疾防患。喻鍼石也。斯文之興盛於三代。夏商二箴餘句頗存。及周之辛甲百官箴一篇。體義備焉。迄至春秋微而未絕。故魏絳諷君於后羿。楚子訓民於在勤。戰伐已來。棄德務功。銘辭代興。箴文委絕。至揚雄稽古。始範虞箴。作卿尹州牧廿五篇。及崔胡補綴。總稱百官。指事配位。鑿鑑可徵。信所謂追清風於前古。攀辛甲於後。



代者也。至於潘勗符節，要而失淺，溫嶠傳臣，傳而患繁。王濟國子，引廣事雜，潘尼乘輿，義正體蕪，凡斯繼作，鮮有克衷。至於王朗雜箴，乃寘巾履，得其戒慎，而失其所施，觀其約文舉要，憲章戒銘，而水火井竈，繁辭不已，志有偏也。夫箴誦於官，銘題於器，名目雖異，而警戒實同。箴全禦過，故文資確切，銘兼褒讚，故體貴宏潤。其取事也，必覈以辨，其摛文也，必簡而深。此其大要也。然矢言之道，蓋闕庸器之制，久淪所以，箴銘異用，罕施於代。惟秉文君子，宜酌其遠大焉。



贊曰

銘實表器箴惟德軌有佩于言無鑒于水。秉茲貞厲  
敬言平履義典則宏文約爲美。

誄碑第十二

周世盛德有銘誄之文大夫之材臨喪能誄誄者累  
也。累其德行旌之不朽也。夏商已前其詳靡聞周雖  
有誄未被於士又賤不誄貴。勿不誄長在萬乘則稱  
天以誄之讀誄定謚其節文大矣。自魯莊戰乘止始  
及於士逮尼父卒哀公作誄觀其慙遺之切嗚呼之



歎雖非叡作古式存焉。至柳妻之誄惠子則辭哀而韻長矣。暨乎漢世承流而作揚雄之誄元后文實煩穢沙麓撮其要而摯疑成篇安有累德述尊而濶畧四句乎。杜篤之誄有譽前代吳誄雖工而他篇頗疎豈以見稱光武而改盼千金哉。傳毅所製文體倫序孝山崔瑗辨絜相參觀其序事如傳辭靡律調固誄之才也。潘岳構意專師孝山巧於序悲易入新切所以隔代相望能徵厥聲者也。至如崔駰誄趙劉陶誄黃並得憲章工在簡要陳思叨名而體實繁緩文且誄末



旨言自陳其垂甚矣。若夫殷臣誅湯，追褒元鳥之祚。周史歌文，上闡后稷之烈。誅述祖宗，蓋詩人之則也。至於序述哀情，則觸類而長，傳毅之誄北海，云白日幽光，雰雰杳冥，始序致感，遂爲後式。景而效者，彌取於工矣。詳夫誄之爲制，蓋選言錄行，傳體而頌文，榮始而哀終。論其人也，暖乎若可覲，道其哀也，悽焉如可傷。此其旨也。碑者，埤也。上古帝皇，始號封禪，樹石埤岳，故曰碑也。周穆紀跡於弇山之石，亦石碑之意也。又宗廟有碑，樹之兩楹，事止麗牲，未勒勲績，而庸



器漸缺。故後代用碑。以石代金。同乎不朽。自廟徂墳。猶封墓也。自後漢以來。碑碣雲起。才鋒所斷。莫高蔡邕。觀楊賜之碑。骨鯁訓典。陳郭二文。詞無擇言。周乎衆碑。莫非清允。其叙事也。該而要。其綴采也。雅而澤。清詞轉而不窮。巧義出而卓立。察其爲才。自然而至。孔融所創。有慕伯喈。張陳兩文。辨給足采。亦其亞也。及孫綽爲文。志在碑誄。溫王郤庾。辭多枝雜。桓彝一篇。最爲辨裁。夫屬碑之體。資乎史才。其序則傳。其文則銘。標序盛德。必見清風之華。昭紀鴻懿。必見峻偉。



之烈。此碑之制也。夫碑實銘器。銘實碑文。因器立名。事光於誄。是以勒石讚勲者。入銘之域。樹碑述已者。同誄之區焉。

贊曰

寫實追虛。碑誄以立。銘德慕行。文采允集。觀風似面。聽辭如泣。石墨鐫華。頽影豈忒。

哀弔第十三

賦憲之謚。短折曰哀。哀者依也。悲實依心。故曰哀也。以辭遣哀。蓋不淚之悼。故不在黃髮。必施天昏。昔三



良殉秦，百夫莫贖。事均天橫，黃鳥賦哀。抑亦詩人之  
哀辭乎？暨漢武封禪，而霍子侯暴亡。帝傷而作詩，亦  
哀辭之類矣。及後漢汝陽王亡，崔瑗哀辭，始變前式。  
然履突鬼門，怪而不辭；駕龍乘雲，仙而不哀。又卒章  
五言，頗似歌謠，亦彷彿乎漢武也。至於蘇慎、張升，竝  
述哀文，雖發其情華，而未極心實。建安哀辭，惟偉長  
差善。行女一篇，時有惻怛。及潘岳繼作，實踵其美觀。  
其慮善辭變，情洞悲苦，叙事如傳，結言摹詩，促節四  
言，鮮有緩句。故能義直而文婉，體舊而趣新。金鹿澤



蘭莫之或繼也。原夫哀辭大體。情主於痛傷。而辭窮  
乎愛惜。切未成德。故譽止於察惠。弱不勝務。故悼加  
乎膚色。隱心而結文。則事慙。觀文而屬心。則體奢。奢  
體爲辭。則雖麗不哀。必使情往會悲。文來引泣。乃其  
貴耳。弔者至也。詩云。神之弔矣。言神至也。君子令終  
定謚。事極理哀。故賓之慰主。以至到爲言也。壓溺乖  
道。所以不弔。又宋水鄭火。行人奉辭。國災民亡。故同  
弔也。及晉築虎臺。齊襲燕城。史趙蘇秦。翻賀爲弔。虐  
民搆敵。亦亡之道。凡斯之例。弔之所設也。或驕貴而



殞身。或狷忿以乖道。或有志而無時。或美才而兼累。追而慰之。竝名爲弔。自賈誼浮湘發憤。弔屈。體同而事覈。辭清而理哀。蓋首出之作也。及相如之弔二世。全爲賦體。桓譚以爲其言惻愴。讀者歎息。及卒章要切。斷而能悲也。揚雄弔屈。思積功寡。意深文畧。故辭韻沉隄。班彪蔡邕。竝敏於致語。然影附賈氏。難爲竝驅耳。胡阮之弔夷齊。褒而無聞。仲宣所制。譏呵實工。然則胡阮嘉其清。王子傷其隘。各志也。禰衡之弔平子。縟麗而輕清。陸機之弔魏武。序巧而文繁。降斯以



下未有可稱者矣。夫弔雖古義。而華辭未造。華過韻  
緩。則化而爲賦。固宜正義以繩理。昭德而塞違。剖析  
褒貶。哀而有正。則無奪倫矣。

贊曰

辭定所表。在彼弱弄。苗而不秀。自古斯慟。雖有通才  
迷方告控。千載可傷。寓言以送。

雜文第十四

智術之子。博雅之人。藻溢於辭。辭盈乎氣。苑囿文情。  
故日新殊致。宋玉含才。頗亦負俗。始造對問。以申其



志放懷寥廓，氣實使之。及枚乘摘艷，首製七發，腴辭  
雲構，夸麗風駭，蓋七竅所發，發乎嗜欲，始邪末正，所  
以戒膏粱之子也。揚雄覃思文潤，業深綜述，碎文璅  
語，肇爲連珠。其辭雖小，而明潤矣。凡此三者，文章之  
枝派。暇豫之末造也。自對問以後，東方朔效而廣之，  
名爲客難，託古慰志，疎而有辨。揚雄解嘲，雜以諧謔，  
廻環自釋，頗亦爲工。班固賓戲，含懿采之華。崔駰達  
旨，吐典言之裁。張衡應問，密而兼雅。崔寔客譏，整而  
微質。蔡邕釋誨，體奧而文炳。景純客傲，情見而采蔚。



選相祖述，然屬篇之高者也。至於陳思客問辭高而理疎，庾敬客咨意榮而文悴，斯類甚衆，無所取裁矣。原茲文之設，廼發憤以表志，身挫憑乎道勝，時屯寄於情泰，莫不淵岳其心，麟鳳其采。此立本之大要也。自七發以下，作者繼踵，觀枚氏首唱，信獨拔而偉麗矣。及傅毅七激，會清要之工。崔駰七依，入博雅之巧。張衡七辨，結采綿靡。崔瑗七厲，植義純正。陳思七啓，取美於宏壯。仲宣七釋，致辨於事理。自桓麟七說以下，左思七諷，以上枝附影從，十有餘家，或文麗而



義揆或理粹而辭駁。觀其大抵所歸。莫不高談宮館。壯語畋獵。窮瓌奇之服饌。極蠱媚之聲色。甘意搖骨體。艷詞動魂識。雖始之以淫侈。而終之以居正。然諷一勸百。勢不自反。子雲所謂先騁鄭衛之聲。曲終而奏雅者也。唯七厲叙賢。歸於儒道。雖文非拔羣。而意實卓爾矣。自連珠以下。擬者間出。杜篤賈逵之曹。劉珍潛勗之輩。欲穿明珠。多貫魚目。可謂壽陵匍匐。非復邯鄲之步。里醜捧心。不關西施之嚬矣。唯士衡運思。理新文敏。而裁章置句。廣於舊篇。豈慕珠仲四寸。



之璫乎。夫文小易周。思閑可瞻。足使義明而詞淨。事  
圓而音澤。磊磊自轉。可稱珠耳。詳夫漢來雜文。名號  
多品。或典誥誓問。或覽略篇章。或曲操弄引。或吟諷  
謠詠。總括其名。並歸雜文之區。甄別其義。各入討論  
之域。類聚有貫。故不曲述。

贊曰

偉矣前修。學堅多飽。負文餘力。飛靡弄巧。技辭攢映。  
彗若參昴。慕嘖之心。於焉祗攪。

諧譌第十五



芮良夫之詩云、自有肺腸、俾民卒狂、夫心險如山口、  
壅若川、怨怒之情不一、歡謔之言無方、昔華元棄甲、  
城者發脾、目之謳、臧紇喪師、國人造保、儒之歌、竝嗤  
戲形貌、內怨爲俳也、又蠶蠨鄙諺、狸首淫哇、苟可箴  
戒、載于禮典、故知諧辭、譏言亦無棄矣、諧之言皆也、  
辭淺會俗、皆悅笑也、昔齊威酣樂、而淳于說甘酒、楚  
襄讌集、而宋玉賦好色、意在微諷、有足觀者、及優旃  
之諷漆城、優孟之諫葬馬、竝譎辭飾說、抑止昏暴、是  
以予長編史、列傳滑稽、以其辭雖傾回、意歸義正也、



但本體不雅，其流易弊，於是東方枚臯，舖糟啜醢，無所匡正，而詆嫚嫖弄，故其自稱爲賦，廼亦俳也。見視如倡，亦有悔矣。至魏文因俳說以著笑書，薛綜憑宴會而發嘲調，雖扑推席而無益時用矣。然而懿文之士，未免枉轡。潘岳醜婦之屬，束皙賣餅之類，尤相效之。蓋以百數。魏晉滑稽，盛相驅扇，遂乃應瑒之鼻，方於盜削卵，張華之形，比乎握春杵，曾是莠言，有虧德音，豈非溺者之妄笑，胥靡之狂歌歟。譏者隱也，遜辭以隱意，譎譬以指事也。昔還社求拯於楚師，喻智井



而稱麥麴。叔儀乞糧於魯人。歌佩玉而呼庚癸。伍舉刺荊王以大鳥。齊客譏薛公以海魚。莊姬託辭於龍尾。臧文謬書於羊裘。隱語之用。被于紀傳。大者興治濟身。其次弼違曉惑。蓋意生於權譎。而事出於機急。與夫諧辭可相表裏者也。漢世隱書十有八篇。歆固編文錄之歌末。昔楚莊齊威性好隱語。至東方曼倩尤巧辭述。但謬辭詆戲無益規補。自魏代以來。頗非俳優。而君子隱化爲謎語。謎也者。迴互其辭。使昏迷也。或體目文字。或圖象品物。纖巧以弄思。淺察以衡。



辭義欲婉而止。辭欲隱而顯。荀卿蠶賦已兆其體。至  
魏文陳思約而密之。高貴鄉公博舉品物。雖有小巧。  
用乖遠大。夫觀古之爲隱。理周要務。豈爲童稚之戲。  
謔搏髀而抃笑哉。然文辭之有諧隱。譬九流之有小  
說。蓋稗官所采。以廣視聽。若效而不已。則髡袒而入  
室。旃孟之石交乎。

贊曰

古之嘲隱。振危釋憊。雖有絲麻。無棄菅蒯。會義適時。  
頗益諷誡。空戲滑稽。德音大壞。

卷之三

三

三

...

...

...

...

...

...

...

...



文心雕龍卷四

史傳第十六

開闢草昧，歲紀綿邈。居今識古，其載籍乎軒轅之世。史有蒼頡主文之職，其來久矣。曲禮曰：史載筆，史者使也。執筆左右使之記也。古者左史記事者，右史記言者。言經則尚書，事經則春秋。唐虞流于典謨，商夏被於誥誓。自周命惟新，姬公定法，紬三正以班歷，貫四時以聯事。諸侯建邦，各有國史，彰善癉惡，樹之風聲。自平王微弱，政不及雅，憲章散紊，彝倫攸斁。夫子



閔王道之缺，傷斯文之墜，靜居以歎，鳳臨衢而泣麟。  
於是就太師以正雅頌，因魯史以修春秋。舉得失以  
表黜陟，徵存亡以標勸戒。褒見一字，貴踰軒冕；貶在  
片言，誅深斧鉞。然睿旨存亡幽隱，經文婉約，正明回  
時，實得微言。乃原始要終，創爲傳體。傳者轉也。轉受  
經旨，以授於後。實聖文之羽翮，記籍之冠冕也。至從  
橫之世，史職猶存。秦并七王，而戰國有策。蓋錄而弗  
敘，故節簡而爲名也。漢滅嬴項，武功積年。陸賈稽古，  
作楚漢春秋。爰及太史談世，惟執簡。子長繼志，甄序



帝勩比堯稱典則位雜中賢法孔題經則文非元聖  
故取式呂覽通號曰紀紀綱之號亦宏稱也故本紀  
以述皇王列傳以總侯伯八書以鋪政體十表以譜  
年爵雖殊古式而得事序焉爾其實錄無隱之旨博  
雅宏辨之才愛奇反經之尤條例踳落之失叔皮論  
之詳矣及班固述漢因循前業觀司馬遷之辭思實  
過半其十志該富讚序宏麗儒雅彬彬信有遺味至  
於宗經矩聖之典端緒豐贍之功遺親攘美之罪  
賄鬻筆之愆公理辨之究矣觀夫左氏綴事附經



出於文爲約。而氏族難明。及史遷各傳。人始區詳。  
易覽述者宗焉。及孝惠委機。呂后攝政。班史立紀。  
經失實。何則。庖犧以來。未聞女帝者也。漢運所值。  
爲後法。牝雞無晨。武王首誓。婦無與國。齊桓著盟。宣  
后亂秦。呂氏危漢。豈唯政事難假。亦名號宜慎矣。張  
衡司史。而惑同遷固。元帝王后。欲爲立紀。謬亦甚矣。  
尋子宏雖僞。要當孝惠之嗣。孺子誠微。實繼平帝之  
體。二子可紀。何有於二后哉。至於後漢紀傳。發源東  
觀。袁張所製。偏駁不倫。薛謝之作。踈謬少信。司馬彪



之詳實華嶠之準當則其冠也及魏代三雄記傳互出陽秋魏畧之屬江表吳錄之類或激抗難徵或疎濶寡要唯陳壽三志文質辨洽荀張比之於遷固非妄譽也至於晉代之書繫乎著作陸機肇始而未備王韶續末而不終干寶述紀以審正得序孫盛陽秋以約舉爲能按春秋經傳舉例發凡自史漢以下莫有準的至鄧璨晉紀始立條例又撮畧漢魏憲章殷周雖湘州曲學亦有心典謨及安國立例乃鄧氏之規焉原夫載籍之作也必貫乎百氏被之千載表徵



盛衰殷鑒興廢使一代之制共日月而長有王霸之  
跡並天地而久大是以在漢之初史職爲盛郡國文  
計先集太史之府欲其詳悉於體國必閱石室啓金  
匱抽裂帛檢殘竹欲其博練於稽古也是立義選言  
宜依經以樹則勸戒與奪必附聖以居宗然後銓評  
昭整苛濫不作矣然紀傳爲式編年綴事文非泛論  
按實而書歲遠則同異難密事積則起訖易踈斯固  
總會之爲難也或有同歸一事而數人分功兩記則  
失於複重偏舉則病於不周此又銓配之未易也故



張衡摘史註之舛謬傳元譏後漢之尤煩皆此類  
若夫追述遠代代遠多僞公羊高云傳聞異辭苟  
稱錄遠略近蓋文疑則闕貴信史也然俗皆愛奇莫  
顧實理傳聞而欲偉其事錄遠而欲詳其跡於是棄  
同卽異穿鑿傍說舊史所無我書則傳此訛濫之本  
源而述遠之巨蠹也至於記編同時時同多詭雖定  
哀微辭而世情利害勲榮之家雖庸夫而盡飾進取  
之士雖令德而常嗤理欲吹霜噴露寒暑筆端此又  
同時之枉可歎息者也故述遠則誣矯如彼記近則



回邪如此析理居正唯素臣乎若乃尊賢隱諱固尼  
父之聖旨蓋纖瑕不能玷瑾瑜也姦慝懲戒實良史  
之直筆農夫見莠其必鋤也若斯之科亦萬代一準  
焉至於尋繁領雜之術務信棄奇之要明白頭訖之  
序品酌事例之條曉其大綱則衆理可貫然史之爲  
任乃彌綸一代負海內之貴而羸是非之尤秉筆荷  
擔莫此之勞遷固通矣而歷詆後世若任情失正文  
其殆哉



史肇軒黃體備周孔世歷斯編善惡偕總騰褒貶  
萬古魂動辭宗邱明直歸南董

諸子第十七

諸子者入道見志之書太上立德其次立言百姓之  
群居苦紛雜而莫顯君子之處世疾名德之不章唯  
英才特達則炳曜垂文騰其姓氏懸諸日月焉昔風  
后力牧伊尹咸其流也篇述者蓋上古遺語而戰伐  
所記者也至鬻熊知道而文王諮詢餘文遺事錄爲  
鬻子子自肇始莫先於茲及伯陽識禮而仲尼訪問



爰序道德以冠百氏然則鬻惟文友李實孔師聖賢  
竝世而經子異流矣逮及七國力政俊乂蠡起孟軻  
膺儒以罄折莊周述道以翺翔墨翟執儉確之教尹  
文課名實之符野老治國於地利騶子養政於天文  
申商刀鋸以制理鬼谷脣吻以策勲尸佼兼總於雜  
術青史曲綴以街談承流而枝附者不可勝算竝飛  
辨以馳術壓祿而餘榮矣暨于暴秦烈火勢炎崑岡  
而烟燎之毒不及諸子逮漢成普思子政讎校於是  
七畧芬菲九流鱗萃殺青所編百有八十餘家矣遂



至魏晉作者間出調言兼存稗語必錄類聚而求亦  
克箱照軫矣然繁辭雖積而本體易總述遵言治枝  
條五經其純粹者入矩踏駁者出規禮記月令取乎  
呂氏之紀三年間喪寫乎荀子之書此純粹之類也  
若乃湯之問棘云蚊虻有雷霆之聲惠施對梁王云  
蝸角有伏尸之戰列子有移山跨海之談淮南有傾  
天折地之說此踏駁之類也是以世疾諸混洞虛誕  
說歸藏之經大明迂怪乃稱羿斃十日姮娥奔月殷  
紂如茲况諸子乎至如商韓六風五蠹棄孝廢仁轅



藥之禍非虛至也。公孫之白馬孤犢，辭巧理拙，魏牟比之鴉鳥，非妄貶也。昔東平求諸子史記，而漢朝不與。蓋以史記多兵謀，而諸子雜詭術也。然洽聞之士，宜撮綱要，覽華而食實，棄邪而採正。極睇參差，亦學家之壯觀也。研夫孟荀所述，理懿而辭雅；管晏屬篇，事覈而言練。列御寇之書，氣偉而采奇；鄒子之說，心奢而辭壯。墨翟隨巢，意顯而語質；尸佼尉繚，術通而文鈍。鵠冠綿綿，亟發深言；鬼谷渺渺，每環奧義。情辨以澤，文子擅其能；辭約而精，尹文得其要。慎到析密。



理之巧。韓非著博喻之富。呂氏鑒達而體周。淮南沈  
採而文麗。斯則得百氏之華采。而辭氣文之大略也。  
若夫陸賈典語。賈誼新書。揚雄法言。劉向說苑。王符  
潛夫。崔寔正論。仲長昌言。杜夷幽求。咸叙經典。或明  
政術。雖標論名。歸乎諸子。何者。博門萬事爲子。適辨  
一理爲論。彼皆蔓延雜說。故入諸子之流。夫自六國  
以前。去聖未遠。故能越世高談。自開戶牖。兩漢以後。  
體勢漫弱。雖明乎坦途。而類多依採。此遠近之漸變  
也。嗟夫。身與時舛。志共道申。標心於萬古之上。而送



懷於千載之下、金石靡矣、聲其銷乎、

贊曰

丈夫處世、懷寶挺秀、辨雕萬物、智周宇宙、立德何隱、含道必授、條流殊述、若有區囿、

論說第十八

聖哲彛訓曰、經述經叙、理曰論、論者倫也、倫理有無、聖意不墜、昔仲尼微言、門人追記、故仰其經目、稱爲論語、蓋羣論立名、始於茲矣、自論語已前、經無論字、六韜二論、後人追題、平詳觀論體、條流多品、陟政



與議說合契釋經則與傳注參體辨史則與贊評齊  
行銓文則與叙引共紀故議者宜言說者說語傳者  
轉師注者主解贊者明意評者平理序者次事引者  
屑辭八名區分一揆宗論論也者彌綸羣言而研精  
一理者也是以莊周齊物以論爲名不韋春秋六論  
昭列至石渠論藝白虎通講聚述聖言通經論家之  
正體也及班彪王命巖尤三將敷述昭情善入史體  
魏之初霸術兼名法傳擢王粲校練名理迄至正始  
務欲守文何晏之徒始盛元論於是聃周當路與尼



父爭塗矣。詳觀蘭石之才性，仲宣之去代，叔夜之辨聲，太初之本元，輔嗣之兩例，平叔之二論，竝師心獨見，鋒穎精密，蓋人倫之英也。至如李康運命，同論衡而過之；陸機辨亡，效過秦而不及；然亦其美矣。次及宋岱郭象，銳思於機神之區；夷甫裴頠，交辨於有無之域。並獨步當時，流聲後代。然滯有者，全繫於形用；貴無者，專守於寂寥。徒銳偏解，莫詣正理。動極神源，其般若之絕境乎？逮江左羣談，惟元是務。雖有日新而多抽前緒矣。至如張衡譏世韻，似排說孔融孝廉，但



談嘲戲曹植辨道體同書抄言不持正論如其已原  
夫論之爲體所以辨正然否窮於有數追於無形迹堅  
求通鉤深取極乃百慮之筌蹄萬事之權衡也故其  
義貴圓通辭忌枝碎必使心與理合彌縫莫見其隙  
辭共心密敵人不知所乘斯其要也是以論如析薪  
貴能破理斤利者越理而橫斷辭辨者反義而取通  
覽文雖巧而檢跡如妄唯君子能通天下之志安可  
以曲論哉若夫注釋爲詞解散論體襍文雖異總會  
是同若秦君延之注堯典十餘萬字朱普之解尚書



三十萬言，所以通人惡煩，羞學章句。若毛公之訓詩，安國之傳書，鄭君之釋禮，王弼之解易，要約明暢，可謂式矣。說者悅也。兌爲口舌，故言咨悅懌，過悅必譌。故舜驚讒說，說之善者，伊尹以論味，隆殷。太公以辨釣，興周。及燭武行而紓鄭，端木出而存魯，亦其美也。暨戰國爭雄，辨士雲踊，從橫參謀，長短角勢，轉丸騁其巧辭，飛鉗伏其精術。一人之辨，重於九鼎之寶；三寸之舌，強於百萬之師。六印磊落以佩，五都隱賑而封。至漢定秦楚，辨士弭節。酈君卽斃於齊，饒荊子幾



入乎漢鼎。雖復陸賈籍甚。張釋傅會。杜欽文辨。婁護  
唇舌。頡頏萬乘之階。抵噓公卿之席。竝順風以託勢。  
莫能逆波而泝洄矣。夫說貴撫會。弛張相隨。不專緩  
頰。亦在刀筆。范雎之言事。李斯之止逐客。竝煩情入  
機。動言中務。雖批逆鱗。而功成計合。此上書之善說  
也。至於鄒陽之說吳梁。喻巧而理至。故雖危而無咎  
矣。敬通之說鮑鄧。事緩而文繁。所以歷騁而罕遇也。  
凡說之樞要。必使時利而義貞。進有契於成務。退無  
阻於榮身。自非譎敵。則唯忠與信。披肝膽以獻主。飛



文敏以濟辭、此說之本也。而陸氏直稱說煒曄以譎誑、何哉。

贊曰

理形於言、叙理成論、詞深人天、致遠方寸、陰陽莫貳、鬼神靡遯、說爾飛鉗、呼吸沮勸。

詔策第十九

皇帝御寓、其言也神、淵嘿黼辰、而響盈四表、唯詔策乎。昔軒轅唐虞、同稱爲命、命之爲義、制性之本也。其在三代、事兼誥誓、誓以訓戒、誥以敷政、命喻自天、故



授管錫胤，易之姤象。后以施命誥四方，誥命動民。若天下之有風矣。降及七國，竝稱曰令。令者使也。秦并天下，改命曰制。漢初定儀則，則命有四品：一曰策書，二曰制書，三曰詔書，四曰戒勅。勅，戒州部；詔，誥百官；制，施赦命；策，封王侯。策者簡也，制者裁也，詔者告也，勅者正也。詩云：「畏此簡書。」易稱：「君子以制度數，禮稱明君之詔。」書稱：「勅天之命。」竝本經典以立名目。遠詔近命，習秦制也。記稱：「絲綸所以應接羣后。」虜重紉言，周貴喉舌，故兩漢詔誥職在尚書。王言之大動，入史。



策其出如綽，不反若汗。是以淮南有英才，武帝使相如視草。隴右多文士，光武加意於書辭，豈直取美書時，亦敬慎來葉矣。觀文景以前，詔體浮新，武帝崇儒，選言宏奧，策封三王，文同訓典，勸戒淵雅，垂範後代，及制誥嚴助，卽云厭承明廬，蓋寵才之恩也。孝宣重書，賜太守陳遂，亦故舊之厚也。逮光武撥亂，留意斯文，而造次喜怒，時或偏濫，詔賜鄧禹，稱司徒爲堯勅，責侯霸，稱黃鉞一下，若斯之類，實乖憲章。暨明帝崇學，雅詔間出，安和政弛，禮閣鮮才，每爲詔勅，假手外



請建安之末文理代興潘勗九錫典雅逸群衛凱禮  
誥符命炳耀弗可加已自魏晉誥策職在中書劉放  
張華互管斯任施命發號洋洋盈耳魏文帝下詔  
義多偉至於作威作福其萬慮之一弊乎晉氏中興  
唯明帝崇才以溫嶠文清故引入中書自斯以後  
憲風流矣夫王言崇秘大觀在上所以百辟其刑  
邦作孚故授官選賢則義炳重離之輝優文封策  
氣含風雨之潤勅戒恒誥則筆吐星漢之華治戎  
伐則聲有滄雷之威膏災肆赦則文有春露之滋明



罰勅法則辭有秋霜之烈。此詔策之大略也。戒勅爲文，實詔之切者。周穆命郊父受勅憲，此其事也。魏武稱作勅戒，當指事而語，勿得依違，曉治要矣。及晉武勅戒，備告百官，勅都督以兵要，戒州牧以董司，警郡守以恤隱，勒牙門以禦衛，有訓典焉。戒者慎也。禹稱戒之用休，君父至尊，在三罔極。漢高祖之勅太子，東方朔之戒子，亦顧命之作也。及馬援已下，各遺家戒。班姬女戒，足稱母師也。教者效也。言出而民效也。契敷五教，故王侯稱教。昔鄭宏之守南陽，條教爲後所



述乃事緒明也。孔融之守北海，文教麗而罕於理，乃治體乖也。若諸葛孔明之詳約，庾雅恭之明斷，並理得而辭中，教之善也。自教以下，則又有命。詩云：有命在天，明爲重也。周禮曰：師氏詔王爲輕命，今詔重而命輕，古今之變也。

贊曰

皇王施令，寅嚴宗誥。我有絲言，兆民尹好。輝音峻舉，鴻風遠蹈。騰義飛辭，煥其大號。

檄移第二十

震雷始於曜電，出師先乎威聲。故觀電而懼雷，壯聽聲而懼兵。威兵先乎聲，其來已久。昔有虞始戒於國，夏后初誓於軍，殷誓軍門之外，周將交刃而誓之。故知帝世戒兵，三王誓師，宜訓我衆，未及敵人也。至周穆西征，祭公謀父稱古有威讓之令，令有文告之辭，卽檄之本源也。及春秋征伐，自諸侯出，懼敵弗服，故兵出須名，振此威風。暴彼昏亂，劉獻公之所謂告之以文辭，董之以師武者也。齊桓征楚，詰菴茅之闕，晉厲伐秦，責箕郤之焚，管仲、呂相奉辭先路，詳其意義。



卽今之檄文暨乎戰國始稱爲檄檄者皦也宣露於外皦然明白也張儀檄楚書以尺二明白之文或稱露布播諸視聽也夫兵以定亂莫敢自專天子親戎則稱恭行天罰諸侯御師則云肅將王誅故分闔推轂奉辭伐罪非唯致果爲毅亦且厲辭爲武使聲如衝風所擊氣似攬槍所掃奮其武怒總其罪人懲其惡稔之時顯其貫盈之數搖姦宄之膽訂信慎之心使百尺之衝摧折於咫書萬雉之城顛墜於一檄者也觀隗囂之檄亡新布其三逆文不雕飾而辭切事

明隴右文士得檄之體矣。陳琳之檄豫州，壯有骨鯁。雖姦閹携養，章密太甚，發兵換金，誣過其虐，然抗辭書檄，皦然露骨矣。敢指曹公之鋒，幸哉免袁黨之戮也。鍾會檄蜀，徵驗甚明。桓公檄胡，觀釁尤切。竝壯筆也。凡檄之大體，或述此休明，或叙彼苛虐，指天時，審人事，算強弱，角權勢，標著龜於前，驗懸輦鑑於已然。雖本國信實，參兵詐譎，詭以馳旨，煒曄以騰說，凡此衆條，莫或違之者也。故其植義颺辭，務在剛健，插羽以示迅，不可使辭緩；露板以宜衆，不可使義隱。必事



昭而理辨氣盛而辭斷此其要也若曲趣密巧無所  
取才矣又州郡徵吏亦稱爲檄固明舉之義也移者  
易也移風易俗令往而民隨者也相如之難蜀老文  
曉而喻博有移檄之骨焉及劉歆之移太常辭剛而  
義辨文移之首也陸機之移百官言約而事顯武移  
之要者也故檄移爲用事兼文武其在金革則逆黨  
用檄順命資移所以洗濯民心堅同符契意用小異  
而體義大同與檄參伍故不重論也

贊曰

三驅弛剛九伐先話輦鑑吉凶著龜成敗推壓鯨鯢  
抵落蜂蠆移寶易俗草偃風邁



文心雕龍卷五

封禪第二十一

夫正位北辰嚮明南面所以運天樞毓黎獻者何嘗  
不經道緯德以勒皇蹟者哉錄圖曰渾渾噶噶勞勞  
雉雉萬物盡化言至德所被也丹書曰義勝欲則從  
欲勝義則凶戒慎之至也則戒慎以崇其德至德以  
凝其化七十有二君所以封禪矣昔黃帝神靈克膺  
鴻瑞勒功喬岳鑄鼎荆山大舜巡岳顯乎虞典成康  
封禪聞之樂緯及齊桓之霸爰窺王跡夷吾譎陳拒

以怪物固知玉牒金鏤專在帝皇也然則西鵜東鯨  
南茅北黍空談非徵勲德而已是史遷八書明述封  
禪者固禪祀之殊禮名號之秘祝祀天之壯觀矣秦  
始皇銘岱文自李斯法家辭氣體乏宏潤然踈而能  
壯亦彼時之絕采也鋪觀兩漢隆盛孝武禪號於肅  
然光武巡封於梁父誦德銘勲乃鴻筆耳觀相如封  
禪蔚爲唱首爾其表權輿序皇王炳元祿鏡鴻業驅  
前古於當今之下騰休明於列聖之上歌之以貞瑞  
讚之以介祉絕筆茲文固惟新之作也及光武勒碑



則文自張純首盾典謨末同祝辭引鉤識叙離亂計  
武功述文德事覈理舉華不足而實有餘矣凡此二  
家竝岱宗實跡也及揚雄劇秦班固典引事非鐫石  
而體因紀禪觀劇秦爲文影寫長卿詭言遜辭故兼  
包神怪然骨掣靡密辭貫圓通自稱極思無遺力矣  
典引所序雅有懿乎歷鑑前作能執厥中其致義會  
文斐然餘巧故稱封禪麗而不典劇秦典而不實豈  
非追觀易爲明循勢易爲力歟至於邯鄲受命攀響  
前聲風末力寡輯韻成頌雖文理順序而不能奮飛

陳思魏德假論客主問答迂緩且已千言勞深勩寡  
飈歊缺焉茲文爲用蓋一代之典章也構位之始宜  
明大體樹骨於訓典之區選言於宏富之路使意古  
而不晦於深文今而不墜於淺義吐光芒辭成靡鏝  
則爲偉矣雖復道極數殫終然相襲而日新其采者  
必超前轍焉

贊曰

封勒帝勩對越天休  
逃聽高岳聲英克彪  
樹石九畹泥金八幽  
鴻律蟠采如龍如虬



章表第二十二

夫設官分職、高卑聯事、天子垂珠以聽、諸侯鳴玉以朝、敷奏以言、明試以功、故堯咨四岳、舜命八元、固辭再讓之請、俞往欽哉之授、竝陳辭帝庭、匪假書翰、然則敷奏以言、卽章表之義也、明試以功、卽授爵之典也、至太甲旣立、伊尹書誡、思庸歸亳、又作書以繼文翰、獻替事斯見矣、周監二代、文理彌盛、再拜稽首對揚休命、承文受冊、敢當丕顯、雖言筆未分、而陳謝可見、降及七國、未變古式、言事於王、皆稱上書、秦初定



制改書曰奏。漢定禮儀，則有四品：一曰章，二曰奏，三曰表，四曰議。章以謝恩，奏以按劾，表以陳請，議以執異。章者明也。詩云：爲章於天，謂文明也。其在文物，赤白曰章，表者標也。禮有表記，謂德見于儀，其在器式，揆景曰表，章表之目，蓋取諸此也。按七畧藝文，謠詠必錄，章表奏議，經國之樞機，然闕而不纂者，乃各有故事而在職司也。前漢表謝遺篇，寡存及後漢察舉，必試章奏。左雄奏議臺閣爲式，胡廣章奏天下第一。並當時之傑筆也。觀伯始謁陵之章，足見其典文之



焉昔晉文受冊三辭從命是以漢末讓表以三爲斷  
曹公稱爲表不必三讓又勿得浮華所以魏初表章  
措事造實求其靡麗則未足美矣至於文舉之薦  
衡氣揚采飛孔明之辭後主志盡文暢雖華實異  
竝表之英也琳瑯章表有譽當時孔璋稱健則其標  
也陳思之表獨冠羣才觀其體贍而律調辭清而志  
顯應物掣巧隨變生趣執轡有餘故能緩急應節  
逮晉初筆札則張華爲雋其三讓公封理周辭要引義  
比事必得其偶世珍鵠鷄莫顧章表及羊公之辭開



府有譽於前談。庾公之讓中書。信美於往載。序志顯類。有文雅焉。劉琨勸進。張駿自序。文致耿介。竝陳事之美表也。原夫章表之爲用也。所以對揚王庭。昭明心曲。旣其身文。亦且國華。章以造闕。風矩應明。表以致禁。骨采宜耀。循名課實。以章爲本者也。是以章式炳賁。志在典謨。使要而非略。明而不淺。表體多包。情僞屢遷。必雅義以扇其風。清文以馳其麗。然懇愜者辭爲心使。浮侈者情爲文使。繁約得正。華實相勝。展吻不滯。則中律矣。子貢云。心以制之。言以結之。蓋一



辭意也。荀卿以爲觀人美辭，麗於黼黻文章，亦可以喻於斯乎。

贊曰

敷奏絳闕，獻替黼辰。言必貞明，義則宏偉。肅恭節文，條理首尾。君子秉文，辭令有斐。

奏啓第二十三

昔唐虞之臣，敷奏以言。秦漢之輔，上書稱奏。陳政事，獻典儀，上急變，劾僭謬，總謂之奏。奏者進也。言敷于下，情進于上也。秦始立奏，而法家少文。觀王綰之奏。



勲德辭質而義近。李斯之奏驪山。事略而意逕。政無  
膏潤。形於篇章矣。自漢以來。奏事或稱上疏。儒雅繼  
踵。殊采可觀。若夫賈誼之務農。晁錯之兵事。匡衡之  
定郊。王吉之觀禮。溫舒之緩獄。谷永之諫仙。理既  
至。辭亦通暢。可謂識大體矣。後漢羣賢。嘉言罔伏。擢  
秉耿介於災異。陳蕃憤懣於尺一。骨鯁得焉。張衡  
摘於史職。蔡邕銓列於朝儀。博雅明焉。魏代名臣。文  
選興。若高堂天文。黃觀教學。王朗節省。甌毅考課。  
亦盡節而知治矣。晉氏多難。災屯流移。劉頌殷勤於



時移溫嶠懇切於費役並體國之忠規矣。夫奏之爲  
筆。固以明允篤誠爲本。辨析疏通爲首。強志足以成  
務。博見足以窮理。酌古御今。治繁總要。此其體也。若  
乃按劾之奏。所以明憲清國。昔周之太僕。繩愆糾繆。  
秦之御史。職主文法。漢置中丞。總司按劾。故位在摯  
擊。砥礪其氣。必使筆端振風。簡上凝霜者也。觀孔光  
之奏董賢。則實其姦回。路粹之奏孔融。則誣其釁惡。  
名儒之與險士。固殊心焉。若夫傳咸勁直。而按辭堅  
深。劉隗切正。而劾文潤略。各其志也。後之彈事。迭相



斟酌惟新。日用而舊。準弗差然。面人欲全。矢人欲傷。術在糾惡。勢必深峭。詩刺讒人。投畀豺虎。禮疾無禮。方之鸚猩。墨翟非儒。日以彘彘。孟軻譏墨。比諸禽獸。詩禮儒墨。既其如茲。奏効嚴文。孰云能免。是以世人爲文。競於詆訶。吹毛取瑕。次骨爲戾。復似善罵。多失折衷。若能闢禮門以懸規。標義路以植矩。然後踰垣者折肱。捷徑者滅趾。何必躁言醜句。詬病爲切哉。是以立範運衡。宜明體要。必使理有典刑。辭有風軌。總法家之式。秉儒家之文。不畏強禦。氣流墨中。無縱詭



隨聲動簡外。乃稱絕席之雄。直方之舉耳。啓者開也。高宗云啓乃心。沃朕心。取其義也。孝景諱啓。故兩漢無稱。至魏國箋記始云啓聞。奏事之末。或云謹啓。自晉來盛啓。用兼表奏。陳政言事。既奏之異條。讓爵謝恩。亦表之別幹。必歛散入規。促其音節。辨要輕清。文而不侈。亦啓之大畧也。又表奏确切。號爲讜言。讜者偏也。王道有偏。乖乎蕩蕩。其偏故曰讜言也。孝成稱班伯之讜言。貴直也。自漢置八儀。密奏陰陽。皂囊封板。故曰封事。晁錯受書。還上便宜。後代便宜。多附封



事慎機密也。夫王臣匪躬，必吐蹇諤，事舉人存，故無待泛說也。

贊曰

皂飭司直，肅清風禁，筆銳干將，墨含淳醜，雖有次骨，無或膚浸，獻政陳宜，事必勝任。

議對第二十四

周爰諮謀，是謂爲議，議之言宜，審事宜也。易之節卦，君子以制度數，議德行，周書曰：議事以制，政乃弗迷。議貴節制，經典之體也。昔管仲稱軒轅有明臺之議。



則其來遠矣。洪水之難，堯咨四岳，宅揆之舉，舜疇五  
人，三代所興，詢及芻蕘。春秋釋宋，魯桓務議，及趙靈  
胡服，而季父爭論，商鞅變法，而甘龍交辨。雖憲章無  
算，而同異足觀。迄今有漢，始立駁議，駁者雜也。雜議  
不純，故曰駁也。自兩漢文明，楷式昭備，藹藹多士，發  
言盈庭。若賈誼之遍代諸生，可謂捷於議也。至如主  
父之駁挾弓，安國之辨匈奴，賈捐之陳於朱崖，劉歆  
之辨於祖宗，雖質文不同，得事要矣。若乃張敏之斷  
輕侮，郭躬之議擅誅，程曉之駁校事，司馬芝之議貨



錢何曾蠲出女之科。秦秀定賈克之諡。事實允當。可謂達議體矣。漢世善駁。則應劭爲首。晉代能議。則傅咸爲宗。然仲瑗博古而銓貫有叙。長虞識治而屬辭枝繁。及陸機斷議。亦有鋒穎。而腴辭弗翦。頗累文骨。亦各有美風格存焉。夫動先擬議。明用稽疑。所以敬慎羣務。弛張治術。故其大體所資。必樞紐經典。採故實於前代。觀通變於當今。理不謬搖其枝。字不妄舒其藻。又郊祀必洞於理。戎事必練於兵。佃穀先曉於農。斷訟務精於律。然後標以顯義。約以正辭。文以辨



潔爲能。不以繁縟爲巧。事以明覈爲美。不以深隱爲奇。此綱領之大要也。若不達政體而舞筆弄文。支離  
搆辭。穿鑿會巧。苟空騁其華。固爲事實所擯。設得其  
理。亦爲遊辭所埋。昔秦女嫁晉。從文衣之媵。晉人貴  
媵而賤女。楚珠鬻鄭。爲薰桂之櫝。鄭人買櫝而還珠。  
若文浮於理。未勝其本。則秦女楚珠。復在於茲矣。又  
對策者。應詔而陳政也。射策者。探事而獻說也。言中  
理準。譬射侯中的。二名雖殊。卽議之別體也。古之造  
士。選事考言。漢文中年。始舉賢良。晁錯對策。蔚爲舉



首及孝武益明。旁求俊乂。對策者以第一登庸。射策者以甲第入仕。斯因選賢要術也。觀晁氏之對。證驗古今。辭裁以辨。事通而贍。超升高第。信有徵矣。仲舒之對。祖述春秋。本陰陽之化。究列代之變。煩而不恩者。事理明也。公孫之對。簡而未博。然總要以約。文事切而情舉。所以太常居下。而天子擢上也。杜欽之對。略而指事。辭以治宜。不爲文作。及後漢魯丕。辭氣質素。以儒雅中策。以入高第。凡此五家。竝前代之明範也。魏晉已來。稍務文麗。以文紀實。所失已多。及其來



選又稱疾不會。雖欲求文，弗可得也。是以漢飲博士而雉集乎堂。晉策秀才而磨興於前。無他怪也。選失之異耳。夫駁議偏辨，各執異見，對策掄揚，大明治道，使事深於政術，理密於時務，酌三五以鎔世，而非迂緩之高談，馭權變以拯俗，而非刻薄之僞論。風恢恢而能遠，流洋洋而不溢，王庭之美對也。難矣哉！士之爲才也，或練治而寡文，或工文而疎治。對策所選，實屬通才，志足文遠，不其鮮歟。

贊曰



議惟疇政、名實相課、斷理必綱、摘辭無懦、對策王庭、同時酌和、治體高秉、雅謨遠播、

書記第二十五

六舜云書用識哉、所以記時事也、蓋聖賢言辭總爲尚書、尚書之爲體、主言者也、揚雄曰言心聲也、書心畫也、聲畫形、君子小人可見矣、故書者舒也、舒布其言、陳之簡牘、取象乎夬、貴在明決而已、三代政暇、文翰頗疎、春秋聘繁、書介彌盛、繞朝贈士會以策、子家與趙宣以書、巫臣之遺子反、子產之諫范宣、詳觀四



書辭若對面。又子服敬叔進弔書於滕君。固知行人  
挈辭多被翰墨矣。及七國獻書。詭麗輻輳。漢來筆札。  
辭氣紛紜。觀史遷之報任安。東方朔之難公孫。楊惲  
之酬會宗。子雲之答劉歆。志氣槃桓。各含殊采。竝杼  
軸乎尺素。抑揚乎寸心。逮後漢書記。則崔瑗尤善。魏  
之元瑜。號稱翩翩。文舉屬章。半簡必錄。休璉好事。留  
意辭翰。抑其次也。稽康絕交。實志高而文偉矣。趙至  
叙離。廼少年之激切也。至如陳遵占辭。百封各意。襍  
衡代書。親疎得宜。斯又尺牘之偏才也。詳總書體。本



在盡言、言以散鬱陶、託風采。故宜條暢以任氣、優柔以懌懷。文明從容、亦心聲之獻酬也。若夫尊貴差序、則肅以節文、戰國以前、君臣同書。秦漢立儀、始有表奏。王公國內、亦稱奏書。張敞奏書於膠后、其義美矣。迄至後漢、稍有名品。公府奏記、而郡將奏牋、記之言志、進已志也。牋者表也。表識其情也。崔寔奏記於公府、則崇讓之德音矣。黃香奏牋於江夏、亦肅恭之遺式矣。公幹牋記、麗而規益。子桓弗論、故世所共遺。若略名取實、則有美於爲詩矣。劉廙謝恩、喻切以至。陸



機自理情周而巧。賡之爲善者也。原賡記之爲式。既上窺乎表。亦下睨乎書。使敬而不懼。簡而無傲。清美以惠其才。彪蔚以文其響。蓋賡記之分也。夫書記廣大。衣被事體。筆劄雜名。古今多品。是以總領黎庶。則有譜籍簿錄。鑒歷星筮。則有方術占試。申憲述兵。則有律令法制。朝市徵信。則有符契券疏。百官詢事。則有關刺解謀。萬民達志。則有狀列辭諺。並述理於心。著言於翰。雖藝文之末品。而政事之先務也。故謂譜者普也。注序世統。事資周普。鄭氏譜詩。蓋取乎此。籍



者借也。歲借民力，條之於版。春秋司籍，卽其事也。簿者，圖也。草木區別，文書類聚。張湯、李廣爲吏，所簿別情僞也。錄者，領也。古史世本，編以簡策，領其名數，故曰錄也。方者，隅也。醫藥攻病，各有所主，專精一隅，故藥術稱方。術者，路也。算歷極數，見路乃明。九章積微，故以爲術。淮南萬畢，皆其類也。占者，覘也。星辰飛伏，伺候乃見。精觀書雲，故曰占也。式者，則也。陰陽盈虛，五行消息，變雖不常，而稽之有則也。律者，中也。黃鍾調起五音，以正音；以正法律，馭民。八刑克平，以律爲



名取中正也。令者命也。出命申禁。有若自天。管仲下  
命如流水。使民從也。法者象也。兵謀無方而奇。正有  
象。故曰法也。制者裁也。上行於下。如匠之制器也。符  
者孚也。徵召防僞。事資中孚。三代玉瑞。漢世金竹。未  
代從省易以書翰矣。契者結也。上古純質。結繩執契。  
今羌胡徵數。負販記繒。其遺風歟。券者束也。明白約  
束。以備情僞。字形半分。故周稱判書。古有鐵券。以堅  
信誓。王褒髯奴。則券之楷也。疏者布也。布置物類。撮  
題近意。故小券短書。號爲疏也。關者閉也。出入由門。



關閉當審庶務在政通塞應詳韓非云孫亶回聖相也而關於州郡蓋謂此也刺者達也詩人諷刺周禮三刺事叙相逢若針之通結矣解者釋也解釋結滯徵事以對也牒者葉也短簡編牒如葉在枝溫舒截蒲卽其事也議政未定故短牒咨謀牒之尤密謂之爲籤籤者籤密者也狀者貌也禮貌本原取其事實先賢表謚竝有行狀狀之大者也列者陳也陳列事情昭然可見也辭者舌端之文通已於人子產有辭諸侯所賴不可已也諺者直語也喪言亦不及文故





弔亦稱諺。塵路淺言。有實無華。鄒穆公云。囊滿儲中。皆其類也。太誓曰。古人有言。牝雞無晨。大雅云。人亦有言。惟憂用老。竝上古遺諺。詩書可引者也。至於陳琳諫辭。稱掩目捕雀。潘岳哀辭。稱掌珠伉儷。竝引俗說而爲文辭者也。夫文辭鄙俚。莫過於諺。而聖賢詩書採以爲談。况踰於此。豈可忽哉。觀此四條。竝書記所總。或事本相通。而文意各異。或全任質素。或雜用文綺。隨事立體。貴乎精要。意少一字。則義闕。句長一言。則辭妨。竝有司之實務。而浮藻之所忽也。然才冠



鴻筆多疎尺牘。譬九方堙之識駿足。而不知毛色牝牡也。言旣身文。信亦邦瑞。翰林之士。思理實焉。

贊曰

文藻條流。託在筆札。旣馳金相。亦運木訥。萬古聲薦。千里應拔。庶務紛綸。因書乃察。





文心雕龍卷六

神思第二十六

古人云形在江海之上。心存魏闕之下。神思之謂也。文之思也。其神遠矣。故寂然凝慮。思接千載。悄焉動容。視通萬里。吟詠之間。吐納珠玉之聲。睂睫之前。卷舒風雲之色。其思理之致乎。故思理爲妙。神與物游。神居胷臆而志氣統其關鍵。物沿耳目而辭令管其樞機。樞機方通。則物無隱貌。關鍵將塞。則神有遯心。是以陶鈞文思。貴在虛靜。疏淪五藏。澡雪精神。積學



以儲寶。酌理以富才。研閱以窮照。馴致以懌辭。然後  
使元解之宰。尋聲律而定墨。獨照之匠。闕意象而運  
斤。此蓋馭文之首術。謀篇之大端。夫神思方運。萬塗  
競萌。規矩虛位。刻鏤無形。登山則情滿於山。觀海則  
意溢於海。我才之多少。將與風雲而並驅矣。方其搦  
翰。氣倍辭前。暨乎篇成。半折心始。何則。意翻空而易  
奇。言徵實而難巧也。是以意授於思。言授於意。密則  
無際。疎則千里。或理在方寸。而求之域表。或義在咫  
尺。而思隔山河。是以秉心養術。無務苦慮。含章司契。



不必勞情也。人之稟才遲速異分，文之制體大小殊  
功相如。含筆而腐毫，揚雄輟翰而驚夢。桓譚疾感於  
苦思，王充氣竭於思慮。張衡研京以十年，左思練都  
以一紀。雖有巨文，亦思之緩也。淮南崇朝而賦騷，枚  
臯應詔而成賦。子建援牘如口誦，仲宣舉筆似宿構。  
阮瑀據案而制書，禰衡當食而草奏。雖有短篇，亦思  
之速也。若夫駿發之士，心總要術，敏在慮前，應機立  
斷。覃思之人，情饒岐路，鑒在疑後，研慮方定。機敏故  
造次而成功，慮疑故愈久而致績。難易雖殊，並資博



練若學淺而空遲。才踈而徒速。以斯成器。未之前聞。  
是以臨篇綴慮。必有二患。理鬱者苦貧。辭溺者傷亂。  
然則博聞爲饋貧之糧。貫一爲拯亂之藥。博而能一。  
亦有助乎心力矣。若情數詭雜。體變遷貿。拙辭或孕  
於巧義。庸事或萌於新意。視布於麻。雖云未費。杼軸  
獻功。煥然乃珍。至於思表纖旨。文外曲致。言所不追。  
筆固知止。至精而後闡其妙。至變而後通其數。伊摯  
不能言鼎輪扁不能語斤其微矣乎。



神用象通。情變所孕。物以貌求。心以理應。刻鏤聲律。萌芽比興。結慮司契。垂帷制勝。

體性第二十七

夫情動而言形。理發而文見。蓋沿隱以至顯。因內而符外者也。然才有庸雋。氣有剛柔。學有淺深。習有雅鄭。竝情性所鑠。陶染所凝。是以筆區雲謫。文苑波詭者矣。故辭理庸雋。莫能翻其才。風趣剛柔。寧或改其氣。事義淺深。未聞乖其學。體式雅鄭。鮮有反其習。各師成心。其異如面。若總其歸塗。則數窮八體。一曰典。



雅二曰遠奧三曰精約四曰顯附五曰繁縟六曰壯麗七曰新奇八曰輕靡典雅者鎔式經誥方軌儒門者也遠奧者馥采典文經理元宗者也精約者覈字省句剖析毫釐者也顯附者辭直義暢切理厭心者也繁縟者博喻釀采煒熠枝派者也壯麗者高論宏裁卓爍異采者也新奇者擯古競今危側趣詭者也輕靡者浮文弱植縹緲附俗者也故雅與奇反奧與顯殊繁與約舛壯與輕乖文辭根葉苑囿其中矣若夫八體屢遷功以學成才力居中肇自血氣氣以實



志。志以定言。吐納英華。莫非情性。是以賈生俊發。故  
文潔而體清。長卿傲誕。故理侈而辭溢。子雲沉寂。故  
志隱而味深。子政簡易。故趣昭而事博。孟堅雅懿。故  
裁密而思靡。平子淹通。故慮周而藻密。仲宣躁銳。故  
穎出而才果。公幹氣褊。故言壯而情駭。嗣宗傲儻。故  
響逸而調遠。叔夜儁俠。故興高而采烈。安仁輕敏。故  
鋒發而韻流。士衡矜重。故情繁而辭隱。觸類以推。表  
裏必符。豈非自然之恒資。才氣之大略哉。夫才有天  
資。學慎始習。斲梓染絲。功在初化。器成綵定。難可翻



移故童子雕琢必先雅製。沿根討葉，思轉自圓，八體雖殊，會通合數，得其環中，則輻輳相成，故宜摹體以定習，因性以練才，文之司南，用此道也。

贊曰

才性異區，文體繁詭，辭爲膚根，志實骨髓。雅麗輔散，淫巧朱紫，習亦凝真，功沿漸靡。

風骨第二十八

詩總六義，風冠其首，斯乃化感之本源，志氣之符契也。是以怛悵述情，必始乎風，沉吟鋪辭，莫先於骨。故



辭之待骨。如體之樹骸。情之含風。猶形之包氣。結言端直。則文骨成焉。意氣駿爽。則文風清焉。若豐藻克瞻。風骨不飛。則振采失鮮。負聲無力。是以綴慮裁篇。務盈守氣。剛健既實。輝光乃新。其爲文用。譬征鳥之使翼也。故練於骨者。析辭必精。深乎風者。述情必顯。捶字堅而難移。結響凝而不滯。此風骨之力也。若瘠義肥辭。繁雜失統。則無骨之徵也。思不環周。索莫之氣。則無風之驗也。昔潘勗錫魏。思摹經典。羣才韜筆。乃其骨髓駿也。相如賦仙。氣號凌雲。蔚爲辭宗。廼其



風力適也能鑒斯要。可以定文。茲術或違。無務繁采。  
故魏文稱文以氣爲主。氣之清濁有體。不可力強而  
至。故其論孔融則云。體氣高妙。論徐幹則云。時有齊  
氣。論劉楨則云。時有逸氣。公幹亦云。孔氏卓卓。信舍  
異氣。筆墨之性。殆不可勝。並重氣之旨也。夫翬翟備  
色。翮翥百步。肌豐而力沈也。鷹隼乏采。翰飛戾天。骨  
勁而氣猛也。文章才力。有似於此。若風骨乏采。則驚  
集翰林。采乏風骨。則雉竄文囿。唯藻耀而高翔。固文  
筆之鳴鳳也。若夫鎔鑄經典之範。翔集子史之術。洞



曉情變曲昭文體。然後能葦甲新意。雕畫奇辭。昭體  
故意新而不亂。曉變故辭奇而不黷。若骨采未圓。風  
辭未練。而跨略舊規。馳騖新作。雖獲巧意。危敗亦多。  
豈空結奇字。紕繆而成經矣。周書云。辭尚體要。弗惟  
好異。蓋防文濫也。然文術多門。各適所好。明者弗授  
學者弗師。於是習華隨侈。流遁忘反。若能確乎正式。  
使文明以健。則風清骨峻。篇體光華。能研諸慮。何遠  
之有哉。

贊曰



情與氣偕辭共體並文明以健珪璋乃騁蔚彼風力  
巖此骨鯁才鋒峻立符采克炳

通變第二十九

夫設文之體有常變文之數無方何以明其然耶凡  
詩賦書記名理相因此有常之體也文辭氣力通變  
則久此無方之數也名理有常體必資於故實通變  
無方數必酌於新聲故能騁無窮之路飲不竭之源  
然綆短者銜渴足疲者輟塗非文理之數盡乃通變  
之術疎耳故論文之方譬諸草木根幹麗土而同性



臭味晞陽而異品矣。是以九代詠歌，志合文則黃歌，斷竹質之至也。唐歌在晉則廣於黃世，虞歌卿雲則文於唐時，夏歌雕牆縟於虞代，商周篇什麗於夏年。至於序志述時，其揆一也。暨楚之騷文，矩式周人，漢之賦頌，影寫楚世。魏之策制，顧慕漢風，晉之辭章，瞻望魏采。確而論之，則黃唐淳而質，虞夏質而辨，商周麗而雅，楚漢侈而艷，魏晉淺而綺，宋初訛而新，從質及訛，彌近彌澹。何則？競今踈古，風味氣衰也。今才穎之士，刻意學文，多略漢篇，師範宋集，雖古今備閱，然



近附而遠踈矣。夫青生於藍，絳生於蒨，雖踰本色，不能復化。桓君山云：予見新進麗文，美而無採，及見劉楊言辭，常輒有得，此其驗也。故練青濯絳，必歸藍蒨，矯訛翻淺，還宗經誥，斯斟酌乎質文之間，而橐括乎雅俗之際，可與言通變矣。夫誇張聲貌，則漢初已極，自茲厥後，循環相因，雖軒翥出轍，而終入籠內，枚乘七發云：通望兮東海，虹洞兮蒼天，相如上林云：視之無端，察之無涯，日出東沼，月生西陂，馬融廣城云：天地虹洞，固無端涯，大明出東，月生西陂，揚雄校獵云：



出入日月、天與地沓張衡西京云、日月於是乎出入、  
象扶桑於濛汜、此竝廣寓極狀、而五家如一、諸如此  
類、莫不相循、參伍因革、通變之數也、是以規略文統、  
宜宏大體、先博覽以精閱、總綱紀而攝契、然後拓衢  
路、置關鍵、長轡遠馭、從容按節、憑情以會通、負氣以  
適變、采如宛虹之奮、譬光若長離之振翼、迺脫穎之  
文矣、若乃齟齬於偏解、矜激乎一致、此庭間之廻驟、  
豈萬里之逸步哉。

贊曰



文律運周。日新其業。變則其久。通則不乏。趨時必果。乘機無怯。望今制奇。參古定法。

定勢第三十

夫情致異區。文變殊術。莫不因情立體。卽體成勢也。勢者。乘利而爲制也。如機發矢直。澗曲湍回。自然之趣也。圓者規體。其勢也自轉。方者矩形。其勢也自安。文章體勢。如斯而已。是以模經爲式者。自入典雅之懿。效騷命篇者。必歸豔逸之華。綜意淺切者。類乏醜籍。斷辭辨約者。率乖繁縟。譬激水不滯。槁木無陰。自



然之勢也。是以繪事圖色文辭盡情色糅而犬馬殊  
形情交而雅俗異勢。鎔範所擬各有司匠。雖無嚴郭  
難得踰越。然淵乎文者。竝總羣勢。奇正雖反。必兼解  
以俱通。剛柔雖殊。必乘時而適用。若愛典而惡華。則  
兼通之理偏。似夏人爭弓矢。執一不可以獨射也。若  
雅鄭而共篇。則總一之勢離。是楚人鬻矛譽盾。兩難  
得而俱售也。是以括囊雜體。切在銓別。宮商朱紫。隨  
勢各配。章表奏議。則準的乎典雅。賦頌歌詩。則羽儀  
乎清麗。符檄書移。則楷式於明斷。史論序注。則師範



於覈要。箴銘碑誄。則體制於宏深。連珠七辭。則從事於巧豔。此循體而成勢。隨變而立功者也。雖復契會相參。節文互雜。譬五色之錦。各以本采爲地矣。桓譚稱文家各有所慕。或好浮華而不知實覈。或美衆多而不見要約。陳思亦云。世之作者。或好煩文博採。深沉其旨者。或好離言辨白。分毫析釐者。所習不同。所務各異。言勢殊也。劉楨云。文之體指實強弱。使其辭已盡而勢有餘。天下一人耳。不可得也。公幹所談。頗亦兼氣。然文之任勢。勢有剛柔。不必壯言慷慨。乃稱



勢也。又陸雲自稱往日論文，先辭而後情，尚勢而不取悅澤。及張公論文，則欲宗其言，夫情固先辭，勢實須澤，可謂先迷後能從善矣。自近代辭人，率好詭巧，原其爲體，訛勢所變，厭黷舊式，故穿鑿取新，察其訛意，似難而實無他術也。反正而已。故文反正爲乏，辭反正爲奇，效奇之法，必顛倒文句，上字而抑下，中辭而出外，回互不常，則新色耳。夫通衢夷坦而多行捷徑者，趨近故也。正文明白而常務反言者，適俗故也。然密會者以意新得巧，苟異者以失體成怪。舊練之



才則執正以馭奇。新學之銳。則逐奇而失正。勢流不反。則文體遂弊。秉茲情術。可無思邪。

贊曰

形生勢成。始末相承。湍迴似規。矢激如繩。四利騁節。情采自凝。征轡學步。力止襄陵。



文心雕龍卷七

情采第三十一

聖賢書辭總稱文章。非采而何。夫水性虛而淪漪結。木體實而華萼振。文附質也。虎豹無文。則鄴同犬羊。犀兕有皮。而色資丹漆。質待文也。若乃綜述性靈。敷寫器象。鏤心鳥跡之中。織辭魚網之上。其爲彪炳。縉采名矣。故立文之道。其理有三。一曰形文。五色是也。二曰聲文。五音是也。三曰情文。五性是也。五色雜而成黼黻。五音比而成韶夏。五情發而爲辭章。神理之



數也。孝經垂典，喪言不文，故知君子嘗言未嘗質也。老子疾僞，故稱美言不信，而五千精妙，則非棄美矣。莊周云：辯雕萬物，謂藻飾也。韓非云：豔采辯說，謂綺麗也。綺麗以豔說，藻飾以辯雕，文辭之變，於斯極矣。研味李老，則知文質附乎性情。詳覽莊韓，則見華實過乎淫侈。若擇源於涇渭之流，按轡於邪正之路，亦可以馭文采矣。夫鉛黛所以飾容，而盼倩生於淑姿。文采所以飾言，而辯麗本於情性。故情者文之經，辭者理之緯。經正而後緯成，理定而後辭暢。此立文之



本源也。昔詩人什篇爲情而造文。辭人賦頌爲文而造情。何以明其然。蓋風雅之興。志思蓄憤而吟詠情性。以諷其上。此爲情而造文也。諸子之徒。心非鬱陶。苟馳夸飾。鬻聲釣世。此爲文而造情也。故爲情者要約而寫真。爲文者淫麗而煩濫。而後之作者。採濫忽真。遠棄風雅。近師辭賦。故體情之製。日疎。逐文之篇。愈盛。故有志深軒冕而汎詠皐壤。心纏幾務而虛述人外。真宰弗存。翩其反矣。夫桃李不言而成蹊。有實存也。男子樹蘭而不芳。無其情也。夫以草木之微。依



情待實況乎文章述志爲本。言與志反。文豈足徵。是以聯辭結采。將欲明經。采濫辭詭。則心理愈翳。固知翠綸桂餌。反所以失魚。言隱榮華。殆謂此也。是以衣錦褻衣。惡文太章。賁象窮白。貴乎反本。夫能設模以位理。擬地以置心。心定而後結音。理正而後摘藻。使文不滅質。博不溺心。正采耀乎朱藍。間色屏於紅紫。乃可謂雕琢其章。彬彬君子矣。

贊曰

言以文遠。誠哉斯驗。心術旣形。英華乃贍。吳錦好渝。



妍英徒豔繁彩寡情味之必厭

鎔裁第三十二

情理設位文采行乎其中剛柔以立本變通以趨時  
立本有體意或偏長趨時無方辭或繁雜蹊要所司  
職在鎔裁。擧括情理。矯揉文采也。規範本體謂之鎔。  
翦截浮詞謂之裁。裁則蕪穢不生。鎔則綱領昭暢。譬  
繩墨之審分。斧斤之斲削矣。駢拇枝指。由侈於性。附  
贅懸疣。實侈於形。二意兩出。義之駢枝也。同辭重句。  
文之疣贅也。凡思緒初發。辭采苦雜。心非權衡。勢必



輕重是以草創鳴筆先標三準履端於始則設情以  
位體舉正於中則酌事以取類歸餘於終則撮辭以  
舉要然後舒華布實獻替節文繩墨以外美材既斲  
故能首尾圓合條貫統序若術不素定而委心逐辭  
異端叢至駢贅必多故三準既定次討字句句有可  
削足見其疎字不得減乃知其密精論要語極略之  
體遊心竄句極繁之體謂繁與略適分所好引而伸  
之則兩句敷爲一章約以貫之則一章刪成兩句思  
瞻者善敷才覈者善刪善刪者字去而意留善敷者



辭繁而義顯。字刪而意闕。則短乏而非覈。辭敷而言  
重則蕪穢而非贍。昔謝艾王濟西河文士。張俊以爲  
艾繁而不可刪。濟略而不可益。若二子者。可謂練鎔  
裁而曉繁略矣。至如士衡才優而綴辭尤繁。士龍思  
劣而雅好清省。及雲之論機。亟恨其多。而稱清新相  
接。不以爲病。蓋崇友于耳。夫美錦製衣。修短有度。雖  
翫其采。不倍領袖。巧猶難繁。況在乎拙。而文賦以爲  
榛楛勿剪。庸音足曲。其識非不鑒。乃情苦芟繁也。夫  
百節成體。共資榮衛。萬趣會文。不離辭情。若情周而



不繁辭運而不濫，非夫鎔裁何以行之乎。

贊曰

篇章戶牖，左右相瞰，辭如川流，溢則汎濫，權衡損益，斟酌濃淡，芟繁翦穢，弛於負擔。

聲律第三十三

夫音律所始，本於人聲者也。聲合宮商，肇自血氣，先王因之以制樂歌，故知器寫人聲，聲非學器者也。故言語者，文章神明樞機，吐納律呂，脣吻而已。古之教歌，先揆以法，使疾呼中宮，徐呼中徵，夫商徵響向宮。



羽聲下。抗喉矯舌之差。攢脣激齒之異。廉肉相準。皎然可分。今操琴不調。必知改張。摘文乖張。而不識所調。響在彼絃。乃得克諧。聲萌我心。更失和律。其故何哉。良由內聽難爲聰也。故外聽之易。絃以手定。內聽之難。聲與心紛。可以數求。難以辭逐。凡聲有飛沉。響有雙疊。雙聲隔字而每舛。疊韻雜句而必睽。沉則響發而斷。飛則聲颺不還。竝轆轤交往。逆鱗相比。迂其際會。則往蹇來連。其爲疾病。亦文家之吃也。夫吃文爲患。生於好詭。逐新趣異。故喉脣糾紛。將欲解結。務



在剛斷左礙而尋右。末滯而討前。則聲轉於吻。玲玲如振玉。辭靡於耳。纍纍如貫珠矣。是以聲畫妍媸。寄在吟詠。滋味流於字句。氣力窮於和韻。異音相從。謂之和。同聲相應。謂之韻。韻氣一定。故餘聲易遣。和體抑揚。故遺響難契。屬筆易巧。選和至難。綴文難精。而作韻甚易。雖纖意曲變。非可縷言。然振其大綱。不出茲論。若夫宮商大和。譬諸吹簫。翻廻取均。頗似調瑟。瑟資移柱。故有時而乖貳。簫舍定管。故無往而不壹。陳思潘岳吹簫之調也。陸機左思瑟柱之和也。槩舉



而推可以類見。又詩人綜韻，率多清切。楚辭辭楚，故訛韻寔繁。及張華論韻，謂士衡多楚。文賦亦稱知楚不易。可謂銜靈均之聲餘，失黃鍾之正響也。凡切韻之動，勢若轉圜。訛音之作，甚於枘方。免乎枘方，則無大過矣。練才洞鑒，剖字鑽響，識踈濶略，隨音所遇，若長風之過籟，南郭之吹竽耳。古之佩玉，左宮右徵，以節其步，聲不失序。音以律文，其可忘哉。

贊曰

標情務遠，比音則近。吹律曾臆，調鐘脣吻。聲得鹽梅，



響滑榆槿。割棄支離。官商難隱。

### 章句第三十四

夫設情有宅。置言有位。宅情曰章。位言曰句。故章者明也。句者局也。局言者聯字以分疆。明情者總義以包體。區畛相異。而衢路交通矣。夫人之立言。因字而生句。積句而成章。積章而成篇。篇之彪炳。章無疵也。章之明靡。句無玷也。句之青英。字不妄也。振本而末從。知一而萬畢矣。夫裁文匠筆。篇有大小。離章合句。調有緩急。隨變適會。莫見定準。句司數字。待相接以



爲用。章總一義。須意窮而成體。其控引情理。送迎際會。譬舞容廻環。而有綴兆之位。歌聲靡曼。而有抗墜之節也。尋詩人擬喻。雖斷章取義。然章句在篇。如蠶之抽緒。原始要終。體必鱗次。啓行之辭。逆萌中篇之意。絕筆之言。追媵前句之旨。故能外文綺交。內義脉注。跼躄相銜。首尾一體。若辭失其朋。則羈旅而無友。事乖其次。則飄寓而不安。是以搜句忌於顛倒。裁章貴於順序。斯固情趣之指歸。文筆之同致也。若夫筆句無常。而字有條數。四字密而不促。六字格而非緩。



或變之以三五，蓋應機之權節也。至於詩頌大體，以四言爲正。唯祈父、肇禋以二言爲句，尋二言肇於黃世，竹彈之謠是也。三言興於虞時，元首之詩是也。四言廣於夏年，洛汭之歌是也。五言見於周代，行露之章是也。六言七言，雜出詩騷，而體之篇成於兩漢，情數運周，隨時代用矣。若乃改韻從調，所以節文辭氣，賈誼枚乘，兩韻輒易。劉歆桓譚，百句不遷，亦各有其志也。昔魏武論賦，嫌於積韻，而善於資代。陸雲亦稱四言轉句，以四句爲佳。觀彼制韻，志同枚賈，然兩韻



輒易則聲韻微躁。百句不遷。則唇吻言勞。妙才激揚。雖觸思利貞。曷若折之中和。庶保無咎。又詩人以今字入於句限。楚辭用之。字出句外。尋今字成句。乃語助餘聲。舜詠南風。用之久矣。而魏武弗好。豈不以無益文義耶。至於夫惟蓋故者。發端之首唱。之而於以者。乃剗句之舊體。乎哉矣也。亦送末之常科。據事似閑。在用實切。巧者迴運。彌縫文體。將令數句之外。得一字之助矣。外字難謬。况章句歟。

贊曰



斷章有檢積句不恒理資配主辭忌失朋環情草調  
宛轉相騰離同合異以盡厥能

麗辭第三十五

造化賦形支體必雙神理爲用事不孤立夫心生文  
辭運裁百慮高下相須自然成對唐虞之世辭未極  
文而臯陶贊云罪疑惟輕功疑惟重益陳謨云滿招  
損謙受益豈營麗辭率然對爾易之文繫聖人之妙  
思也序乾四德則句句相銜龍虎類感則字字相儷  
乾坤易簡則宛轉相承日月往來則隔行懸合雖句



字或殊而偶意一也。至於詩人偶章，大夫聯辭，奇偶適變，不勞經營，自揚馬張蔡崇盛麗辭，如宋畫吳冶，刻形鏤法，麗句與深采竝流，偶意共逸韻俱發。至魏晉羣才，析句彌密，聯字合趣，割毫析釐，然契機者入巧，浮假者無功。故麗辭之體，凡有四對：言對爲易事，對爲難，反對爲優，正對爲劣。言對者，雙比空辭者也。事對者，竝舉人驗者也。反對者，理殊趣合者也。正對者，事異義同者也。長卿上林賦云：脩容乎禮園，翱翔乎書圃。此言對之類也。宋玉神女賦云：毛嬙鄣袂，不



足程式。西施掩面，比之無色。此事對之類也。仲宣登樓賦云：鍾儀幽而楚奏，莊舄顯而越吟。此反對之類也。孟陽七哀云：漢祖想枌榆，光武思白水。此正對之類也。凡偶辭胷臆，言類所以爲易也。微人之學，事對所以爲難也。幽顯同志，反對所以爲優也。竝貴共心，正對所以爲劣也。又以事對，各有反正。指類而求，萬條自昭然矣。張華詩：稱遊鴈比翼翔，歸鴻知接翮。劉琨詩：言宣尼悲獲麟，西狩涕孔丘。若斯重出，卽對句之駢枝也。是以言對爲美，貴在精巧。事對所先，務在




允當。若兩事相配。而優劣不均。是驥在左。驂驚爲右。服也。若夫事或孤立。莫與相偶。是夔之一足。踟蹰而行也。若氣無奇類。文乏異采。碌碌麗辭。則昏睡耳目。必使理圓事密。聯璧其章。迭用奇偶。節以雜佩。乃其貴耳。類此而思。理自見也。

贊曰

體植必兩。辭動有配。左提右挈。精味兼載。炳爍聯華。鏡靜含態。玉潤雙流。如彼珩珮。

































76  
2451  
183  
170  
文心雕龍卷八

比興第三十六

詩文宏奧，包韞六義。毛公述傳，獨標興體，豈不以風  
通而賦同比，顯而興隱哉？故比者附也，興者起也。附  
理者，切類以指事，起情者，依微以擬議。起情故興體  
以立，附理故比例以生。比則蓄憤以斥言，興則環譬  
以記諷。蓋隨時之義不一，故詩人之志有二也。觀夫  
興之託諭，婉而成章，稱名也小，取類也大。關雎有別，  
故后妃方德；尸鳩貞一，故夫人象義。義取其貞，無從





於夷禽德貴其別不嫌於鷺鳥明而未融故發注而  
後見也且何謂爲比蓋寫物以附意颺言以切事者  
也故金錫以喻明德珪璋以譬秀民螟蛉以類教誨  
蜩蟬以寫號呼幹衣以擬心憂席卷以方志固凡斯  
切象皆比義也至如麻衣如雪兩驂如舞若斯之類  
皆比類者也楚襄信讒而三閭忠烈依詩製騷諷兼  
比興炎漢雖盛而辭人夸毗詩刺道喪故興義銷亡  
於是賦頌先鳴故比體雲構紛紜雜遝信舊章矣夫  
比之爲義取類不常或喻於聲或方於貌或擬於心



或譬於事。宋玉高唐云。纖條悲鳴。聲似竽籟。此比聲之類也。枚乘菟園云。焱焱紛紛。若塵埃之間。白雲。此則比貌之類也。賈生鵬賦云。禍之與福。何異糾纏。此以物比理者也。王褒洞簫云。優柔溫潤。如慈父之愛子也。此以聲比心者也。馬融長笛云。繁縟絡繹。范蔡之說也。此以響比辯者也。張衡南都云。起鄭舞。璽曳緒。此以容比物者也。若斯之類。辭賦所先。日用乎比。月忘乎興。習小而棄大。所以文謝於周人也。至於揚班之倫。曹劉以下。圖狀山川。影寫雲物。莫不纖綜比義。以



數其華驚聽回視資此效績。又安仁螢賦云。流金在沙。季鷹稱詩云。青條若總翠。皆其義者也。故此類雖繁。以切至爲貴。若刻鵠類鶩。則無所取焉。

贊曰

詩人止與觸物圓覽。物雖胡越。合則肝膽。擬容取心。斷辭必敢。攢雜詠歌。如川之渙。

夸飾第三十七

夫形而上者謂之道。形而下者謂之器。神道難摹。言不能追其極。形器易寫。壯辭可得喻其真。才非短。



長理自難易耳。故自天地以降。豫入聲貌。文辭所被。夸飾恒存。雖詩書雅言。風格訓世。事必宜廣。文亦過焉。是以言峻。則嵩高極天。論狹。則河不容舠。說多。則子孫千億。稱少。則民靡孑遺。襄陵舉滔天之目。倒戈立漂杵之論。辭雖已甚。其義無害也。且夫鴉音之醜。豈有泮林而變好。茶味之苦。寧以周原而成飴。竝意深褒讚。故義成矯飾。大聖所錄。以垂憲章。孟軻云。說詩者。不以文害辭。不以辭害意也。自宋玉景差。夸飾始盛。相如憑風。詭濫愈甚。故上林之館。奔星與宛虹。



入軒從禽之盛。飛廉與鷁鵒俱獲。及揚雄甘泉。酌其  
餘波。語壞奇。則假珍於玉樹。言峻極。則顛墜於鬼神。  
至東都之比目。西京之海若。驗理則理無不驗。窮飾  
則飾猶未窮矣。又子雲校獵。鞭宓妃以釀屈原。張衡  
羽獵。困元冥於朔野。變彼洛神。旣非罔兩。惟此水怪。  
亦非魑魅。而虛用濫形。不其踈乎。此欲夸其威而飾  
其事。義睽刺也。至如氣貌山海。體勢宮殿。嵯峨揭業。  
熠燿焜煌之狀。光采煒煒而欲燃。聲貌岌岌其將動  
矣。莫不因夸以成狀。沿飾而得奇也。於是後進之才。



獎氣挾聲。軒翥而欲奮飛。騰躑而羞跼步。辭入煒煜。  
春藻不能程其豔。言在葵絕。寒谷未足成其凋。談歡  
則字與笑竝。論感則聲共泣。偕信可以發蘊而飛滯。  
披瞽而駭聾矣。然飾窮其要。則心聲鋒起。夸過其理。  
則名實兩乖。若能酌詩書之曠旨。剪揚馬之甚泰。使  
夸而有節。飾而不誣。亦可謂之懿也。

贊曰

夸飾在用文。豈循檢言。必鵬運氣。靡鴻漸。倒海探珠。  
傾崑取琰。曠而不溢。奢而無玷。



事類第三十八

事類者，蓋文章之外，據事以類義，援古以證今者也。昔文王繇易，剖判爻位，既濟九三，遠引高宗之伐，明夷六五，近書箕子之貞，斯略舉人事以徵義者也。至若肩征義和，陳正典之訓，盤庚詰民，叙遲任之言，此全引成辭以明理者也。然則明理引乎成辭，徵義舉乎人事，廼聖賢之鴻謨，經籍之通矩也。大畜之象，君子以多識前言往行，亦有包於文矣。觀夫屈宋屬篇，號依詩人，雖引古事，而莫取舊辭，唯賈誼鵬賦，始用



鶚冠之說相如上林撮引李斯之書此萬分之一會也。及揚雄百宮箴頗酌於詩書。劉歆遂初賦歷叙於紀傳。漸漸綜採矣。至於崔班張蔡遂捃摭經史華實布濩。因書立功。皆後人之範式也。夫桂薑同地。辛在本性。文章由學。能在天資。才自內發。學以外成。有學飽而才餒。有才富而學貧。學貧者迤邐於事義。才餒者劬勞於辭情。此內外之殊分也。是以屬意立文。心與筆謀。才爲盟主。學爲輔佐。主佐合德。文采必霸。才學偏狹。雖美少功。夫以子雲之才。而自奏不學。及觀



書石室，乃成鴻采，表裏相資，古今一也。故魏武稱張  
子之文爲拙，然學問膚淺，所見不博，專拾掇崔杜小  
文所作，不可悉難，難便不知所出，斯則寡聞之病也。  
夫經典沈深，載籍浩瀚，實羣言之奧區，而才思之神  
臯也。揚班以下，莫不取資，任力耕耨，縱意漁獵，操刀  
能割，必裂膏腴，是以將贍才力，務在博見。狐腋非一  
皮能溫，鷄蹠必數千而飽矣。是以綜學在博，取事實  
約。校練務精，据理須覈。衆美輻輳，表裏發輝。劉邵趙  
都賦有云：公子之客，叱勁楚令歃盟，管庫隸臣，呵強



秦使鼓缶，用事如斯，可謂理得而義要矣。故事得其要，雖小成績，譬寸轄制輪，尺樞運關也。或微言美事，置於閑散，是綴金翠於足脛，靚粉黛於曾臆也。凡用舊合機，不啻自其口出，引事乖謬，雖千載而爲瑕。陳思羣才之英也，報孔璋書云：葛天氏之樂，千人唱，萬人和，聽者因以箴韶夏矣。此引事之實謬也。按葛天之歌唱和，三人而已，相如上林云：奏陶唐之舞，聽葛天之歌，千人唱，萬人和，唱和千萬人，乃相如接人，然而濫侈葛天，推三成萬者，信賦妄書，致斯謬也。陸機



園葵詩云。庇足同一致。生理合異端。夫葵能衛足。事  
譏鮑莊。葛藟庇根。辭自樂豫。若譬葛爲葵。則引事爲  
謬。若謂庇勝衛。則改事失真。斯又不精之患。夫以子  
建明練士。衡沈密。而不免於謬。曹仁之謬。高唐。又曷  
足以嘲哉。夫山木爲良。匠所度。經書爲文。士所擇。木  
美而定於斧斤。事美而制於刀筆。研思之士。無慙匠  
石矣。

贊曰

經籍深富。辭理遐亘。儗如江海。鬱若崑鄧。文梓共採。



項珠交贈用人若已古來無情

練字第三十九

夫文象列而結繩移、鳥跡明而書契作、斯乃言語之體貌、而文章之宅宇也、蒼頡造之、鬼哭粟飛、黃帝用之、官治民察、先王聲教、書必同文、輔軒之使、紀言殊俗、所以一字體、總異音、周禮保章氏掌教六書、秦滅舊章、以吏爲師、及李斯刪籀而秦篆興、程邈造隸而古文廢、漢初章律、明著厥法、太史學童、教試六體、又吏民上書、字謬輒劾、是以馬字缺畫、而石建懼死、雖



云性慎亦時重文也。至孝武之世則相如譔篇及宣  
成二帝徵習小學張敞以正讀傳業揚雄以奇字纂  
訓竝貫練雅頌總閱音義鴻筆之徒莫不洞曉且多  
賦京苑假借形聲。是以前漢小學率多瑋字非獨制  
異乃共曉難也。暨乎後漢小學轉疎複文隱訓臧否  
太半。及魏代綴藻則字有常檢追觀漢作翻成阻與  
故陳思稱揚馬之作。麴幽旨深。讀者非師傳不能析  
其辭。非博學不能綜其理。豈直才懸抑亦字隱。自晉  
來用字率從簡易。時竝習易人誰取難。今一字詭異。



則羣句震驚。三人弗識。則將成字妖矣。後世所同曉者。雖難斯易。時所共廢。雖易斯難。趣舍之間。不可不察。夫爾雅者。孔徒之所纂。而詩書之襟帶也。蒼頡者。李斯之所輯。而烏籀之遺體也。雅以淵源詁訓。頡以苑囿奇文。異體相資。如左右肩股。該舊而知新。亦可。以屬文。若夫義訓古今。興廢殊用。字形單複。妍媸異體。心旣託聲於言。言亦寄形於字。諷誦則續在宮商。臨文則能歸字形矣。是以綴字屬篇。必須練擇。一避詭異。二省聯邊。三權重出。四調單複。詭異者。字體壞。



怪者也。曹攄詩稱豈不願斯遊。褊心惡啍呶。兩字詭異。大疵美篇。況乃過此。其可觀乎。聯邊者。半字同文者也。狀貌山川。古今咸用。施於常文。則齟齬爲瑕。如不獲免。可至三接。三接之外。其字林乎。重出者。同字相犯者也。詩驗適會。而近世忌同。若兩字俱要。則寧在相犯。故善爲文者。富於萬篇。貧於一字。一字非少。相避爲難也。單複者。字形肥瘠者也。瘠字累句。則纖疎而行劣。肥字積文。則黷黷而篇闇。善酌字者。參伍單複。磊落如珠矣。凡此四條。雖文不必有。而體例不



無若值而莫悟則非精解至於經典隱曖方冊紛綸  
簡蠹帛裂三寫易字或以音訛或以文變子思弟子  
於穆不祀者音訛之異也晉之史記三豕渡河文變  
之謬也尚書大傳有別風淮雨帝王世紀云列風淫  
雨別列淮淫字以潛移淫列義當而不奇淮別理乖  
而新異傳毅制誅已用淮雨固知愛奇之心古今一  
也史之闕文聖人所慎若依義棄奇則可與正文字  
矣

贊曰



篆隸相鎔。蒼雅品訓。古今殊跡。妍媸異分。字靡異流。  
文阻難運。聲畫昭精。墨采騰奮。

隱秀第四十

夫心術之動遠矣。文情之變深矣。源奧而派生。根盛  
而穎峻。是以文之英蕤。有秀有隱。隱也者。文外之重  
旨者也。秀也者。篇中之獨拔者也。隱以複意爲工。秀  
以卓絕爲巧。斯乃舊章之懿績。才情之嘉會也。夫隱  
之爲體。義主文外。秘響傍通。伏采潛發。譬爻象之變  
互。體川瀆之韞珠玉也。故互體變爻而化成四象。珠



玉潛水而瀾表方圓。始正而末奇。內明而外潤。使翫  
之者無窮味之者不厭矣。彼波起辭間。是謂之秀纖。  
手麗音宛乎逸態。若遠山之浮烟靄。變女之靚容華。  
然煙靄天成。不勞於粧點。容華格定。無待於裁鎔。深  
淺而各奇。嫵纖而俱妙。若揮之則有餘。而攬之則不  
足矣。夫立意之士。務欲造奇。每馳心於元默之表。工  
辭之人。必欲臻美。恒溺思於佳麗之鄉。嘔心吐膽。不  
足語窮。煨歲煉年。奚能喻苦。故能藏穎詞間。昏迷於  
庸目。露鋒文外。驚絕乎妙心。使醞藉者蓄隱而意愉。



英銳者抱秀而心悅。譬諸裁雲製霞。不讓乎天工。斲  
卉刻葩。有同乎神匠矣。若篇中乏隱。等宿儒之無學。  
或一叩而語窮。句間鮮秀。如巨室之少珍。若百詰而  
色沮。斯並不足於才思。而亦有媿於文辭矣。將欲微  
隱。聊可指篇。古詩之離別。樂府之長城。詞怨旨深。而  
復兼乎比興。陳思之黃雀。公幹之青松。格剛才勁。而  
並長於諷諭。叔夜之闕二嗣宗之闕二境元思澹。而  
獨得乎優閑。士衡之闕二彭澤之闕二心密語澄。而  
俱適乎下闕二字如欲辨秀。亦惟摘句。常恐秋節至。涼飈



奪炎熱意。悽而詞婉。此匹婦之無聊也。臨河濯長纓。  
念子悵悠悠。志高而言壯。此丈夫之不遂也。東西安  
所之徘徊以旁皇。心孤而情懼。此閨房之悲極也。朔  
風動秋草。邊馬有歸心。氣容而事傷。此羈旅之怨曲  
也。凡文集勝篇。不盈十一。篇章秀句。裁可百二。竝思  
合而自逢。非研慮之所果也。或有晦塞爲深。雖奧非  
隱。雕削取巧。雖美非秀矣。故自然會妙。譬卉木之耀  
英華。潤色取美。譬繒帛之染朱綠。朱綠染繒。深而繁  
鮮。英華曜樹。淺而煒媚。秀句所以照文苑。蓋以此也。

贊曰

深文隱蔚餘味曲包辭生互體有似變文言之秀矣  
萬慮一交動心驚耳逸響笙匏

文心雕龍卷八終



文心雕龍卷九

指瑕第四十一

管仲有言，無翼而飛者聲也，無根而固者情也。然則聲不假翼，其飛甚易；情不待根，其固匪難。以之垂文，可不慎歟！古來文才異世，爭驅或逸才以爽迅，或精思以纖密，而慮動難圓，鮮無瑕病。陳思之文，羣才之俊也。而武帝詠云：尊靈永蟄，明帝頌云：聖體浮輕。浮輕有似於蝴蝶，永蟄頗疑於昆蟲。施之尊極，豈其當乎？左思七諷，說孝而不從，反道若斯，餘不足觀矣。潘



昔爲才善於哀文，然悲內兄，則云感口澤，傷弱子，則云心如疑。禮文在尊極而施之下流，辭雖足哀，義斯潛矣。若夫君子擬人，必於其倫，而崔瑗之誄李公，比行於黃虞，向秀之賦稽生，方罪於李斯，與其失也，雖寧僭無濫，然高厚之詩，不類甚矣。凡巧言易標，拙辭難隱。斯言之玷，實深白圭。繁例難載，故略舉四條。若夫立文之道，惟字與義，字以訓正，義以理宣。而晉末篇章，依希其旨，始有賞際奇至之言，終無撫卹酬卽之語。每單舉一字，指以爲情。夫賞訓錫賚，豈關心解。



撫訓執握何預情理。雅頌未聞，漢魏莫用，懸領似如  
可辯，課文了不成義，斯實情訛之所變，文澆之致弊。  
而宋來才英，未之或改，舊染成俗，非一朝也。近代辭  
人，率多猜忌，至乃比語求媼，反音取瑕，雖不屑於古，  
而有擇於今焉。又製同他文，理宜刪革，若排人美辭，  
以爲己力，寶玉大弓，終非其有。全寫則揭篋傍採，則  
探囊。然世遠者太輕，時同者爲尤矣。若夫注解爲書，  
所以明正事理，然謬於研求，或率意而斷。西京賦稱  
中黃育獲之疇，而薛綜謬注，謂之闔尹，是不聞執雕



虎之人也。又周禮井賦，舊有疋馬，而應劭釋疋，或量首數蹄，斯豈辯物之要哉？原夫古之正名，車兩而馬疋，疋兩稱目，以竝耦爲用，蓋車貳佐乘，馬儷驂服，乘不隻，故名號必雙，名號一正，則雖單爲疋矣。疋夫疋婦，亦配義矣。夫車馬小義，而歷代莫悟，辭賦近事，而千里致差，况鑽灼經典，能不謬哉？夫辯言而數首蹄，選勇而驅閭尹，失理太甚，故舉以爲戒。丹青初炳，而後渝。文章歲久而彌光，若能櫟括於一朝，可以無愧於千載也。



贊曰

羿氏舛射，東野敗駕，雖有雋才，謬則多謝。斯言一語，千載弗化。令章靡疚，亦善之亞。

養氣第四十二

昔王克著述，制養氣之篇，驗已而作，豈虛造哉。夫耳目鼻口，生之役也。心慮言辭，神之用也。率志委和，則理融而情暢。鑽礪過分，則神疲而氣衰。此性情之數也。夫三皇辭質，心絕於道華。帝世始文，言貴於敷奏。三代春秋，雖沿世彌綌，竝適分智臆，非牽課才外也。



代枝詐，攻奇飾說。漢世迄今，辭務日新，爭光鬻采，  
亦竭矣。故淳言以比澆辭，文質懸乎千載，率志以  
方，竭情勞逸，差於萬里。古人所以餘裕，後進所以莫  
遑也。凡童少鑒淺而志盛，長艾識堅而氣衰。志盛者  
思銳，以勝勞氣衰者慮密，以傷神。斯實中人之常資。  
歲時之大較也。若夫氣分有限，智用無涯。或慚鳬企  
鶴，瀝辭鑄思。於是精氣內銷，有似尾閭之波；神志外  
傷，同乎牛山之木。怛惕之盛疾，亦可推矣。至如倅任  
置硯，以綜述，敬通懷筆，以專業。旣喧之以歲序，又煎



之以日時。是以曹公懼爲文之傷命。陸雲歎用思之困神。非虛談也。夫學業在勤。功庸弗怠。故有鏹股自厲。和熊以苦之人。志於文也。則申寫鬱滯。故宜從容率情。優柔適會。若銷鑠精膽。威迫和氣。秉牘以驅齡。灑翰以伐性。豈聖賢之素心。會文之直理哉。且夫思有利鈍。時有通塞。沐則心覆。且或反常。神之方昏。再三愈黷。是以吐納文藝。務在節宣。清和其心。條暢其氣。煩而卽捨。勿使壅滯。意得則舒懷。以命筆。理伏則投筆。以卷懷。逍遙以針勞。談笑以藥勸。常弄閑於才。



鋒。賈餘於文勇。使刃發如新。湊理無滯。雖非胎息之邁術。斯亦衛氣之一方也。

贊曰

紛哉萬象。勞矣千想。元神宜寶。素氣資養。水停以鑒。火靜而朗。無擾文慮。鬱此精爽。

附會第四十三

何謂附會。謂總文理。統首尾。定與奪。合涯際。彌綸一篇。使雜而不越者也。若築室之須基構。裁衣之待縫緝矣。夫才量學文。宜正體製。必以情志爲神明。事義



爲骨髓辭采爲肌膚。宮商爲聲氣。然後品藻元黃。摛振金玉。獻可替否。以裁厥中。斯綴思之常數也。凡六體文章。類多枝派。整派者依源。理枝者循幹。是以附辭會義。務總綱領。驅萬塗於同歸。貞百慮於一致。使衆理雖繁而無倒置之乖。羣言雖多而無棼絲之亂。扶陽而出條。順陰而藏跡。首尾周密。表裏一體。此附會之術也。夫畫者謹髮而易貌。射者儀毫而失墻。銳精細巧。必疎體統。故宜詘寸以信尺。枉尺以直尋。棄偏善之巧。學具美之績。此命篇之經略也。夫文變無



方意見浮雜。約則義孤。博則辭叛。率故多尤。需爲事  
賊。且才分不同。思緒各異。或製首以通尾。或片接以  
寸附。然通製者蓋寡。接附者甚衆。若統緒失宗。辭味  
必亂。義脉不流。則偏枯文體。夫能懸識湊理。然後文  
節自會。如膠之粘木。豆之合黃矣。是以四牡異力。而  
六轡如琴。馭文之法。有似於此。去留隨心。脩短在手。  
齊其步驟。總轡而已。故善附者異旨如肝膽。拙會者  
同音如胡越。改章難於造篇。易字艱於代句。此已然  
之驗也。昔張湯疑奏而再却。虞松草表而屢譴。竝理



事之不明而辭旨之失調也。及倪寬更草鍾會易字而漢武歎奇。晉景稱善者。乃理得而事明。心敏而辭當也。以此而觀。則知附會巧拙相去遠哉。若夫絕筆斷章。譬乘舟之振楫。會辭切理。如引轡以揮鞭。克終底績。寄深寫遠。若首唱榮華。而腰句憔悴。則遺勢鬱湮。餘風不暢。此周易所謂齟齬無膚。其行次且也。惟首尾相援。則附會之體固亦無以加于此矣。

贊曰

篇統間關。情數稠疊。原始要終。踈條布葉。道味相附。



懸緒自接，如樂之和，心聲克協。

總術第四十四

今之常言，有文有筆，以爲無韻者筆也，有韻者文也。夫文以足言，理兼詩書，別目兩名，自近代耳。顏延年以爲筆之爲體，言之文也，經典則言而非筆，傳記則筆而非言，請奪彼矛，還攻其盾矣。何者？易之文言，豈非言文？若筆不言文，不得云經典非筆矣。將以立論，未見其論立也。予以爲發口爲言，屬筆曰翰。常道曰：經述經曰傳，經傳之體，出言入筆，筆爲言使，可強可



弱分經以典奧爲不刊，非以言筆爲優劣也。昔陸氏  
文賦，號爲曲盡，然汎論纖悉，而實體未該。故知九變  
之貫匪窮。知言之選難備矣。凡精慮造文，各競新麗。  
多欲練辭，莫肯研術。落落之玉，或亂乎石；碌碌之石，  
時似乎玉。精者要約，匱者亦尠；博者該贍，蕪者亦繁。  
辨者昭皙，淺者亦露；奧者複隱，詭者亦典；或義華而  
聲悴，或理拙而文澤。知夫調鐘未易，張琴實難。伶人  
告和，不必盡窅楸之中；動用揮扇，何必窮初終之韻。  
魏文比篇章於音樂，蓋有徵矣。夫不截盤根，無以驗



利器不剖文奧。無以辨通才。才之能通。必資曉術。自非圓鑒區域。大判條例。豈能控引清源。制勝文苑哉。是以執術馭篇。似善奕之窮數。棄術任心。如博塞之邀遇。故博塞之文。借巧儻來。雖前驅有功。而後援難繼。少既無以相接。多亦不知所刪。乃多少之竝惑。何妍媸之能制乎。若夫善奕之文。則術有恒數。按部整伍。以待情會。因時順機。動不失正。數逢其極。機入其巧。則義味騰躍而生。辭氣叢雜而至。視之則錦繪。聽之則絲簧。味之則甘腴。佩之則芬芳。斷章之功於斯。



盛矣。夫驥足雖駿，繆牽忌長，以萬分一累，且廢千里。  
况文體多術，共相彌綸，一物携貳，莫不解體。所以列  
在一篇，備總情變，譬三十之輻，共成一轂。雖未足觀，  
亦鄙夫之見也。

贊曰

文場筆苑，有術有門，務先大體，鑑必窮源。乘一總萬，  
舉要治繁，思無定契，理有恒存。

時序第四十五

時運交移，質文代變，古今情理，如可言乎。昔在陶唐，



德盛化鈞，野老吐何力之談，郊童含不識之歌。有虞繼作，政阜民暇，薰風詩於元后，爛雲歌於列臣。盡其美者，何乃心樂而聲泰也。至大禹敷土，九序詠功，成湯聖敬，猗歟作頌。逮姬文之德盛，周南勤而不怨，太王之化淳，邠風樂而不淫。幽厲昏而板蕩怒，平王微而黍離哀，故知歌謠文理，與世推移。風動於上，而波震於下者，春秋之後，角戰英雄，六經泥蟠，百家颺駭。方是時也，韓魏力政，燕趙任權，五蠹六蝨，嚴於秦令，唯齊楚兩國，頗有文學。齊開莊衢之第，楚廣蘭臺之



宮孟軻賓館荀卿宰邑故稷下扇其清風蘭陵鬱其  
茂俗鄒子以談天飛譽騶奭以雕龍馳響屈平聯藻  
於日月宋玉交彩於風雲觀其豔說則籠罩雅頌故  
知晔熠之奇意出乎縱橫之詭俗也爰至有漢運接  
燔書高祖尚武戲儒簡學雖禮律草創詩書未遑然  
矢風鴻鵠之歌亦天縱之英作也施及孝惠迄于文  
景經術頗興而辭人勿用賈誼抑而鄒枚沉亦可知  
已逮孝武崇儒潤色鴻業禮樂爭輝辭藻競鶩栢梁  
展朝讌之詩金堤製恤民之詠徵枚乘以蒲輪申主



父以鼎食擢公孫之對策，歎倪寬之擬奏，買臣負薪而衣錦，相如滌器而被繡。於是史遷壽王之徒，嚴終枚臯之屬，應對固無方，篇章亦不匱，遺風餘采，莫與比盛。越昭及宣，實繼武績，馳騁石渠，暇豫文會，集雕篆之軼材，發綺縠之高喻。於是王褒之倫，底祿待詔，自元暨成，降意圖籍，笑玉屑之諫，清金馬之路。子雲銳思於千首，子政讐校於六藝，亦已美矣。爰自漢室迄至成哀，雖世漸百齡，辭人九變，而大抵所歸，祖述楚辭，靈均餘影，於是乎在。自哀平陵替，光武中興，澤



懷圖讖頗略文華然杜篤獻諫以免刑班彪參奏以  
補令雖非旁求亦不遐棄及明帝豐耀崇愛儒術肄  
禮璧堂講文虎觀孟堅珥筆于國史賈逵給札於瑞  
頌東平擅其懿文沛王振其通論帝則藩儀輝光相  
照矣自安和已下迄至順桓則有班傅三崔王馬張  
蔡磊落鴻儒才不時乏而文章之選存而不論然中  
興之後羣才稍改前轍華實所附斟酌經辭蓋歷政  
講聚故漸靡儒風者也降及靈帝時好辭製造義皇  
之書開鴻都之賦而樂松之徒招集淺陋故楊賜號



爲驪塊蔡邕北之俳優其餘風遺文蓋篋如也自獻  
帝播遷文學蓬轉建安之末區宇方輯魏武以相王  
之尊雅愛詩章文帝以副君之重妙善辭賦陳思以  
公子之豪下筆琳琅竝體貌英逸故俊才雲蒸仲宣  
委質於漢南孔璋歸命於河北偉長從宦於青土公  
幹狗質於海隅德璉綜其斐然之思元瑜展其翩翩  
之樂文蔚休伯之儔于倅德祖之侶傲雅觴豆之前  
雍容衽席之上灑筆以成酣歌和墨以藉談笑觀其  
時文雅好慷慨良由世積亂離風衰俗怨竝志深而



筆長故梗槩而多氣也。至明帝纂戎、制詩度曲、徵篇章之士、置崇文之觀、何劉羣才迭相照耀、少主相仍、惟高貴鄉公英雅、顧盼合章、動言成論、於時正始餘風、篇體輕澹、而嵇阮應繆、竝馳文路矣。逮晉宣始基、景文克構、竝跡沉儒雅、而務深方術、至武帝惟新、承平受命、而膠序篇章、弗簡皇慮、降及懷愍、綴旒而已。然晉雖不文、人才實盛、茂先搖筆而散珠、太冲動墨而橫錦、岳湛曜聯璧之華、機雲標二俊之采、應傳三張之徒、孫摯成公之屬、竝結藻清英、流韻綺靡、前史以



爲運涉季世，人未盡才。誠哉斯談，可爲歎息。元皇中興，披文建學，劉刁禮吏而寵榮，景純文敏而優擢。逮明帝秉哲，雅好文會，升儲御極，華華講藝，練情於誥策，振采於辭賦。庾以筆才逾親，溫以文思益厚，揄揚風流，亦彼時之漢武也。及成康促齡，穆哀短祚，簡文勃興，淵乎清峻，微言精理，函滿元席。澹思濃采，時麗文囿。至孝武不嗣，安恭已矣。其文史則有袁殷之曹，孫于之輩，雖才或淺深，珪璋足用，自中朝貴乎江左，稱盛。因談餘氣，流成文體，是以世極述邇而辭意爽。



泰詩必柱下之旨歸賦乃漆園之義疏故知文變染  
乎世情與廢繫乎時序原始以要終雖百世可知也  
自宋武愛文文帝彬雅秉文之德孝武多才英采雲  
構自明帝以下文理替矣爾其縉紳之林霞蔚而飈  
起王袁聯宗以龍章顏謝重葉以鳳采何范張沈之  
徒亦不可勝也蓋聞之於世故略舉大較暨皇齊馭  
寶運集休明太祖以聖武膺錄高祖以睿文纂業文  
帝以貳離含章中宗以上哲興運竝文明自天緝遐  
景祚今聖歷方興文思光被海岳降神才英秀發馭



飛龍於天衢，駕騏驎於萬里。經典禮章，跨周轅漢。唐虞之文，其鼎盛乎。鴻風懿采，短筆敢陳。臆言讚時，請寄明哲。

贊曰

蔚映十代，辭采九變。樞中所動，環流無倦。質文沿時，崇替在選。終古雖遠，曠焉如面。

文心雕龍卷九終



文心雕龍卷十

物色第四十六

春秋代序，陰陽慘舒，物色之動，心亦搖焉。蓋陽氣萌而元駒步，陰律凝而丹鳥羞，微蟲猶或入感，四時之動物深矣。若夫珪璋挺其惠心，英華秀其清氣，物色相召，人誰獲安？是以獻歲發春，悅豫之情暢，滔滔孟夏，鬱陶之心凝，天高氣清，陰沈之志遠，霰雪無垠，矜肅之慮深，歲有其物，物有其容，情以物遷，辭以情發，一葉且或迎意，蟲聲有足引心。況清風與明月同夜。



白日與春林共朝哉。是以詩人感物，聯類不窮，流連萬象之際，沈吟視聽之區，寫氣圖貌，既隨物以宛轉，屬采附聲，亦與心而徘徊。故灼灼狀桃花之鮮，依依盡楊柳之貌，杲杲爲出日之容，漙漙擬雨雪之狀，喈喈逐黃鳥之聲，嚶嚶學草蟲之韻，皎日曄星，一言窮理。參差沃若，兩字連形，竝以少總多，情貌無遺矣。雖復思經千載，將何易奪。及離騷代興，觸類而長，物貌難盡，故重沓舒狀。於是嵯峨之類聚，歲隰之羣積，及長卿之徒，詭勢瓌聲，模山範水，字必魚貫，所謂詩



人麗則而約言。辭人麗淫而繁句也。至如雅詠紫莖  
或黃或白。騷述秋蘭。綠葉紫莖。凡摘表五色。貴在時  
見。若青黃屢出。則繁而不珍。自近代以來。文貴形似。  
窺情風景之上。鑽貌草木之中。吟詠所發。志惟深遠。  
體物爲妙。功在密附。故巧言切狀。如印之印泥。不加  
雕削。而曲寫毫芥。故能瞻言而見貌。印字而知時也。  
然物有恒姿。而思無定檢。或率爾造極。或精思愈疎。  
且詩騷所標。並據要害。故後進銳筆。怯於爭鋒。莫不  
因方以借巧。卽勢以會奇。善於適要。則雖舊彌新矣。



是以四序紛廻而入興貴閑。物色雖繁而析辭尚簡。使味飄飄而輕舉。情曄曄而更新。古來辭人異代接武。莫不參伍以相變。因革以爲功。物色盡而情有餘者。曉會通也。若乃山林臯壤。實文思之奧府。略語則闕。詳說則繁。然屈平所以能洞監風騷之情者。抑亦江山之助乎。

贊曰

山沓水匝。樹雜雲合。目既往還。心亦吐納。春日遲遲。秋風颯颯。情往似贈。興來如答。



才略第四十七

九代之文，富矣盛矣，其辭令華采，可略而詳也。虞夏文章，則有臯陶六德，夔序八音，益則有贊，五子作歌，辭義溫雅。萬代之儀表也。商周之世，則仲虺垂誥，伊尹敷訓，吉甫之徒，竝述詩頌，義固爲經文，亦師矣。及乎春秋大夫，則脩辭聘會，磊落如琅玕之圃，焜耀似縟錦之肆。遠敖擇楚國之令典，隨會講晉國之禮法。趙衰以文勝從饗，國僑以脩辭扞鄭子太叔，美秀而文。公孫翬善於辭令，皆文名之標者也。戰代任武，而



文士不絕。諸子以道術取資。屈宋以楚辭發采。樂毅報書。辯以義范。睢上疏密而至。蘇秦歷說壯而中。李斯自奏麗而動。若在文世。則揚班儔矣。荀況學宗。而象物名賦。文質相稱。固巨儒之情也。漢室陸賈首發奇采。賦孟春而選典誥。其辯之富矣。賈誼才穎。陵軼飛兔。議極而賦清。豈虛至哉。枚乘之七發。鄒陽之上書。膏潤於筆。氣形於言矣。仲舒專儒。子長純史。而麗縉成文。亦詩人之告哀焉。相如好書。師範屈宋。洞入夸艷。致名辭宗。然覆取精意。理不勝辭。故揚子以爲



又麗用寡者長卿誠哉是言也。王褒構采以密巧爲致，附聲測貌，泠然可觀。子雲屬意辭人，最深覲其涯度幽遠，搜選詭麗而竭才以鑽思，故能理贍而辭堅矣。桓譚著論，富號猗頓，宋宏稱薦，爰比相如，而集靈諸賦偏淺無才，故知長於諷論，不及麗文也。敬通雅好辭說，而坎壈盛世，顯志自序，亦蚌病成珠矣。二班兩劉奕葉繼采，舊說以爲固文優彪，歆學精向，然王命清辯，新序該練，璿璧產於崑崙，亦難得而踰本矣。傳毅崔駰，光采比肩，瑗寔踵武，能世厥風者矣。杜篤



賈逵亦有聲於文跡。其爲才也。崔傳之末流也。李尤  
賦銘志。慕鴻裁而才力沈隄。垂翼不飛。馬融鴻儒。思  
洽識高。吐納經範。華實相扶。王逸博識有功。而綸綵  
無力。延壽繼志。瓌頰獨標。其善圖物寫貌。豈枚乘之  
遺術歟。張衡通瞻。蔡邕精雅。文史彬彬。隔世相望。是  
則竹栢異心而同貞。金玉殊質而皆寶也。劉向之奏  
議。旨切而調緩。趙壹之辭賦。意繁而體疎。孔融氣盛  
於爲筆。禰衡思銳於爲文。有偏美焉。潘勗憑經以騁  
才。故絕羣於錫命。王朗發憤以託志。亦致美於序銘。



然自卿淵已前多俊才而不課學。雄向已後頗引書以助文。此取與之大際。其分不可亂者也。魏文之才洋洋清綺。舊談抑之。謂去植千里。然子建思捷而才儻。詩麗而表逸。子桓慮詳而力緩。故不競於先鳴。而樂府清越。典論辯要。迭用短長。亦無惜焉。但俗情抑揚雷同。一響遂令文帝以位尊減才。思王以勢窘益價。未爲篤論也。仲宜溢才。捷而能密。文多兼善。辭少瑕累。摘其詩賦。則七子之冠冕乎。琳瑯以符檄擅聲。徐幹以賦論標美。劉楨情高以會采。應瑒學優以得



文路粹楊脩頗懷筆記之工。丁儀邯鄲亦含論述之美。有足算焉。劉劭趙都能攀於前脩。何晏景福克光於後進。休璉風情則百壹標其志。吉甫文理則臨丹成其采。嵇康師心以遣論。阮籍使氣以命詩。殊聲而合響。異翮而同飛。張華短章奕奕清暢。其鷦鷯寓意。卽韓非之說難也。左思奇才業深覃思。盡粹於三都。拔萃於詠史。無遺力矣。潘岳敏給辭自和暢。鍾美於西京。賈餘於哀誅。非自外也。陸機才欲窺深。辭務索廣。故思能入巧而不制繁。士龍朗練以識檢亂。故能



布采鮮淨敏於短篇。孫楚綴思每直置以踈通。摯虞述懷必循規以溫雅。其品藻流別有條理焉。傅元篇章義多規鏡。長虞筆奏世執剛中。竝楨幹之實才。非羣華之韞萐也。成公子安選賦而辭美。夏侯孝若具體而皆微。曹攄清靡於長篇。季鷹辨切於短韻。各其善也。孟陽景陽才綺而相埒。可謂魯衛之政。兄弟之文也。劉琨雅壯而多風。盧謠情發而理昭。亦遇之於時勢也。景純艷逸足冠中興。郊賦旣穆穆以大觀。仙詩亦飄飄而凌雲矣。庾元規之表奏靡密以閑暢。溫



太真之筆記，循理而清通，亦筆端之良工也。孫盛工  
實文，勝爲史準的所擬，志乎典訓，戶牖雖異，而筆彩  
略同。袁宏發軔以高驤，故卓出而多偏。孫綽規旋以  
矩步，故倫序而寡狀。殷仲文之孤興，謝叔源之間情，  
竝解散辭體，縹緲浮音。雖滔滔風流，而大澆文意。宋  
代逸才，辭翰鱗萃，世近易明，無勞甄序。觀夫後漢才  
林，可參西京；晉世文苑，足儷鄴都。然而魏時話言，必  
以元封爲稱首；宋來美談，亦以建安爲口實。何也？豈  
非崇文之盛世，招才之嘉會哉？嗟夫！此古人所以貴



也

贊曰

才難然乎性各異稟一朝綜文千年凝錦餘采徘徊  
遺風籍甚無日紛雜皎然可品

知音第四十八

知音其難哉音實難知知實難逢逢其知音千載其  
一乎夫古來知音多賤同而思古所謂日進前而不  
御遙聞聲而相思也昔儲說始出子虛初成秦皇漢  
武恨不同時既同時矣則韓囚而馬輕豈不明鑒同



時之賤哉。至於班固傳教文在伯仲。而固嗤毅云。下筆不能自休。及陳思論才。亦深排孔璋。敬禮請潤色。歎以爲美談。季緒好詆訶。方之於田巴。意亦見矣。故魏文稱文人相輕。非虛談也。至如君卿唇舌。而謬欲論文。乃稱史遷著書。諮東方朔。於是桓譚之徒。相顧嗤笑。彼實博徒。輕言負誦。況乎文士。可妄談哉。故鑒照洞明。而貴古賤今者。二主是也。才實鴻懿。而崇已抑人者。班曹是也。學不逮文。而信僞迷真者。樓護是也。醬醃之議。豈多歎哉。夫麟鳳與麀。雉懸絕。珠玉與礫。



石超殊白。日垂其照。青眸寫其形。然魯臣以麟爲  
楚人以雉爲鳳。魏氏以夜光爲怪石。宋客以燕礫爲  
寶珠形器易徵。謬乃若是。文情難鑒。誰曰易分。夫篇  
章雜沓。質文交加。知多偏好。人莫圓該。慷慨者逆聲  
而擊節。醞藉者見密而高蹈。浮慧者觀綺而躍心。愛  
奇者聞詭而驚聽。會已則嗟諷。異我則沮棄。各執一  
隅之解。欲擬萬端之變。所謂東向而望。不見西牆也。  
凡操千曲而後曉聲。觀千劒而後識器。故圓照之象。  
務先博觀。閱喬岳以形培塿。酌滄波以喻畎澮。無私



於輕重不偏於憎愛。然後能平理若衡。照辭如鏡矣。  
是以將閱文情。先標六觀。一觀位體。二觀置辭。三觀  
通變。四觀奇正。五觀事義。六觀宮商。斯術既形。則優  
劣見矣。夫綴文者情動而辭發。觀文者披文以入情。  
沿波討源。雖幽必顯。世遠莫見其面。覘文輒見其心。  
豈成篇之足深。患識照之自淺耳。夫志在山水。琴表  
其情。况形之筆端。理將焉匿。故心之照理。譬目之照  
形。目瞭則形無不分。心敏則理無不達。然而俗監之  
迷者。深廢淺售。此莊周所以笑折楊。宋玉所以傷



雪也。昔屈平有言：文質踈內，衆不知余之異采。見異唯知音耳。揚雄自稱：心好沈博絕麗之文，其事浮淺，亦可知矣。夫唯深識鑒奧，必歎然內懌，譬春臺之熙衆人，樂餌之止過客。蓋聞蘭爲國香，服媚彌芬，書亦國華，翫澤方美。知音君子，其垂意焉。

贊曰

洪鐘萬鈞，夔曠所定。良書盈篋，妙鑒廼訂。流鄭淫人，無或失聽。獨有此律，不謬蹊徑。

程器第四十九



周書論士，方之梓材，蓋貴器用而兼文采也。是以樸  
斲成而丹雘施，垣墉立而雕墁附。而近代詞人，務華  
棄實，故魏文以爲古今文人之類，不護細行，韋誕所  
評，又歷詆羣才。後人雷同，混之一貫，吁可悲矣。略觀  
文士之疵，相如竊妻而受金，揚雄嗜酒而少算，敬通  
之不循廉隅，杜篤之請求無厭，班固竇以作威，馬  
融黨梁而黷貨，文舉傲誕以速誅，正平狂慙以致戮。  
仲官輕脆以躁競，孔璋恇惛以麤疎，丁儀貪婪以乞  
貨，路粹舖啜而無耻。潘岳詭譎於愍懷，陸機傾仄於



賈郭傳元剛隘而詈臺。孫楚懷懷而府諸有此類。  
竝文士之瑕累。文既有之。武亦宜然。古之將相。疵咎  
實多。至如管仲之盜竊。吳起之貪淫。陳平之污黥。絳  
灌之讒嫉。沿茲以下。不可勝數。孔光負衡據鼎而仄  
媚董賢。况班馬之賤職。潘岳之下位哉。王戎開國上  
秩。而鬻官鬻俗。况馬杜之磬懸。丁路之貧薄哉。然子  
夏無虧於名儒。濬冲不塵乎竹林者。名崇而譏減也。  
若夫屈賈之忠貞。鄒枚之機覺。黃香之淳孝。徐幹之  
沈默。豈曰文士必其玷歟。蓋人稟五材。脩短殊用。自



非上哲，難以求備。然將相以位隆，特達文士以職卑。多誚此江河，所以騰湧；涓流所以寸折者也。名之抑揚，旣其然矣。位之通塞，亦有以焉。蓋士之登庸，以成務爲用；魯之敬姜，婦人之聰明耳。然推其機綜，以方治國，安有丈夫學文而不達於政事哉？彼揚馬之徒，有文無質，所以終乎下位也。昔庾元規，才華清英，勲庸有聲，故文藝不稱。若非台岳，則正以文才也。文武之術，左右惟宜。郤縠敦書，故舉爲元帥；豈以好文而不練武哉？孫武兵經，辭如珠玉，豈以習武而不曉文。



也是以君子藏器待時而動發揮事業固宜蓄素以  
弼中散采以彪外。榘其質豫章其幹。摛文必在緯  
軍國負重必在任棟梁窮則獨善以垂文達則負時  
以騁績若此文人應梓材之士矣。

贊曰

瞻彼前脩有懿文德聲昭楚南采動梁北雕而不器  
貞幹誰則豈無華身亦有光國

序志第五十

夫文心者言爲文之用心也昔涓子琴心王孫巧心



心哉美矣，故用之焉。古來文章，以雕鐫成體，豈效鄉  
夷之羣言，雕龍也。夫宇宙綿邈，黎獻紛雜，拔萃出類，  
智術而已。歲月飄忽，性靈不居，騰聲飛實，創作而已。  
夫自肖貌天地，稟性五行，擬耳目於日月，方聲氣乎  
風雷，其超出萬物亦已靈矣。形同草木之脆，名踰金  
石之堅，是以君子處世，樹德建言，豈好辨哉？不得已  
也。予生七齡，乃夢彩雲若錦，則攀而採之，齒在踰立。  
則常夜夢執丹漆之禮器，隨仲尼而南行，旦而寤，廼  
怡然而喜。大哉聖人之難見也！廼小子之垂夢歟！



生人以來未有如夫子者也。敷讚聖旨，莫若注經而  
馬鄭諸儒宏之。已精就有深解，未足立家。唯文章之  
用，實經典枝條。五禮資之以成，六典因之致用。君臣  
所以炳煥軍國，所以昭明詳其本原，莫非經典。而去  
聖久遠，文體解散，辭人愛奇，言貴浮詭。飾羽尚畫，文  
繡輦悅。離本彌甚，將遂誰濫。蓋周書論辭，貴乎體要。  
尼父陳訓，惡乎異端。辭訓之異，宜體於要。於是搦管  
和墨，乃始論文。詳觀近代之論文者多矣。至於魏文  
述典，陳思序書，應瑒文論，陸機文賦，仲治流別，宏範



翰林各照隅隙。鮮觀衢路。或臧否當時之才。或銓品  
前脩之文。或汎舉雅俗之旨。或撮題篇章之意。魏典  
密而不周。陳書辨而無當。應論華而疏畧。陸賦巧而  
碎亂。流別精而少巧。翰林淺而寡要。又君山公幹之  
徒。吉甫士龍之輩。汎議文意。往往間出。竝未能振葉  
以尋根。觀瀾而索源。不述先哲之誥。無益後生之慮。  
蓋文心之作也。本乎道。師乎聖。體乎經。酌乎緯。變乎  
騷。文之樞紐。亦云極矣。若乃論文叙筆。則固別區分。  
原始以表末。釋名以章義。選文以定篇。敷理以舉統。



上篇以上綱領明矣。至於割情析采，必籠圈條貫，摛  
神性圖風勢，幽遠苞會通。闕聲字，崇替於時序，褒貶  
於才略。怵悵於知音，耿介於程器。長懷序志，以馭羣  
篇。下篇以下毛目顯矣。位理定名，彰乎大易之數。其  
爲文用，四十九篇而已。夫銓序一文爲易，彌綸羣言  
爲難。雖復輕採毛髮，深極骨髓，或有曲意密源，似近  
而遠，辭所不載，亦不勝數矣。及其品列成文，有同乎  
舊談者，非雷同也；勢自不可異也。有異乎前論者，非  
苟異也。理自不可同也。同之與異，不屑古今，擘肌分

理唯務折衷，按響文雅之場，而環絡藻繪之府，亦幾乎備矣。但言不盡意，前聖所難，識在鉅管，何能矩矱，漣漣往代，既沈予聞，渺渺來世，諒塵彼觀也。

贊曰

生也有涯，無涯惟智，運物實難，憑性良易，傲岸泉石，咀嚼文義，文果載心，余心有寄。

文心雕龍卷十終



右劉勰文心雕龍十卷見隋唐志按南史文學傳  
勰字彥和天監中兼東宮通事舍人撰文心雕龍  
論古今文體凡五十篇篇係以贊沈約謂其深得  
文理劉知幾亦云詞人屬文其體非一譬甘辛殊  
味丹素異彩後來祖述識昧圓通家有詆訶人相  
摘摭故劉勰文心生焉蓋亦服膺此書而晁氏乃  
題其後以譏之曰世之詞人刻意文藻讀書多滅  
裂杜牧之以龍星爲真龍王摩詰以去病爲衛青  
昔人譏之然亦不足怪蓋詩賦或率爾之作故也

今勰著書行世自謂嘗夢執丹漆器隨仲尼南行  
其自負亦不淺矣乃其論說篇云六經論語以前  
經無論字六韜三論後人追題是殊不知書有論  
道經邦之言也其疎略過於王杜矣愚者論道經  
邦語出古文尙書周官說者亦以爲非真尙書則  
此字仍出論語後要之文心原主論文不得以是  
爲病也汝上王謨識



詩品總評

王世貞曰。吾覽鍾記室詩品。求情文裁量事代。可謂允矣。詞亦奕奕發之。第一源出於何者。恐未盡然。邁凱昉約濫居中品。至魏文不列乎上。三公屈第乎下。尤爲不公。少損連城之價。吾獨愛其評子建。骨氣奇高。詞彩華茂。情兼雅怨。體被文質。嗣宗言在耳目之內。情寄八荒之表。靈運名章迥句。處處間起麗典。新聲絡驛奔會。越石善爲悽愴之詞。自有清拔之氣。明遠得景陽之詭譎。含茂先之靡嫚。骨節強於謝



混。馳邁疾於顏延。總四家而並美。跨兩代而孤出。多  
暉奇草秀句。往往警道。足使叔源失步。明遠變色。文  
通詩體總雜。善於摹擬。筋力於王微。成就於謝朓。此  
數評者。贊許既實。措撰尤工。

蘭莊詩話云。鍾嶸品陶潛詩。文體省靜。殆無長語。篤  
意真古。辭興婉愜。古今隱逸詩人之宗也。可謂知言  
矣。而寘之中品。其上品十一人。如王粲。阮藉輩。顧右  
於潛耶。論者稱嶸洞悉言理。曲臻雅致。標揚極界。以  
示法程。自唐而上。莫及也。吾獨惑於處陶焉。



南史云鍾嶸嘗求譽於約約拒之及約卒嶸品古今  
詩爲評言其優劣云云蓋追宿憾以此報之也

詩

經

詩云其風未至而盛風至以故其風

自東而西也



詩品卷上

梁鍾嶸著

新城郭家蓮校

氣之動物。物之感人。故搖蕩性情。形諸舞詠。照燭三才。暉麗萬有。靈祇待之以致饗。幽微藉之以昭告。動天地。感鬼神。莫近於詩。昔南風之辭。卿雲之頌。厥義復矣。夏歌曰。鬱陶乎予心。楚謠曰。名予曰正則。雖詩體未全。然是五言之濫觴也。逮漢李陵始著五言之目矣。古詩眇邈。入世難詳。推其文體。固是炎漢之製。非衰周之倡也。自王揚枚馬之徒。詞賦競爽。而吟詠



靡聞從李都尉迄班婕妤將百年間有婦人焉一人而已詩人之風頓已缺喪東京二百載中惟有班固詠史質木無文降及建安曹公父子篤好斯文平原兄弟鬱爲文棟劉楨王粲爲其羽翼次有攀龍托鳳自致於屬車者蓋將百計彬彬之盛大備於時矣爾後陵遲衰微迄於有晉太康中三張二陸兩潘一左敦爾復興踵武前王風流未沫亦文章之中興也永嘉時貴黃老稍尚虛談于時篇什理過其辭淡乎寡味爰及江表微波尚傳孫綽許詢桓庾諸公詩皆平



典似道德論建安風力盡矣。先是郭景純用儻上之才。變創其體。劉越石仗清剛之氣。贊成厥美。然彼衆我寡。未能動俗。逮義熙中。謝益壽斐然繼作。元嘉中有謝靈運才高詞盛。富艷難蹤。固已含跨劉郭。陵轢潘左。故知陳思爲建安之傑。公幹仲宣爲輔。陸機爲太康之英。安仁景陽爲輔。謝客爲元嘉之雄。顏延年爲輔。斯皆五言之冠冕。文詞之命世也。夫四言文約易廣。取效風騷。便可多得。每苦文繁而意少。故世罕習焉。五言居文詞之要。是衆作之有滋味者也。故云。



會於流俗。豈不以指事造形。窮情寫物。最爲詳切者邪。故詩有六義焉。一曰興。二曰比。三曰賦。文已盡而意有餘。興也。因物喻志。比也。直書其事。寓言寫物。賦也。宏斯三義。酌而用之。幹之以風力。潤之以丹彩。使味之者無極。聞之者動心。是詩之至也。若專用比興。則患在意深。意深則詞蹟。若但用賦體。則患在意浮。意浮則文散。嬉成流移。文無止泊。有蕪漫之累矣。若乃春風春鳥。秋月秋蟬。夏雲暑雨。冬月祁寒。斯四候之感諸詩者也。嘉會寄詩以親。離羣託詩以怨。至於



楚臣去境。漢妾辭宮。或骨橫朔野。或魂逐飛蓬。或負  
戈外戎。殺氣雄邊。塞客衣單。孀閨淚盡。文士有解佩  
出朝。一去忘返。女有揚蛾入寵。再盼傾國。凡斯種種。  
感蕩心靈。非陳詩何以展其義。非長歌何以騁其情。  
故曰詩可以羣。可以怨。使窮賤易安。幽居靡悶。莫尚  
於詩矣。故詞人作者。罔不愛好。今之士俗。斯風熾矣。  
纔能勝衣。甫就小學。必甘心而馳騫焉。於是庸音雜  
體。各各爲容。至使膏腴子弟。耻文不逮。終朝點綴。分  
夜呻吟。獨觀謂爲警策。衆覩終淪平鈍。次有輕薄之



徒笑曹劉爲古拙。謂鮑昭義皇上人。謝朓今古獨步。而師鮑昭終不及日中市朝滿。學謝朓劣得黃鳥度青枝。徒自棄於高聽。無涉於文流矣。觀王宮指紳之士。每博論之餘。何嘗不以詩爲口實。隨其嗜慾。商確不同。淄澠並泛。朱紫相奪。喧議競起。準的無依。近彭城劉士章。俊賞之士。疾其淆亂。欲爲當世詩品。口陳標榜。其文未遂。感而作焉。昔九品論人。七略裁士。校以賓實。誠多未值。至若詩之爲技。較爾可知。以類推之。殆均博奕。方今皇帝資生知之上才。沉鬱之幽



思文麗日月。賞究天人。昔在貴遊。已爲稱首。況八紘  
旣奄。風靡雲蒸。抱玉者聯肩。握珠者踵武。以瞰漢魏  
而不顧。吞晉宋於胷中。諒非農歌轅議。敢致流別。爍  
之今錄。庶周旋於閭里。均之於談笑耳。

古詩

其體源出於國風。陸機所擬十四首。文溫以麗。意悲  
而涼。驚心動魄。可謂幾乎一字千金。其外去者。日以  
疎。四十五首。雖多哀怨。頗爲總雜。舊疑是建安中曹  
王所製。客從遠方來。橘柚垂華實。亦爲驚絕矣。人代

言品  
冥滅而清音獨遠悲夫。

漢都尉李陵

其源出於楚辭文多悽怨者之流。陵名家子有殊才。生命不諧。聲顏身喪。使陵不遭辛苦。其文亦何能至此。

漢婕妤班姬

其源出於李陵。團扇短章。辭旨清捷。怨深文綺。得匹婦之致。侏儒一節。可以知其工矣。

魏陳思王植



其源出於國風。骨氣奇高。詞彩華茂。情兼雅怨。體被  
文質。粲溢今古。卓爾不羣。嗟乎陳思之於文章也。譬  
人倫之有周孔。鱗羽之有龍鳳。音樂之有琴笙。女工  
之有黼黻。俾爾懷鉛吮墨者。抱篇章而景慕。映餘暉  
以自燭。故孔氏之門。如用詩。則公幹升堂。思王入室。  
景陽潘陸。自可坐於廊廡之間矣。

魏文學劉楨

其源出於古詩。仗氣愛奇。動多振絕。真骨凌霜。高風  
跨俗。但氣過其文。雕潤恨少。然自陳思已下。楨稱獨



步。

魏侍中王粲

其源出於李陵。發愀愴之詞。文秀而質。羸在曹劉間。別構一體。方陳思不足。比魏文有餘。

晉步兵阮籍

其源出於小雅。無雕蟲之功。而詠懷之作。可以陶性靈。發幽思。言在耳目之內。情寄八荒之表。洋洋乎會於風雅。使人忘其鄙近。自致遠方。頗多感慨之詞。厥旨淵放。歸趣難求。顏延年註解法言其志。



晉平原相陸機

其源出於陳思才高辭贍舉體華美氣少於公幹文  
劣於仲宣尙規矩不貴綺錯有傷直致之奇然其咀  
嚼英華厭飫膏澤文章之淵泉也張公歎其大才信  
矣。

晉王門郎潘岳

其源出於仲宣翰林歎其翩翩然如翔禽之有羽毛  
衣服之有綃縠猶淺於陸機謝混云潘詩爛若舒錦  
無處不佳陸文如披沙簡金往往見寶蝶謂益壽輕

華故以潘勝。翰林篤論。故歎陸爲深。余常言陸才如海。潘才如江。

晉黃門郎張協

其源出於王粲。文體華淨。少病累。又巧構形似之言。雄於潘岳。靡於太沖。風流調達。實曠代之高。詞彩蔥蒨。音韻鏗鏘。使人味之。亹亹不倦。

晉記室左思

其源出於公幹。文典以怨。頗爲精切。得諷諭之致。雖野於陸機。而深於潘岳。謝康樂常言。左太沖詩。潘安



仁詩古今難比。

宋臨川大守謝靈運

其源出於陳思。雜有景陽之體。故尙巧似而逸蕩過之。頗以繁蕪爲累。噪謂若人興多才高博。寓目輒書。內無乏思。外無遺物。其繁富宜哉。然名章迴句。處處間起麗典新聲。絡繹奔會。譬猶青松之拔灌木。白玉之暎塵沙。未足貶其高潔也。初錢塘杜明師夜夢東南有人來入其館。是夕卽靈運生於會稽。旬日而謝元亡。其家以子孫難得。送靈運於杜治養之。十五方

還都故名客兒

治音稚奉道之家靖室也

宋國俱大治信靈聖

樂聖俱大寺僧靈照



詩品卷中

一品之中。略以世代爲先後。不以優劣爲詮次。又其人既往。其文克定。今所寓言。不錄存者。夫屬詞此事。乃爲通談。若乃經國文符。應資博古。撰德駿奏。宜窮往烈。至乎吟詠情性。亦何貴於用事。思君如流水。旣是卽目。高臺多悲風。亦唯所見。清晨登隴首。羣無故實。明月照積雪。詎出經史。觀古今勝語。多非補假。皆由直尋。顏延。謝莊尤爲繁密。於時化之。故大明泰始。中文章始同書。接近任昉。王元長等。辭不貴奇。競須



新事。爾來作者。寢以成俗。遂乃句無虛語。語無虛字。拘攣補衲。蠹文已甚。但自然英旨。罕值其人。詞旣失高。則宜加事義。雖謝天才。且表學問。亦一理乎。陸機文賦。通而無貶。李充翰林。疎而不切。王微鴻寶。密而無裁。顏延論文。精而難曉。摯虞文志。詳而博瞻。頗曰知言。觀斯數家。皆就談文體。而不顯優劣。至於謝客集詩。逢詩輒取。張騭文士。逢文卽書。諸英志錄。並義在文。曾無品第。矇今所錄。止乎五言。雖然網羅今古。詞文殆集。輕欲辨彰清濁。掎摭病利。凡百二十人。預



此宗流者。便稱才子。至斯三品升降。差非定制。方申  
變裁。請寄知者爾。

漢上計秦嘉妻徐淑

夫妻事既可傷。文亦悽怨。爲五言者。不過數家。而婦  
人居二徐淑敘別之作。亞於團扇矣。

魏文帝

其文出於李陵。頗有仲宣之體。則新奇百許篇。率皆  
鄙直如偶語。惟西北有浮雲十餘首。殊美贍可翫。始  
見其工矣。不然。何以銓衡羣彥。對揚厥弟者耶。



晉中散嵇康

頗似魏文。過爲峻切。訐直露才。傷淵雅之致。然託論清遠。良有鑒裁。亦未失高流矣。

晉司空張華

其源出於王粲。其體華艷。興託不奇巧。用文字務爲妍冶。雖名高曩代。而疏亮之士。猶恨其兒女情多。風雲氣少。謝康樂云。張公雖復千篇。猶一體耳。今置之。中品疑弱。處之下科恨少。在季孟之間矣。

魏尚書何晏。晉馮翊守孫楚。晉著作正贊。晉王



司徒掾張翰晉中書令潘尼

平叔鴻鴈之篇。風規見矣。子荆零雨之外。正長朔風  
之後。雖有累札。良亦無聞。季鷹黃華之喝。正叔綠縈  
之良。雖不具美。而文彩高麗。竝得虬龍片甲。鳳凰一  
毛。事同駁聖。宜居中品。

魏侍中應璩

祖襲魏文。善爲古語。指事殷勤。雅意深篤。得詩人激  
刺之旨。至於濟濟。今日所華靡。可諷味焉。

晉清河守陸雲晉侍中石崇晉襄城太守曹攬

晉朗陵公何劭

清河之方平原。殆如陳思之匹白馬。于其哲昆。故稱二陸。季倫顏遠。並有英篇。篤而論之。朗陵爲最。

晉太尉劉琨晉中郎劉琨

其源出於王粲。善爲淒戾之詞。自有清拔之氣。琨旣體良才。又懼厄運。故善敘喪亂。多感恨之詞。中郎仰之。微不逮者矣。

晉宏農太守郭璞

憲章潘岳。文體相輝。彪炳可翫。始變永嘉平淡之體。



故稱中興第一翰林以爲詩首但遊仙之作辭多憤慨乖遠乎宗而云奈何虎豹姿又云戢翼棲榛梗乃是坎壈詠懷非列仙之趣也

晉吏部郎袁宏

彦伯詠史雖文體未適而鮮明緊健去凡俗遠矣

晉處士郭泰機晉常侍顧愷之朱謝世基宋參軍顧邁宋參軍戴凱

泰機寒女之製孤怨宜恨長康能以二韻答四首之美世基橫海顧邁鴻飛戴凱人實貧羸而才章富健



觀此五子。文雖不多。氣調警拔。吾許其進。則鮑昭江淹未足逮。止越居中品。僉曰宜哉。

宋徵士陶潛

其源出於應璩。又協左思。風力文體省靜。殆無長語。篤意真古。辭興婉愜。每觀其文。想其人德。世欲其質直。至如歡言醉春酒。日暮天無雲。風華清靡。豈直爲田家語耶。古今隱逸詩人之宗也。

宋光祿大夫顏延之

其源出於陸機。尚巧似。體裁綺密。情喻淵深。動無虛



散一句一字皆致意焉。又喜用古事。彌見拘束。雖乖秀逸。是經綸文雅才。雅才減若人。則蹈於困躓矣。湯惠休曰。謝詩如芙蓉出水。顏如錯彩鏤金。顏終身病之。

宋豫章太守謝瞻。宋僕射謝混。宋太尉袁淑。宋徵君王微。宋征虜將軍王僧達。

其源出於張華才力苦弱。故務其清淺。殊得風流媚趣。課其實錄。則豫章僕射宜分庭抗禮。徵君太尉可託乘後車。征虜卓卓。殆欲度驂驪前。



宋法曹參軍謝惠連

小謝才思富捷。恨其蘭玉夙凋。故長轡未騁。秋懷擣衣之作。雖復靈運銳思。亦何以加焉。又工爲綺麗歌謠。風人第一。謝氏家錄云。康樂每對惠連。輒得佳語。後在永嘉西堂。思詩竟日。不就寤寐。間忽見惠連。卽成池塘生春草。故常云。此語有神助。非吾語也。

宋參軍鮑昭

其源出於二張。善製形狀。寫物之詞。得景陽之諛詭。含茂先之靡嫚。骨節強於謝混。馭邁疾於顏延。總四



家而擅美。跨兩代而孤出。嗟其才秀人微。故取湮當  
代。然貴尚巧似。不避危仄。頗傷清雅之調。故言險俗  
者多以附昭。

齊吏部謝朓

其源出於謝混。微傷細密。頗在不倫。一章之中自有  
玉石。然奇章秀句。往往警適。足使叔源失步。明遠變  
色。善自發詩端。而末篇多躓。此意銳而才弱也。至爲  
後進士子之所嗟慕。朓極與余論詩。感激頓挫過其  
文。

齊光祿江淹

文通詩體總雜。善於摹擬。勛力於王微。成就於謝朓。  
初淹罷宣城郡。遂宿冶亭。夢一美丈夫。自稱郭璞。謂  
淹曰。吾有筆在卿處多年矣。可以見還。淹探懷中得  
五色筆以授之。爾後爲詩。不復成語。故世傳江淹才  
盡。

梁衛將軍范雲梁中書郎江淹

范詩清便宛轉。如流風迴雪。江詩點綴腴媚。似落花  
依草。故當淺於江淹。而秀於任昉。



梁太常任昉

彥昇少年爲詩不工。故世稱沈詩任筆。昉深恨之。晚節愛好。旣篤。又亦適變。若銓事理。拓體淵雅。得國士之風。故擢居中品。但昉旣博物。動輒用事。所以詩不得奇。少年士子效其如此。弊矣。

梁左光祿沈約

觀休文衆製。五言最優。詳其文體。察其餘論。固知憲章鮑明遠也。所以不閑於經綸。而長於清怨。永明相王愛文。王元長等。皆宗附之。約于時。謝朓未適。江淹



才盡。范雲名級故微。故約稱獨步。雖文不至。其功麗  
亦一時之選也。見重閭里。誦詠成音。嶸謂約所著既  
多。今剪除淫雜。收其精要。允爲中品之第矣。故當詞  
密於范。意淺於江也。



詩品卷下

昔曹劉殆文章之聖。陸謝爲體貳之才。銳精研思。千  
百年中。而不聞宮商之辨。四聲之論。或謂前途偶然  
不見。豈其然乎。嘗試言之曰。古詩頌。皆被之金竹。故  
非調五音。無以諧會。若置酒高堂上。明月照高樓。爲  
韻之首。故三祖之詞。文或工。而韻入歌唱。此重音  
韻之義也。與世之言宮商異矣。今旣不備管絃。亦何  
取於聲律耶。齊有王元長者。嘗謂余云。宮商與二儀  
俱生。自古詞人不知之。唯顏憲子乃云。律呂音調而



其實大謬。唯見范曄謝莊贗議之耳。常欲進知音論。未就。王元長創其首。謝朓沈約揚其波。三賢或貴公子孫。幼有文辨。於是士流景慕。務爲精密。襞積細微。專相凌架。故使文多拘忌。傷其真美。余謂文製本須諷讀。不可蹇礙。但令清濁通流。口吻調利。斯爲足矣。至平上去入。則余病未能。蜂腰鶴膝。間里已具。陳思贈弟仲宣七哀。公幹思友阮籍詠懷。子卿雙鳬。叔夜雙鷺。茂先寒夕。平叔衣單。安仁倦暑。景陽苦雨。靈運鄴中。士衡擬古。越石感亂。景純詠仙。王微風月。謝客



山泉叔源離宴鮑昭茂邊太冲詠史顏延入洛陶公  
詠貧之製。燕連擣衣之作。斯皆五言之警策者也。所  
謂篇章之珠澤。文彩之鄧林。

漢令史班固漢孝廉酈炎漢上計趙壹

孟堅才流而老於掌故。觀其詠史。有感歎之詞。文  
託詠靈芝。觀懷寄不淺。元叔散憤蘭蕙。指斥囊錢。苦  
言切句。良亦勤矣。斯人也而有斯困。悲夫。

魏武帝魏明帝

曹公古直。甚有悲涼之句。戲不如丕。亦稱三祖。

魏白馬王彪。魏文學徐幹。

白馬與陳思答贈。偉長與公幹往復。雖曰以筵和。亦能閑雅矣。

魏倉曹屬阮瑀。晉頓丘太守歐陽建。晉文學。璩。晉中書令嵇含。晉河南太守阮侃。晉侍中。紹。晉黃門。棗據。

元瑜。堅石七君詩。竝平典不失古體。大檢似。而二嵇微優矣。

晉中書張載。晉司隸傅。晉太僕傅。虞侍中。



襲散騎常侍夏侯湛

孟陽詩乃遠慙厥弟而近超兩傅長虞父子繁富可  
嘉。孝冲雖曰後進。見重安仁。熙伯挽歌。唯以造哀爾。

晉驃騎王濟。晉征南將軍杜預。晉廷尉孫綽。晉

徵士許詢

永嘉以來。清虛在俗。王武子輩詩。貴道家之言。爰洎  
江表。平風尚備。真長仲祖。桓庾諸公。猶相襲。世稱孫  
許。彌善恬淡之詞。

晉徵士戴逵。晉東陽太守殷仲文

晉宋之際殆無詩乎。義熙中以謝益壽殷仲文爲華綺之冠。殷不競矣。

宋尚書令傅亮

季友文。余常忽而不察。今沈特進撰詩載其數百。亦復平矣。

宋記室何長瑜。羊曜璠。宋詹事范曄。

乃不稱其才。亦爲鮮舉矣。

宋孝武帝。宋南平王鑠。宋建平王宏。

孝武詩彫文織綵。過爲精密。爲二藩希慕。竟稱輕此。



矣。

宋光祿謝莊

希逸詩氣候清雅不逮於范袁然興屬閑長良無鄙  
促也。

宋御史蘇費生宋中書令史陵修之宋典祠令

任曇緒宋越騎戴法興

蘇陵任戴竝著篇章亦爲搢紳之所嗟詠人非文才  
是愈甚可嘉焉。

宋監典事區惠恭



惠恭本胡人，爲顏師伯幹。顏爲詩，輒偷筆定之。後造獨樂賦，語侵給主，被斥。及大將軍修北第，差充作長時。謝惠連兼記室參軍，惠恭時往共安陵嘲調。末作雙枕詩以示謝。謝曰：君誠能恐人未重，且可以爲謝法曹造遣。大將軍見之，賞歎，以錦二端賜謝。謝辭曰：此詩公作，長所製，請以錦賜之。

齊惠休上人齊道猷上人齊釋寶月

惠休淫靡，情過其才。世遂疋之鮑昭，恐商周矣。羊曜璠云：是顏公忌昭之文，故立休鮑之論。庾白二胡亦



有蕭何行路難。是東陽柴廓所造。寶月嘗憇其家。會廓亡。因竊而有之。廓子賁手本出都。欲訟此事。乃厚賂止之。

齊高帝齊征北將軍張永齊太尉王文憲

齊高帝詩詞藻意深。無所云少。張景云。雖謝文體。頗有古意。至如王師文憲。既經國圖遠。或忽是雕蟲。

齊黃門謝超宗齊潯陽太守王靈鞠齊給事中郎劉祥齊司徒長史檀超齊正員郎鍾憲齊諸暨令顏則齊秀才顧則心

檀謝七君。竝祖襲顏延。欣欣不倦。得士大火之雅致。  
乎。余從祖正員常云。大明泰始中。鮑休美文殊已動。  
俗。唯此諸人。傳顏陸體用固執。不如顏諸暨最荷家。  
聲。

齊參軍毛伯成。齊朝請吳邁遠。齊朝請許謠之。  
伯成文不全佳。亦多惆悵。吳善於風人答贈。許長於。  
短句詠物。湯休謂遠云。吾詩可爲汝詩父。以訪謝光。  
祿云不然。爾湯可爲庶兄。

齊鮑令暉。齊韓蘭英。



令暉歌詩。往往斷絕精巧。擬古尤勝。唯百願淫矣。常答孝武云。臣妹才自亞於左芬。臣才不及太沖爾。蘭英綺密。甚有名篇。又善談笑。齊武謂韓云。借使二媛生於上葉。則玉階之賦。純素之辭。詎未多也。

齊司徒長史張融。齊詹事孔稚珪。

思光紆緩誕放。縱有乖文體。然亦捷疾豐饒。差不局促。德璋生於封谿。而文爲雕飾。青於藍矣。

齊寧朔將軍王融。齊中庶子劉繪。

元長士章。竝有盛才。詞美英淨。至於五言之作。幾乎

尺有所短。譬應變將略。非武侯所長。未足以貶臥龍。

齊僕射江祐

祐詩猗猗清潤。弟祀明靡可懷。

齊記室王巾齊綏遠太守卞彬齊端溪令卞錄  
王巾二卞詩竝愛奇嶄絕慕袁彥伯之風雖不宏綽  
而文體勦淨去平美遠矣

齊諸暨令袁嘏

嘏詩平平耳多自謂能常語徐太保尉云我詩有生  
氣須人捉着不爾便飛去



齊雍州刺史張欣泰梁中書郎范

欣泰子真竝希古勝文鄙薄俗製賞心允亮不失雅

宗

梁秀才陸厥

觀厥文緯具識丈夫之情狀自製未優非言之夫也

梁常侍虞羲梁建陽令江洪

子陽詩奇句清拔謝朓常嗟頌之洪雖無多亦能自  
迥出

梁步兵鮑行卿梁晉陵令孫察

行卿少年。甚擅風謠之美。察最幽微。而感賞至到。可。



石詩品三卷梁記室參軍潁川鍾嶸仲偉撰有傳  
見南史云嶸嘗求譽於沈約約拒之及約卒嶸品  
古今詩爲評言其優劣云觀休文衆製五言最優  
於時謝朓未適江淹才盡范雲名級又微故稱獨  
步故當辭宏於范意淺於江蓋追宿憾以此報約  
也今考約詩列在中品似未爲劣且旣評品自有  
軒輊如於江淹詩亦以爲淺於江淹秀於任昉豈  
亦爲有宿憾耶但其評論諸家源流亦有未協如  
以陶詩爲源出應璩前人固有議之者汝上王謨

詩品

識



書品

梁庾肩吾著 南昌王翎校

平靜先生曰。予遍求邃古。逖訪厥初。書名起于平洛。字勢發于倉史。故遺結繩。取諸文。象諸形。會諸人事。未有廣此緘繚。深茲文契。是以一畫加大。天尊可知。二力增土。地卑可審。日以君道。則字勢圓。月以臣輔。則文體缺。及其轉註假借之流。指事會意之類。莫不狀範毫端。形呈字表。開篇玩古。則千載共朝。削簡傳今。則萬里對面。記善則惡自削。書賢則過必改。玉歷



頌正而化俗。帝敎陳言而設敎。變通不極。日用無窮。  
與聖同功。參神並運。爰洎中葉。舍繁從省。漸失潁川  
之言。竟逐雲陽之字。若乃鳥跡孕于古文。壁書存于  
科斗。符陳帝璽。摹調蜀漆。署表宮門。銘題禮器。魚遊  
舍鳳。鳥已分虫。仁義起于麒麟。威形發于龍虎。雲氣  
時飄五色。仙人還作兩童。颺若浮溪。蛇若赴穴。流星  
疑燭。垂露似珠。芝英轉車。飛白掩素。參差倒薤。旣思  
種柳之謠。長短懸針。復想定情之製。蚊脚俯低。鵠頭  
仰立。填飄板上。謬起印中。波回墮鏡之鸞。楷顧雕陵。



之鵠竝以篆籀重複。見重昔時。或巧能售酒。或妙令  
鬼哭。信無味之奇珍。非趨時之急務。且具錄前訓。今  
不復兼論。惟草正疏通。專行于世。其或繼之者。雖百  
代可知。尋隸體發源。秦時隸人下邳程邈所作。始皇  
見而重之。以奏事繁多。篆字難製。遂作此法。故曰隸  
書。今時正書是也。草聖起于漢時。解散隸法。用以赴  
急。本因草創之義。故曰草書。建初中。京兆杜操始以  
善書知名。今之草書是也。余自少迄長。畱心茲藝。敏  
手謝于臨池。銳意同于削板。而戢山之扇。竟未增錢。



凌雲之臺。無因誠子求諸故跡。或有淺深。輒刪善草。隸者一百二十八人。伯英以稱聖居首。法高以追駿。處末推能相越。小例而九。引類相附。大等而三。復爲略論總名書品。

張芝伯英 鍾繇元常 王羲之逸少

右三人上之上

論曰。隸旣發源秦始。草乃激流齊相。跨七代而彌遵。將千載而無革。誠開博者也。均其文。總六書之要。指其事。籠八體之奇。能拔篆籀于繁蕪。移借真于重密。



分行紙上類出繭之蛾結畫篇中似聞琴之霍峯嶺  
間起瓊山慚其歛霧漪瀾遞振碧海愧其下風抽絲  
散水定其下筆倚刀較尺驗于成字真草旣分于星  
芒烈火復成于珠珮或橫牽豎掣或濃點輕拂或將  
放而更畱或因挑而還置敏思藏于胸中巧意發于  
毫銛詹尹端策故以述其變化英韶傾耳無以察其  
音聲殆善射之不注妙斲輪之不傳是以鷹爪舍利  
出彼兔毫龍管潤霜遊茲蠆尾學者鮮能具體窺者  
罕得其門若探妙測深盡形得勢烟花落紙將動風

彩帶字欲飛。疑神化之所爲。非人世之所學。惟張有道。鍾元常王右軍。其人也。張工夫第一。天然次之。衣帛先書。稱爲草聖。鍾天然第一。工夫次之。妙盡許昌之碑。窮極鄴下之牘。王工夫不及張。天然過之。天然不及鍾。工夫過之。羊欣云。貴越羣品。古今莫二。兼撮衆法。備成一家。若孔門以書。三子入室矣。允爲上之上。

崔瑗子玉

杜度伯度

師宜官

張昶文舒

王獻之子敬



右五人上之中

論曰崔子玉擅名北中跡罕南度世有得其摹者王  
子敬見之稱美以爲功類伯英杜度濫觴于草書取  
奇于漢帝詔復奏事皆作草書師宜官鴻都爲最能  
人能小文舒聲劣于兄時云亞聖子敬泥帚最驗天  
骨兼以製筆復識人工一字不遺兩葉傳妙此五人  
允爲上之中

索靖幼安

梁鵠孟皇

韋誕仲將

皇象休明

胡昭孔明

鍾會士季

衛瓘伯玉 荀爽長兄 阮研文機

右九人上之下

論曰。幼安歛蔓舅氏抗名衛。令孟皇功盡筆力。字入帳中。仲將不妄染毫。必須張筆而左紙。孔明動見模楷。皆謂胡肥而鍾瘦。休明斟酌二家。聯駕八絕。士季之範。元常猶予敬之。稟逸少而工拙兼効。真草皆成。伯玉遠慕張芝。近叅父迹。長兄狸骨方擬而難追。阮研居今觀古。盡窺衆妙之門。雖復師王祖鍾。終成別構一體。此九人允爲上之下。



張翥子竝 郭伯道 劉德昇君嗣

崔寔子真 衛夫人名鑠字茂猗

李式景則 庾翼稚恭 郗愔方回

謝安安石 王珉季琰 栢弔敬道

羊欣敬元 王僧虔 孔琳之彥琳

殷鈞季和

右十五人中之上

論曰予竝崔寔州里頗相倣效可謂牆隤于鹽冰寒于水伯道府問朝廷遠封其迹德昇之妙鍾胡各採

其美子真俊才門法不墜李妻衛氏自出華宗景則  
毫素流靡稚恭聲彩適越郗愔安石草正竝驅季琰  
栢辛筋力俱駿羊欣早隨子敬最得王體孔琳之聲  
高宋氏王僧虔雄發齊代殷鈞頗耽愛好終得肩隨  
此一十五人允爲中之上

魏武帝曹操孟德 吳主元宗孫皓

衛覬伯儒 左子邑伯子 衛桓巨山

杜預元凱 王廙世將 張彭祖 任靖

韋昶文休 王修敬仁 范懷約



張永景初 吳休尚 施方泰

右十五人中之中

論曰。魏帝筆墨雄贍。吳主體裁綿密。伯儒兼叙隸草。  
子邑分鑣梁郛。巨山三世元凱累葉。王廙爲右軍之  
師。彭祖取羲之之道。任靖矯名。文休題柱。敬仁清舉。  
致畏逼之詞。張范逢時俱東南之美。施吳鄴下後生。  
同年拔萃。此十五人允爲中之中。

羅暉叔景 趙襲元嗣 劉興 張昭

陸機士衡 朱誕 王導茂宏 庾亮元規



王洽 郗超 吳興 張翼 宋文帝 劉義隆

康昕 徐希秀 謝眺 孚暉 劉繪

陶隱君 名宏景 王崇素

右十八人中之下

論曰。叔景元嗣。並稱西州劉興之筆。扎張昭之無懈。

陸機以宏才掩迹。朱誕以偏藝流聲。王導則列聖推

能。庾亮則羣公挹巧。王洽以並通諸法。郗超以晚年

取譽。張翼善効。宋帝康昕。郗秀孤生。謝眺。劉繪。文宗

書範。近來少前。陶隱君。仙才翰采。拔于山谷。王崇素



繪事靡倫篇筆傳于里閭。此十八人允爲中之下。

姜翊 梁宣 魏徵 弼 成 韋秀 鍾興

向泰 羊忱 晉元帝景文 識道人

范曄 蔚宗 宋炳 謝靈運 蕭思話

薄紹之 敬叔 齊高帝紹伯 庾黔婁

費元瑤 孫奉伯 王會 羊祐叔子

論曰。此二十一人。並擅毫翰。動成楷則。殆逼前良。見  
希後彥。允爲下之上。

陽經 諸葛融 楊潭 張炳 岑端

張興 王濟 李夫人 劉穆之道和

朱齡石 庾景休 張融思光 褚元明

孔敬通 王籍文海

右十五人下之中

論曰此十五人雖未窮字奧。書尚文情。披其叢薄。非  
無香草。視其涯岸。皆有潤珠。故遺斯紙。以爲世玩。允  
爲下之中。

衛宣 李韞 陳基 傅庭堅 張紹

陰光 韋熊少季 張暢 曹任 朱嘉



張邈 羊固 傅夫人 辟閭訓 謝晦

徐羨之 孔閭 顏寶光 周仁皓

張欣泰 張熾 僧苦道人

右二十二人下之下

論曰。此二十二人。皆五味一和。五色一彩。視其雕文。非特刻鵠。人人下筆。寧止追響。遺跡見珍。餘芳可折。誠以駟馳並駕。不逮前鋒。而中權後殿。各盡其美。允爲下之下。

今以九例。該此衆賢。猶如平圃積玉。炎洲聚桂。其中

書品  
賁相推謝。故有茲多品。然終能振此鱗翼。俱上龍門。  
八  
倘後之學者。更隨點曝云爾。

右書品。庾肩吾所著。載漢魏以來能書者。肩吾生  
梁代。相去不遠。近者同時。宜其評論精核。如此。後  
唐張懷瓘。宋滿溪氏。皆有論著。不過稍加損益。附  
以近世者耳。夫古文窮于真草。書法盡于六朝。取  
法乎上者。斯亦可以考見矣。羅浮山樵跋

書品終



右書品一卷梁散騎常侍新野庾肩吾慎之撰玉  
海云肩吾集草隸者一百二十八人以張芝爲首  
品爲九例蓋倣班固古今人表例於三等之中又  
各區爲三等也惟以草正疏通專行於世故於諸  
體不復兼論而又以隸書爲卽今時正書玉海謂  
自唐以前皆謂楷字爲隸至歐陽集古錄始以八  
分爲隸書此論蓋自肩吾發之也此與鍾嶸詩品  
皆六朝遺書爲藝苑所不可廢而通考祇收詩品  
不收書品直齋書錄解題謂如書品書斷之類所

論書法工拙正與射御同科應削歸雜藝不以入  
經錄馬氏闢之謂以偏旁音韻入於小學真行草  
篆入於雜藝一書析爲二門於藝無當似矣而檢  
通考二門中仍不載書品書斷何哉汝上王謨識



尤射

魏 繆襲著

南昌程 椿校

口贊從王圯厥德縱射觀游罔度獲尤于上天口遂

戒旃觀游內諧擷盡也俊民于時誦太史嗣采似姓名

作尤射志悛也

粵稽觀射口氏口烈黨嘏諧悛苦濬靖言其德也都淑奕

珣允魏恂繹令順懿揚言其威儀有聞旁外三十有

一載射口乃踦艘于門爰賂于江以搜厥嫺有牟有

撫有愜有馮曰寡人爽義爽于義謂射也罔曰弗俚惟嫺容



九

人亦有言。惟天斯地。惟文斯武。諉射不可已也。口口口口。 燧罔紆。

下多 鳳凰來儀。此錯簡當在有開旁外之下。

右稽觀第一

口口口我報聘于王。亦亟曰求仇。二月口口邁射。大

圍于江麋弗逆。尤自此也。故有後戒。 有撻于厥中。廢于鏢射退。

我旋于王。惟辰心弗逞。釗抽厥畢。惟脅閱艱遘。惟曰

河濁有清。寧朕挺于倚。清哉清哉。余惟辰慎哉。關

右報聘第二

口口戊口又通射于林正。旋有非。六月口口命浹錫。



我以言格我以詠辰我惟禋曰厲哉宿哉浹再格曰  
厲我于時聿厥撫曰小子敬告惟略朕詠瘡朕敷朕  
穀庸懃恩以詹惟忱以延朕弗德罔承譬華輶

車軸

也而朽枕賊襦而敗裳奚據偶已冒子之錫敢弗薄

以副格錫畢惟對厥錫□□□□□□□□惟乃兢

兢罔化于朕躬允若時辰乃朕扈乃錫于萬億禩罔

浚□□諷逞由時罔夙夜達厥問先求得其歡心然後諫于射□□□

賦我思二章此句當在浹再格日厲下□

右遇射第三



喘有事于江麋姦芋興咎我灼裨書訓之尤曰易乎

天產吉人挺吉惟寒稟敬采事閒躬罔弗終輕采慢

躬罔獲濟古哲有言輕火略焚侵水略溺烏乎戒哉

地匪履勿履采匪迪勿迪謹于行事上下驛明也爰

易釐陰陽鐳正也爰罔僭嚴于治國戒自茲哉古容

成氏獵于江百辟弗邇中央氏還于應門百姓躊躇

獫稚豕也競食于槽靡或訾鳳鳥妄攫有師具咈自茲

聳願也勿恣厥遊妄奔傷足恣遊圯度采蹈于尤靡

笙口口躬協于義靡忤口也俾惟曰甫田弗悉去厥



秀大璧弗悉去厥瑕。辰肆于觀游。亦惟割于乃懿問。

俾惟曰吳大也。墻底壞胎杪穴。喬木底朽胎趙蠹。辰

檢于厥身。亦惟光于乃令德。奚臧否于朕觀。□□□

□□□□□警戒勗釗。朕觀惟辰迹迹。異所指者廣不必及射

而射在其中射□疾旃于時亟悛。  
可謂善諫矣

### 右尤戒第四

□□□□我贈玉藉芳報如旃。罔藉惟惟曰。侯乃已

敦芳。奚席于寡人。侯□□我贈元毛。報如旃。□□錫

寶以糊憐我。滋逞賦無衣于時辰。期于江門。奄瞿筵



罔逆辟惡也。侯□□上國之香龕。□蠡香辰易□□

□夢月墜于前興。賦詩曰。明月爛兮。何以有翰兮。疇

曰匪觀兮。迹印之館兮。□□我獻箴嘉旃。□□我有

松止之志。將會曰侯。俾俾訣。廼曰寡人弗德。幼弃于

我前社。嗣罹多艱。茲恃乃以薄苟捐。何有卽弗有。寡

人將弗有。爽匪艾疇父。厥中罔中。惟乃中。厥行罔行。

惟乃行。厥言罔言。惟乃言。若苗方萌。弗耕弗耘。弗有

旋。成熟也。若雞方卵。弗伏弗道。弗有晨。寡人侯煌。煌射姓

名。煌。煌侯艾。時依艾之松止。時斃寡人觀。觀斃善從。



艾苦哉弗苦何眷也而松止之茹腴服瓊止抑嬉愉

何弗苦也肆當之責其去國也于辰我請戾于西殿侯魏

盈焉弗格惟錫醴餽餽饔我逞弗瞑眩弗克樹侯聆

覆馮以掩錫我寶枕軫也玉席峯也命寧命寧口口命空

于期門弗遘口口口口甘露降于時辰奏樂名曰玉

華曲名也靡辰罔奏盛口口合口侯古寶古圓二辰錫

我一辰易如香口口口口乃會八乙卯甲子侯月會

丙子丙辰侯日會癸亥戊辰侯歲會侯時會二咸以

戊子尋好也口口我辰奏篴牒匪攸匿然以服辟泄



也。曰：侯。口聘我元王。

上等王口

誓也。錫書弗藉。善聿書曰。

觀恂立誓筵罔底。貳于厥中。有如大江。于厥內。

宮昭告皇天。口口口既而賦大車之本章。藏于盟府。

口口侯曰：寡人惟背。

回也。反言若治而曰亂也。

若在疚。匪藥焉有。

瘳。昔寡人將以仲秋之望。口口錫我寶環。秬鬯一鹵。

我拜錫。口口望不果背。奏書寓忱。我庸對曰：曩我逃。

罔。或布厥愬。幸乃射恣于游射。恂失德。展乃皇天置。

介。俾觀觀其乘合。我展嘉天之賜。自茲迄茲。靡有忌。

賜。胎卽命我背寧。甲子。逌侯小罔大矢厥胎。衷我展。



憾工。古有姦咎我憾。姦逝厥咎覆射于令德垂祀于  
子孫。顯問於後葉。憾乃蘊于乃躬靡獲釋茲。侯曰監  
空異辰。豈胎衷胎易我玉莫已臚。茲拒我背莫已葯  
胎戒乃射莫罔躬茲。睽曩誓莫罔人良苗恒昧于秋  
穫晴風恒昧于昏雨。首臧末否鮮末然我焉獲乃終  
以憾寧靡盟府曩誓匿申永言曰東園有木其名曰  
李招我于園曰請食爾。恒繁者華恒鮮者子命乎命  
乎吾將去此。書口口有口口責其侯諷有報監慙黜  
口口旨詩口口口  
講于時我監空。以上乃口口口口口  
口以下實口口口口



允射

右贈玉第五

侯口口產厥令幼墜千學我憫旃函純成筆也葑黝

墨也

丹牒勝書訓曰維鑛弗鑠終匪金維人弗學終

匪彥肆古聖后勤劬靡怠聞旃太庭有懿元妃名曰

無設大庭墾勅鄉厥學昇策三千有奇俾抽中宮采

采糊厥躬無設服于靡斂日昏衍輯采藏錠蠢于學

恒惇以狃鷄鳴宿桂瞻厥采旬日之夕僅一瞋基

茨然有成庸作大庭之歌白鶴悟悟朱鸞簫簫悟悟鳴聲

簫簫飛貌絡降于厥宮無設弗厲祥礪弗憇再基而後咏



明月敷厥行，爍暉罔晝貳。學若時焉，弗學而可底。時  
侯念于茲內，朕訓奏純成。葑黝暨丹牒，輿胥元以妙。  
惟乃索心以從，斯罔俾無設。專顯于大庭，朕嘉乃錫。  
惟芋維秋，九月拜丹牒于內殿。夜毆以佔，與有獲。

右學訓第六

侯冬十月，□□有東之役。我弗送□□我賦卷耳之  
首章。□歸自東，我弗克逆。皆道我□□我東厥駕。□  
賦伯兮之二章。我賦鴟鴞之三章。□□我暨繹示之  
圖而旋。闕



維三十有三載克終我訓令于辭。民歌曰。瞻彼世兮。靡有雙。義謂蛇兮。今則龍。何必佔畢盤游是從。口口

□ □ □ □ □ □ □ □ □ □ 候時 □ 內豫信信興致

我元韜一兩苴飲二

布之貴重者  
可以爲帶

寶珠二圓正石

次玉出海  
外神山

□□我報以承澤二

寶扇也出  
口口志

侯永寶



元韜履也

右腴致第八

春正月□□越□日□□我報□□之聘遂館旃屨



倅問仲秋之背厥庸則書寓我曰欽拜稽首糊言鳥  
乎浸述予觀弗克儀惟弗天屬罹凶旋汗于甲下若  
麋鹿之在厥藩若野鳥之在厥笄靡敢逸也逸乃德  
展龐濬深也侯愒愒于厥衷罔攸寧金疇弗曰厥孔  
堅恒液于厥熾淵疇弗曰厥孔深恒測于厥泳狎至  
也予觀之弗諠夫情厥惟恂堅監深哉允逾于淵金  
夫嘗察越于觀鮮違于茲厥言幼聆諸黃耆農僎  
貪耕卒有穫女侯貪績卒有織夫惟庸固越乃心後  
惟終獲遂乃願烏乎允監哉予觀靡啻若厥魚跬步



離水罔靡悔，苟離未悔，食言乃厥諱。辰也此章曰我

庸作答曰：猷祗庸乃告昭乃忱，攸隱戾弗辰矣。予璽

焉憾若侯躬隱，譬苗之式雨。厥旱罔天咎，咎侯苗譬

瞽之式相。厥賴罔相咎，咎侯瞽予攸弗辰，或咎乃允

若乃告予誕。大也禋茲藉右人，厥一人辰偕升若降

厥心弗朝，印罔益厥一人逃。越參若商，厥心辰在若

若何貪若。其靡曰寧逃乃心，允一予紆背厥罔憾，苟

設貳辰在予側，亦罔光允若。乃告予誕，禋予惠乃徽

柔獲乃徽言，服乃慰。即浸逃乃徽言，辰冀嗚呼乃射



勿中盤厥門。又戒射忠哉人胥譎張皇匪乃之皇慶尚惟

背世音。似有行文此章口會不口口口也

右糊言第九

已已召會于呂圃弗至口口庚午我申欵采越石志

遇也。欵刻也口口口口采事口夏五月口口越口口

口寅籍詩媵我志服也其一曰鷄鳴歐歐。聲也明燈

替替。音制摩彼華衾。彼疎之三載在是薄言祇之爛

矣初製。賦也三載而若初製示不寢也口口其二曰方舠伊何榜人擊

鼓其聲橦橦歷我江汭思子不見踣然獨舞。賦也口口口



九身

口 蹠也

其三曰昔我遯子。齒莒歲蕤。今我懷子。有蒲參

差。日月疾邁。永矣我思。

賦也

其四曰青青綠竹。蔭我

宮墻。馥馥幽蘭。發我堂廂。

堂之左廂

安得覲子。薦以兕

觥。賦也

其五曰曰汙印手。于彼清水。丹魚羣游。衍衍

其體。彼何修斯。天佑之祉。

賦也。羨佑祉于魚。悼已不天也。

其六曰歷

觀重門。以眺元里。楊柳方方。倉庚囀止。願乘行雲。言

覲君子。

賦也

右志服第十

六月口口我尋盟。侯錫書曰。赤帝肆毒。金石具泐。護



紂厥會商弗果。顓蒼實監侯厥攸行我臧。闕文

右赤帝第十一

□□□□錫我紫綃之幃黃金飾□秋□□寒盟我

弗豫于時曹侯斬好斬求也  
闕文

右紫幃第十二

癸酉歸我以承澤□□乙亥錫我服屬觀寶器也冬至

□□□日卜夢其繇曰有女孌娥坐彼虎子有窺厥

牖展侯吉士卜人曰有女有士陰陽協也虎子威始

也窺牖通明也陰陽既協威始而通明罔弗吉尤利



干射于時又縱射觀游我戒之。□□□丙子錫我茵  
著芻芻壁障觀造也。射視其造。□寶重也。□□□□□

右承澤第十三

十一月□□我卜會其繇曰言索其絢觀光于朝。卜  
人曰索絢合也。觀光于朝不。或載其繇曰有芳其  
香。族合合止曰已合也。而芳在其中。君罔攸疑會也。  
□□薛伯堊□族先往我族弗邁。闕文

右卜會第十四

戊寅越七日壬子書實至于呂。圖有陳族之會我西



弗邁我賚書曰屬古口口夏口口越茲疇曰厥弗邁  
卒未獲丕會矣微茲乃命厥軟匪乃忱何底時子方  
迫于費會陳矣辰維鼻孟嘏禽儀草震東風丕會匪  
茲疇攸善予何弗辰乃弗在館疇式授几筵疇式蠲  
飲食疇式羞戾疇式逆逝疇式送徒劬于乃躬罔繇  
丕會乃越上何仇予越下何戾上下天地也俾若時譬舟  
之幾覆暨孺而風憇譬大旱踰獲而降霖若弗憇弗  
降鬱陶乎厥衷子雅靡攸如乃弗格已行午格邁已  
逾辰格焉汙勝焉予中靡攸泊若子雁越海若鰈賈

之止于遐則芒芒曷獲次尚乃弗罪厥弗廷于欽辰  
辰空乃駕 闕文

右實至第十五

□□丁丑我有京師之役我賚以華虫 帶鉤也 報我趾

澤之履 趾澤在真臘西出奇錦 □□我歸自京師 闕

右華虫第十六

□□癸酉我賚以追捫 寶扇名 藉用芳報我襦褌 寶器也

莫交也 闕 □□乞膚金 即今銀也 干我

右追捫第十七



右雨會第十八 闕

四月庚戌成命史于京師發黃金廿兩

越五月

哉生明□□□□□□□□□□丁未錫我

流蘓

五色錦幃 闕 許報合

右命史第十九

□□□□□復射禮也□□□□書曰渡于鵠水金

厥禽獲越子里先得金嗣射從時昌子孫惟振振永

膺天休 闕

右復射第二十

古史補遺

歌

...

...

...

...

...

...

...

...

...



右繆襲尤射一卷按魏志劉劭傳同時東海繆襲亦有才學多所述敘官至尚書光祿勳注引文章志云襲字熙伯歷事魏四世正始中卒今考隋書經籍志載有襲撰列女傳贊一卷文集五卷又皇覽一百二十卷注繆卜等撰卜當作襲史記索隱皇覽是魏人王象繆襲等撰是也初無所謂尤射者通志藝文略藝術類射部備載唐王琚射經以下三十一家獨無尤射書目惟陶氏說郛第一百一身始以繆襲尤射列王琚射經前後始采入唐

宋叢書今考篇首言以縱射觀游罔度獲尤於上天於時誦太史朋采作尤射雖似述作書之由但其中稱寡人究不知何所指其第三篇命濇及濇再格所謂濇者何人後又有曹侯陳侯薛伯竟似春秋列國會盟事而其以三十一載三十三載紀元年號又無所繫尤可疑者襲本仕魏世家東海而於尤射乃曰爰賂於江又曰邁射大閭於江麋弗逆又曰有事於江麋又曰期於江門又曰厯我江潞一似風馬牛不相及者或云是時魏吳兵爭



襲有戒心於孟德會獵之書子桓臨江之嘆故亂  
其辭廋其旨而爲此寓言以諷諫亦未可知也書  
本殘缺又往往佶屈聱牙不可句讀然其文實古  
奧故特錄出與識者其珍賞之汝上王謨識


虞尚於殷出與諸春其德實之於土王野淵

本於外史於計無其不不位於其其安其古

其朝張其言而誠其言以清其心未可暇也


其言其言其言其言其言其言其言其言其言





























拾遺記序



拾遺記者晉隴西安陽人王嘉字子  
年所撰凡十九卷二百二十篇皆爲  
殘缺當僞秦之季王綱遷號五都淪  
覆河洛之地沒爲戎墟宮室榛蕪書  
藏堙毀荆棘霜露豈獨悲於前王鞠



爲禾黍彌深嗟於茲代故使典章散  
滅黷館焚埃皇圖帝冊殆無一存故  
此書多有亡敗文起義炎已來事訖  
西晉之末五運因循十有四代王子  
年乃搜撰異同而殊怪必舉紀事存  
朴受廣向奇憲章稽古之文綺綜編



雜之部山海經所不載夏鼎未之或  
存乃集而記矣辭趣過誕音旨迂濶  
推理陳迹恨爲繁冗多涉貞祥之書  
博採神僊之事妙萬物而爲言蓋絕  
世而宏博矣世德陵夷文頗缺略綺  
更刪其繁紊紀其實美搜刊幽祕摭



採殘落言匪浮詭事弗空誣推詳往  
迹則影徹經史考驗真怪則叶附圖  
籍若其道業遠者則辭省朴素世德  
近者則文存靡麗編言貫物使宛然  
成章數運則與世推移風政則因時  
廻收至如金繩鳥篆之文玉牒蟲章



之字末代流傳多乖襲跡雖探研鑄  
寫抑多疑悞及言乎政化訛乎貞祥  
隨代而次之土地山川之域或以名  
例相疑艸木鳥獸之類亦以聲狀相  
惑隨所載而區別各因方而釋之或  
變通而會其道寧可採於一說今搜

檢殘遺合爲一部凡一十卷序而錄

焉蕭綺撰



拾遺記總目

卷一

庖犧

神農

黃帝

少昊

高陽

高辛

唐堯

虞舜

卷二

夏

殷

周

卷三

周穆王

魯僖公

周靈王



卷四

燕昭王

秦始皇

卷五

前漢上

卷六

前漢下

後漢

卷七

魏

卷八

吳

蜀

卷九

晉時事

卷十

崑崙山

蓬萊山



方丈山

瀛洲山

員嶠山

岱輿山

昆吾山

洞庭山

目錄終

龍溪山

龍溪山

龍溪山

龍溪山

龍溪山

龍溪山



拾遺記卷一

晉隴西王嘉著 南昌胡鳳藻校

春皇庖犧

春皇者庖犧之別號所都之國有華胥之洲神母遊其上。有青虹繞神母久而方滅卽覺有娠。歷十二年而生庖犧。長頭修目。龜齒龍唇。眉有白毫。鬚垂委地。或人曰。歲星十二年一周天。今叶以天時。且聞聖人生皆有祥瑞。昔者人皇虵身九首。肇自開闢于時日月重輪。山明海靜。自爾以來。爲陵成谷。世歷推移。難



可紀筭。比于聖德。有踰前皇。禮義文物於茲始作。去  
巢穴之居。變茹腥之食。立禮教以導文。造干戈以飾  
武。絲桑爲瑟。均土爲埴。禮樂於是興矣。調和八風。以  
畫八卦。分六位以正六宗。于時未有書契。規天爲圖。  
矩地取法。視五星之文。分晷景之度。使鬼神以致羣  
祠。審地勢以定川岳。始嫁娶以修人道。庖者包也。言  
包含萬象。以犧牲登薦於百神。民服其聖。故曰庖犧。  
亦謂伏羲。變混沌之質文。宓其教。故曰宓犧。布至德  
於天下。元元之類莫不尊焉。以木德稱王。故曰春皇。



其明叡照於八區。是謂太昊。昊者明也。位居東方。以含養蠢化。叶于木德。其音附角。號曰木星。

### 炎帝神農

炎帝始教民耒耜。躬勤畎畝之事。百穀滋阜。聖德所感。無不著焉。神芝發其異色。靈苗擢其嘉穎。陸池丹蕖。駢生如蓋。香露滴瀝。下流成池。因爲參龍之圃。朱草蔓衍於街衢。卿雲蔚藹於叢薄。築圓丘以祀朝日。飾瑤堦以揖夜光。奏九天之和樂。百獸率舞。八音克諧。木石潤澤。時有流雲洒液。是謂霞漿。服之得道。後



天而老有石磷之玉號曰夜明以闇投水浮而不滅  
當斯之時漸革庖犧之朴辨文物之用時有丹雀銜  
九穗禾其墜地者帝乃拾之以植於田食者老而不  
死採峻鍤之銅以爲器峻鍤山名也下有金井白氣  
冠其上人升於其間雷霆之聲在於地下井中之金  
柔弱可以緘滕也

錄曰謹按周易云伏羲爲上古觀文於天察理於  
地俯仰二儀經綸萬象至德備於冥昧神化通於  
精粹是以圖書著其迹河洛表其文變太素之質



改淳遠之化。三才之位既立。四維之義乃張。禮樂  
文物自茲而始。降于下代。漸相移襲。八索載其遐  
軌。九邱紀其淳化。備昭籍錄。編列柱史。考驗先經。  
刊詳往誥。事列方典。取徵羣籍。博採百家。求詳可  
證。按山海經云。棠帝之山。出浮水玉。巫閭之地。其  
木多文。自非道真俗朴。理會冥旨。與四時齊其契。  
精靈協其德。貞祥之異。胡可致哉。故使迹感誠著。  
幽祇不藏其實。祇心剪害殊性之類。必馴也。以降  
露成池。蓄龍爲圖。及乎夏代。世載緜絕。時有參龍。



之官考諸遐籍由斯立矣

軒轅黃帝

軒轅出自有熊之國母曰吳樞以戊巳之日生故以  
土德稱王也時有黃星之祥考定歷紀始造書契服  
冕垂衣故有袞龍之頌變乘桴以造舟楫水物爲之  
祥踴滄海爲之恬波泛河沉璧有澤馬羣鳴山車滿  
野吹玉律正璇衡置四史以主圖籍使九行之士以  
統萬國九行者孝慈文信言忠恭勇義以觀天地以  
祠萬靈亦爲九德之臣薰風至真人集乃狀世於昆



臺之上，留其冠劍佩舄焉。昆臺者，鼎湖之極峻處也。立館於其下，帝乘雲龍而遊，殊鄉絕域，至今望而祭焉。帝以神金鑄器，皆銘題。及昇遐後，羣臣觀其銘，皆上古之字，多磨滅缺落。凡所造建，咸刊記其年時，辭跡皆質。詔使百辟羣臣受德教者，先列珪玉於蘭蒲席上，燃沉榆之香，舂雜寶爲屑，以沉榆之膠和之，爲泥以塗地，分別尊卑華戎之位也。事出封禪記帝使風后負書，常伯荷劍，旦遊洹流，夕歸陰浦，行萬里而一息，洹流如沙塵，足踐則陷，其深難測。大風吹沙如霧中。



多神龍魚鼈皆能飛翔有石藻青色堅而甚輕從風靡靡覆其波上一莖百葉千年一花其地一名沙瀾言沙湧起而成波瀾也仙人甯封食飛魚而死二百年更生故甯先生遊沙海七言頌云青藻灼爍千載舒百齡暫死餌飛魚則此花此魚也

少昊

少昊以金德王母曰皇娥處璇宮而夜織或乘桴木而晝遊經歷窮桑滄茫之浦時有神童容貌絕俗稱爲白帝之子卽太白之精降乎水際與皇娥讌戲奏



嬋娟之樂游漾忘歸窮桑者西海之濱有孤桑之樹  
直上千尋葉紅樅紫萬歲一實食之後天而老帝子  
與皇娥泛於海上以桂枝爲表結薰茅爲旌刻玉爲  
鳩置於表端言鳩知四時之候故春秋傳曰司至是  
也今之相風此之遺象也帝子與皇娥並坐撫桐峯  
梓瑟皇娥倚瑟而清歌曰天清地曠浩茫茫萬象廻  
薄化無方滄天蕩蕩望滄滄乘桴輕漾著日傍當其  
何所至窮桑心知和樂悅未央俗謂遊樂之處爲桑  
中也詩中衛風云期我乎桑中蓋類此也白帝子答



歌四維八埏眇難極。驅光逐影窮水域。璇宮夜靜當  
軒織。桐峰文梓千尋直。伐梓作器成琴瑟。清歌流暢  
樂難極。滄湄海浦來棲息。及皇娥生少昊號曰窮桑  
氏。亦曰桑土氏。至六國時。桑土子著陰陽書。卽其餘  
裔也。少昊以主西方。一號金天氏。亦曰金窮氏。時有  
五鳳隨方之色。集於帝庭。因曰鳳鳥氏。金鳴於山。銀  
湧於地。或如龜蛇之類。乍似人鬼之形。有水屈曲。亦  
如龍鳳之狀。有山盤紆。亦如屈龍之勢。故有龍山龜  
山鳳水之目也。亦因以爲姓。末代爲龍土氏。出班固



藝文志蚺正氏出西王母神異傳

顓頊

帝顓頊高陽氏黃帝孫昌意之子昌意出河濱遇黑龍負元玉圖時有一老叟謂昌意云生子必叶水德而王至十年顓頊生手有文如龍亦有玉圖之象其夜昌意仰視天北辰下化爲老叟及顓頊居位奇祥衆祉莫不總集不稟正朔者越山航海而皆至也帝乃揖四方之靈羣后執珪以禮百辟各有班序受文德者錫以鐘磬受武德者錫以干戈有浮金之鐘沉



明之磬以羽毛拂之。則聲振百里。石浮於水上如萍藻之輕。取以爲磬。不加磨琢。及朝萬國之時。乃奏含英之樂。其音清密。落雲間之羽。鯨鯢游湧。海水恬波。有曳影之劍。騰空而舒。若四方有兵。此劍則飛起。指其方則尅伐。未用之時。常於匣裏如龍虎之吟。

溟海之北有勃鞞之國人。皆衣羽毛。無翼而飛。日中無影。壽千歲。食以黑河水。薤飲以陰山桂脂。憑風而翔。乘波而至。中國氣暄。羽毛之衣稍稍自落。帝乃更以文豹爲飾。獻黑玉之環。色如淳漆。貢元駒千疋。帝



以駕鐵輪、騁勞殊鄉絕域、其人依風泛黑河、以旋其國也。

閼河之北有紫桂成林、其實如棗、羣仙餌焉、韓終採藥、四言詩曰、閼河之桂、實大如棗、得而食之、後天不老。

高辛

帝嚳之妃、鄒屠氏之女也、軒轅去蚩尤之凶、遷其民善者於鄒屠之地、遷惡者於有北之鄉、其先以地命族、後分爲鄒氏屠氏、女行不踐地、常履風雲、游於伊



洛帝乃期焉。納以爲妃。妃常夢吞日。則生一子。凡經  
八夢。則生八子。世謂爲八神。亦謂八翌。翌明也。亦謂  
八英。亦謂八力。言其神力英明。翌成萬象。億兆流其  
神睿焉。

有丹正之國。獻碼碯。以盛甘露。帝德所洽。被於殊  
方。以露充於厨也。碼碯。石類也。南方者爲之勝。今善  
別馬者。死則破其腦視之。其色如血者。則日行萬里。  
能騰空飛。腦色黃。日行千里。腦色青者。嘶聞數百里。  
腦色黑者。入水毛鬣不濡。日行五百里。腦色白者。多



力而怒。今爲器多用赤色。若是人工所制者。多不成器。亦殊朴拙。其國人聽馬鳴。則別其腦色。丹正之地。有夜叉駒跋之鬼。能以赤馬腦爲甌盃及樂器。皆精妙輕麗。中國人有用者。則魑魅不能逢之。一說云。馬腦者。言是惡鬼之血。凝成此物。昔皇帝除蚩尤。及四方羣凶。并諸妖魅。填川滿谷。積血成淵。聚骨如岳。數年中。血凝如石。骨白如灰。膏流成泉。故南方有肥泉之水。有白堊之山。望之峩峩如霜雪矣。又有丹正千年一燒。黃河千年一清。至聖之君。以爲大瑞。丹正之



野多鬼血、化爲丹石、則礪礪也、不可析削雕琢、乃可鑄以爲器也、當皇帝時、礪礪甕、至堯時猶存、甘露在其中、盈而不竭、謂之寶露、以班賜羣臣、至舜時露已漸減、隨帝世之污隆、時淳則露滿、時澆則露竭、及乎三代、減於陶唐之庭、舜遷寶甕於衡山之上、故衡山之岳有寶露壇、舜於壇下起月館、以望夕月、舜南巡至衡山、百辟羣后皆得露泉之賜、時有雲氣生於露壇、又遷寶甕於零陵之上、舜崩甕淪于地下、至秦始皇通汨羅之流爲小溪、逕從長沙至零陵、掘地得赤



玉堯可容八斗以應八方之數。在舜廟之堂前後人得之不知年月。至後漢東方朔識之。朔乃作寶堯銘曰。寶雲生於露壇。祥風起於月館。望三壺如盈尺。視八鴻如縈帶。三壺則海中三山也。一曰方壺則方丈也。二曰蓬壺則蓬萊也。三曰瀛壺則瀛洲也。形如壺器。此三山上廣中狹下方。皆如工制。猶華山之似削。成八鴻者。八方之名。鴻大也。登月館以望四海三山。皆如聚米縈帶者矣。

唐堯



帝堯在位，聖德光洽，河洛之濱，得玉版方尺，圖天地之形，又獲金璽之瑞，文字炳列，記天地造化之始，四凶既除，善人來服，分職設官，舜倫攸叙，乃命大禹疏川瀦澤，有吳之鄉，有北之地，無有妖災，沉翺之類，自相馴擾，幽州之墟，羽山之北，有善鳴之禽，人面鳥喙，八翼一足，毛色如雉，行不踐地，名曰青鸛，其聲似鐘磬，笙竽也。世語曰：青鸛鳴，時太平。故盛明之世，翺鳴藪澤，音中律呂，飛而不行，至禹平水土，棲於川岳，所集之地，必有聖人出焉。自上古鑄諸鼎器，皆圖像其



形銘贊至今不絕，堯登位三十年有巨查浮於西海，查上有光，夜明晝滅，海人望其光，乍大乍小，若星月之出入矣。查常浮繞四海，十二年一周天，周而復始，名曰貫月查，亦謂挂星查。羽人棲息其上，羣仙含露以漱，日月之光則如暝矣。虞夏之季，不復記其出沒，遊海之人猶傳其神仙也。西海之西有浮玉山，山下有巨穴，穴中有水，其色若火，晝則通曜，不明，夜則照耀穴外，雖波濤灌蕩，其光不滅，是謂陰火。當堯世，其光爛起，化爲赤雲，丹輝炳映，百川恬澈。游海者銘曰：



沉然以應火德之運也。堯在位七十年，有鸞雛歲歲來集麒麟遊於藪澤，梟鴟逃於絕漠，有祗支之國獻重明之鳥。一名雙睛，言雙睛在目，狀如雞，鳴似鳳。時解落毛羽，肉翮而飛，能搏逐猛獸虎狼，使妖災羣惡不能爲害，飴以瓊膏。或一歲數來，或數歲不至，國人莫不掃灑門戶，以望重明之集。其未至之時，國人或刻木或鑄金爲此鳥之狀，置於門戶之間，則魍魎醜類自然退伏。今人每歲元日或刻木鑄金，或圖畫爲雞於牖上，此其遺像也。



# 虞舜

虞舜在位十年有五老遊於國都舜以師道尊之言  
則及造化之始舜禪於禹五老去不知所從舜乃置  
五星之祠以祭之其夜有五長星出薰風四起連珠  
合璧祥應備焉萬國重譯而至有大頻之國其民來  
朝乃問其災祥之數對曰昔北極之外有涇海之水  
渤澥高隱於日中有巨魚大蛟莫測其形也吐氣則  
八極皆闇振鬣則五岳波盪當唐堯時懷山爲害大  
蛟縈天縈天則三河俱溢海濱同流三河者天河地



河中河是也。此三水有時通壅，至聖之治水色俱溢，無有流沫及帝之商均，暴亂天下，則巨魚吸日，蛟繞於天，故誣妄也。此言吸日而星雨皆墜，抑亦似是而非也。故使後來爲之迴惑，託以無稽之言，特取其愛博多奇之間，錄其廣異宏麗之靡矣。舜葬蒼梧之野，有鳥如雀，丹州而來，吐五色之氣，氤氲如雲，名曰憑。霄雀能羣飛，銜土成邱墳，此鳥能反形變色，集於峻林之上，在木則爲禽，行地則爲獸，變化無常，常遊丹海之際，時來蒼梧之野，銜青砂珠，積成壘阜，名曰珠。



正其珠輕細。風吹如塵起。名曰珠塵。今蒼梧之外山。人採藥時有得青石圓潔如珠。服之不死。帶者身輕。故仙人方迴遊南岳七言讚曰。珠塵圓潔輕且明。有道服者得長生。

冀州之西二萬里有孝養之國。其俗人年三百歲而織茅爲衣。卽尚書鳥夷卉服之類也。死葬之中野。百鳥銜土爲墳。羣獸爲之掘穴。不封不樹。有親死者。尅木爲影。事之如生。其俗驍勇。能嚙金石。其舌杪方而本小。手搏千鈞。以爪畫地。則洪泉涌流。善養禽獸。入



海取虬龍育於園室以充祭祀昔皇帝伐蚩尤除諸  
凶害獨表此處爲孝養之鄉萬國莫不欽仰故舜封  
爲孝讓之國舜受堯禪其國執玉帛來朝特加賓禮  
異於餘戎狄也爰及鳥獸昆蟲以應陰陽至億萬之  
年山一輪海一竭魚蛟陸居有赤鳥如鵬以翼覆蛟  
魚之上蛟以尾叩天求雨魚吸日之光冥然則暗如  
薄蝕矣衆星與雨偕墜舜乃禱海岳之靈萬國稱聖  
德之所洽羣祥咸至矣

南潯之國有洞穴陰源其下通地脉中有毛龍時蛻



骨於曠澤之中魚龍同穴而處其國獻毛龍一雌一雄放置參龍之宮至夏代養龍不絕因以命族至禹導川乘此龍及四海攸同反放河汭

錄曰按春秋傳云星隕如雨而夜猶明淮南子曰麒麟鬪而日月蝕鯨魚死而彗星見夫盈虛薄蝕未詳變於聖典字彗妖沴著災異於圖冊麒麟鬪鯨魚死靡聞於前經求諸正誥殆將昧焉

錄曰自稽考羣籍伏羲至于軒轅少昊高辛唐虞之君禪業相襲符表名類未若堯之盛也按易緯



云、堯爲陽精、叶德乾道、粵若稽古、是謂上聖、惟天  
惟大、惟堯則之、禪業有虞、所謂契叶符同、明象日  
月、蓋其載歷遐曠、筭紀綿遠、德業異紀、神迹各殊、  
考傳聞於前古、求僉言於中世、而道教參差、祥德  
遞起、指明羣說、能無髣髴、精靈冥昧、至聖之所不  
語、安以淺末、貶其有無者哉、劉子政曰、凡傳聞不  
如親聞、親聞不如親見、何則、神化歟、忽出隱難常、  
非膚受之所考、筭恒情之所思、測至如龍火鳥水  
之異、雲鳳麟蟲之屬、魍魎百怪之形、歟、忽之像、憑



風雲而自生，因金玉而相化，未詳備於夏鼎，信其  
記於山經，貫月查之誕，重明桂實之說，陽燎出於  
氷木，陰蟲生於炎山，易腸倒舌之民，蜺骨龍肉之  
景，憑風雲而託生，含雨露而蠶育，已表怪於衆圖，  
方見偉於羣記，茫茫遐邇，眇眇流文，百家迂濶，各  
尚斯異，吁，守文於一說者矣。

拾遺記卷一終

自漢魏以來中外無一斷洋矣

史記云匈奴時時有使來漢世祖以所之

匈奴使臣上命命州郡各遣使往來通國

漢武帝時匈奴使臣上命命州郡各遣使往來通國

匈奴使臣上命命州郡各遣使往來通國

匈奴使臣上命命州郡各遣使往來通國



右王嘉拾遺記梁蕭綺錄共十卷隋唐志並作拾  
遺記二卷蕭綺錄拾遺記十卷文獻通考又以拾  
遺記第十卷別爲名山記一卷實祇一書卷數分  
合不同爾嘉字子年隴西人後秦姚萇方士有傳  
列晉書藝術亦言其拾遺記記事多詭怪昔太史  
公嘗病百家言黃帝文不雅馴而嘉乃鑿空著書  
專說伏羲以來異事其甚者至以衛風桑中託始  
皇娥爲有淫佚之行誣罔不道如此其見殺于萇  
非不幸也二志厠之雜史謬矣通考以入小說家

尚爲近之汝上王謨識



拾遺記卷二

夏禹

堯命夏鯀治水，九載無績。鯀自沉於羽淵，化爲𩺰魚。時揚鬚振鱗，橫修波之上。見者謂爲河精。羽淵與河海通源也。海民於羽山之中，修立鯀廟，四時以致祭祀。常見𩺰魚與蛟龍跳躍而出，觀者驚而畏矣。至舜命禹疏川，奠岳，濟巨海，則鼃鼃而爲梁，踰翠岑則神龍而爲馭。行遍日月之墟，惟不踐羽山之地，皆聖德感鯀之靈化，其事互說，神變猶一，而色狀不同。𩺰魚



黃熊四音相亂，傳寫流文，鯨字或魚邊乎也。羣疑衆說，並略記焉。

錄曰：書契之作，肇迹軒轅，道朴風淳，文用尚質。降及唐虞，爰迄三代，世祀遐絕，載歷綿遠，列聖通儒，憂乎道缺，故使玉牒金繩之書，蟲章鳥篆之記，或祕諸巖藪，藏於屋壁，或逢喪亂，經籍事寢，前史舊章，或流散異域，故字體與俗訛移，其音旨隨方，牙改歷商周之世，又經嬴漢，簡帛焚裂，遺文殘泯，詳其朽蠹之餘，採摭傳聞之說，是以已亥正於前疑。



三豕析於後謬。子年所述，涉乎萬古，與聖叶同。攬  
文求理，斯言如或可據。尚書云：堯殛鯀于羽山。春  
秋傳曰：其神化爲黃熊，以入羽淵。是在山變爲熊，  
入水化爲魚也。獸之依山，魚之附水，各因其性而  
變化焉。詳之正典，爰訪雜說，若真若似，並略錄焉。  
禹鑄九鼎五者，以應陽法；四者，以象陰數。使工師以  
雌金爲陰鼎，以雄金爲陽鼎。鼎中常滿，以占氣象之  
休否。當夏桀之世，鼎水忽沸。及周將末，九鼎咸震，皆  
應滅亡之兆。後世聖人，因禹之迹，代代鑄鼎焉。禹盡



力溝洫，導川夷岳，黃龍曳尾於前，𧈧龜負青泥於後，  
𧈧龜河精之使者也。龜領下有印文，皆古篆字，作九  
州山川之字。禹所穿鑿之處，皆以青泥封記其所，使  
𧈧龜印其上。今人聚土爲界，此其遺象也。

禹鑿龍關之山，亦謂之龍門。至一空巖，深數十里，幽  
暗不可復行。禹乃負火而進，有獸狀如豕，銜夜明之  
珠，其光如燭。又有青犬行吠於前，禹計可十里，迷於  
晝夜。旣覺漸明，見向來豕犬變爲人形，皆着𧈧衣。又  
見一神，蛇身人面。禹因與語，神卽示禹八卦之圖，列



於金鼓之上。又有八神侍。禹曰：華胥之童子是汝。  
即名曰華胥，是九河神女，以生余也。乃探玉簡授禹，  
長一尺二寸，以合十二時之數，使量度天地。禹即執  
持此簡，以平定水土。蛇身之神，即羲皇也。

錄曰：夫神迹難求。幽暗罔辨，希夷髣髴之間，聞見  
以之衍惑。若測諸冥理，先墳有所指明，是以彭生  
假見於貝丘，趙王示形於蒼犬，皆文備魯冊，驗表  
齊漢，遠古曠代，事異神同。銜珠吐燭之怪，精靈一  
其均矣。若夫茫茫禹跡，杳漠神源，非末俗所能推。



辨矣、觀伏羲至于夏禹、歲歷悠曠、載祀綿邈、故能  
與日月共輝、陰陽齊契、萬代百王、情異迹至、參機  
會道、視萬齡如旦暮、促累劫於寸陰、何嗟鬼神之  
可已、而疑羲禹之相遇乎、

殷湯

商之始也、有神女簡狄、遊于桑野、見黑鳥遺卵於地、  
有五色文、作八百字、簡狄拾之、貯以玉筐、覆以朱紱、  
至夢神母謂之曰、爾懷此卵、卽生聖子、以繼金德、  
乃懷胎一年而有娠、經十四月而生、契、祚以天下、



卯之文也。雖遭旱厄，後嗣興焉。

傳說實爲赭衣者，春於深巖以自給，夢乘雲，繞日而行。筮得利建侯之卦，歲餘，湯以玉帛聘爲阿衡也。紂之昏亂，欲討諸侯，使飛廉惡來誅戮賢良，取其寶器埋於瓊臺之下，使飛廉等惑所近之國，侯服之內，使烽燧相續，紂登臺以望火之所在，乃興師往伐其國，殺其君，囚其民，收其女樂，肆其淫虐，神人憤怒，時有朱鳥銜火如星之照耀，亂以烽燧之光，紂乃回惑，使諸國滅其烽燧，於是億兆夷民乃歡，萬國已靜，及



武王伐紂、樵夫牧豎探高鳥之巢、得玉璽、文曰、水德將滅、木祚方盛、文皆大篆、紀殷之世、歷已盡、而姬聖之德方隆、是以三分天下、而其二歸周、故蚩蚩之類、嗟殷亡之晚、望周來之遲矣、

師延者、殷之樂人也、設樂以來、世遵此職、至師延精述陰陽、曉明象緯、莫測其爲人、世載遼絕、而或出或隱、在軒轅之世、爲司樂之官、及殷時、總修三皇五帝之樂、拊一絃琴、則地祇皆升、吹玉律、則天神俱降、當軒轅之時、年已數百歲、聽衆國樂聲、以審興亡之兆、



至夏末抱樂器以奔殷而紂淫於聲色乃拘師延於  
陰宮欲極刑戮師延旣被囚繫奏清商流徵滌角之  
音司獄者以聞於紂紂猶嫌曰此乃淳古遠樂非余  
可聽說也猶不釋師延乃更奏迷魂淫魄之曲以歡  
修夜之娛乃得免炮烙之害周武王興師乃越濮流  
而逝或云死於水府故晉衛之人鐫石鑄金以像其  
形立祀不絕矣

錄曰三墳五典及諸緯候雜說皆言簡狄吞鸞卵  
而生契詩云天命乎鳥降而生商斯文正矣此說



懷感而生，衆言各異。故記其殊別也。傳說去其春  
築，釋彼傭賃，應翹旌而來相，可謂知幾其神矣。同  
礪溪之歸周，異殷相之負鼎，龍蛇遇命，道會則通。  
斯則往賢之明教，通人之至規。樂天知命，信之經  
言也。死且不朽，是謂名也。烏無聲譽於後裔，揚風  
烈於萬祀，譬諸金玉，煙埃不能埋其堅貞。比之涇  
濮，滔渭不能混其澄澈。師延當紂之虐，矯步求存，  
因權取濟，觀時殉主，全身獲免，所謂困而能通，卒  
以智免。故影被丹青，形刊金石，愛其和樂之功，貴



其神迹之遠矣。至如越思計然之利，鑄金以旌其德，方斯蔑矣。

周

周武王東伐紂，夜濟河，時雲明如晝，八百之族皆齊而歌，有大蜂，狀如丹鳥，飛集王舟，因以鳥畫其旗，翌日而梟紂，名其船曰蜂舟。魯哀公二年，鄭人擊趙簡子，得其蜂旗，則其類也。事出太公六韜武王使畫其像於幡旗，以爲吉兆。今人幡信皆爲鳥畫，則遺象也。

成王卽政三年，有泥離之國來朝，其人稱自發其國。

當從雲裏而行，聞雷霆之聲在下，或入潛穴，又聞波  
瀾之聲在上，視日月以知方國所向，計寒暑以知年  
月，考國之正朔，則序歷與中國相符，王接以外賓禮  
也。

四年，旃塗國獻鳳鵠，載以瑤華之車，飾以五色之玉，  
駕以赤象。至于京師，育於靈禽之苑，飲以瓊漿，飴以  
雲實，二物皆出上元仙方。鳳初至之時，毛色文彩彪  
發，及成王封泰山禪社首之後，文彩炳燿，中國飛走  
之類，不復一鳴，咸服神禽之遠至也。及成王崩，冲飛



而去。孔子相魯之時，有神鳳遊集至哀公之末，不復來翔，故云鳳鳥不至，可爲悲矣。

五年，有因祗之國，去王都九萬里，獻女工一人，體貌輕潔，被織羅雜繡之衣，長袖修裾，風至則結其衿帶，恐飄飄不能自止也。其人善織，以五色絲內於口中，手引而結之，則成文錦。其國人來獻，有雲崑錦，文似雲從山岳中出；有列堞錦，文似雲霞覆城雉樓堞；雜珠錦，文似貫珠珮也；有篆文錦，文似大篆之文也；有列明錦，文似列燈燭也。幅皆廣三尺，其國丈夫勤於



耕稼一日鋤十頃之地。又貢嘉禾一莖盈車。故時俗四言詩曰。力勤十頃。能致嘉穎。

六年。燃邱之國。獻比翼鳥。鷓鴣各一。以玉爲樊。其國使。者皆拳頭尖鼻。衣雲霞之布。如今朝霞也。經歷百有餘國。方至京師。其中路山川不可記。越鐵峴。泛沸海。虵洲。蜂岑。鐵峴峭礪。車輪剛金爲輞。比至京師。輪皆銚銳。幾盡。又沸海洶湧如煎魚鼈皮骨。堅強如石。可以爲鎧。泛沸海之時。以銅薄舟底。蛟龍不能近也。又經虵洲。則以豹皮爲屋。於屋內推車。又經蜂岑。燃



胡蘇之木。此木煙能殺百虫。經途十五餘年。乃至洛邑。成王封泰山。禪社首。使發其國之時。並童稚。至京師。鬚皆白。及還至燃邱。容貌還復少壯。比翼鳥多力。狀如鵲。銜南海之丹泥。巢崑岑之平木。遇聖則來集。以表周公輔聖之祥異也。

七年南陲之南。有扶婁之國。其人善能機巧變化。異形改服。大則興雲起霧。小則入於纖毫之中。綴金玉毛羽爲衣裳。吐雲噴火。鼓腹則如雷霆之聲。或化爲羣犀象。師子龍蛇。火鳥之狀。或變爲虎兕。口中生人。



備百戲之樂，宛轉屈曲於指掌間，人形或長數分，或復數寸，神怪欻忽，銜麗於時，樂府皆傳此伎。至末代，猶學焉，得龐子精，代代不絕。故俗謂之婆猴伎，則扶婁之音訛替至今。

昭王卽位二十年，王坐祇明之室，晝而假寐，忽夢白雲蔚蔚而起，有人衣服並皆毛羽，因名羽人。夢中與語，問以上仙之術，羽人曰：「大王精智未開，欲求長生，久世不可得也。」王跪而請受絕慾之教，羽人乃以指畫王心，應手卽裂，王乃驚寤，而血濕衿席。因患心疾。



卽卻膳撤樂移於旬日忽見者復來語王曰先  
欲易王之心乃出方寸綠囊中有續脉明丸補血精  
散以手摩王之臆俄而卽愈王卽請此藥貯以玉缶  
緘以金繩王以塗足則飛天地萬里之外如遊咫尺  
之內有得服之後天而死

二十四年塗修國獻青鳳丹鵲各一雌一雄孟夏之  
時鳳鵲皆脫易毛羽聚鵲翅以爲扇緝鳳羽以飾車  
蓋也扇一名遊飄二名條翮三名虧光四名仄影時  
東甌獻二女一名延娟二名延娛使二人更搖此扇



倚於王側，輕風四散，冷然自涼。此二人辯口麗辭，巧  
善歌笑，步塵上無跡，行日中無影。及昭王淪於漢水，  
二女與王乘舟，夾擁王身，同溺於水。故江漢之人，到  
今思之，立祀於江湄。數十年間，人於江漢之上，猶見  
王與二女乘舟，戲於水際。至暮春上巳之日，禊集祠  
間，或以時鮮甘味，採蘭杜，包裹以沉水中，或結五色  
紗囊盛食，或用金鐵之器，並沉水中，以驚蛟龍水虫，  
使畏之不侵此食也。其水傍號曰招祇之祠，綴青鳳  
之毛爲二裘，一名煩質。二名暄肌服之，可以卻寒，至



厲王流於彘，彘人得而奇之，分裂此裘遍於彘土，罪  
入大辟者，抽裘一毫以贖其死，則價直萬金。

錄曰：武王資聖智而尅伐，觀天命以行誅，不驅熊  
羆之師，不勞三戰之旅，一戎衣而定王業，憑神力  
而協符瑞。至于成王，制禮崇樂，姬德方盛，營洛邑  
而居九鼎，寢刑廟而萬國來賓。雖大禹之隆，夏績  
帝乙之興，殷道未足方焉。故能繼后稷之先基，紹  
公劉之聖德，文武之跡不墜。故大雅稱爲令德，播  
聲教於八荒之外，流仁惠於九圍之表。神智之所



綏化遐邇之所來服。靡不越岳航海。交費於遼險之路。瑰寶殊怪之物。充於王庭。靈禽神獸之類。遊集林藪。詭麗殊用之物。鑄斲異於人功。方冊未之或載。篆素或所不絕。及乎王人風舉之。使直指踰於日月之陲。窮昏明之際。況風星以望路。憑雲波而遠逝。所謂道通幽微。德被冥昧者也。成康以降。世禩陵衰。昭王不能宏遠。垂聲教南遊荆楚。義乖巡狩。溺精靈於江漢。且極於幸田水濱。所以招問春秋。以爲深貶。嗟二姬殉死。三良之貞節。精



誠一至視殞若生格之正道不如強諫楚人愾之  
失其死矣

拾遺記

卷一

七



拾遺記卷三

周穆王

穆王卽位三十二年，巡行天下，馭黃金碧玉之車，傍氣乘風，起朝陽之岳，自明及晦，窮寓縣之表，有書史十人，記其所行之地，又副以瑤華之輪十乘，隨王之後，以載其書也。王馭八龍之駿，一名絕地，足不踐土，二名翻羽，行越飛禽，三名奔霄，夜行萬里，四名超影，逐日而行，五名踰輝，毛色炳耀，六名超光，一形十影，七名騰霧，乘雲而奔，八名挾翼，身有肉翅，遞而駕焉。



按轡徐行以匝天地之域。王神智遠謀。使迹轂遍於四海。故絕異之物。不期而自服焉。

錄曰。夫因氣含生。罕不以形相別。至於比德方事。龍馬則同類焉。是以蔡曇觀其智。忌衛相其才。抑亦昭發於圖緯。而刊載於寶牒。章皇王之符瑞。叶河洛之貞祥。故以丹青列其形。銅玉傳其象。至如騄耳驊騮。赤驥白驎之絕。黃渠山子。踰輪之異。不可得而比也。故能遙碣石而轆倒晷。排閭闔而軼姑徐。非夫歸風彌塵之迹。超虛送日之步。安能若



是哉望絳宮而驤首指瓊臺而一息繫可得而亦  
影矣。至於詩書所記名色寔多。騁駘麗乎埊野。鱗  
質耀乎空谷。或表形駟紫被乎青元。難可盡言矣。  
一其有龍文騶裊之倫。取其電逝而飈逸。麟駟馱馱  
之儔。亦騰驤以稱駿。莫不待盛明而皆出。歷代之  
神寶矣。次有蒲梢。嚙膝魚文。驪駒之類。或擅名於  
漢右。或珍生於冀北。備飾於涓正。填列於帝皐。進  
則充服於上襄。而驂驪於瑤輅。退則羈棄於下圉。  
思馭於帝閑。俟吳班秦公之見識。仰天門而彌遠。



窺雲路而可即難哉。使乎韓哀孫陽之復執靶。豈傷吻敝策伏匿而不進焉。自非神徹幽遐。體照冥遠。驅罵羣龍。窮觀天域。詳搜迥古。靡得儔焉。

三十六年。王東巡大騎之谷。指春宵宮。集諸方士仙術之要。而螭鵠龍蛇之類。奇種憑空而出。時已將夜。王設常生之燈以自照。一名恒輝。又列璫膏之燭。遍於宮內。又有鳳腦之燈。又有冰荷者。出冰壑之中。取此花以覆燈七八尺。不欲使光明遠也。西王母乘翠鳳之輦而來前。導以文虎玄豹。後列雕麟。紫磨曳丹。



王之履敷碧蒲之蓆。黃莞之薦。共玉帳高會。薦清澄  
琬琰之膏以爲酒。又進洞淵紅藕。嶸州甜雪。峴流素  
蓮。陰岐黑棗。萬歲冰桃。千常碧藕。青花白橘。素蓮者  
一房百子。凌冬而茂。黑棗者其樹百尋。實長二尺。核  
細而柔。百年一熟。

扶桑東五萬里。有磅礴山。上有桃樹百圍。其花青黑。  
萬歲一實。鬱水在磅礴山東。其水小流在大陂之下。  
所謂沉流亦名重泉。生碧藕。長千常。七尺爲常也。條  
陽山出神蓬。如蒿。長十丈。周初國人獻之。周以爲宮



柱、所謂蒿宮也、中有白橘花、色翠而實白、大如爪、香聞數里、奏環天之和樂、列以重霄之寶器、器則有岑華、鏤管、睇澤、雕鐘、員山、靜瑟、浮瀛、羽磬、撫節、按歌、萬靈皆聚、環天者、鈞天也、和廣也、出穆天子傳、岑華、山名也、在西海上、有象竹、截爲管、吹之爲羣鳳之鳴、睇澤、出精銅、可爲鐘鐸、員山、其形員也、有大林、雖疾風震地、而林木不動、以其水爲琴瑟、故曰靜瑟、浮瀛、卽瀛洲也、上有青石、可爲磬、磬者長一丈、輕若鴻毛、因輕而鳴、西王母與穆王歡歌、旣畢、乃命駕昇雲而去、



魯僖公

僖公十四年、晉文公焚林以求介之推、有白鷗遶煙而噪、或集之推之側、火不能焚、晉人嘉之、起一高臺、名曰思煙臺、種仁壽木、木似栢而枝長柔軟、其花堪食、故呂氏春秋云木之美者、有仁壽之華焉、卽此是也、或云戒所焚之山、數百里居人、不得設網羅、呼曰仁鳥、俗亦謂鳥白臆者爲慈鳥、則其類也、

錄曰、楚令尹子華有言曰、昔穆王欲肆心周行、使天下皆有車轍馬跡、考以竹書蠹簡、求諸石室、不



絕金繩山經爾雅及乎大傳雖世歷悠遠而記說  
叶同。名山大川肆登躋之極殊鄉異俗莫不臆拜  
稽顙。東升巨人之臺。西宴王母之堂。南渡黿鼉之  
梁。北經積羽之地。觴瑤池而賦詩。期并泊而遊博。  
勒石軒轅之邱。絕跡元圃之上。自開闢以來載籍  
所記未有若斯神異者也。

周靈王

周靈王立二十一年孔子生於魯襄公之世。夜有二  
蒼龍自天而下來附徵在之房。因夢而生夫子。有二



神女擎香露於空中而來以沐浴徵在天帝下奏鈞天之樂列於顏氏之房空中有聲言天感生聖子故降以和樂笙鏞之音異於俗世也又有五老列於徵在之庭則五星之精也夫子未生時有麟吐玉書於闕里人家文云水精之子繼衰周而素王故二龍繞室五星降庭徵在賢明知爲神異乃以繡紱繫麟角信宿而麟去相者云夫子係殷湯水德而素王至敬王之末魯定公二十四年魯人鋤商田於大澤得麟以示夫子繫角之紱尚猶在焉夫子知命之將終乃



抱麟解紱，涕泗滂沱，且麟出之時，及解紱之歲，垂百年矣。

錄曰：詳觀前史，歷覽先誥，援神鉤命之說，六經緯候之志，研其大較，與今所記相符，語乎幽祕，彌深影響，故述作書者，莫不憲章古策，斟酌舊文，蓋以至聖之德，列廣也，是以尊德崇道，必欲盡其真極，崑華不足以匹其高，滄溟未得以方其廣，含生有識，仰之如日月焉。夫子生鍾周季，王政寢缺，愍大道之將崩，惜文雅之垂墜，乃搜舊章而定五禮，采



遺音而正六樂，故以棟宇生民，舟航萬代者也。所謂崇德廣業，其謂是乎？孟子云：千年一聖，謂之連步。自絕筆以來，載歷年祀，難可稱筭，故通人之言，有聖將及，後來諸疑，更發明其章也。

二十三年，起昆昭之臺，亦名宜昭，聚天下異木神工，得崿谷陰生之樹，其樹千尋，文理盤錯，以此一樹而臺用足焉。大幹爲桁，棟小枝爲桷，其木有龍蛇百獸之形，又篩水精以爲泥，臺高百丈，昇之以望雲色。時有萇宏能招致神異，王乃登臺望雲氣，蓊鬱忽見。



二人乘雲而至，鬚髮皆黃，非世俗之類也。乘遊龍，飛鳳之輦，駕以青螭。其衣皆縫緝毛羽也。王卽迎之上席。時天下大旱，地裂木燃。一人先唱，能爲雪霜，引氣一噴，則雲起雪飛。坐者皆凜然。宮中池井，堅冰可琢。又設狐腋素裘，紫羅文褥。熊褥是西域所獻也。施於臺上，坐者皆溫。又有一人唱，能使卽席爲炎，乃以指彈席上，而暄風入室。裘褥皆棄於臺下。時有容成子諫曰：「大王以天下爲家，而染異術，使變夏改寒，以誣百姓。文武周公之所不取也。」王乃疎萇宏而求正諫。



之士時異方貢玉人石鏡此石色白如月照面如雪  
謂之月鏡有玉人機戾自能轉動萇宏言於王曰聖  
德所招也故周人以萇宏幸媚而殺之流血成石或  
言成碧不見其尸矣

有韓房者自渠胥國來獻玉駝高五丈虎魄鳳凰高  
六尺火齊鏡廣三尺闇中視物如晝向鏡語則鏡中  
影應聲而答韓房身長一丈垂髮至膝以丹砂畫左  
右手如日月盈缺之勢可照百餘步周人見之如神  
明矣靈王末年亦不知所在



錄曰夫誘於可欲而正德虧矣惑於聞見志用遷矣周靈之謂乎余乃受制於奢玩神於亂波蕩正教爲之媮薄淫湎因斯而滋焉何則溺此仙道棄彼儒教觀乎異俗萬代之神絕者也及其化流遐俗風被邊隅非正朔之所被服四氣之所含養而使鬼物隨方而競至奇精自遠而來臻窮天區而盡地域反五常而移四序惚恍形象之間希夷明昧之際難可言也窮幽極智偉哉偉哉凡事君盡禮忠爲令德有違則規諫以竭言弗從則奉身以



求退甚能剖身碎首莫顧其生。排戶觸輪知死不  
去。如手足衛頭目。舟楫濟巨川。君臣之義斯爲至  
矣。而宏違有犯無隱之誠。行求媚以取容。身卒見  
於夷戮。可爲哀也。容成萇宏不並語矣。

師曠者。或出於晉靈之世。以主樂官。妙辨音律。撰兵  
書萬篇。時人莫知其原。裔出沒難詳也。晉平公之時。  
以陰陽之學顯於當世。燠目爲瞽人。以絕塞衆慮。專  
心於星筭音律之中。考鍾呂以定四時。無毫釐之異。  
春秋不記師曠。出何帝之時。曠知命欲終。乃述寶符。



百卷。晉戰國時，其書滅絕矣。

老聃在周之末，居反景日室之山，與世人絕跡。惟有黃髮老叟五人，或乘鴻鶴，或衣羽毛，耳出於頂，瞳子皆方，面色玉潔，手握青筠之杖，與聃共談天地之數。及聃退跡爲柱下史，求天下服道之術，四海名士莫不爭至。五老卽五方之精也。

浮提之國，獻神通善書二人。乍老乍少，隱形則出影，聞聲則藏形。出肘間金壺四寸，上有五龍之檢，封以青泥。壺中有黑汁如淳漆，灑地及石，皆成篆隸科斗。



之字記造化人倫之始。佐老子撰道德經垂十萬言，  
寫以玉牒，編以金繩，貯以玉函，晝夜精勤，形勞神倦，  
及金壺汁盡，二人剗心瀝血以代墨焉。遞鑽腦骨，取  
髓代爲膏燭，及髓血皆竭，探懷中玉管，中有丹藥之  
屑，以塗其身，骨乃如故。老子曰：「更除其繁紊，存五千  
言，及至經成工畢，二人亦不知所往。」

錄曰：莊周云：「德配天地，猶假至言，觀乎老氏崇謙  
柔以爲要，挹虛寂以歸真，知太朴之旣漓，發元文  
以示世，孰能辨其虛無，究斯深寂，是以仲尼責其



德叶以神靈、極譬其人、以爲龍矣。師曠設數千間、  
卒具春秋之末、抱朴子謂爲知音之聖也。雖容成  
之妙、大撓之推歷、夔襄之理樂、延州之聽故、未之  
能過也。

師涓出於衛靈公之世、寫列代之樂、造新曲以代古  
樂。故有四時之樂、春有離鴻去鴈應蘋之歌、夏有明  
晨焦泉泛華流金之調、秋有商風白雲落葉吹蓬之  
曲、冬有凝河流陰沉雲之操。以此四時之聲、奏於靈  
公、靈公情涵心惑、忘於政事。蘧伯玉趨階而諫曰、此



雖以發揚氣律終爲沉酒淫漫之音無合於風雅非  
下臣宜薦於君也。靈公乃去其聲而親政務故衛人  
美其化焉。師涓悔其乖於雅頌失爲臣之道乃退而  
隱跡。蘧伯玉焚其樂器於九達之衢恐後世傳造焉。  
錄曰夫體國以質直爲先導政以謙約爲本故三  
風十誓商書以之誓昭無荒無怠唐風貴其遵儉  
靈公違詩人之明諷惟奢縱惑心雖追悔於初失  
能革情於後諫日月之蝕無損明焉伯玉志存規  
主秉亮爲心師涓識進退之道觀過知仁一君二



臣斯可稱美。

宋景公之世，有善星文者，許以上大夫之位，處於  
樓延閣之上，以望氣象，設以珍食，施以寶衣，其食則  
有渠滄之鳧，煎以桂髓，叢庭之鷄，蒸以蜜沫，淇漳之  
鱧，脯以青茄，九江珠璣，爨以蘭蘇，華清夏潔，灑以織  
綺，華清井之澄華也，饗人視時而叩鐘，伺食以擊盤，  
言每食而輒擊鐘磬也，懸四時之衣，春夏金玉爲飾，  
秋冬以翡翠爲溫，燒異香於臺上，忽有野人被草負  
笈，扣門而進，曰：聞國君愛陰陽之術，好象緯之祕，請



見景公乃延之崇堂語則及未來之兆次及已往之事萬不失一夜則觀星望氣晝則執筭披圖不服寶衣不甘奇食景公謝曰今國喪亂微君何以輔之曰德之不均亂將及矣修德以來人則天應之祥人美其化景公曰善遂賜姓曰子氏名之曰韋卽子韋也錄曰宋子韋世司天部妙觀星緯抑亦梓慎裨竈之儔景公待之若神禮以上列服以絕世之衣膳以殊方之味雖謂大禽之旨華黼龍袞之服及斯固陋矣春秋因生以賜姓亦緣事以顯名號司星



氏至六國之末著陰陽之書

出班固藝文志

越謀滅吳蓄天下奇寶美人異味進於吳殺三牲以

祈天地殺龍蛇以祠川岳矯以江南億萬戶民輸吳

爲傭保越又有美女二人一名夷光一名修明

卽西施鄭

旦之以貢於吳吳處以椒華之房貫細珠爲簾幌朝

下以蔽景夕捲以待月二人當軒並坐理鏡靚粧於

珠幌之內竊窺者莫不動心驚魂謂之神人吳王妖

惑怠政及越兵入國乃抱二女以逃吳苑越軍亂入

見二女在樹下皆言神女望而不敢侵今吳城地門



內有朽株、尚爲祠神女之處、初越王入國、有丹鳥夾  
王而飛、故句踐入國、起望烏臺、言丹鳥之異也、范蠡  
相越、日致千金、家僮閑筭術者萬人、收四海難得之  
貨、盈積於越、都以爲器、銅鐵之類、積如山之阜、或藏  
之井墜、謂之寶井、奇容麗色、溢于閨房、謂之遊宮歷  
古以來、未之有也、

錄曰、易尚謙益、書著明謨、人臣之體、以斯爲上、傳  
曰、知無不爲、忠也、范蠡陳工術之本、而句踐乃霸  
卒王百越、稱爲富强、斯其力矣、故能佯狂以晦跡、



浮海以避世，因三從以別名，功遂身退，斯其義也。至如寶井遊宮，雖奢不惑，夫興亡之道，匪推之歷數，亦由才力而致也。觀越之滅吳，屈柔之禮盡焉，薦非世之絕姬，收歷代之神寶，斯皆跡殊而事同矣。博識君子，驗斯言焉。



拾遺記卷四

燕昭王

王卽位二年，廣延國來獻善舞者二人，一名旋始，一名提嫫，竝玉質凝膚，體輕氣馥，綽約而窈窕，絕古無倫，或行無跡影，或積年不饑。昭王處以單綃華幄，飲以瑤珉之膏，飴以丹泉之粟。王登崇霞之臺，乃召二人徘徊翔舞，殆不自支。王以纓縷拂之，二人皆舞容冶，妖麗靡於鸞翔，而歌聲輕颺，乃使女伶代唱其曲，清響流韻，雖飄梁動木，未足嘉也。其舞一名縈塵，言



其體輕，與塵相亂。次曰集羽，言其婉轉若羽毛之從風。宋玉曰：旋懷，言其支體纏蔓若入懷袖也。乃設麟文之席，散荃蕪之香，香出波弋國，浸地則土石皆香。著朽木腐草，莫不鬱茂。以燠枯骨，則肌肉皆生。以屑噴地，厚四五寸，使二女舞其上，彌日無跡。體輕故也。時有白鸞孤翔，銜千莖穗，穗於空中自生花實，落地則生根葉，一歲百穫，一莖滿車。故曰盈車嘉穗。麟文者，錯雜寶以飾席也，皆爲雲霞麟鳳之狀。昭王復以衣袖麾之，舞者皆止。昭王知其神異，處於崇霞之臺。



設枕席以寢，讌遣侍人以衛之。王好神仙之術，元天  
之女，託形作此二人。昭王之末，莫知所在。或云遊於  
漢江，或伊洛之濱。

四年，王居正寢，召其臣甘肅曰：寡人志於仙道，欲學  
長生久視之法，可得遂乎？肅曰：臣遊昆臺之山，見有  
垂白之叟，宛若少童，貌如冰雪，行如處子，血清骨勁，  
膚實腸輕，乃歷蓬瀛而超碧海，經涉升降，遊往無窮，  
此爲上仙之人也。蓋能去滯慾而離嗜愛，洗神滅念，  
常遊於太極之門。今大王以妖惑目，美味爽口，列



女成羣。迷心動慮。所愛之容。恐不及玉。纖腰皓齒。患不如神。而欲卻老雲遊。何異操圭爵以量滄海。執毫釐而廻日月。其可得乎。昭王乃徹色減味。居乎正寢。賜甘霈羽衣。一襲表其墟。爲明真里也。

七年。涿胥之國來朝。則申毒國之一名也。有道術人名尸羅。問其年。云百三十歲。荷錫持餅。云發其國五年。乃至燕都。善術惑之術。於其指端出浮屠十層。高三尺。乃諸天神仙。巧麗特絕。人皆長五六分。列幢蓋。鼓舞繞塔而行歌唱之音。如真人矣。尸羅噴水爲霧。



霧暗數里間。俄而復吹爲疾風。霧霧皆止。又吹指上。浮屠漸入雲裏。又如左耳出青龍。右耳出白虎。始入之時。纔一二寸。稍至八九尺。俄而風至雲起。卽以一手揮之。卽龍虎皆入耳中。又張口向日。則見人乘羽蓋。駕螭鵠。直入於口內。復以手抑曾上。而聞懷袖之中。轟轟雷聲。更張口則見羽蓋。螭鵠相隨從口中而出。尸羅常坐日中。漸漸覺其形小。或化爲老叟。或爲嬰兒。倏忽而死。香氣盈室。時有清風來吹之。更生。如向之形。呪術衍惑。神怪無窮。



八年盧扶國來朝。渡河萬國方至。云其國中山川無惡禽獸。水不揚波。風不折木。人皆壽三百歲。結草爲衣。是謂卉服。至死不老。咸知孝讓。壽登百歲以上。相敬如至親之禮。死葬於野外。以香木靈草瘞掩其尸。閭里助送號泣之音。動於林谷。河源爲之流止。春木爲之改色。居喪水漿不入於口。至死者骨爲塵埃。然後乃食。昔大禹隨山導川。乃旌其地爲無老純孝之國。

錄曰。夫含靈稟氣。取象二儀。受命因生。包乎五德。



故守淳明以修身資施以爲本義緣天屬生盡愛  
敬之容體自心慈死結追終之慕蓋處物之常情  
有識之常道是以忠諫一至則會理以通幽神義  
由心洞祇靈爲之昭感迹顯神著表降羣祥行道  
不違遠邇旌德美乎異國之人隔絕王化闕聞大  
道語其國法華戎有殊觀其政教頗令殊俗禮在  
四夷事存諸誥孝讓之風萬不尚也

九年昭王思諸神異有谷將子學道之人也言於王  
曰西王母將來遊必語虛無之術不踰一年王母果



至與昭王遊於燧林之下，說炎帝鑽火之術，取綠桂之膏，燃以照夜。忽有飛蛾銜火，狀如丹雀，來拂於桂膏之上。此蛾出於員丘之穴，穴洞達九天，中有細珠如流沙，可穿而結，因用爲珮。此是神蛾之火也。蛾憑氣飲露，飛不集下。羣仙殺此蛾，合丹藥。西王母與羣仙遊員丘之上，聚神蛾以瓊筐盛之，使王童負筐以遊四極，來降燕庭。出此蛾以示昭王，王曰：「今乞此蛾以合九轉神丹。」王母弗與。昭王坐握日之臺，參雲上可捫日。時有黑鳥白頭，集王之所，銜洞光之珠，圓徑



二尺此珠色黑如漆懸照於室內百神不能隱其精  
靈此珠出陰泉之底陰泉在寒山之北員水之中言  
水波常圓轉而流也有黑蚌飛翔來去如五岳之上  
昔黃帝時霧成子遊寒山之嶺得黑蚌在高崖之上  
故知黑蚌能飛矣至燕昭王時有國獻於昭王王取  
瑤漳之水洗其沙泥乃嗟歎曰自懸日月以來見黑  
蚌生珠已八九十遇此蚌千歲一生珠也珠漸輕細  
昭王常懷此珠當隆暑之月體自輕涼號曰銷暑招  
涼之珠也



秦始皇

始皇元年，騫霄國獻刻玉善畫工名裔，使含丹青以漱地，卽成魑魅及詭怪羣物之象，刻玉爲百獸之形，毛髮宛若真矣，皆銘其臆前，記以日月，工人以指畫地，長百丈，直如繩墨，方寸之內，畫以四瀆五岳列國之圖，又畫爲龍鳳騫翥若飛，皆不可點睛，或點之必飛走也。始皇嗟曰：刻畫之形，何得飛走？使以淳漆各點兩玉虎，一眼睛，旬日則失之，不知所在。山澤之人云：見二白虎，各無一目，相隨而行，毛色相似，異於常。



見者至明年西方獻兩白虎各無一目。始皇發檻視之，疑是先所失者，乃刺殺之，檢其胷前，果是元年所刻玉虎。迄胡亥之滅，寶劍神物隨時散亂也。始皇好神仙之事，有宛渠之民乘螺舟而至，舟形似螺，沉行海底而水不浸入。一名淪波舟，其國人長十丈，編鳥獸之毛以蔽形。始皇與之語及天地初開之時，了如親覩。曰：臣少時躡虛卻行，日遊萬里，及其老朽也，坐見天地之外事。臣國在咸池日沒之所，九萬里，以萬歲爲一日。俗多陰霧，遇其晴日，則天豁然雲



裂耿若江漢，則有爭龍黑鳳，翻翔而下。及夜，燃石以繼日光。此石出燃山，其土石皆自光澈，扣之則碎，狀如粟一粒，輝映一堂。昔炎帝始變生食，用此火也。國人今獻此石，或有投其石於溪澗中，則沸沫流於數十里，名其水爲焦淵。臣國去軒轅之北十萬里，少典之子採首山之銅鑄爲大鼎，臣先望其國，其金火氣動，奔而往視之。三鼎已成，又見冀州有異氣，應有聖人生。果有慶都生堯，又見赤雲入于鄆，鎬走而往視，果有丹雀瑞昌之符。始皇曰：此神人也。彌信仙術焉。



始皇起雲明臺窮四方之珍木搜天下之巧工南得  
烟土碧樹酈水燃沙賁都朱泥雲岡素竹東得葱巒  
錦栢漂檣龍松寒河星栢岍雲之梓西得漏海浮金  
狼淵羽墾滌嶂霞桑沉塘員籌北得冥阜乾漆陰坂  
文梓褰流黑魄閭海香瓊珍異是集二人騰虛綠木  
揮斤斧於空中子時起工午時已畢秦人謂之子午  
臺亦言於子午之地各起一臺二說疑也

張儀蘇秦二人同志好學迭剪髮而鬻之以相養或  
傭力寫書非聖人之言不讀遇見墳典行途無所題



記以墨書掌及股裏夜還而寫之折竹爲簡二人每  
假食於路剝樹皮編以爲書帙以盛天下良書嘗息  
大樹之下假息而寐有一先生問二子何勤苦也儀  
秦又問之子何國人荅曰吾生於歸谷亦云鬼谷鬼  
者歸也又云歸者谷名也乃謂其術教以千世出俗  
之辯卽探胃內得二卷說書言輔時之事古史考云  
鬼谷子也鬼歸相近也秦王子嬰立凡百日郎中趙  
高謀殺之子嬰寢於望夷之宮夜夢有人身長十丈  
鬚鬢絕青納玉舄而乘丹車駕朱馬而至宮門云欲



見秦王子嬰。聞者許進焉。子嬰乃與言。謂子嬰曰。余  
是天使也。從沙丘來。天下將亂。當有同姓名欲相誅。  
暴翌日廼起。子嬰則疑趙高囚高於咸陽獄。懸於井  
中。七日不死。更以鏊湯煮。七日不沸。乃戮之。子嬰問  
獄吏曰。高其神乎。獄吏曰。初囚高之時。見高懷有一  
青丸。大如雀卵。時方士說云。趙高先世受韓終丹法。  
冬月坐於堅冰。夏日臥於爐上。不覺寒熱。及高死。子  
嬰棄高屍於九達之路。泣送者千家。或見一青雀從  
高屍中出。直入雲。九轉之驗。信於是乎。子嬰所夢。卽



始皇之靈所著玉舄則安期先生所遺也鬼昧之理  
萬世一時

錄曰夫含靈挺質罕不羨乎久視所以長生苟乖  
才性企之彌遠何者夫層宮峻宇肆其奢綽約柔  
曼縱其惑九韶六英悅其耳喜怒刑賞示其威精  
靈溺於常滯志意疲於馳策銷竭神慮翦刻天和  
秦政自以功高三皇世踰五帝取惑徐市身殞沙  
丘燕昭能延禮羣神百靈響集並欲棄機事以遊  
真極去塵垢而望雲飛譬猶等溝澮於天河齊湖



茵於椿水，超二儀於崑巒，升一匱而坂重漢，何則？  
望之與無階矣。抱朴子曰：學若牛毛，得如麟角，至  
如秦皇、燕昭之知，雖微鑒仙體，而未入元真，蓋由  
褊惑尚多，滯情未盡。至於神通元化，詭變萬端，故  
曰：徐行雲垂之儔，駕影乘霞之侶，可得齊肩比步  
焉。與之棲息也，窮神絕異，隨方而來，銜絕殊形，越  
境而至，託神以盡變，因變以窮神，觸象難名，靈怪  
莫測。淮南子云：含雷吐火之術，出於萬畢之家，方  
毳羽於洪鑪，炎烟火於冰水，漏海螺船之屬，飛珠



沉霞之類千途萬品、書籍之所未詳、自神化以來、  
神奇莫與爲例、豈末代浮誣所能窺仰、天齡脩短、  
之所效哉、今觀子年之記、蘇張二人異辭同迹、或  
以字音相類、或以上俗爲殊、驗諸墳史、豈惟秦儀  
之見異者哉、



拾遺記卷五

前漢上

漢太上皇微時佩一刀，長三尺，上有銘，其字難識，疑是殷高宗伐鬼方之時所作也。上皇遊鄴沛山中，寓居窮谷裏，有人歐冶鑄，上皇息其傍，問曰：「此鑄何器？」工者笑而荅曰：「爲天子鑄劍，慎勿泄言。」上皇謂爲戲言而無疑色。工人曰：「今所鑄鐵鋼礪難成，若得公腰間佩刀雜而冶之，卽成神器，可以尅定天下。」星精爲輔佐，以殲三猾，木衰火盛，此爲異兆也。上皇曰：「余此



物名爲七首，其利難儔，水斷虬龍，陸斬虎兕，魑魅罔兩，莫能逢之。斫玉鑄金，其刃不卷。工人曰：若不得此七首以和鑄，雖歐冶專精，越砥歛鐸，終爲鄙器。上皇則解七首投於鑪中，俄而烟焰衝天，日爲之晝晦。及乎劍成，殺三牲以釁祭之。鑄工問上皇何時得此七首，上皇云：秦昭襄王時，余行逢一野人於陌上，授余云：是殷時靈物，世世相傳，上有古字記其年月。反成劍，工人視之，其銘尚存，叶前疑也。工人卽持劍授上皇，上皇以賜高祖。高祖常佩於身，以殲三獠及天下。



已定。呂后藏於寶庫，庫中守藏者見白氣如雲出於戶外，狀如龍蛇。呂后改庫名曰靈金藏，及諸呂擅權，白氣亦滅。及惠帝卽位，以此庫貯禁兵器，名曰靈金內府也。

錄曰：夫精靈變化，其途非一。冥會之感，理故難常。至如墳識所載，咸取驗於已往，謠歌里說，皆求徵於未來。考圖披籍，往往而編列矣。觀乎工人之說，諒妖言之遠效焉。三尺之劍，以應天地之數，故三爲陽數，亦應天地之德。按鉤命決曰：蕭何爲昴星。



精項羽陳勝胡亥爲三猾國爲木德漢叶火位此其徵也

孝惠帝二年四方咸稱車書同文軌天下太平干戈  
偃息遠國殊鄉重譯來貢時有道士姓韓名稚則韓  
終之嗣也越海而來云是東海神使聞聖德洽乎區  
宇故悅服而來庭時有東極出扶桑之外有泥離之  
國來朝其人長四尺兩角如蟹牙出如唇自乳已來  
有靈毛自蔽居於深穴其壽不可測也帝云方士韓  
稚解絕國人言令問人壽幾何經見幾代之事荅曰



五運相承。迭生迭死。如飛塵細雨。存歿不可論筭。問  
女媧以前可聞乎。對曰。蛇身已上。八風均四時序。不  
以威悅攬乎精運。又問。燧人以前。荅曰。自鑽火變腥  
以來。父老而慈。子壽而孝。自軒皇以來。屑屑焉以相  
誅滅。浮靡囂動。淫於禮。亂於樂。世德澆訛。浮風墜矣。  
稚以荅聞於帝。帝曰。悠哉杳昧。非通神達理者。難可  
語乎。斯遠矣。稚於斯而退。莫知其所之。帝使諸方士  
立仙壇於長安城北。名曰祠韓館。俗云司寒之神。祀  
於城陰。按春秋傳曰。以享司寒。其音相亂也。定是祠



韓館至二年，詔宮女百人，文錦萬疋，樓船十艘，以送泥離之使，大赦天下。

漢武帝思懷往者，李夫人不可復得，時始穿昆靈之池，泛翔禽之舟，帝自造歌曲，使女伶歌之。時日已西，傾涼風，激水，女伶歌聲甚適，因賦落葉哀蟬之曲曰：羅袂兮無聲，玉墀兮塵生。虛房冷而寂寞，落葉依於重扇。望彼美之女兮，安得感余心之未寧。帝聞唱動心，悶悶不自支持，命龍膏之燈以照舟內，不自止。親侍者覺帝容色愁怨，乃進淇梁之酒，酌之。



卮卮出波祗之國，酒出洪梁之縣。此屬有扶風，至哀帝廢此邑。南人受此釀法，今言雲陽出美酒，兩聲相亂矣。帝飲三爵，色悅心歡，乃詔女伶出侍，節息於延涼室。卧夢李夫人，授帝薝蔔之香。帝驚起，而香氣猶著衣枕。歷月不歇。帝彌思求，終不復見。涕泣洽席，遂改延涼室爲遺芳夢室。初，帝深嬖李夫人，死後常思夢之。或欲見夫人，帝貌顛頓，嬪御不寧。詔李少君與之語曰：「朕思李夫人，其可得乎？」少君曰：「可遙見，不可同於帷幄。暗海有潛英之石，其色青輕如毛羽，寒盛。」



石溫暑盛則石冷刻之爲人像神悟不異真人使  
此石像往則夫人至矣此石人能傳譯人言語有聲  
無氣故知神異也帝曰此石像可得否少君曰願得  
樓船巨力千人能浮水登木皆使明於道術齋不死  
之藥乃至暗海經十年而還昔之去人或升雲不歸  
或託形假死獲反者四五人得此石卽命工人依先  
圖刻作夫人形刻成置於輕紗幙裏宛若生時帝大  
悅問少君曰可得近乎少君曰譬如中宵忽夢而晝  
可得近觀乎此石毒宜遠望不可逼也勿輕萬乘之



尊惑此精魅之物帝乃從其諫見夫人畢少君乃使  
舂此石人爲丸服之不復思夢乃築靈夢臺歲時祀  
之。

元封元年浮忻國貢蘭金之泥此金出湯泉盛夏之  
時水常沸湧有若湯火飛鳥不能過國人常見水邊  
有人冶此金爲器金狀混混若泥如紫磨之色百鑄  
其色變白有光如銀卽銀燭是也常以此泥封諸函  
匣及諸宮門鬼魅不敢干當漢世上將出征及使絕  
國多以此泥爲璽封衛青張騫蘇武傅介子之使皆



受金泥之璽封也。武帝崩後，此泥乃絕焉。

日南之南，有淫泉之浦，言其水浸淫，從地而出，成淵。故曰淫泉。或言此水甘軟，男女飲之則淫。其水小處可濫觴，褰涉大處可方舟。沿沂隨流，屈直其水激石之聲，似人之歌笑。聞者令人淫動，故俗謂之淫泉。時有鳬鴈，色如金，羣飛戲於沙瀨。羅者得之，乃真金鳬也。昔秦破驪山之墳，行野者見金鳬向南而飛，至淫泉，後寶鼎元年，張善爲日南太守，郡民有得金鳬以獻。張善該博多通，考其年月，卽秦始皇墓之金鳬也。



昔始皇爲塚，歛天下瓊異，生殉工人，傾遠方奇寶於  
塚中，爲江海川瀆，及列山岳之形，以沙棠沉檀爲舟  
楫，金銀爲鳬鴈，以瑠璃雜寶爲龜魚，又於海中作王  
象鯨魚，銜火珠爲星，以代膏燭，光出墓中，精靈之偉  
也。昔生埋工人於塚內，至被開時，皆不死，工人於塚  
內琢石爲龍鳳仙人之像，及作碑文辭讚，漢初發此  
塚，驗諸史傳，皆無列仙龍鳳之製，則知生埋匠人之  
所作也。後人更寫此碑文，而辭多怨酷之言，乃謂爲  
怨碑，史記略而不錄。



董偃常卧延清之室。以畫石爲床。文如錦也。石體甚輕。出郅支國。上設紫瑠璃帳。火齊屏風。列靈麻之燭。以紫玉爲盤。如屈龍。皆用雜寶飾之。侍者於戶外扇。偃曰。玉石豈須扇而後涼耶。侍者乃卻扇以手摸。方知有屏風。又以玉精爲盤。貯冰於膝前。玉精與水同其潔澈。侍者謂冰之無盤。必融濕席。乃合玉盤拂之。落堦下。冰玉俱碎。偃以爲樂。此玉精。平塗國所貢也。武帝以此賜偃。哀平之世。民家猶有此器。而多殘破。及王莽之世。不復知其所在。



初二年大月氏國貢雙頭雞四足一尾鳴則俱鳴  
武帝置於甘泉故館更以餘雞混之得其種類而不  
鳴諫者曰詩云牝雞無晨一云牝雞之晨惟家之  
索今雄類不鳴非吉祥也帝乃送還西域行至西關  
雞反顧望漢宮而哀鳴故謠言曰三七末世雞不鳴  
犬不吠宮中荆棘亂相係當有九虎爭爲帝至王莽  
篡位將軍有九虎之號其後喪亂彌多宮掖中生蒿  
棘家無雞鳴犬吠此雞未至月支國乃飛于天漢聲  
似鷓鴣雞翱翔雲裏一名暄雞昆暄之音相類



天漢二年，渠搜國之西，有新淪之國，其俗淳和人壽，三百歲，有壽木之林，一樹千尋，日月爲之隱蔽，若經此木下，皆不死不病。或有泛海越山來會其國，歸懷其葉者，則終身不老。其國人綴草茅爲繩，結網爲衣，似今之羅紈也。至元狩六年，渠搜國獻網衣一襲，帝焚於九達之道，恐後人徵求，以物奢費，燎之，烟如金石之氣。

太始二年，西方有因霽之國人，皆善嘯，丈夫嘯聞百里，婦人嘯聞五十里，如笙竽之音。秋冬則聲清亮，春



則聲沉下。亦曰兩舌重沓以  
爪徐刮之。則嘯聲逾遠。故呂氏春秋云反舌殊鄉之  
國。卽此謂也。有至聖之君。則來服其化。

錄曰。漢興。維六國之遺弊。天下思於聖德。是以黔  
黎嗟秦亡之晚。恨漢來之遲。高祖肇基。業恢張  
區宇。孝惠務寬刑辟。以成無爲之治。德侔三王。教  
通四海。至于武帝。世載愈光。省方巡岳。標元崇號。  
聞禮樂以恢風。廣文義以飾俗。改律歷而建封禪。  
祀百神以招羣瑞。雖欽明茂於唐書。文思稱於虞



典豈尚茲焉。觀乎周孔之教。不貴虛無之學。武帝  
修黃老。治卻老之方。求報無福之祀。是以張敞切  
言。使遠斥仙術。指以萇宏。楚襄懷秦皇。徐福之事。  
造新垣之徒。卒見夷戮。夫仙者。尚冲靜以忘形體。  
守寂寞而祛囂務。武帝好微行而尚尅伐。恢宮宇  
而廣苑囿。永垂長生久視之法。失元一守道之要。  
悔少翁之先誅。藥大之詭說。至如李夫人細心  
昵愛。專媚華閨。忘沉魂之更生。飭新宮以延佇。蓋  
猶嬖惑之寵過熾。累心之結未祛。欲竦身雲霓之



表與天地而齊畢。由係風晷。其可階乎。雖未及元  
真。頗參神邃。是以幽明不能藏其殊妙。萬象無所  
隱其精靈。考諸仙部。驗以衆說。未有異於斯乎。夫  
五運遞興。數之常理。金土之兆。魏晉當焉。董偃起  
自販珠之徒。因庖宰而升寵。竊幸一時。富傾海宇。  
內蓄神異之珍。銜非世之寶。一朝絕愛。信盛衰之  
有兆乎。夫爲棺槨者。以防螻蟻之患。爲歛骨之具。  
聖人使合其正禮。惡其踰費。疾其過薄。至如澹臺  
滅明之儉。盛姬秦皇之奢。皆失於節用。嗟乎。形銷

神滅歟爲一棺之土。爲陵成谷。瓊珣美寶。奄爲燼  
塵。斯則費生加死。無益身名也。冥然長往。何憶曩  
時之盛。仲尼云。不如速朽。歛手足形。聖人以斯昭  
誠。豈不尚哉。



拾遺記卷六

前漢下

昭帝元始元年，案淋池廣千步，中植分枝荷，一莖四葉，狀如駢蓋，日照則葉低蔭根莖，若葵之衛足，名曰低光荷。實如元珠，可以飾佩。花葉葳蕤，芬馥之氣徹十餘里，食之令人口氣常香。益脉理病，宮人貴之。每遊宴出入，必皆含嚼，或剪以爲衣，或折以蔽日，以爲戲弄。楚辭所謂折芰荷以爲衣，意在斯也。亦有倒生菱，莖如亂絲，一花千葉，根浮水上，實沉泥中，名紫菱。

食之不老。帝時命水嬉遊宴永日。土人進一豆槽。帝曰。桂楫松舟。其猶重朴。況乎此槽可得而乘也。乃命以文梓爲船。木蘭爲拖。刻飛鸞翔鶴飾於船首。隨風輕漾。畢景忘歸。乃至通夜。使宮人歌曰。秋素景兮泛洪波。揮纖手兮折芰荷。涼風淒淒揚棹歌。雲光開曙月低何。萬歲爲樂豈云多。帝乃大悅。起商臺於池上。及平末歲。進諫者多。遂省薄遊幸。堙毀池臺。鸞舟荷芰。臨時空在。今臺無遺址。溝池已平。

宣帝時。東有背明之國來貢其方物。



言其鄉在扶桑之東見日出於西方其國昏昏常暗  
宜種百穀名曰融澤方三千里五穀皆良食之後天  
而死有浹日之稻種之十旬而熟有翻形稻言食者  
死而更生天而有壽有明清稻食者延年也清腸稻  
食一粒歷年不饑有搖枝粟其枝長而弱無風常搖  
食之益髓有鳳冠粟似鳳鳥之冠食者多力有遊龍  
粟葉屈曲似遊龍也有瓊膏粟白如銀食此二粟令  
人骨輕有繞明豆其莖弱自相縈纏有挾劍豆其莢  
形似人挾劍橫斜而生有傾離豆言其豆見日葉垂

獲地食者不老不疾有延精麥延壽益氣有昆和麥  
調暢六府有輕心麥食者體輕有醇和麥爲麴以釀  
酒一醉累月食之凌冬可袒有含露麥穗中有露味  
甘如飴有紫沉藤其實不浮有雲冰藤實冷而有光  
宜爲油澤有通明藤食者夜行不持燭是苣勝也食  
之延壽後天而老其北有草名虹草枝長一丈葉如  
車輪根大如轂花似朝虹之色昔齊桓公伐山戎國  
人獻其種乃植於庭云霸者之瑞也有宵明草夜視  
如列燭晝則無光自消滅也有紫菊謂之日精一莖



一蔓延及數畝味甘食者至死不饑渴有焦茅高五  
丈燃之成灰以水灌之復成茅也謂之靈茅有黃渠  
草映日如火其堅韌若金食者焚身不熱有蔓草葉  
如蒲莖如蓍採之以占吉凶萬不遺一又有聞遐草  
服者耳聰香如桂莖如蘭其國獻之多不生實葉多  
萎黃詔並除焉元鳳二年於淋池之南起桂臺以望  
遠氣東引太液之水有一連理桂樹上枝跨於渠水  
下枝隔岸而南生與上枝同一株帝常以季秋之月  
泛薜蘭雲鵠之舟窮晷係夜釣於臺下以香金爲鈎



繡絲爲綸丹鯉爲餌釣得白蛟長三丈若大蛇無鱗  
果帝曰非祥也命太官爲鮓肉紫骨青味甚香美班  
賜羣臣帝思其美漁者不能復得知爲神異之物

二年含塗國貢其珍怪其使云去王都七萬里鳥獸  
皆能言語雞犬死者埋之不朽經歷數世其家人遊  
於山阿海濱地中聞雞犬鳴吠主乃掘取還家養之  
毛羽雖禿落更生久乃悅澤

張掖郡有邛族之盛因以名也邛奇字君珍居喪盡  
禮所居去墓百里每夜行常有飛鳥銜火夾之登山



濟水號泣不息未嘗以險難爲憂雖夜如晝之明也  
以淚灑石則成痕著朽木枯草必皆重茂以淚浸地  
卽醎俗謂之醎鄉至昭帝嘉其孝異表銘其邑曰孝  
感鄉四時祭祀立廟焉

錄曰夫心迹所至無幽不徹理著於微冥昧自顯  
乎曦迴魯陽之戈嚴霜感匹夫之歎在於凡倫尚  
昭神迹況求之精爽以會蒸蒸之心木石爲之乎  
感鳥獸爲之馴集元偉哀號春花以之改葉叔通  
晨興朝流歎生橫石辛繕表跡於棲鸞衛農示德

於夢虎郅氏之行類斯道焉按漢昭帝時有黃鵠  
下太液池今云淋池蓋一水二名也宣帝之世有  
嘉穀秬稷之祥亦不說今之所生豈由神農后稷  
播厥之功抑亦王子所稱非近俗所食詮其名華  
而不實及乎飛走之類神木怪草見奇而說萬世  
之瑰偉也

漢成帝好微行於太液池傍起宵遊宮以漆爲柱鋪  
黑綈之幕器服乘輿皆尚黑色旣悅於暗行憎燈燭  
之照宮中美御皆服皂衣自班婕妤已下咸帶平綬



簪珮雖如錦綉更以木蘭紗綃罩之至宵遊宮乃秉  
燭宴幸旣罷靜鼓自舞而步不揚塵好夕出遊造飛  
行殿方一丈如今之輦選羽林之士負之以趨帝於  
輦上覺其行快疾聞其中若風雷之聲言其行疾也  
名曰雲雷宮所幸之宮咸以氍毹藉地惡車轍馬跡  
之喧雖惑於微行昵宴在民無勞無怨每乘輿返駕  
以愛幸之姬寶衣珍食捨於道傍國人之窮老者皆  
歌萬歲是以鴻嘉永始之間國富家豐兵戈長戢故  
劉向谷永指言切諫於是焚宵遊宮及飛行殿罷宴

逸之樂所謂從繩則正如轉圜焉

帝常以三秋閑日與飛鷺戲於太液池以沙棠木爲舟貴其不沉沒也以雲母飾於鸕首一名雲舟又刻大桐木爲虬龍雕飾如真以夾雲舟而行以紫桂爲柂櫂及觀雲棹水玩擷菱藕帝每憂輕蕩以驚飛鷺命飲飛之士以金鑲纜雲舟於波上每輕風時至飛鷺殆欲隨風入水帝以翠纓結飛鷺之裙常怨曰妾微賤何復得預纓裙之遊今太液池尚有避風臺卽飛鷺結裙之處



錄曰、夫言端履拱嘿者、人君之尊也。是故典居有  
節、進止有度。出則太師奏登車之禮、入則少師薦  
升堂之儀。列旌門以周衛、修清宮以宴息。成帝輕  
南面之位、微遊姬幸、好感神仙之事。谷永因而抗  
諫、書不云乎、弗矜細行、終累大德。斯之謂矣。  
哀帝尚淫奢、多進諂佞、幸愛之臣、競以粧飾妖麗巧  
言取容。董賢以霧縠單衣、飄若蟬翼。帝入宴息之房、  
命賢更易輕衣小袖、不用奢帶修裾。故使宛轉便易  
也。宮人皆效其斷袖。又曰、割袖恐驚其眠。

後漢

明帝因貴人夢食瓜甚美帝使求諸方國時燉煌獻異瓜種恒山獻巨桃核瓜名穹隆長三尺而形屈曲味美如飴父老云昔道士從蓬萊山得此瓜云是崆峒靈瓜四劫一實西王母遺於此地世代遐絕其實頗在又說巨桃霜下結花隆暑方熟亦云仙人所食帝使植於霜林園園皆植寒菓積冰之節百菓方盛俗謂之相陵與霜林之聲訛也后曰王母之桃王公之瓜可得而食吾萬歲矣安可植后崩內侍者見



鏡奩中有瓜桃之核，視之涕零，疑非其類耳。  
章帝永寧元年，條支國來貢異瑞，有鳥名鳩鵲，形高  
七尺，解人語。其國太平，則鳩鵲羣翔；昔漢武時，四夷  
賓服，有獻馴鵲，若有喜樂事，則鼓翼翔鳴。按莊周云，  
雕陵之鵲，蓋其類也。淮南子云，鵲知人喜，今之所記，  
大小雖殊，遠近爲異，故畧舉焉。

安帝好微行，於郊坰或露宿，起帷宮，皆用錦綉文綉，  
至永初二年，國用不足，令吏民入錢者得爲官，有瑯  
琊王溥，卽王吉之後，吉先爲昌邑中尉，奕世衰陵，及



安帝時家貧不得仕乃挾竹簡插筆於洛陽市傭書  
美於形貌又多文辭來僦其書者丈夫贈其衣冠婦  
人遺其珠玉一日之中衣寶盈車而歸積粟于廩九  
族宗親莫不仰其衣食洛陽稱爲善筆而得富溥先  
時家貧穿井得鐵印銘曰傭力得富錢至億庾一土  
三田軍門主簿後以一億錢輸官得中壘校尉三田  
一土壘字也中壘校尉掌北軍壘門故曰軍門主簿  
積善降福明神報焉

靈帝初平三年遊於西園起裸遊館千間采綠苔而



被堵引渠水以繞砌。周流澄澈。乘船以遊漾。使宮人  
乘之。選玉色輕體。以執篙櫂。搖漾於渠中。其水清澄。  
以盛暑之時。使舟覆沒。視宮人玉色者。又奏招臨之  
歌。以來涼氣也。歌曰。涼風起。今日照渠。青荷晝偃。葉  
夜舒。惟日不足。樂有餘。清絲流管。歌玉鳧。千年萬歲  
喜難踰。渠中植蓮大如蓋。長一丈。南國所獻。其葉夜  
舒。晝卷。一莖有四蓮。叢生。名曰夜舒荷。亦云。月出則  
舒也。故曰望舒荷。帝盛夏避暑於裸遊館。長夜飲宴。  
帝嗟曰。使萬歲如此。則上仙也。宮人年二七已上。三



六已下皆靚粧解其上衣惟着內服或共裸浴西域  
所獻茵握香焚以爲湯宮人以之浴浣使以餘汁入  
渠名曰流香渠又使內豎爲驢鳴於館北又作雞鳴  
堂多畜雞每醉迷於天曉內侍競作雞鳴以亂真聲  
也乃以炬燭投於殿前帝乃驚悟及董卓破京師散  
其美人焚其宮館至魏咸熙中先所投燭處爰爰有  
光如星後人以爲神光於此地立小屋名曰餘光祠  
以祈福至魏明末稍掃除矣

錄曰明章兩主丕承前業風被四海威行八區



邊異服。祥瑞輻輳。安靈二帝同爲敗德。夫悅目快  
心。罕不淪乎情慾。自非遠鑒興亡。孰能移隔下俗。  
傭才緣心。緬乎嗜慾。塞諫任邪。沒情於淫靡。至如  
列代亡主。莫不憑威猛以喪家國。肆奢麗以覆宗  
祀。詢考先墳。往往而載僉求歷古。所記非一。販爵  
鬻官。乖分職之本。露宿郊居。違省方之義。成安二  
帝。載世雖遠。而亂政攸同。驗之史牒。訊諸前記。迷  
情狗馬。愛好龍鶴。非明王之所聞示於後也。內窮  
淫酷。外盡禽荒。取悅耳目。流貶萬世。是以牝妖告



禍漢靈以蒼伯傾宗酒池裸逐之醜鳴雞長夜之  
惑事由商乙遠倣燕丹異代一時可爲悲矣

獻帝伏皇后聰惠仁明有聞於內則及乘輿爲李傕  
所敗晝夜逃走宮人奔竄萬無一生至河無舟楫后  
乃負帝以濟河河流迅急惟覺脚下如有乘踐則神  
物之助焉兵戈逼岸后乃以身擁遏於帝帝傷趾后  
以綉紱拭血刮玉釵以覆於瘡應手則愈以淚湔帝  
衣及面潔靜如浣車人歎服雖亂猶有明智婦人精  
誠之至幽祇之所感矣



錄曰夫丹石可磨而不可奪其堅色蘭桂可折而不可掩其貞芳伏后履純明之姿懷忠亮之質臨危受命壯夫未能加焉知死不愆馮媛之儔也求之千古亦所罕聞

漢興至於哀平元成尚以宮室崇苑囿而西京始有宏侈東都繼其繁奢卽違采椽不斲之製允與靈沼遵儉之風考之皇圖求諸志錄千家萬戶之書臺衛城隍之廣自重門構宇以來未有若斯之費溢也孝哀廣四時之房靈帝修裸遊之館妖惑爲之則神怨



工巧爲之則人虐夷國淪家可爲慟矣及未靈瑞嘉  
翕艷卉殊木生非其壤詭色訛音不稟正朔之地無  
涉圖書所記或緣德業以來儀由時俗以具質咸得  
而備詳矣歷覽羣經披求方冊未若斯之宏麗矣  
郭況光武皇后之弟也累金數億家僮四百餘人以  
黃金爲器工治之聲震於都鄙時人謂郭氏之室不  
雨而雷言其鑄鍛之聲盛也庭中起高閣長廡置衡  
石於其上以稱量珠玉也閣下有藏金窟列武士以  
衛之錯雜寶以飾臺榭懸明珠於四垂晝視之如星



夜望之如月。里語曰：洛陽多錢郭氏室，夜月晝星，富無匹。其寵者皆以玉器盛食，故東京謂郭家爲瓊厨金穴。况小心畏慎，雖居富勢，閉門優遊，未嘗干世事，爲一時之智也。

錄曰：夫后族之盛，專挾內主之威，皆以黨嬖強盛，肆囂於天下。妖幸侵政，擅椒房之親，在昔魏冉，富傾嬴國。漢世王鳳同拜五侯，館第僭於京都。嬌姬麗於宮掖，瑰賂南金，彌玩於王府。緹繡雕文，被飾於土木。高廓洞門，極夏屋之盛。文馬朱軒，窮車服



之靡自古擅驕未有如斯之例雖三歸移於管室  
八佾陳於季庭方之爲劣矣郭況內憑姻寵外事  
聲厲遠採丹山之穴積陶朱程鄭之產未足稱其  
盛歟曾不恃其戚里矜其財勢秉溫恭之正守道  
持盈而自兢慎足可謂知幾其神乎

劉向於成帝之末校書天祿閣專精覃思夜有老人  
着黃衣植青藜杖登閣而進見向暗中獨坐誦書老  
父乃吹杖端煙燃因以見向說開闢已前向因受五  
行洪範之文恐辭說繁廣忘之乃裂裳及紳以記其



言至曙而去。向請問姓名。云我是太一之精。天帝聞金卯之子有博學者。下而觀焉。乃出懷中竹牒。有天文地圖之書。余略授子焉。至向子歆。從向授其術。向亦不悟此人焉。

賈逵年五歲。明惠過人。其姊韓瑤之婦。嫁瑤無嗣。而歸居焉。亦以貞明見稱。聞隣中讀書。旦夕抱逵隔離。而聽之。逵靜聽不言。姊以爲喜。至年十歲。乃暗誦六經。姊謂逵曰。吾家貧困。未嘗有教者入門。汝安知天下有三墳五典。而誦無遺句耶。逵曰。憶昔姊抱逵於



離間聽隣家讀書，今萬不遺一，乃剝庭中桑皮以爲  
牋，或題於扉屏，且誦且記。暮年，經文通遍於閭里，每  
有觀者，稱云振古無倫。門徒來學，不遠萬里，或襁負  
子孫，舍於門側，皆口授經文。贈獻者積粟盈倉，或云  
賈逵非力耕所得，誦經口倦，世所謂舌耕也。

何休本訥多智，三墳五典、陰陽筭術、河洛讖緯及遠  
年古諺、歷代圖籍，莫不咸誦也。門徒有問者，則爲註  
記，而口不能說，作左氏膏肓。公羊廢疾、穀梁墨守，謂  
之三闕言理幽微，非知機藏往，不可通焉。及鄭康成



蜂起而攻之求學者不遠千里，贏糧而至如細流之  
赴巨海，京師謂康成爲經神。何休爲學海。

任末年十四時，學無常師，負笈不遠嶮阻，每言人而  
不學，則何以成，或依林木之下，編茅爲菴，削荆爲筆，  
剉樹汁爲墨，夜則映星望月，暗則縛麻蒿以日照，觀  
書有合意者，題其衣裳以記其事，門徒悅其勤學，更  
以靜衣易之，非聖人之言不視，臨終誡曰：夫人好學，  
雖死若存，不學者雖存謂之行尸走肉耳。河洛祕奧，  
非正典籍所載，皆注記於柱壁及園林樹木，慕好學



者來輒寫之時人謂任氏爲經苑。

曹曾魯人也。本名平。慕曾參之行。改名爲曾。家財巨億。事親盡禮。日用三牲之養。一味不虧。於是不先親而不食新味也。爲客於人家。得新味則含懷而歸。不畜雞犬。言喧器驚動於親老時。亢旱井池皆竭。母思甘清之水。曾跪而操餅。則甘泉自涌。清美於常。學徒有貧者。皆給食。天下名書。上古以來文篆。訛落者。曾皆刊正。垂萬餘卷。及國難旣夷。收天下遺書於曾家。連車繼軌輸於王府。諸弟子於門外立祠。謂曰曹師。



祠及世亂家家焚廬曾慮先文湮沒乃積石爲倉以藏書故謂曹氏爲書倉

錄曰觀乎劉向顯學於漢成時才包三古藝該九聖懸日月以來其類少矣逮乎後漢賈任曹之學並爲聖神通生民到今蓋斯而已若顏淵之殆庶幾關美張霸何足顯大儒哉至如五君之徒孔門之外未有也方之入室彼有慙焉賈氏之姊所謂知識婦人鑒乎聖也

拾遺記卷六終



拾遺記卷七

魏

文帝所愛美人姓薛名靈芸常山人也父名鄴爲鄴鄉亭長母陳氏隨鄴舍於亭傍居生窮賤至夜每聚隣婦夜績以麻蒿自照靈芸年至十五容貌絕世世常中少年夜來竊窺終不得見咸熙元年谷習出守常山郡聞亭長有美女而家甚貧時文帝選良家子女以入六宮習以千金寶賂聘之旣得乃以獻文帝靈芸聞別父母歔歔累日淚下霑衣至升車就路之時



以玉壺承淚。壺則紅色。旣發常山。及至京師。壺中  
淚凝如血。帝以文車十乘迎之。車皆鏤金爲輪。輞丹  
畫其轂。輶前有雜寶爲龍鳳。銜百子鈴。鏘鏘和鳴。響  
於林野。駕青色之牛。日行三百里。此牛尸塗國所獻。  
足如馬蹄也。道側燒石葉之香。此石重疊狀如雲母。  
其光氣辟惡厲之疾。此香腹題國所進也。靈芸未至。  
京師數十里。膏燭之光相續不滅。車徒咽路。塵起蔽  
於星月。時人謂爲塵宵。又築土爲臺基。高三丈。列  
燭於臺下。名曰燭臺。遠望如列星之墜地。又於大道



之傍一里一銅表高五尺以誌里數故行者歌曰青槐夾道多塵埃龍樓鳳闕望崔嵬清風細雨雜香來上上出金火照臺此七字是妖辭也爲銅表誌里數於道側是土上出金之義以燭置臺下則火在土下之義漢火德王魏土德王火伏而土興土上出金是魏滅而晉興也靈芸未至京師十里帝乘雕玉之輦以望車徒之盛嗟曰昔者言朝爲行雲暮爲行雨今非雲非雨非朝非暮改靈芸之名曰夜來入宮後居寵愛外國獻火珠龍鸞之釵帝曰明珠翡翠尚不能



勝。况乎龍鸞之重，乃止不進。夜來妙於鍼工，雖處於  
深帷之內，不用燈燭之光。裁製立成，非夜來縫製，帝  
則不服。宮中號爲鍼神也。

錄曰：五帝之運，迭相生死，起伏因循，顯於言端。童  
謠信於春秋，織辭煩於漢末，或著明先典，或託見  
圖記。僉詳河洛，應運不同。唐堯以炎正禪虞，大漢  
以火德受魏，世歷沿革，得其宜矣。夫升名藉璧，因  
事而來。旣而柔曼之質見進，亦以裁縫之妙要寵  
媚斯婉約，榮非世載。取或一朝去彼疑賤，延此華



軒

魏明帝起凌雲臺躬自掘土羣臣皆負畚鍤天陰凍寒死者相枕洛鄴諸鼎皆夜震自移又聞宮中地下有怨歎之聲高堂隆等上表諫曰王者宜靜以養民今嗟歎之聲形於人鬼願省薄奢費以敦儉朴帝猶不止廣求瑰異珍賂是聚飾臺榭累年而畢諫者尤多帝乃去煩歸儉死者收而葬之人神致感衆祥皆應太山下有連理文石高十二丈狀如栢樹其文彪發似人雕鏤自下及上皆合而中開廣六尺望若真

樹也。父老云：當秦末，二石相去百餘步，蕪沒無有。蹊徑乃魏帝之始，稍覺相近，如雙闕。土王陰類，魏爲土德，斯爲靈徵。範圍及民家草樹，皆生連理，有合歡草，狀如蓍，一株百莖。晝則衆條扶疏，夜則合爲一莖，萬不遺一，謂之神草。沛國有黃麟，見於戊巳之地，皆土德之嘉瑞。乃修戊巳之壇，黃星炳夜，又起昂畢之臺，祭祀此星，魏之分野。歲時修祀焉。

任成王彰，武帝之子也。少而剛毅，學陰陽緯候之術，誦六經、洪範之書數千言。武帝謀伐吳蜀，問彰取便。



利行師之決，王善左右射，學擊劍，百步中髭髮，時樂浪獻虎，文如錦斑，以鐵爲檻，梟殷之徒，莫敢視。彰曳虎尾以繞臂，虎弭耳無聲，莫不服其神勇。時南越獻白象，子在帝前，彰手頓其鼻，象伏不動。文帝鑄萬斤鐘，置崇華殿，欲徙之，力士百人不能動。彰乃負之而趨，四方聞其神勇，皆寢兵自固。帝曰：「以王之雄武，吞併巴蜀，如鴟銜腐鼠耳。」彰薨，如漢東平王葬禮。及喪出，空中聞數百人泣聲送者，皆言昔亂軍相傷殺者，皆無棺槨，王之仁惠，取其朽骨，死者歡於地，精靈知

感故人美王之德國史撰任成王舊事三卷晉初藏於祕閣

建安三年胥徒國獻沉明石雞色如丹大如鷲常在  
地中應時而鳴聲能遠徹其國聞鳴乃殺牲以祀之  
常鳴處掘地則得此雞若天下太平翔飛頡頏以爲  
嘉瑞亦爲寶雞其國無雞犬聽地中候晷刻道家云  
昔仙人桐君採石入穴數里得丹石雞舂碎爲藥服  
之者令人有聲氣後天而死昔漢武帝寶鼎元年西  
方貢珍怪有號珀鷲置之靜室自於室中鳴翔蓋此



類也。洛書云：皇圖之寶，土德之徵。大魏之嘉瑞，明帝卽位二年，起靈禽之園。遠方國所獻異鳥珍獸，皆畜此園也。昆明國貢鸛金鳥。人云：其地去燃洲九千里，出此鳥形如雀而色黃，羽毛柔密，常翱翔海上，羅者得之，以爲至祥。聞大魏之德，被於荒遠，故越山航海來獻。大國帝得此鳥，畜於靈禽之園，飴以眞珠，飲以龜腦。鳥常吐金屑如粟，鑄之可以爲器。昔漢武帝時，有人獻神雀，蓋此類也。此鳥畏霜雪，乃起小屋處之，名曰辟寒臺，皆用水精爲戶牖，使內外通光，宮



人爭以鳥吐之金用飾釵珮。謂之辟寒金。故宮人相嘲曰。不服辟寒金。那得帝王心。於是媚惑者亂爭此寶金爲身飾。及行卧皆懷挾以要寵幸也。魏氏喪滅。池臺鞠爲煨燼。嗽金之鳥亦自翱翔。

咸熙二年。宮中夜異。獸白色光潔繞宮而行。闔宦見之以聞於帝。帝曰。宮闈幽密。若有異獸。皆非祥也。使宦者伺之。果見一白虎子。遍房而走。候者以戈投之。卽中左目。比往取視。惟見血在地。不復見虎。搜檢宮內及諸池井。不見有物。次檢寶庫中。得一玉虎頭枕。



眼有傷血痕尚濕。帝該古博聞云。漢誅梁冀得一玉虎頭枕。云單池國所獻。檢其領下有篆書字云。是帝辛之枕。嘗與姐已同枕之。是殷時遺寶也。又按五帝本紀云。帝辛殷代之末。至咸熙多歷年所。代代相傳。凡珍寶久則生精靈。必神物憑之也。魏禪晉之歲。北闕下有白光如鳥雀之狀。時飛翔來去。有司聞奏。帝所羅之。得一白鷺。以爲神物。於是以金爲樊。置於宮中。旬日不知所在。論者云。金德之瑞。昔師曠時有白鷺來巢。檢瑞應圖。果如所論。白色叶



於金德師曠晉時人也古今之義相符焉

薛夏天水人也博學絕倫母孕夏時夢人遺之一篋  
衣云夫人必產賢明之子也爲帝王之所崇母記所  
夢之日及生夏之年以弱冠才辯過人魏文帝與之  
講論終日不息應對如流無有凝滯帝曰昔公孫龍  
稱爲辯捷而迂誕誣妄今子所說非聖人之言不談  
子游子夏之儔不能過也若仲尼在魏復爲入室焉  
帝手制書與夏題云入室生位至祕書丞居生甚貧  
帝解御衣以賜之果符元所夢名冠當時爲一代高



田疇北平人也。劉虞爲公孫瓚所害，疇追慕無已。往虞墓，設雞酒之禮，慟哭之音，動於林野。翔鳥爲之棲，走獸爲之吟伏。疇卧於草間，忽有人通云：劉幽州來，欲與田子泰言平生之事。疇神悟遠識，知是劉虞之魂，旣近而拜，疇泣不自支，因相與進雞酒。疇醉，虞曰：公孫瓚求子甚急，宜竄伏以避害。疇拜曰：聞君臣之義，生則盡禮，今見君之靈，願得同歸九地。死且不朽，安可逃乎？虞曰：子萬古之貞士也，深慎爾儀。奄然

不見，疇亦醉醒。

曹洪武帝從弟，家盈產業，駿馬成羣。武帝討董卓，夜行失馬。洪以其所乘馬讓帝，其馬號曰白鵠。此馬走時，惟覺耳中風聲，足似不踐地。至汴水，洪不能渡，帝引洪上馬共濟，行數百里，瞬息而至。馬足毛不濕，時人謂乘風而行，亦一代神駿也。諺曰：憑空虛躍。曹家白鵠。

錄曰：王者廓萬宇以爲邦家，因海岳以爲城池，固是安民養德垂拱而治焉。去乎遊歷之費，導於敦



教之道無崇宮室有薄林園采掇不斲陶唐如斯  
昭儉卑宮菲食伯禹以之戒奢迄今三代之王失  
斯道矣傷財弊力以驕麗相誇瓊室之侈璧臺之  
富窮神工之奇妙人力勤苦至於春秋王室凌廢  
城者作謳疲於勤勞晉築斯禡之宮爲功動於民  
怨宋興澤門之役勞者以爲深嗟姑蘇積費於前  
阿房奢竭於後自以業固河山名超萬世覆滅宗  
祀山斯哀哀竊觀明帝踐中區之沃盛威靈所懾  
比強列代貞祥神寶史不絕書殊方珍貢府無虛

月鼎據三方，稱雄四海，而聖教微於堯禹，歷代劣於姬漢，東鯁閩吳，西病邛蜀，師旅歲興，財力日費，不能遵養黎元，遠瞻前朴，宮室窮麗，池榭肆其宏廣，終取夷滅，數其然哉！任成淵謀，神勇智周，祥藝雖來，舟蓬蒙劍射之好，不能加也，困疇事死如生，守以直節，精誠之至，通於神明，肅潔忠烈爲心，愛親憂國，此穆滿之駿，方之白鵠，可謂齋足者也。



拾遺記卷八

吳

孫堅母妊堅之時夢腸出繞腰有一童女負之繞吳  
閭門外又授以芳茅一莖童女語曰此吉祥也必生  
才雄之子今賜母以土王於翼軫之地鼎足於天下  
百年中應於異寶授於人也語畢而覺旦起筮之筮  
者曰所夢童女負母繞閭門是太白之精感化來夢  
夫帝王之興必有神跡自表白氣者金色及吳滅而  
晉踐祚夢之徵焉

錄曰按吳書云孫堅母懷堅之時夢腸出繞閭門與王子之說爲異夫西方金位以叶晉德興亡之兆後而効焉蓋表吳亡而授晉也夫六夢八徵著明周易授蘭懷日事類而非及吳氏之興年嘉禾之號芳茅之徵信矣至晉太康元年孫皓送六金璽云時無玉工故以金爲印璽夫孫氏擅割江東包卷百越吞席漢陽威惕中夏富強之業三雄比盛時有未賓而兵戈歲起每梗心於邛蜀憤慨於燕魏四方未夷有事征伐因之以師旅避之以儉



素去以遊侈之費塞茲雕靡之塗不欲使四方民  
勞非無玉工也固能輕彼池山賤斯棘實漢鄙盈  
車之屑燕棄璞於衡廡沉河底谷義昭攸古務崇  
簡約豈非高歟及乎吳亡時以六代金璽歸晉堅  
母之夢驗矣

吳主趙夫人丞相達之妹善畫巧妙無雙能於指間  
以綵絲織雲霞龍蛇之錦大則盈尺小則方寸宮中  
謂之機絕孫權常歎魏蜀未夷軍旅之隙思得善畫  
者使圖山川地勢軍陣之像達乃進其妹權使寫九



州江湖方岳之勢。夫人曰丹青之色。甚易歇滅。不可  
久寶。妾能刺繡作列國方帛之上。寫以五岳河海城  
邑行陣之形。既成。乃進於吳主。時人謂之針絕。雖棘  
刺木猴雲梯飛鵠。無過此麗也。權居昭陽宮。倦暑。乃  
褰紫綃之帷。夫人曰。此不足貴也。權使夫人指其意  
思焉。答曰。妾欲窮慮盡思。能使下綃帷而清風自入。  
視外無有蔽礙。列侍者飄然自涼。若馭風而行也。權  
稱善。夫人乃拊髮以神膠續之。神膠出鬱夷國。接弓  
弩之斷弦。百斷百續也。乃織爲羅縠。累月而成。裁爲



幔內外視之飄飄如煙氣輕動而房內自涼時權紫  
在軍旅每以此幔自隨以爲征幙舒之則廣縱一丈  
卷之則可內於枕中時人謂之絲絕故吳有三絕四  
海無儔其妙後有貪寵求媚者言夫人幻耀於人主  
因而致退黜雖見疑墜猶存錄其巧工吳亡不知所  
在

吳主潘夫人父坐法夫人輸入織室容態少儔爲江  
東絕色同幽者百餘人謂夫人爲神女敬而遠之有  
司聞於吳主使圖其容貌夫人憂戚不食減瘦改形

工人寫其真狀以進。吳主見而喜悅，以琥珀如意，  
按卽折，嗟曰：「此神女也。」愁貌尚能惑人，況在懽樂。乃  
命雕輪，就織室納於後宮。果以姿色見寵，每以夫人  
遊昭宣之臺，志意幸愜。旣盡酣醉，睡於玉壺中。使侍  
婢瀉於臺下，得火齊指環，卽挂石榴枝上。因其處起  
臺，名曰環榴臺。時有諫者云：「今吳蜀爭雄，還劉之名，  
將爲妖矣。」權乃翻其名曰榴環臺。又與夫人遊鈞臺，  
得大魚，王大喜。夫人曰：「昔聞泣魚，今乃爲喜，有喜必  
憂，以爲深戒。」至於末年，漸相譖毀，稍見離退。時人謂



人人知幾其神。吳主於是罷宴。夫人果見棄逐釣臺。基今尚存焉。

錄曰。趙潘二夫人。妍明伎藝。婉孌通神。抑亦漢遊洛妃之儔。荆巫雲雨之類。而能避妖幸之嬖。覩進退之機。夫盈則有虧。道有崇替。居盛必衰。理故明矣。語乎榮悴。譬諸草本。華落張弛。勢之必然。巧言萋斐。前王之所信惑。是以申褒見列於前周。班趙載詳於往漢。異代同聞。可爲歎也。

黃龍元年。始都武昌。時越雋之南。獻背明鳥。形如鶴。



止不向明。巢常對北，多肉少毛。聲音百變，聞鐘磬笙  
竿之聲，則奮翅搖頭。時人以爲吉祥。是歲遷都建業，  
殊方多貢珍奇。吳人語訛，呼背明爲背亡鳥。國中以  
爲大妖。不及百年，當有喪亂，背叛滅亡之事，散逸奔  
逃，墟無煙火。果如斯言。後此鳥不知所在。

張承之母孫氏，懷承之時，乘輕舟遊於江浦之際，忽  
有白蛇長三尺，騰入舟中。母祝曰：「若爲吉祥，勿毒噬  
我。」縈而將還，置諸房內。一宿視之，不復見。蛇嗟而惜  
之，鄰中相謂曰：「昨見張家有一白鶴，聳翮入雲，以告



承母母使筮之。筮者曰：此吉祥也。蛇鶴延年之物，從室入雲，自下升高之象也。昔吳王闔閭葬其妹，殉以美女，珍寶異劍，窮江南之富。未及十年，雕雲覆於溪谷，美女遊於塚上，白鵠翔於林中，白虎嘯於山側，皆舊時之精靈。今出於世，當使子孫位超臣極，擅名江表。若生子，可以名曰白鵠，及承生，位至丞相，輔吳將軍，年踰九十，蛇鶴之祥也。

錄曰：國之將亡，其兆先見。傳曰：明神降之，觀其德也。及歸，命面縛來降，斯爲效矣。蛇鶴者，靈禽之最。



靈張氏以爲嘉瑞吳越春秋百家雜說云吳王闔閭崇飾厚葬生理美人多藏寶物數百年後靈鶴翔於林壑神虎嘯於山止湛盧之劍飛入於楚收鬼聚怪富麗已極而詭異失中不如速朽昔宋桓盛姬前史譏其驕惑羸博楊孫君子貴其合禮觀夫遠古恒詳中代求諸事迹儉泰相懸至如末世漸相誇矯生态淫酒死則同殉委積珍寶埃塵滅身乖於同穴可爲歎歟

蒙入吳吳王勸其學業蒙乃博覽羣籍以易爲宗



常在孫策座上酣醉忽臥於夢中誦周易一部俄而驚起衆人皆問之蒙曰向夢見伏羲周公文王與我論世祚興亡之事日月貞明之道莫不精窮極妙未該元旨故空誦其文耳衆座皆云呂蒙嚙語通周易錄曰夫精誠之至叶于幽冥與日月均其明與四時齊其契故能德會三古道合神微若鄭君之感先聖周盤之夢東里迹同事異光彼遐策索隱鈎深妙於元旨孔門羣說未若呂生之學焉

孫和悅鄧夫人常置膝上和於月下舞水精如意悞

傷夫人頰，血流污袴，嬌蛇彌苦，自舐其瘡。命太醫合藥，醫曰：得白獺髓，雜玉與琥珀屑，當滅此痕。卽購致百金，能得白獺髓者，厚賞之。有富春漁人云：此物知人欲取，則逃入石穴。伺其祭魚之時，獺有鬪死者，穴中應有枯骨。雖無髓，其骨可合玉舂爲粉，歛於瘡上，其痕則滅。和乃命合此膏。琥珀太多，及差而有赤點如朱，逼而視之，更益其研。諸嬖人欲要寵，皆以丹脂點頰而後進幸，妖惑相動，遂成淫俗。

孫亮作琉璃屏風，甚薄而瑩澈，每於月下清夜舒之。



常與愛姬四人皆振古絕色。一名朝姝。二名麗居。三名洛珍。四名潔華。使四人坐屏風內而外望之如無隔。惟香氣不通於外。爲四人合四氣香。殊方異國所出。凡經踐躡宴息之處。香氣沾衣。歷年彌盛。百浣不歇。因名曰百濯香。或以人名香。故有朝姝香。麗居香。洛珍香。潔華香。亮每遊。此四人皆同與席。未侍皆以香名前後爲次。不得亂之。所居室名爲麝香。雖衆

蜀

先主甘后。沛人也。生於賤微。里中相者云。此女後貴。

位極宮掖，及后長而體貌特異，至十八，玉質柔肌，態媚容冶。先王召入綃帳中，於戶外望者，如月下聚雪。河南獻玉人，高三尺，乃取玉人置后側，晝則講說軍謀，夕則擁后而玩玉人，常稱玉之所貴德比君子，況爲人形而不可玩乎？后與玉人潔白齊潤，觀者殆相亂惑。嬖寵者非惟嫉於甘后，亦妬於玉人也。后嘗欲毀壞之，乃誡先主曰：「昔子罕不以玉爲寶，春秋美之。今吳王不識，以妖玩繼懷，凡淫惑生疑，勿復進焉。」先王乃遣玉人，像嬖者皆退。當斯之時，君子議以



甘后爲神智婦人焉。

縻竺用陶朱計術，日益億萬之利，貨擬王家，有寶車千兩。竺惟能販生卹死，家內馬廐屋仄，有古塚，有伏尸，夜聞涕泣聲，竺乃尋其泣聲之處，忽見一婦人袒背而來，訴云：昔漢末，妾爲赤眉所害，叩棺見剝，今袒在地，羞晝見人，垂二百年，今就將軍乞深埋，并弊衣以掩形體。竺許之，卽命之爲棺槨，以青布爲衣，衫置於塚中，設祭既畢，歷一年，行於路西，忽見前婦人所着衣，皆是青布。語竺曰：君財寶可支一世，今遭火厄，

今以青蘆杖一枚，長九尺，報君棺槨衣服之惠。竺挾杖而歸，所住鄉中常見竺家有青氣如龍蛇之形。或有人謂竺曰：「將非恠也？」竺乃疑此異，問其家僮云：「時見青蘆杖自出門間，疑其神，不敢言也。」竺爲性多忌，信厭術之事，有言中恠，卽加刑戮。故家僮不敢言。竺貨財如山，不可筭計，內以方諸、盆餅、設大珠如卵，散滿於庭，謂之寶庭。而外人不得窺。數日，忽青衣童子數十人來，云：「糜竺家當有火厄，萬不遺一，賴君能恤歛枯骨。」天道不辜君德，故來禳卻此火。當使財物不



盡自今已後亦宜防衛。笠乃掘溝渠周繞其庫。旬日  
火從庫內起，燒其珠玉十分之一，皆是陽燄。旱燥自  
能燒物。火盛之時，見數十青衣童子來撲火，有奇氣  
如雲覆於火上，卽滅。童子又云：多聚鸛鳥之類，以禳  
火災。鸛能水於巢上也。家人乃收鸛鵲數千頭，養於  
池渠中，以厭火。竺歎曰：人生財運有限，不得盈溢，懼  
爲身之患害。時三國交鋒，軍用萬倍，乃輸其寶物車  
服以助先王。黃金一億斤，錦繡氈褥，積如丘壠。駿馬  
萬疋，及蜀破後，無復所有，飲恨而終。

周羣妙開美術識說遊岷山採藥見一白猿從絕峯而下對羣而立羣抽所佩書刀投猿猿化爲一老翁握中有玉版長八寸以授羣羣問曰公是何年生答曰已衰邁也忘其年月猶憶軒轅之時始學歷數風后容成皆黃帝之史就余授歷術至顓頊時考定日月星辰之運尤多差異及春秋時有子韋子野禪寵之徒權略雖驗未得其門邇來世代興亡不復可記因以相襲至大漢時有洛下閎頗得其旨羣服其言更精勤美術及考校年歷之運驗於圖緯知蜀應滅



及明年歸命奔吳皆云周羣詳陰陽之精妙也蜀人謂之後聖白猿之異有似越人所記而事皆迂誕似是而非

錄曰孫和孫亮劉備並惑於淫寵之玩忘於軍旅之略猶比强大魏剋伐無功可爲嗟矣周羣之學通於神明白猿之祥有類越人問劍之言其事迂誕若是而非也夫陰陽遞升五常迭用由水火相生亦以相滅淮南子云方諸向月津爲水以厭火災乎縻氏富於珍奇削方諸爲鳥獸之狀猶土龍

以祈雨也。鵲鵲之音與方諸相亂，蓋聲之訛矣。羽  
毛之類，非可禦烈火。於義則爲乖，於事則違類。先  
墳舊典，說以其詳焉。



拾遺記卷九

晉時事

武帝爲撫軍時，府內後堂砌下，忽生草三株，莖黃葉綠，若總金抽翠，花條苒弱，狀似金盞。時人未知是何祥草，故隱蔽，不聽外人窺視。有一羌人，姓姚，名馥，字世芬，充廐養馬，妙解陰陽之術，云此草以應金德之瑞。馥年九十八，姚襄則其祖也。馥好讀書，嗜酒，每醉時，好言帝王興亡之事，善戲笑，滑稽無窮。常歎云：九河之水，不足以漬麴蘖；八藪之木，不足以作薪蒸。七

澤之糜不足以充庖俎。凡人稟天地之精靈，不知飲酒者，動肉含氣耳。何必木偶於心識乎？好聚濁糟，常言渴於醇酒，羣輩常弄狎之，呼爲渴羗。及晉武踐位，忽思見馥，立於堦下。帝奇其倜儻，擢爲朝歌邑宰。馥醉曰：「老羗異域之人，遠隔山川，得遊中華，已爲殊幸。請辭朝歌之縣，長充養馬之役。」時賜美酒，以樂餘年。帝曰：「朝歌紂之故都，地有美酒，故使老羗不復呼渴。馥於堦下高聲而對曰：『馬圉老羗，漸染皇化，溥天夷貊，皆爲王臣。』今若歡酒池之樂，更爲殷紂之民乎？」帝



撫玉几大悅，卽遷酒泉太守。地有清泉，其味若酒，馥  
乘醉而拜受之，遂爲善政。民爲立生祠，後以府地賜  
張華，猶有草在，故茂先金釭賦云：擢九莖於漢庭，美  
三株於茲館。貴表祥乎金德，此名類乎相亂。至惠帝  
元熙元年，三株草化爲三樹，枝葉似楊，樹高五尺，以  
應三楊擅權之事。時有楊駿、楊瑤、楊濟三弟兄，號曰  
三楊，馬圉醉羌所說之驗。

錄曰：不得中行，狂狷可也。淳于優孟之儔，因俳說  
以進諫，至如姚馥，才性容貌，不與華同，片言竊諷。

媚足規範、及其俳諧詭譎、推辭指誠、因物而刺、言之者無罪、抑亦東方曼倩之儔歟。夫心胃之逸朽、故有腐腸爛腸之嗜、是以五味令人口爽、老氏以爲深誠、未若甘並桂石、美斯松草、含吐煙霞、咀食沆瀣、迅千靈於一朝、方塵劫於俄頃乎、可淫此酣樂、忘彼久視者乎、夫物有事異而名同者、自非窮神達理、莫能遙照、豈可假於詖辭、專求於邪說、天命有兆、歷運攸歸、何可妄信於謠訛、指怪於纖草、將溺所聞、信諸厥術、可爲嗟乎、



咸寧四年立芳蔬園於金塘城東多種異菜有菜名  
曰芸薇類有三種紫色者最繁味辛其根爛熲春夏  
葉密秋蘗冬馥其實若珠五色隨時而盛一名芸芝  
其色紫爲上蔬其味辛色黃爲中蔬其味甘色青者  
爲下蔬其味鹹常以三蔬充御膳其葉可以藉飲食  
以供宗廟祭祀亦止人渴饑宮人採帶其莖葉香氣  
歷日不歇

錄曰大雅云言采其薇此之類也草木蔬云其實  
如豆昔孤竹二子避世不食周粟於首陽山采薇

而食疑是卉、或云神類非一、彌相惑亂、可以療饑、其色必紫、百家雜說、意旨相符、論其形品、詳其香色、雖移植芳圃、芬美莫儔、故薰蘭有質、物性無改、產垂本地、逾見芬烈、譬諸薑桂、豈因地而辛矣、當此一代、是謂仙蔬、寔爲神異、

張華爲九醞酒、以三薇漬麴蘖、蘖出西羌、麴出北胡、胡中有指星麥、四月火星出、麥熟而獲之、蘖用水漬麥、三夕而萌芽、平旦雞鳴而用之、俗人呼爲雞鳴麥、以之釀酒、醇美久含、令人齒助、若大醉不叫、笑搖蕩、



令人肝腸消爛俗人謂爲消腸酒或云醇酒可爲長  
宵之樂兩說同而事異也閭里歌曰寧得醇酒消腸  
不與日月齊光言耽此美酒以悅一時何用保守靈  
而取長久至懷帝末民間園圃皆生蒿棘狐兔遊聚  
至元熙元年太史令高堂忠奏熒惑犯紫微若不早  
避當無洛陽乃詔内外四方及京邑諸宮觀林衛之  
内及民間園圃皆植紫薇以爲厭勝至劉石姚苻之  
末此蒿棘不除自絕也

晉太康元年白雲起於灊水三日而滅有司奏云天

下應太平，帝問其故，曰：昔舜時黃雲興於郊野，夏代白雲蔽於都邑，殷代元雲覆於林藪，斯皆應世之休徵，殊鄉絕域，應有貢其方物也。果有羽山之民獻火浣布萬疋，其國人稱羽山之山有文石生火烟色，以隨四時而見，名爲淨火，有不潔之衣，投於火石之上，雖滯污漬涅，皆如新浣。當虞舜時，其國獻黃布，漢末獻赤布，梁冀製爲衣，謂之丹衣，史家云單衣今縫掖也，字異聲同，未知孰是。

錄曰：帝王之興，叶休祥之應，天無隱祥，地無蓄寶。



是以因神物以表運，見星雲以觀德。按周宮有馮相氏，以觀祥錄之數。晉以金德，故白雲起於灞水。山海經及異物志云：燃洲之獸，生於火中，以毛織爲布，雖有垢膩，投火則潔淨也。兩說不同，故偕錄焉。

因墀國獻五足獸，狀如師子，玉錢千緡，其形如環，環重十兩。上有天壽永吉之字，問其使者，五足獸是何變化。對曰：東方有解形之民，使頭飛於南海，左手飛於東山，右手飛於西澤，自臍已下，兩足孤立至暮，頭

還肩，上兩手遇疾風，飄於海外，落元洲之上，化爲五足獸，則一指爲一足也。其人旣失兩手，使傍人割裹肉以爲兩臂，宛然如舊也。因墀國在西域之北，送使者以鐵爲車輪，十年方至。晉及還，輪皆絕銳，莫知其遠近也。

太始元年，魏帝爲陳留王之歲，有頻斯國人來朝，以五色玉爲衣，如今之鎧，其使不食中國滋味，自齋金壺。壺中有漿，凝如脂，嘗一滴則壽千歲。其國有大楓木成林，高六七十里，善算者以里計之，雷電常出樹



之半其枝交蔭於上蔽不見日月之光其下平淨掃  
灑雨霧不能入焉樹東有大石室可容萬人坐壁上  
刻爲三皇之像天皇十三頭地皇十一頭人皇九頭  
皆龍身亦有膏燭之處緝石爲床床上有膝痕深三  
寸床上有竹簡長尺二寸書大篆之文皆言開闢以  
來事人莫能識或言是伏羲畫卦之時有此書或言  
是蒼頡造書之處傍有丹石井非人之所鑿下及漏  
泉水常沸湧諸仙欲飲之時以長綆引汲也其國人  
皆多力不食五穀日中無影飲桂漿雲霧羽毛爲衣

髮大如縷，堅韌如筋，伸之幾至一丈，置之自縮如蠶，續人髮以爲繩，汲井之水，久久方得升之，水中有白蛙兩翅，常來去井上，仙者食之，至周王子晉臨井而窺，有青雀銜玉杓以授子晉，子晉取而食之，乃有雲起，雪飛，子晉以衣袖揮雲，則雲雪自止，白蛙化爲雙白鳩，入雲，望之遂滅，皆頻斯國之所記，蓋其人年不可測也，使圖其國山川地勢，瑰異之屬，以示張華，華云：此神異之國，難可驗信，以車馬珍服送之，出



張華字茂先，挺生聰慧之德，好觀祕異圖緯之部，摺採天下遺逸，自書契之始，考驗神恠，及世間閭里所說，造博物志四百卷，奏於武帝。帝詔詰問，卿才綜萬代，博識無倫，遠冠羲皇。近次夫子，然記事採言，亦多浮妄，宜更刪翦，無以冗長成文。昔仲尼刪詩書，不及鬼神幽昧之事，以言恠力亂神。今卿博物志，驚所未聞，異所未見，將恐惑亂於後生，繁蕪於耳目。可更芟截浮疑，分爲十卷，卽於御前賜青鐵硯。此鐵是于闐國所出，獻而鑄爲硯也。賜麟角筆，以麟角爲筆管。此



產國所獻。側理紙萬番。此南越所獻。後人言陟里  
與側理相亂。南人以海苔爲紙。其理縱橫邪側。因以  
爲名。帝常以博物志十卷。置於函中。暇日覽焉。  
惠帝元熙二年。改爲永平元年。常山郡獻傷魂鳥。狀  
如雞。毛色似鳳。帝惡其名。棄而不納。復愛其毛羽。當  
時博物者云。黃帝殺蚩尤。有羆虎誤噬一婦人。七日  
氣不絕。黃帝哀之。葬以重棺石槨。有鳥翔其塚上。其  
聲自呼爲傷魂。則此婦人之靈也。後人不得其令終  
者。此鳥來集其圉園林之中。至漢哀平之末。王莽多



殺伐賢良其鳥亟來哀鳴時人疾此鳥名使常山郡  
國彈射驅之至晉初干戈始戢四海攸歸山野間時  
見此鳥憎其名收傷魂爲相宏及封孫皓爲歸命侯  
相宏之義叶於此矣永平之末死傷多故門墜巷哭  
常山有獻遂放逐之

太始十年有浮支國獻望舒草其色紅葉如荷近望  
則如卷荷遠望則如舒荷團團似蓋亦云月出則葉  
舒月沒則葉卷植於宮中因穿池廣百步名曰望舒  
荷池愍帝之末移入胡胡人將種還胡中至今絕矣



池亦填塞

祖梁國獻蔓金苔。色如黃金，若縈聚之，大如雞卵，投於水中，蔓延於波瀾之上，光出照日，皆如火生水上也。乃於宮中穿池，廣百步，時觀此苔，以樂宮人。宮人有幸者，以金苔賜之，置漆盤中，照耀滿室，名曰夜明苔。著衣襟，則如火光。帝慮外人得之，有惑百姓，詔使除苔塞池。及皇家喪亂，猶有此物，皆在胡中。石季倫愛婢名翔風，魏末於胡中得之，年始十歲，使房內養之。至十五，無有比其容貌，特以姿態見美妙。



別玉聲巧觀金色石氏之富方比王家驕侈當世珍  
寶奇異視如瓦礫積如糞土皆殊方異國所得莫有  
辯識其出處者乃使翔風別其聲色悉知其處言西  
方北方玉聲沈重而性溫潤佩服者益人性靈東方  
南方玉聲輕潔而性清涼佩服者利人精神石氏侍  
人美艷者數千人翔風最以文辭擅愛石崇嘗語之  
曰吾百年之後當指白日以汝爲殉答曰生愛死離  
不如無愛妾得爲殉身其何朽於是彌見寵愛崇常  
擇美容姿相類者十人裝飾衣服大小一等使忽視



不相分別，常待於側，使翔風調玉以對工人，爲倒龍之狀。金象鳳皇之釵，言刻玉爲倒龍之勢，鑄金釵象鳳皇之冠，結袖繞楹而舞，晝夜相接，謂之恒舞。欲有所召，不呼姓名，悉聽珮聲。視釵色，玉聲輕者居前。金色艷者居後，以爲行次而進也。使數十人各含異香，行而語笑，則口氣從風而颺，又屑沉水之香如塵末，布象床上，使所愛者踐之，無迹者，賜以真珠百琲。有迹者，節其飲食，令身輕弱。故閨中相戲曰：爾非細骨輕軀，那得百琲真珠。及翔風年三十，始卒者，爭嫉。



之或者云胡女不可爲羣，競相排毀。石崇受譖，潤之  
言，卽退。翔風爲房，老使主羣，少乃懷怨而作五言詩  
曰：春華誰不美，卒傷秋落時。突煙還自低，鄙退豈所  
期。桂芳徒自蠹，失愛在蛾眉。坐見芳時歇，憔悴空自  
嗤。石氏房中並歌此爲樂曲，至晉末乃止。

石虎於太極殿前起樓，高四十丈，結珠爲簾，垂五色  
玉珮，風至鏗鏘，和鳴清雅。盛夏之時，登高樓以望四  
極，奏金石絲竹之樂，以日繼夜於樓下，開馬埒射塲，  
周迴四百步，皆文石丹沙，及彩畫于埒傍，聚金玉錢



貝之寶以賞百戲之人。四廂置錦幔，屋柱皆隱起爲龍鳳百獸之形，雕斲衆寶以飾楹柱。夜往往有光明，集諸羌氏於樓上，時亢旱，春雜寶異香爲屑，使數百人於樓上吹散之，名曰芳塵臺。上有銅龍，腹容數百斛酒，使胡人於樓上嗽酒，風至望之如露，名曰粘雨臺。用以灑塵，樓上戲笑之聲，音震空中，又爲四時浴室，用鋤石玦玦爲堤岸，或以琥珀爲餅杓，夏則引渠水以爲池，池中皆以紵縠爲囊，盛百雜香漬於水中，嚴冰之時，作銅屈龍數千枚，各重數十斤，燒如火色，



投於水中，則池水恒溫，名曰焦龍溫池。引鳳文錦步障，縈蔽浴所。共宮人寵嬖者，解媼服宴戲，彌於日夜。名曰清嬉浴室。浴罷，洩水於宮外，水流之所，名溫香渠。渠外之人，爭來汲取，得升台以歸。其家人莫不怡悅。至石氏破滅，焦龍猶在鄴城池，今夷塞矣。

錄曰：居室見妬，故亦姦巧之恒情。因嬌酒嬖而非錦之辭入，至於惑聽邪諂，豈能隔於求媚憑歡，藉幸緣和嫿而相容，是以先寵未退，盛衰之蒙非矣。一朝愛退，皎日之誓忽焉，清奏薄言，怨刻之辭乃

作石崇功擅時資財業傾世遂乃歌擬房中樂稱  
恒舞季庭管室豈獨古之貶乎石虎席卷西京崇  
麗妖虐外僭和鸞文物之儀內修三英九華之號  
靈祥遠貢光耀舊都珠璣丹紫飾備於土木自古  
以來四夷侵掠驕奢僭暴擅位偷安富有之業莫  
此比焉



拾遺記卷十

崑崙山

崑崙山有昆陵之地。其高出日月之上。山有九層。每層相去萬里。有雲色。從下望之。如城闕之象。四面有風。羣仙常駕龍乘鶴。遊戲其間。四面風者。言東南西北一時俱起也。又有祛塵之風。若衣服塵污者。風至吹之。衣則淨如浣濯。甘露濛濛似霧。著草木則滴瀝如珠。亦有朱露。望之色如丹。著木石赭然如朱。雪灑焉。以瑤器承之。如粘。崑崙山者。西方曰須彌山。對七

星之下。出碧海之中。上有九層。第六層有五色玉樹。蔭翳五百里。夜至水上。其光如燭。第七層有禾穗。一株滿車。有瓜如桂。有柰冬生如碧色。玉井水洗食之。骨輕柔能騰虛也。第五層有神龜。一尺九寸。有四翼。萬歲則升木而居。亦能言。第九層山形漸小。狹下有芝田。蕙圃。皆數百頃。羣仙種耨焉。傍有瑤臺。十二各廣千步。皆五色玉爲臺基。最下層有流精。霄間直上四十丈。東有風雲雨師。聞南有井。密雲望之如丹色。丹雲四垂周密。西有螭潭。多龍。鱗皆白色。千歲



一蛻其五臟。此潭左側有五色石。皆云是白螭腸化。成此石。有琅玕璆琳之玉。煎可以爲脂。北有珍林別出。折枝相扣。音聲和韻。九河分流。南有赤陂紅波。千劫一竭。千劫水乃更生也。

### 蓬萊山

蓬萊山亦名防邱。亦名雲來。高二萬里。廣七萬里。水淺有細石如金玉。得之不加陶冶。自然光淨。仙者服之。東有鬱夷國。時有金霧。諸仙說此上常浮轉低昂。有如山上架樓室。常向明以開戶牖。及霧滅。欲戶皆



北。其西有含明之國。綏鳥毛以爲衣。承露而飲。終  
天。登高取水。亦以金銀蒼環水。精火藻爲階。有冰水  
沸。水飲者千歲。有大螺名鰥步。負其殼露行。冷則復  
入其殼。生卵著石。則軟取之則堅。明王出世。則游於  
海際焉。有葭紅色。可編爲席。溫柔如麝毳焉。有鳥名  
鴻鵠。色似鴻。形如禿鶩。腹內無腸。羽翮附骨而生。無  
皮肉也。雄雌相眄。則生產。南有鳥名鴛鴦。形似鴈。群  
徊雲間。棲息高岫。足不踐地。生於石穴中。萬歲一變。  
則生鷦鷯。千歲銜毛學飛。以千萬爲羣。推其毛長者高。



翳萬里。聖君之世來。入國郊。有浮筠之簍。葉青莖紫  
子大如珠。有青鸞集其上下。有沙礫細如粉。柔風至  
葉條翻起。拂細沙如雲霧。仙者來觀而戲焉。吹風竹  
葉聲如鐘磬之音。

### 方丈山

方丈之山一名巒雉。東方龍場。地方千里。玉瑤爲林。  
雲色皆紫。有龍皮骨如山阜。散百頃。遇其蛻骨之時。  
如生龍。或云龍常鬪此處。膏血如水流。膏色黑者。著  
草木及諸物。如淳漆也。膏色紫先著地凝堅。可爲寶。



器燕昭王二年。海人乘霞舟。以雕壺盛數斗膏。以獻昭王。王坐通雲之臺。亦曰通霞臺。以龍膏爲燈。光耀百里。烟色丹紫。國人望之。咸言瑞光。世人遙拜之。燈以火浣布爲纒。山西有照石。去石十里。視人物之影如鏡焉。碎石片片。皆能照人。而質方一丈。則重一兩。昭王春。此石爲泥。泥通霞之臺。與西王母常遊居此臺上。常有衆鸞鳳鼓舞。如琴瑟和鳴。神光照耀。如日月之出。臺左右種恒春之樹。葉如蓮花。芬芳如桂花。隨四時之色。昭王之末。仙人貢焉。列國咸賀。王曰。寡



人得恒春矣。何憂太清不至。恒春一名沉生。如今之  
沉香也。有草名濡氎。葉色如紺。莖色如漆。細軟可縈  
海人織以爲席薦。卷之不盈一手。舒之則列坐方國  
之賓。莎蘿爲經。莎蘿草細大如髮。一莖百尋。柔軟香  
滑。羣仙以爲龍骨之轡。有池方百里。水淺可涉。泥色  
若金而味辛。以泥爲器。可作舟矣。百鍊可爲金。色青  
照鬼魅。猶如石鏡。魑魅不能藏形矣。

瀛洲

瀛洲一名東洲。亦名環洲。東有淵洞。有魚長千丈。色



斑鼻端有角。時鼓舞羣戲。遠望水間。有五色雲。京邑  
乃此魚噴水爲雲。如慶雲之麗。無以加也。有樹名影  
木。日中視之。如列星。萬歲一實。實如瓜。青皮黑瓢。食  
之骨輕。上如華蓋。羣仙以避風雨。有金鬘之觀。飾以  
衆環。直上千雲。中有青瑤瓦覆。以雲紉之。素刻碧玉  
爲倒龍之狀。懸火精爲日。刻黑玉爲鳥。以水精爲月。  
青瑤爲蟾兔於地下。爲機杼。以測昏明。不虧弦望。時  
時有香風冷然而至。張袖受之。則歷年不歇。有獸名  
嗅石。其狀如麒麟。不食生卉。不飲濁水。嗅石則知有



金玉吹石則開。金沙寶璞粲然而可用。有草名芸苗狀如菖蒲。食葉則醉。餌根則醒。有鳥如鳳身紺翼丹名曰藏珠。每鳴翔而吐珠累斛。仙人常以其珠飾仙裳。蓋輕而耀於日月也。

### 貞嶠山

貞嶠山一名環丘。上有方湖。周廻千里。多大鵲高一丈。銜不周之粟。粟穗高三丈。粒皎如玉。鵲銜粟飛於中國。故世俗間往往有之。其粟食之歷月不饑。故呂氏春秋云。粟之美者。有不周之粟焉。東有雲石。廣五

白里駿駱如錦。扣之片片。則蓊然雲出。有木名猗桑。煎樵以爲蜜。有冰蠶長七寸。黑色。有角有鱗。以霜雪覆之。然後作蠶。長一尺。其色五彩。織爲文錦。人水不濡。以之投火。經宿不燎。唐堯之世。海人獻之。堯以爲黼黻。西有星池。千里。池中有神龜。八足六眼。背負七星。日月八方之圖。腹有五岳四瀆之象。時出石上。望之煌煌如列星矣。有草名芸蓬。色白如雪。一枝二丈。夜視有白光。可以爲杖。南有移池。國人長三尺。壽萬歲。以茅爲衣服。皆長裙大袖。因風以昇。煙霞若鳥用。



羽毛也。人皆雙瞳修睂長耳。食九天之正氣。死而復生於億劫之內。見五岳再成塵。扶桑萬歲一枯。其人視之如旦暮也。北有浣腸之國。甜水繞之。味甜如蜜。而水強流迅惡。千鈞投之。久久乃沒。其國人常行於水上。逍遙於絕岳之嶺。度天下廣狹。繞八柱爲一息。經四軸而暫寢。捨塵吐霧。以筭歷劫之數。而成丘阜。亦不盡也。

### 岱輿山

岱輿山有員淵千。里常沸騰。以金石投之。則爛如土。

矣。孟冬水涸。中有黃烟從地出。起數丈。煙色萬變。山人掘之。入數尺。得焦石如炭。滅有碎火。以蒸燭投之。則然而青色。深掘則火轉盛。有草名莽煌。葉圓如荷。去之十步。炙人衣則焦。刈之爲席。方冬。彌溫。以枝相摩。則火出矣。南有平沙千里。色如金。若粉屑。靡靡常流。鳥獸行則沒足。風吹砂起。若霧。亦名金霧。亦曰金塵。沙著樹。粲然如黃金塗矣。和之以泥塗仙宮。則晃昱明粲也。西有人玉山。其石五色而輕。或似履舄之狀。光澤可愛。有類人工。其黑色者爲勝。舉仙所用焉。



北有玉梁千丈。駕乎流之上。紫苔覆漫。味甘而柔滑。食者千歲不饑。玉梁之側有斑斕自然雲霞龍鳳之狀。梁去乎流千餘丈。雲氣生其下。傍有丹桂紫桂白桂。皆直上百尋。可爲舟航。謂之文桂之舟。亦有沙棠。豫章之木。長千尋。細枝爲舟。猶長十丈。有七色芝生梁下。其色青光輝耀。謂之蒼芝。螢火大如蜂。聲如雀。八翅六足。梁有五色蝙蝠。黃者無腸。倒飛腹向天。白者腦重。頭垂白挂。黑者如鳥。至千歲形變如小燕。青者毫毛長二寸。色如翠。赤者止於石穴。穴上入天。視

日出入。恒在其上。有獸名嗽月。形似豹。飲金泉之液。食銀石之髓。此獸夜噴白氣。其光如月。可照數十畝。軒轅之世獲焉。有遙香草。其花如丹。光耀入月。葉細長而曰。如忘憂之草。其花葉俱香。扇馥數里。故名遙香草。其子如薏。中實甘香。食之累月不饑渴。體如草之香。久食延齡萬歲。仙人常採食之。

昆吾山

昆吾山。其下多赤金。色如火。昔黃帝伐蚩尤。陳兵於此地。掘深百丈。猶未及泉。惟見火光如星。地中多丹。



鍊石爲銅。銅色青而利。泉色赤。山草木皆劒利。土亦  
鋼而精。至越王句踐。使工人以白馬白牛祠昆吾之  
神。採金鑄之以成八劒之精。一名揜日。以之指日。則  
光晝暗。金陰也。陰盛則陽滅。二名斷水。以之劃水。開  
卽不合。三名轉鬼。以之指月。蟾兔爲之倒轉。四名懸  
翦。飛鳥遊過。觸其刃如斬截焉。五名驚魺。以之泛海。  
鯨魺爲之深入。六名滅鬼。挾之夜行。不逢魑魅。七名  
卻邪。有妖魅者見之則伏。八名真剛。以切玉斷金。如  
削土木矣。以應八方之氣。鑄之也。其山有獸大如兔。



毛色如金。食土下之丹石。深穴地以爲窟。亦食銅鐵。膽腎皆如鐵。其雌者色白如銀。昔吳國武庫之中。兵刃鐵器俱被食盡。而封署依然。王令檢其庫穴。獵得雙兔。一白一黃。殺之。開其腹。而有鐵膽腎。方知兵刃之鐵爲兔所食。王乃召其劔工。令鑄其膽腎以爲劔。一雌一雄。號千將者雄。號鎮鄒者雌。其劔可以切玉斷犀。王深寶之。遂霸其國。後以石匣埋藏。及晉之中興。夜有紫色衝斗牛。張華使雷煥爲豐城縣令。掘而得之。華與煥各寶其一。拭以華陰之土。光耀射人。後



華遇害。失劍所在。煥子佩其一劍過延平津。劍鳴飛入水。及入水尋之。但見雙龍纏屈於潭下。目光如電。遂不敢前取矣。

### 洞庭山

洞庭山浮於水上。其下有金堂數百間。玉女居之。四時聞金石絲竹之聲。徹於山頂。楚懷王之時。舉羣才賦詩於水湄。故云瀟湘洞庭之樂。聽者令人忘老。雖咸池九韶。不得比焉。每四仲之節。王常繞山以遊宴。舉四仲之氣。以爲樂章。仲春律中夾鍾。乃作輕風流。



水之詩。醺於山南。時中韃賓乃作皓露秋霜之曲。後懷王好進姦雄。羣賢逃越。屈原以忠見斥。隱於沅湘。披蓁茹草。混同禽獸。不交世務。採栢實以和桂膏。用養心神。被王逼逐。乃赴清冷之水。楚人思慕。謂之水仙。其神遊於天河。精靈時降湘浦。楚人爲之立祠。漢末猶在。其山又有靈洞。入中常如有燭於前。中有異香芬馥。泉石明朗。採藥石之人入中。如行十里。迥然天清霞耀。花芳柳暗。丹樓瓊宇。宮觀異常。乃見衆女霓裳。冰顏艷質。與世人殊別。來邀採藥之人。飲以瓊



紫金液。延入璇室。奏以簫管。絲桐。餞令還家。贈之丹醴之訣。雖懷慕戀。且思其子息。卻還洞穴。還若燈燭。導前便絕。饑渴而達舊鄉。已見邑里人戶。各非故鄉。鄰唯尋得九代孫。問之云。遠祖入洞庭山。採藥不還。今經三百年矣。其人說於鄰里。亦失所之。

錄曰。按禹貢。山海正史。說名山大澤。或不列書圖。著於編雜之部。或有乍無。或同乍異。故使覽者迴惑而疑焉。至如列子所說。負嶠岱輿。魂竒是聚。先墳莫記。蓬萊瀛洲。方丈各有別名。昆吾神異。張騫

亦云焉。觀華戎不同寒暑律人。獨禽至其異氣。雲  
水草木。怪麗殊形。考之載籍。同其生類。非夫貴遠  
體大。則笑其虛誕。俟諸宏博。驗斯靈異焉。



